



AT AM

6
23-C
56



623







ITINERARIUM ORIENTALE

R. P. F. PHILIPPI

A SS^{ma} TRINITATE

Carmelitæ Discalceati ab
ipso conscriptum.

IN 2^{VO}

Varij successus Itineris, plures Orientis Regio-
nes, earum Montes, Maria & Flumina,
Series Principum, qui in eis domi-
nati sunt, Incolæ tam Christiani,
quàm Infideles Populi.

*Animalia, Arbores, Planta & Fructus; Religio-
sorum in Oriente Missiones, ac varij celebres
euentus describuntur.*





LVGDVNI,

Sumptibus ANTONII IVLLIERON
in vico Racemi, sub signo duarum Viperarum.

M. DC. XLIX. ^

CVM PERMISSV SUPERIORVM.







EMINENTISSIMO

E T



Reuerendissimo Domino

D. ALEXANDRO

S. R. E. Tituli Sanctæ Sabinæ

PRESBYTERO CARDINALI

BICHIO.



E *X* *ultimis Indiarum orien-*
talium finibus reuersus
(CARDINALIS EMINEN-
TISSIME AC REVERENDISSIME)
peregrinationis meæ narrationem ex-



positurus ad tuum accedo conspectum : & meritò ; nam dum anno salutis millesimo sexcentesimo vigesimo nono Nuntij Apostolici munus in regno Neapolitano obires ; illac transiens sacram benedictionem tuam discessurus accepi : unde sicut Tu ultimus fuisti Ecclesiæ sanctæ Prælatus, cui ad Infidelium regiones properans prostratus Vale dixi : sicut iure merito primus esse debes, cui ab iisdem Infidelium regionibus rediens , cum omni reuerentia , & deuotione cordis Aue dicam.

Scio equidem Te plura, quæ hîc relaturus sum, ab alijs audiuisse & legisse : sed tamen non ingratum EMINENTIÆ TVÆ fore iudico ; si eadem & plura alia narratione sincera velut testis oculatus proponam.

Continuatam meæ peregrinationis ab Vrbe Romanâ vsque ad Ciuita-

tem Goanam Indiarum orientalium
Metropolim, meique reditus histo-
riam, ac varios via successus enarra-
bo. Singulas, quas pertransiui, regio-
nes: quæ in eis vidi, maria, flumina,
montes, animalia, arbores, fructus,
aliæque memoria digna describam.
Principum, qui in eis dominati sunt,
nomina & gesta: Populorum, qui in
eis commorantur, mores, politicam,
legem, errores: Religiosorum in orien-
te missiones ad Infidelium Conuersio-
nem ordinatas: ac memorabiles euen-
tus summa fidelitate & breuitate re-
censebo.

Accedo tandem grato plenus ani-
mo immensas EMINENTIÆ TVÆ
daturus gratias, pro continuis in Car-
melitas Discalceatos collatis à Te be-
neficijs: si omnia mihi referenda fo-
rent; totus hic liber illis describendis
non sufficeret. Nullus est in hac nostra

prouincia Conuentus , qui Te prae-
cipuum non agnoscat & Protectorem
& Benefactorem: Aquensis & Tolo-
nensis sub tuis auspicijs fundati sunt;
Arelatensis eximium tuae protectionis
effectum praeedicat. Iam à multis annis
Religio nostra in Nobilissima, Incly-
ta , & Regia Arelatensi Ciuitate
fundare Conuentum exoptabat : sed
multae obstabant difficultates ; omnes
sciunt , & publica voce fatentur,
quantum EMINENTIAE TVAE au-
thoritas, & tuus in nos summus amor
ad eas superandas contulerit.

Non audeo (singulari tua prohi-
bente modestia) tuas hic celebrare
virtutes, tua referre merita , prima-
riam inter Senenses tuorum Nata-
lium laudare nobilitatem, quae in pu-
blicis Etruriae monumentis venerabi-
lis est : & aliunde superfluum esse iu-
dico; cum toti notum sit Orbi, Te pro-

67
pier

pter eximias nobilis animi dotes fuisse maioribus semper deputatum officijs, & propter eminentia merita ad superiores dignitates & sacram purpuram sublimatum, ac suprema dignum existere. Te Gallia in exequendis negotijs prudentissimum, & in superandis difficultatibus predicat animosum. Te Italia belli intestini pacificatorem; ac pacis restauratorem agnoscit.

Ipse igitur meo, & provincia totius nomine tot nobis collata beneficia, intimo fixa cordi; non solum voce, sed etiam scriptis manifestare volo: ut nouerint omnes, quo amore, qua diligentia, qua fidelitate causas eorum, qui se TVÆ deuouerunt EMINENTIÆ, prosequaris. Accipe (CARDINALIS EMINENTISSIME) vultu beneuolo exiguum, & tuis impar beneficijs, grati hoc animi tribu-

*tum; dum nos iisdem beneficijs obstri-
cti cælestes benedictiones continuo
Tibi deprecabimur: quas ego inter
alios primus ipsi toto cordis affectu
desidero,*

TVÆ EMINENTIÆ

Humillimus, & addictissimus seruus
F. PHILIPPVS à Sanctissima
Trinitate Carmelitarum Discal-
ceatorum Prouincialis.

P R O L O G V S.



O N potui, Lector beneuole licet aliis, & gra-
 uioribus exercitiis occupatus, ab scribenda
 meæ profectiois Orientalis relatione diutius
 contineri: tot enim amicorum precibus, tot
 aliquorum nobilium votis resistere piaculum iudicau:
 unde quotidianis, ac omnino necessariis occupationi-
 bus meis aliquid temporis subripiens, breue hoc opus
 rudi Minerua confeci. Non tibi fabulas pro libito fictas:
 sed puram in omnibus describo veritatem. Ex industria
 breuitatem affecto, ne longo verborum circuitu tæ-
 dium tibi generem, te potius eligens rerum varietate
 recreare. Omnia penè, quæ hîc refero, meis vidi ocu-
 lis; si quid his adiungo, certa & infallibili relatione
 percepi aliquorum, quorum authoritati diffidere credi-
 di temerarium. In his duplici te pabulo nutrire, ac re-
 create; scilicet curiositatis & deuotionis, intendo: in-
 tellectum & voluntatem pascere desidero; quis enim
 tot mirabilia in his descripta libris, tantam rerum pul-
 chritudinem & varietatem, regnorum opulentiam, po-
 pulorum industrias, aliâque huiusmodi considerans,
 ad horum omnium artificem Deum Optimum Maxi-
 mum pro his honorem & gloriam non referat, quis
 horum pulchritudinem attendens, illius pulchritudine
 non rapiatur? inuisibilia enim Dei, per ea quæ facta
 sunt, intellecta conspiciuntur, dicitur Sapientia 13. vbi
 condemnans homines, quod istis inuisibilibus abuten-
 tes, tanquam vani & Dei scientia priuati, de his quæ
 videntur bona, non potuerunt intelligere Deum, quis
 est; neque operibus attendentes agnouerunt, quis esset
 artifex; cum tamen à magnitudine speciei & creaturæ
 cognoscibiliter possit Creator horum videri: unde

Beatissimus Iob nos ad creaturas remittit, ut ex illis ad Creatoris cognitionem assurgamus; capite enim 12. ait, *Interroga sumenta & docebunt te; & volatilia cæli, & indicabunt tibi; loquere terra, & respondebis tibi, & narrabunt pisces maris, quis ignorat, quod omnia hæc manus Domini fecerit?* Tam facilis est à creaturis ad Creatorem, ab illarum perfectione ad eius infinitam perfectionem ascensus; ut nulla circa hoc inuincibilis ignorantia possit admitti: quis enim non facîle aduertat, quod illa, quæ aliquandò incipiunt, & desinunt, ac proinde contingentia subdita, non sunt à seipsis, quasi gaudeant essendi necessitate? si non à seipsis, ergo habent ab alio, quod in rerum natura subsistant; & cum aliunde philosophico axioma sit indubitatum, neminem dare quod non habet, infallibili cōsequētia restat concludendum, quod Deus omnium Creator, omnium creaturarum perfectiones, in illis dispersas, in seipso summè vnitas, in eminentiori, ac infinita Deitatis ratione præhabendo contineat. Hæc tandem à te, Lector, exposco, ut cum in hac meâ relatione tot homines Mahomericæ legis erroribus, aut gentilitatis superstitionibus irretitos legeris, infinitas gratiarum actiones misericordie erga te Deo rependas, qui te in locis fidelium, è fidelibus nasci parentibus, sola motus bonitate sua decreuerit; vocationis ad fidem Christi, ab eiusdem Christi meritis beneficium extolle opera fidei correspondētia sedulus exequere: ut ita per bona opera certam tuam facias vocationem; Quos enim, ait Paulus Apostolus, *Deus prædestinavit, hos & vocauit: quos autem vocauit, hos & iustificauit: quos autem iustificauit, illos & glorificauit;* hanc tibi, sicut & mihi gloriam deprecor.

Continet hoc opus decem libros. In primo proponuntur causa, & varij successus meæ profectiois ad partes Orientales. In secundo, describuntur imperia, & regna

7
regna quæ lustraui. In tertio, montes, maria, & flumina celebriora referuntur. In quarto, Monarchæ, Reges, & Principes adducuntur, qui in Oriente dominati sunt. In quinto, varij Christianorum in Oriente commorantium mores, ritus, & errores exponuntur. In sexto, sectæ infidelium orientalium, eorumque religio, & politica declarantur. In septimo, varia animalia, arbores, plantæ, & fructus describuntur. In octauo, Religiosorum in Oriente missiones pro animarum conuersione manifestantur. In nono, varij euentus memorabiles referuntur: & tandem in decimo, causa, & successus mei in Europam reditus enarrantur. Poteram hoc opus adhibitis libris, ac variis aliorum relationibus, augere; sed malo esse diminutus, quàm falsus; in quarto tantum libro ex Chronologiis aliorum loquor, in quibus varias in annorum supputatione sententias reperi; & cum in eis plurima sint incerta, ea tibi, non vt mea, sed vt aliorum dicta refero. Vale.

Cum in hoc Libro sint multa nomina propria & Author non interfuerit impressioni, forte aliqui errores irrepserunt.

A P P R O B A T I O N E S.

FR. Laurentius à Sancto Elia Præpositus Generalis-
Ordinis Fratrum Discalceatorum B. Mariæ de Monte
Carmeli, vt liber, cuius titulus est *Itinerarium Orientale*
R. P. F. Philippi à S. Trinitate, Prouincialis Pro-
uinciæ Auenionensis Sanctæ Theresiæ per varia Orien-
tis Regna, ab ipso met compositus, & à Grauius doctis-
que viris nostri ordinis recognitus & approbatus typis
mandetur, & in lucem prodeat tenore præsentium licen-
tiam concedimus. Datis in Conuentu nostro sanctæ
Mariæ de Scala Romæ, die 20. Maij anni Domini 1647.

FR. LAURENTIUS à Sancto Elia Præpositus Gener.

NOs infra subscripti Magistri in Theologia facultatis Parisien-
sis legimus *Itinerarium Orientale R. P. F. Philippi à S. Trinitate*
Carmelitæ Discalceati, in eoque nihil quod aures Catholicas of-
fendere possit reperimus, Imò multa iucunda & quæ de naturæ
secretis & mirandis eius effectis curiosos demulcere possunt: digna-
que Iudicauimus quæ in lucem prædeant. In quorum fidem ma-
nuale nostrum Chyrogaphum hîc, die 24. Nouembris anni
1648. Lugduni apposimus.


F. STEPHANVS MOLIN Carmelita.

F. FRANCISCVS LORNET, Prior Præ-
dic. Lugd.

FR. CLAVDIUS COCHET, Ord. Præd.

Visa à Nobis authentica approbatione RR. PP. Præfatorum
Doctorum in Theologia facultatis Parisiensis super hoc *Iti-
nerario Orientali R. P. F. Philippi à S. Trinitate* Carmelitæ Discal-
ceati, qua asserunt nihil in eo contineri Catholicæ doctrinæ aduer-
sum Nos sub prælum mittendum quoque censuimus. Lugduni
26. Nouembr. 1648.

DEVILLE, Prouic. Gen.



INDEX CAPITVM

LIBRI PRIMI.

Cap. I.	<i>De causa mei itineris.</i>	p. 1
II.	<i>De exitu ab urbe Romana, & appulsu ad insulam Melitam.</i>	p. 6
III.	<i>De traiectu maris Mediterranei.</i>	p. 10
IV.	<i>De aduentu in Civitatem Aleppi.</i>	p. 12
V.	<i>De modo iter agendi in Oriente.</i>	p. 16
VI.	<i>De transitu Arabiae deserte.</i>	p. 20
VII.	<i>De itinere a Babylone usque Aspahanum.</i>	p. 25
VIII.	<i>De meo exitu e Perside.</i>	p. 29
IX.	<i>Profectio mea Indica.</i>	p. 35

LIBRI II.

Cap. I.	<i>De imperio Turcarum.</i>	p. 40
II.	<i>Descriptio Terre Sanctae.</i>	p. 43
III.	<i>Descriptio Regni Syriae.</i>	p. 50
IV.	<i>Descriptio Arabiae Deserte.</i>	p. 56
V.	<i>Descriptio Arabiae Felicis.</i>	p. 60
VI.	<i>Descriptio Mesopotamiae.</i>	p. 64
VII.	<i>Descriptio Chaldaee.</i>	p. 66
VIII.	<i>Descriptio Armeniae.</i>	p. 68
IX.	<i>De imperio Persarum.</i>	p. 73
X.	<i>Descriptio Regni Persidis.</i>	p. 77
XI.	<i>Descriptio Regni Parthorum.</i>	p. 81
XII.	<i>Descriptio Regni Medorum.</i>	p. 85
XIII.	<i>Descriptio generalis Indiarum Orientalium.</i>	p. 89
XIV.	<i>Descriptio partis maritimae Indiarum.</i>	p. 93
XV.	<i>Descriptio Insularum maris Indici.</i>	p. 98
XVI.	<i>Descriptio Insulae, & Civitatis Goanae.</i>	p. 102
		LIB.

INDEX CAPITVM.

LIBRI III.

Cap.I.	<i>Vera descriptio Sacri montis Carmeli.</i>	p.115
II.	<i>Descriptio montis Libani.</i>	p.123
III.	<i>Descriptio montis, in quo traditur requieuisse & esse Arca Noë.</i>	p.126
IV.	<i>De alijs montibus.</i>	p.130
V.	<i>Descriptio Oceani Orientalis Indici.</i>	p.132
VI.	<i>Descriptio maris Mediterranei.</i>	p.134
VII.	<i>Descriptio Sinus Persici.</i>	p.137
VIII.	<i>Descriptio maris Armenia.</i>	p.142
IX.	<i>Descriptio Fluviorum Euphratis, & Tigris.</i>	p.143
X.	<i>Descriptio Fluviorum Gangis, & Indi.</i>	p.147
XI.	<i>Descriptio Fluviorum Iordanis & Orontis.</i>	p.149

LIBRI IV.

Cap.I.	<i>De Quatuor mundi Monarchiis in cōmuni.</i>	p.152
II.	<i>De Monarchia Assyriorum, & Chaldaorum.</i>	p.154
III.	<i>De Monarchia Persarum, & Medorum.</i>	p.160
IV.	<i>De Monarchia Græcorum.</i>	p.169
V.	<i>De Monarchia Romanorum.</i>	p.174
VI.	<i>De Imperatoribus Turcarum.</i>	p.196
VII.	<i>De Regibus Indiarum.</i>	p.203
VIII.	<i>De Regibus, & Principibus Palestina.</i>	p.205

LIBRI V.

Cap.I.	<i>De Coloniis, ac Dominio Lusitanorum in Oriente.</i>	pag. 217
II.	<i>De Regimine Lusitanorum in Oriente.</i>	p.226
III.	<i>De Commercio Lusitanorum in Oriente.</i>	p.234
IV.	<i>De alijs Christianis, qui sunt in Indiis.</i>	p.239
V.	<i>De Armenis.</i>	p.241
VI.	<i>De</i>	

INDEX CAPITVM.

VI. <i>De Gracis.</i>	p. 244
VII. <i>De Nestorianis.</i>	p. 246
VIII. <i>De Iacobitis.</i>	p. 248
IX. <i>De alijs Christianis Orientalibus.</i>	p. 249

LIBRI VI.

Cap. I. <i>De lege, moribus, ac politica Turcarum.</i>	p. 251
II. <i>De moribus, & politica Arabum.</i>	p. 257
III. <i>De lege, moribus, & politica Persarum.</i>	p. 260
IV. <i>De Mahometanis Indicis.</i>	p. 265
V. <i>De lege, & moribus Gentilium Indiarum Orientalium.</i>	p. 267
VI. <i>De alijs Gentilibus Orientalibus.</i>	p. 271
VII. <i>De Sobbis siue Mendais.</i>	p. 272
VIII. <i>De Iudais Orientalibus.</i>	p. 273

LIBRI VII.

Cap. I. <i>De Elephantibus.</i>	p. 277
II. <i>De Camelis.</i>	p. 283
III. <i>De alijs Animalibus progressivis.</i>	p. 284
IV. <i>De serpentibus, & alijs reptilibus.</i>	p. 288
V. <i>De Volucris Indicis.</i>	p. 290
VI. <i>De Piscibus Indicis.</i>	p. 292
VII. <i>De Arboribus fructiferis.</i>	p. 294
VIII. <i>De Palma.</i>	p. 297
IX. <i>De Arboribus, & Plantis Aromaticis.</i>	p. 301
X. <i>De alijs Arboribus, & Plantis Indicis.</i>	p. 304

LIBRI VIII.

Cap. I. <i>De Missionibus Orientalibus.</i>	p. 309
II. <i>De fundamento & origine nostrarum Missionum.</i>	p. 312
III. <i>De</i>	

INDEX CAPITVM.

III.	<i>De Prima Missione ad Regiam Ciuitatem Persidis Aspahanum.</i>	p.317
IV.	<i>De aliis Missionibus Persidis.</i>	p.329
V.	<i>De Missione Indica.</i>	p.333
VI.	<i>De Missione Mogoritana.</i>	p.336
VII.	<i>De Missione Arabica.</i>	p.339
VIII.	<i>De Missione Syriaca.</i>	p.344
IX.	<i>De Missione Terra Sancta.</i>	p.346

LIBRI IX.

Cap. I.	<i>De prodigioso successu in Ciuitate Goa.</i>	p.353
II.	<i>De Martyrio V.P. N. Dionysij à Natiuitate, & V. F. Redempti à Cruce.</i>	p.360
III.	<i>De alijs, qua in Indijs successerunt.</i>	p.371
IV.	<i>De his, qua in Arabia successerunt.</i>	p.376
V.	<i>De his qua in Perside successerunt.</i>	p.380
VI.	<i>De his qua successerunt in Syria, & Palaestina.</i>	p.382

LIBRI X.

Cap. I.	<i>De causa mei reditus in Europam.</i>	p.385
II.	<i>De meo exitu è portu Goano.</i>	p.388
III.	<i>De Traiectu Oceani, ac Sinus Persici ingressu.</i>	p.392
IV.	<i>De vltiori Sinus Persici navigatione.</i>	p.396
V.	<i>De secundo meo ingressu in Persidem.</i>	p.401
VI.	<i>De mea per Armeniam profectiōe.</i>	p.405
VII.	<i>De meo in Aleppum aduentu.</i>	p.410
VIII.	<i>De Traiectu Syria, ac navigatione.</i>	p.412
IX.	<i>De mea peregrinatione in Terra Sancta.</i>	p.419
X.	<i>De meo reditu in Galliam.</i>	p.427



LIBER PRIMVS ITINERARII

In quo

Causa, & Successus meæ profec-
tionis in Orientem
proponuntur.

CAPVT PRIMVM.

De causa mei Itineris.

IN ipso statim principio conueniens;
imò necessarium duxi, causam refer-
re tam longi, & diurni mei Itine-
ris; ne lector miretur sciens carme-
litas discalceatos esse strictioris clau-
suræ religiosos, qui nec ad publicas
supplicationes, nec ad mortuos sepeliendos accedunt,
nec passim per plateas & compita cursitantes viden-
tur; vixque ad confessiones decumbentium audiendas,
aut ad iuuandos morti proximos, aut ad implenda si-
milia charitatis opera tantum prodeunt: dum me to-
tum ferè mare Mediterraneum, sinum Persicum, &
orientalem oceanum enauigasse, plurimásque perlu-
strasse audierit orbis prouincias; videlicet Palæstinam,

A Phæ



Phœniciam, Syriam, triplicem Arabiam, desertam, fœlicem, & petream; Assyriam, Chaldæam, Persidem, Parthiam, Mediam, Indiam orientalem, Armeniam maiorem, ac Mesopotamiam.

Mirari desinet si nostrum nouerit Institutum; quod licet principaliter in contemplatione, eique annexis, scilicet silentio & recessu consistat: secundariò tamen ad vitæ actiue opera; maxime ad salutem animarum se extendit: quapropter religio nostra suorum fundatorum Eliæ, ac Theresiæ exempla & doctrinam imitata, contemplationis & actionis spiritum alit in filiis: vnde in qualibet prouincia vnum Conuētum eremiticum instituit, vbi religiosi solitudinis & silentij amatores mira abstinentia, pane duntaxat herbis ac fructibus vescentes, antiquorum eremitarum rigore æmulantur. Solet hic Conuentus inter nemora, aut in montibus, ab urbibus & oppidis longè dissitus ædificari; vt ibi commorantes religiosi ab omni sæcularium strepitu liberi quierius viuant; ibi in continuo degunt silentio, solis solemnioribus diebus inter se, & tunc de rebus spiritualibus colloquentes: piaculum enim grande est, si quis de foris adueniens vanos rumores, aut nuntia sæcularia deferat, cui rei vt facilius prouideatur, nullus (excepto Priore, & Procuratore ad negotia Conuentus explenda) foras exire potest, nec litteras mittere aut recipere intra eremi ambitum, qui circiter vnus leuæ spatium continet. Præter Conuētum, vbi cellula paupercula & perexigua intermediis separantur hortulis, sunt habitacula quædam eremitica variis sanctis dedicata, ab inuicem & ab ipso conuentu longè dissita, ad quæ sanctioribus præsertim anni temporibus, scilicet Quadragesima & Aduentu recedunt: in illis est oratorium, aliaque mansiuncula habitationi eremitarum necessaria, est hortulus variis floribus confusus, nec desunt aquarum riuuli, & quidquid

quid idoneum videtur ad mentem exhilarandam, & ad cœlestia dirigendam : sibi inuicem eremitæ in sacrificio Missæ deferuiunt, est campanula in singulis eremitarum cellis, qua singuli actus communitatis eodem tempore, quo in conuentu maiori campana, pulsantur; ibi iuge silentium, ibi incredibilis abstinencia; nihil enim præter herbas & fructus comedunt, illorum austeritas antiquorum eremitarum Ægypti & Palestinæ rigorem; si non superat, saltem adæquat: redeunt in Conuentû in vigilia Natiuitatis, & dominica Palmarum, ad Dominicam, Natiuitatem, Passionem, & Resurrectionem in cōmuni cum aliis religiosis celebrandam. Verè hîc est in terra Paradisus, quem Religio nostra vitis solitudinis amatoribus præparauit.

Nec defuit illis, qui aliis prodesse cupiunt animarum salutem ardentius anhelantes: cùm enim ex nostro Galliarum Apostolo Sancto Dionysio Areopagita didicerit, omnium diuinorum diuinissimum esse, in salutem animarum Christo cooperari; non solum in omnibus aliis Conuentibus instituit Confessores & Prædicatores, qui concionando, & confessiones audiendo peccatorum, & hæreticorum circumiacentium conuersionem & salutem inquirant; sed & missiones plurimas instituit, vt ad remotissima quæque regna nostrorum charitas dilatetur: nam præter Angliam, Hiberniam, Batauiam, Germaniam, cæterasque prouincias in quibus nostri plurimum laborant, Indiam orientalem, tum occidentalem, Arabia, regnum Persidis, Syria, & Palæstina nostris decorantur hospitiiis. Ad fouendas ac promouendas has in terris Infidelium missiones, instituta sunt in variis nostræ religionis prouinciis quædam seminaria; sed præcipuè Romanum S. Pauli in monte Quirinali, nunc B. Mariæ de victoria titulo nuncupatum; quia in eius Ecclesia sollemnissima totius Cleri Romani; imò & Cardinaliû pro-

cessionem collocata fuit à summo Pontifice Gregorio XV. miraculosa illa imago Sanctiss. Virginis, quæ victoriæ Pragensis à Ferdinando secundo Imperatore supra comitem Palatinum relata, causa fuit.

Ad hoc generale totius congregationis domicilium mittuntur ex singulis Prouincijs duo religiosi, iam Philosophiam & Theologiam edocti; vt ibi in controuersijs & in orientalium linguarum, præsertim Arabica peritia instruantur. Elapso primo anno tenentur votum publicè emittere in manu Superiorum, scè ad quamlibet missionem ituros pro conuersione Infidelium, seu Hæreticorum; cum obedientia id eis inianxerit. Non mittuntur illuc, qui spiritum missionum non habent: ibi enim variis modis, tum exhortationibus, tum exemplis martyrum, tum epistolis è terris Infidelium delatis mirabiliter alitur & augetur.

Hunc duplicem; sed subordinatum contemplationis & actionis spiritum Religio nostra didicit & hausit à suis fundatoribus Elia, & Theresia; magnus quippe ille Propheta aliquandò solitudines; præcipuè montium Horeb & Carmeli quærebat, vt cœlestium contemplationi, & legis diuinæ meditationi vacaret: aliquandò etiam peruersos populi sui mores, & regulam Israël idololatriam videns, ardenti flagrans diuini zelo honoris, varias ciuitates Israël, præsertim Samariam Regis curiam frequentabat: vnde primus hic Carmelitarum Institutor conuentus Eremiticos, vt in Carmelo, soli diuinorum contemplationi; alios verò in vrbibus Samaritæ, Bethel, Hiericuntis, proximorum vtilitati, animarumque saluti consecrauit: cuius zelus in vltima eius missione contra Antichristum sub finem mundi, in conuersione Iudaici populi plurimum emicabit. Interim per tot sæcula cœlestium contemplatione & delicijs perfusus, à mortalium oculis ereptus delitescit; cuius duplicem spiritum sectatus est Elisæus, qui
eremi

Eremiticum Conuentum iuxta fluentia Iordânis ædificauit, variâsque inſtituit, tum ad plures Iudææ ciuitates, tum ad Damafcum caput Syriæ ciuitatem infidelium miſſiones; eundemque ſpiritum ſuos edocuit ſucceſſores. Quorum imitatrix fideliffima virgo Thereſia Carmeli Reſtauratrix, contemplationis & zeli animarum ſpiritum à ſanctis illis Prophetis hæreditaria ſucceſſione traditum, tum ſcriptis, tum rebus geſtis penè languidum renouauit; cùm adhuc paruula eſſet, aliquandò in horto domus paternæ ſibi cellulas eremiticas efformabat, vt ibi contemplatione & ſolitudine frueretur; aliquandò etiam martyrij deſiderio flagrans ad Barbarorum terras vnà cum paruulo fratre ire contendit. Fatetur etiam in ſuis libris ſe reformationem ſui ordinis ſuſcipere, vt ſuæ moniales ſtatum rerum Gallicarum, qui tunc Caluini hæreſibus peruertebatur, deſcentes, Dominum pro operatiis ab ipſo ad talem meſſem deputatis exorarent. Nunquid ipſa, ô vti-
nam, ad bonum Galliæ veniſſet; niſi ſexuſ virginalis conditione fuiſſet impedita.

Eram Pariſiis ſacræ ſtudentis Theologiæ, quando Romam pro Gallicâ prouincia, quæ tunc vnica erat, deſtinatus ſum: die poſt feſtum Aſſumptionis Dei-
paræ anni milleſimi ſexcentefimi vigefimi ſexti Pariſiis egreſſus conſenſa naui per Sequanam contra impetum fluminis aliquantùm proceſſi: deinde relicta prope Antiſiodorum naui pedes incedens Cabilonem perueni, vbi iterum Ararim pernauigans appulſi Lugdunum; ibi me velociſſimi fluctibus Rhodani committens, delatus ſum Auenionem, inde Maſſiliam veni; repertâque naui, quæ Liuorniam tendebat, proſpera nauigatione Italiam appulſus, quarto Octobris Romanam ingreſſus ſum Ciuitatem.

Manſi Romæ per duos annos & quatuor meſes, ſolitis occupatus ſeminarij exercitiis: quibus elapſis

à Definitorio generali cum aliis electus, ut ad Persidem proficisceretur, cœpi me orientali profectiōni parare: ecce Lector beneuolè longi & diuturni mei causam itineris.

C A P V T II.

De exitu ab urbe Romana, & appulsu ad insulam Melitam.

IAM diu exoptata, & summis expectata votis adueniat dies quarta Februarij anni millesimi sexcentissimi vigesimi noni: qua R. P. N. Mathias à sancto Francisco Præpositus Generalis iussit me è nostro seminario venire ad palatium Vaticanum summi Pontificis, ut deosculatis beatis eius pedibus, acceptâque Apostolicâ benedictione alacrius Persicam cum sociis aggredeter profectiōnem: ingressō igitur palatio, superatisque difficultatibus quæ solent occurrere, & auctoritate Eminentiss. Domini Francisci Barberini Cardinalis, in aulam ubi summus Pontifex in solito sedebat throno, introducti, breui temporis interuallo ad illum alloquendum fuimus euocati.

Eramus quinque videlicet R. P. N. Generalis Mathias à sancto Francisco Turiasonenſis, R. P. N. Paulus Simon à Iesu Maria Genuensis nunc tertio Generalis, qui primus ob eximium animarum zelum, quem semper conseruauit, ad Persicam missionem à Clemente octauo destinatus est, P. F. Epiphanius à sancto Ioanne Baptista, P. F. Ignatius à Iesu, & ego, qui breui eramus discessuri. Post varia colloquia significauit summus Pontifex se satisfactum labore & industria Patrum nostrorum in missionibus commorantium, præsertim circa Armenos: tunc enim temporis eorum Patriarcha Moyſes nomine vir venerabilis, quem postea in Perside vidi, & de quo iterum redibit sermo:

sermo : item Chulsenfis Episcopus nomine cascatur
sive crucifer , suasu nostrorum Patrum , vt ipsi fate-
bantur , mirabilem epistolam ei direxerant , in qua
ipsum Ecclesiæ caput , columnam fidei , Christi vica-
rium , & diui Petri successorem vocabant : ita præci-
puum de vnitæ naturæ in Christo , quod à nobis
damnatur , dogma exponebant , vt potius error Phi-
losophiæ quàm fidei , vt dicitur infra , videretur.

Sciscitatur tandem , vnde nam essent patres , qui ad
missiones mittebantur : cùm ei responsum fuisset om-
nes esse Italos excepto vno ex Galliis oriundo , ite-
rum sciscitatus quisnam ille esset : cùm me ei indica-
sent ; vultu hilari & beneuolo respiciens , maximum
quem semper fouit in Gallos affectum demonstrauit :
osculatis eius pedibus , & accepta benedictione Apo-
stolica recessimus : ipse autem magnificentissimam
sancti Petri Basilicam ingressus , celebransque in Al-
tari sanctorum Apostolorum Simonis & Iudæ patro-
norum Perfidis , vbi nobilissimum consummarunt
martyrium , Persicam meam profectionem eis conse-
crans commendauit.

Illuscescente octaua Februarij die Româ discedi-
mus , serò peruenimus Velletrum , secunda die Piper-
num propè monasterium fossæ nouæ , vbi mortuus est
diuus Thomas Aquinas lumen Ecclesiæ præfulgi-
dum , & sacre princeps Theologiæ , tertia die Tar-
racina relicta venimus Fundos in regno Neapolitano ,
quarta transeuntes propè Caietam , ac fluuium Liri-
dem vulgò *Garigliano* traicientes ad oppidum Cas-
canam diuertimus , quinta denique Capuam pertran-
seuntes Neapolim peruenimus , vbi per aliquot dies
commorati , vt expeditionem quandam sacre Congre-
gationis de propaganda fide expectaremus , repertâ
tandem nauicula Melitensi , vulgò *Fargata* mare in-
gredimur , ac versùs Melitam nauigamus.

Mirandum ac miraculosum quid, ipsa qua discessi die, paulò ante discessum mihi contigit: cum enim in nostro conuentu sanctæ Theresiæ, qui tunc erat nouitiatus, missam pro fœlici nostra profectioe celebrarem, post communionem video in calice Sanguinem coloris viuidi, ac in meis digitis, quibus Hostiam tetigeram, eiusdem sanguinis guttulas reperi, non sparsas sed collectas; non secus ac si digiti tunc acu fuissent penetrati: plurimum obstupui, explorare incœpi; sed causam istius naturalem minimè reperiens in varias distractus fui cogitationes: primò credidi, hanc esse diuini numinis admonitionem, quâ stupendo hoc miraculo manifestata mihi sua præsentia, significauit sacrosanctum hoc sacrificium maiori reuerentia ac deuotione esse celebrandum: deinde, cum hoc accidisset ipsa die qua nauigationem ad terras Infidelium aggrediebar, noua succedit cogitatio, an scilicet misericors Dominus quia subitò potest dehonestare pauperem, vellet me quoque miserrimum, & ingratissimum peccatorem pro fide Christiana, corona Martyrum decorare: sed meis demeritis indignum me reddidi, hanc tradidit alteri, cui ego habitum religionis dedi.

Festa die Sancti Mathiæ vigesima quarta Februarij sub vesperam è portu Neapolitano soluimus, illa nocte ac sequenti die tractum Salernitanum traiecimus, reliquos Februarij & quinque primos Martij dies littora Calabriae circumlegentes ob ventos contrarios insumpsimus: in illo tractu apparuit nobis mons igniuomus dictus Stromboli, sicut & alius propè Siciliam nomine Vulcanus: die sexta appulimus Siciliam, nocte sequenti nominatissimum eius fretum, vulgo Pharum, nautis infestum ac periculosum enauigantes Messanam peruenimus. In illo freto sunt duo illa periculosissima loca ab antiquis toties recensita,

sita, Scylla scilicet & Charibdis; magni enim ibi cernuntur vortices ex occurſu vtriuſque maris Mediteranei & Adriatici; hîc tanto Impetu fluit & refluit mare, vt naues plenis proſpero vento velis nauigantes contrarium fluxum ſuperare non poſſint, & manifeſto nautæ ſe exponunt naufragio qui contra maris impetum nauigare præſumunt.

Mellanae propter contrarios ventos quattriduo manſimus, quo elapſo diſcedentes attingimus exuſtas radices montis Ætnæ apud antiquos Poëtâs nominatiſſimi: cùm enim continuò ignem euomat inferni aditus credebatur: poſtera die venimus Siracufaſ olim Siciliæ caput, & Dionifiſij Tiranni curiam, inde exeuntes ac Pachinum promontorium prætereuntes verſùs Melitam nauigamus: ſed è medio mari ventorum contrarietate redire coacti, per triduum in Siculæ littoribus inſulæ demoramur: vnde iterum exeuntes decima quarta martij proſpera nauigatione, ventisſque ſecundis Melitam peruenimus. In hoc maritimo contra immanem Turcarum potentiam propugnaculo, Chriſtianæ nobilitatis ſub habitu Equitum Hieroſolimitanorum habitaculo vſque ad quintam Aprilis ſiſtimus, vltèrius enauigandi opportunitatem expectantes.

In hac inſula apparet locus, in quo ſanctus Apoſtolus Doctôr gentium & vas electionis Paulus è naufragio cum ſociis liberatur. Apparet & in medio inſulæ cauerna, in qua manſit aliquandiu, Principem inſulæ poſtea etiam Epiſcopum nomine Publium, eiùſque ſubditos ad amplectenda Chriſtianæ fidei dogmata conuertendo. Apparet & locus, in quo prædicans ab incolis adiacentis inſulæ Gozo per multa milliaria audiebatur. Teſtis eſt vniuerſa inſula præſentiæ olim, & beneficiorum tam grati hoſpitis: in ea quippe viperæ aliæque ſerpentium ſpecies nullo ſunt hominibus infeſtæ veneno; imò terra & lapides

insulæ dant promptissimum ac efficacissimum veneni cuiuslibet antidotum ; & hoc meritis sancti Pauli ; ac in memoriam illius euentus, quo sarmentum igni tradendum assumptis manum vipera inuasit : quæ historia non solum sacris, litteris sed & apparentibus signis æternitati commendatur : traditione siquidem illius Gentis habetur , omnes qui tunc in insula serpentes erant in lapides fuisse conuersos , quod euidenti demonstratur niti fundamento ; ibi siquidem dentes, linguæ , ossa illa nodosa , & capita serpentium intra terram & lapides inueniuntur , quorum copia maxima nobis in munus pretiosissimum , vt pote veneni remedium , oblata fuit : dono etiam recepimus plures annulos digito sancti Ioannis Baptiste præcursoris, quo Christum Agnum Dei indicauit suis discipulis, impositos ; qui ad subleuandos capitis dolores meritis tanti martyris idonei facto reperiuntur experimento : hæc cursim de regionibus ac rebus Europæ, vt pote vicinis , & cuilibet notis , dicta sunt : ad accuratius scribenda, quæ in reliquo profectiois occurrunt, vt pote pluribus ignota , vel non tanta diligentia & sinceritate scripta, procedamus.

C A P V T III.

De traiectu maris Mediterranei.

PRæstolabamur in Insula Melita opportunitatem nauigandi ; cum ecce nauis è portu Massiliensi veniens , ad portum Alexandrettæ contendit : quam assumptis duobus religiosis itineris sociis conscendentes , nos alto committimus mari : quinta igitur die Aprilis è portu Meliteni soluentes, octaua eiusdem mensis Cretam insulam Iouis magni olim gentilium Dei patriam , nunc vulgò Candiam Archipelago oppositam à longe contemplamur , quatuor aliis diebus elapsis

elapſis Cyprum conſpiciamus, tandem decima quinta eiufdem Aprilis, quæ fuit Dominica Reſurrectionis, decima nauigationis die optatum Alexandrettæ portum, Deo votis noſtris obſecundante fauſtè fælicitèque peruenimus: conſectis mille & ſeptingentis miliaribus.

Proſperi, vt dixi ſemper fuere venti; licet quadam nocte in tractu, quem dicunt Sataliæ, inter Cretam, & Cyprum inſulas, intumeſcentibus vndis inexperti nauigationis peregrini vehementem exiſtantes ſæuire tempeſtatem, naufragium velut proximum ac imminens formidauerimus. Prope Cyprum deficientibus ventis die vna integra ſtetimus immobiles: ſequenti verò nocte, cùm promontorium Porcorum, vulgò *Cau-cauſir* perueniſſemus, variis ſubito exortis turbinibus (quod frequenter ibidem ſolet aduenire) plus terroris quàm nocuenti fuit: deinde intra ſinum, quem mare reſtriſtum vlteriùſque procurrens facit, nauigantes, ac omnia tormenta bellica in ſolemnitatem Dominicæ Reſurrectionis celebrandam, & ad ſalutandum portum explodentes, iacta ſub aquis anchora noſtrum iter maritimum terminamus.

Primo regionis ingreſſu diutius attoniti & obſtupefacti, non viſis hætenus Mahometanorum ritibus, nouo veſtium genere, & inaudito loquendi modo hæſitauimus. Hic videre erat quosdam mercibus, illic alios repetitis identidem religionis cauſa profundis inclinationibus & crebris proſtrationibus, inuſitatique occupatos ceremoniis: commoramur illa ac ſequenti die apud quendam mercatorem Venetum, qui nos inſigni charitatis & beneuolentiæ ſignificatione recepit.

Exiguum eſt Alexandretta oppidum, paucas habens domos lapideas, ſcilicet Proconſulis tum Galli, tum Veneti,

Veneri, Ecclesiam Gallorum aliásque paucas facile numerabiles; cæteræ sunt viminibus, iunco & arundinibus textæ: habitatores eius præter mercatores aliquos Gallos, Venetos, Anglos, & Batauos, sunt Turcæ, Græci, Armeni, aliique Christiani orientales: ær ibi præsertim æstate pessimus est, ac pestifer: cuius malignitatem flauī ac deformes vultus mercatorum ibidem commorantium præ se ferunt; ibique plures è nostris religiosīs ad missionem pergentibus, si fortè ob defectum comitum itineris detineantur, facile infirmantur: vnde maximi instar beneficii à Deo nobis collati reputauimus, quòd repertis alterius nauis mercatoribus sequenti die post prandium discedere contigerit.

C A P V T IV.

De aduentu in ciuitatem Aleppi.

IAM aderat decima sexta Aprilis, mane duo ex nobis natione Itali pergunt ad capellam Venetorū, vt missam celebrarent; ego cum alio, qui licet natione Italus; linguam tamen Gallicam optimè nouerat, quia iuuenis Auenionem delatus fuerat, eadem intentione ad Gallorum Ecclesiam venimus: deinde domum recedentes omnia itineri necessaria præparamus post prandium conscensis equis quindecim circiter simul discedimus, vespere venimus ad oppidum dictum Beilam satis amplum, aquis abundantissimum, situm supra montem, qui olim dicebatur Amanus siue niger, diuidens Syriam à Cilicia; in quo cum pueri Mahometani simul ludentes occurrissent, eorum miseriam interius deflens, quod luderent; cū tamen moraliter certum esset, illos præscitos, reprobos, ac æternis esse flammis destinatos, ardentius cœpi animarum salutem sitire, ac immensas diuinæ misericordiæ

diæ gratias rependere, quòd me Christianis parentibus natum, Ecclesiæ filium, imò religiosum Carnelitam discalceatum effecisset: insuper pro eorum conversione enixius Dominum exoravi, libenter ipsi offerens quidquid in missionibus essem passurus.

Mansimus illa nocte in domo ducis nostri itineris Arnaudi nomine, Armeni natione; ibi enim familiam alebat, pueris eius ac puellis paruas cruces æreas ac sanctorum imagines diuisimus; summo mane discedentes cautè admodum simulque vniti qua poteramus celeritate montem descendimus, frequentia quæ illis in locis nemoribus consitis occurrunt, latronum pericula formidantes. Illucescente die apparuerunt ad dexteram ruinæ incœnium & ædificiorum Antiochiæ nobilissimæ & antiquæ ciuitatis, quæ tempore Anthiochii eius fundatoris, ac aliorum Regum totius Syriæ caput & curia fuit, & in qua primò fideles denominati sunt Christiani.

Nobis è monte descendantibus latè diffusa occurrunt planities Anthiochena, in varios passim assurgens colles; in ea plures apparent aggeres à Godefredo Bullioneo primo restauratæ Hierusalem Rege, quando actu regnum conquirebat, vt constanti habetur traditione, constructi; in ea est lacus maximus, plurèscque riuuli; imò & fluuioli, qui omnes Orontem fluuium à Libano venientem ingressi, proximo se committunt mari, abluta & exhilarata prius leuiter fluentibus vndis Antiochena ciuitate. In eadem planitie, quæ per plures leucas diffunditur, præter Antiochiam supra collem ædificatam, & à pristina gloria penitus collapsam, rara eaque contemnenda cernuntur oppidula: ibi sunt plures pastores, quos vocant Turchemanos, qui portatiles inhabitantes domos, arundinibus & panno rudi textas, hinc inde per planitiem suos greges ad varia deducunt pascua: prædicti Turchemani

chemani non solum pastores, sed etiam insignes sunt latrones; propterea viatores non sigillatim, sed turmatim & armati procedunt.

Mirabitur fortè quis, cur regio quondam populis plena, vrbibus decorata, ac deliciis affluens; deserta nunc, inuia & inculta remanserit: sed in hoc mirabilem circa Christianos Dei laudet prouidentiam, qui inimicos Christiani nominis pro viribus, poligamia scilicet, multiplicationem suæ gentis procurantes, crescere non permittit: & inter alia diuinæ prouidentiae media ad hoc ordinata est pestis, quæ sæpissimè, quinto scilicet anno, per totum Turcarum Imperium, modo in his, modo in aliis prouinciis grassatur, maximamque consumit populi multitudinem: cum enim diuina decreta necessariò complenda iudicent, præcindendo à mediis, fatalem in omnibus agnoscunt necessitatem: & ita, quidquid fecerint, dicant se morituros, si hoc ita statutum sit vel non morituros, si contrarium fuerit à Deo constitutum; propterea licet videant parentes & amicos peste laborantes, non tamen se ab eorum consortio & conuictu separant: quapropter propè infiniti pestifero contracto morbo decedentes confluunt ad tartara: sed iam præcipui inter ipsos nostrorum mercatorum exemplo, qui recedentes tunc & pestis & mortis periculum euadunt, sapientes effecti, ipsos imitantur. Propter incolarum defectum integra sæpè regna duobus aut tribus tantum constant ciuitatibus; propterea immensa reperiuntur terræ fertilissimæ spatia, vt accidit in hac planitie Antiochena omninò inculta, ac animalium pascuis derelicta: vnde solo lacte acetoso, oriza, ac crassioribus carnibus arietum, & boiū vescuntur; non enim venationi, aut piscationi solent esse addicti, quamuis plurimæ in his locis sint ceruæ vulgò *Gazelle*.

Die igitur decima septima Aprilis integram ferè Anthiochenam planitiem percurrentes ad exiguum oppidulum, quod iuxta quendam fluuiolum, qui tunc valde intumuerat, ad quemdam aggerem ex supradictis ædificatum diuertimus, ibique totam noctem alternatim vigilantes duximus: omnia enim hîc plena sunt periculis; cùm, vt communi prouerbio fertur, occasio furem faciat; quantò magis fures ad furandum inuitabit: summo mane diei sequentis viam prosequimur, colles qui occurrunt superantes: circa horam diei nonam peruenimus ad quemdam locum, quem monasterium vocant; quia ibi est quoddam monasterium semidirutum, ibique paululum refecti ultra procedimus, & paulò post meridiem ad oppidum vulgò *Iarra* appellimus, in quo plures mercatores Gallos, qui nobis obuiam venerant, reperimus: ibi prandentes paululum mansimus, consensisseque iterum equis, circiter viginti quinque simul equitantes Aleppum, mirantibus Turcis tantum Christianorum, & maximè quinque religiosorum comitatum, ingressi sumus.

Prædicti mercatores Galli, qui nobis venerunt obuiam, nostrum aduentum Alexandretam, consueto, sed mirabili modo didicerunt: solent mercatores, vt scilicet & maiori cum lucro sua exerceant negotia, explorare aduentum nauium, discere quas afferant merces, quas velint Aleppi emere, quique mercatores in eis vaneant; propterea sumunt Aleppi columbas, statim ac pullos pepererunt, & Alexandretam deferunt, statimque ac naues portum appellant, schedulam prædictis inscriptam sub ala ligant, ac ita columbam dimittunt, quæ pullorum amore allecta sursum volat, donec Aleppum videns illuc volatum dirigit, ac tribus circiter horis perficit, quod equites duobus tantum diebus perficiunt: columba autem domum suam

suam ingressa capitur præ manibus, ac soluta schedula legitur: sic noster innotuit aduentus; duæ enim columbæ coram nobis Alexandrettâ sunt dimissæ: olim ad Aleppum ex Babilone, & ex Aleppo Babilonem, ut didici, columbæ similia nuntia perferentes dimittebantur.

Aleppum ingressu ad magnum campum, ubi Consul Gallorum, plurésque alij, ac præcipui habitant mercatores, & ubi omnes merces ad soluenda pro eis vectigalia deferuntur, recta tendimus, redditâque exactoribus pro nobis ratione, supra ad nostrum hospitium in eodem campo positum conscendimus. Perpende quanta animi hilaritate, & nos de nouo aduenientes, & Patres illic degentes perfunderemur: solum id percipies, si aliquandò ad remotissima loca tibi que chara, & plurimis desiderata votis, pluribus exantlatis laboribus, multisque euadens periculis faustè feliciterque peruenieris: decima octaua die Aleppum peruenimus, ibique usque ad sextam Maij commoramur.

C A P V T V.

De modo iter agendi in Oriente.

CUM Arabia maximè sit deserta, & ea præcipuè quæ hoc nomine vocatur, & extenditur ab Aleppo usque Babilonem; propterea non audent soli per illam incedere mercatores, sed multi adunantur Aleppi, ac primò obtenta pecuniis & muneribus à Gubernatore Aleppensi proficiscendi licentia, mittunt aliquos ad Regem deserti, à quo iusiurandum in scriptis recipiunt, se non eis nociturum, si in transitu debita pro mercibus vectigalia persoluant.

Inter mercatores, qui ut in plurimum sunt Armeni, eligitur vnus in ciuitate Chulfa prope Aspalian ab Armenorum duce, qui aliis mercatoribus tum Armenis

menis tum Mahometanis in illo transitu præsideat, qui vocatur Carauanbaschi, ad quem pertinet dirigere illā multitudinem, iurgia inter mercatores dissidentes finire, delinquentes fustibus vel simili modo castigare, aliquas contributiones de consilio aliorum iniungere, ad danda si opus sit munera, vel ad expensas communes persoluentes: ipse etiam iubet sistere vel procedere, ubi & quandò iudicauerit, modum procedendi statuere, prouidere vigiles, & alia similia.

Expeditis Aleppi negotiis, mercibusque venditis, (hi enim ex Perside pannos olosericos, item ex auro, argento, ac serico mira contextos arte, quos *meleq* vocant; tapetes eximios tum serico, tum lana contextos; maximamque serici copiam deferunt ac plura alia) temporibus Veris, & Autumni quæ opportuniore sunt, ne frigore Hiemis, nèue calore Æstatis molestantur, se itineri præparant.

Dux igitur illius multitudinis indicit aliis designatum discedendi diem, mittitque aliquos ex seruis suis ad determinatum congressus locum, qui tribus aut quatuor milliariibus Aleppo distat, ibique papilionem tendit, suaque defert onera; ad cuius exemplum alii mercatores similiter expediti illuc properant, & ita spatio aliquorum dierum omnes conueniunt, suos ibi tendentes papiliones.

Præparant itineri necessaria, & primò panem bis coctum, copiam orizæ, quotidiani omnium orientalium cibi, caseum, fructus siccos, lac acetosum coagulatum, vinum, aliisque similia: secundò assumunt pastorem, qui emprum ouium, agnorum, & caprarum gregem diducat, vtres etiam paratos habent ad deferendam aquam; non enim singulis diebus reperiunt, maximè antequam fluuium Euphratem attingāt; qui etiam ob serpentinos circuitus à recta discedit viā; ac ita aliquando recto tendentibus tramite aquam denegat, qui etiam vtres ad

purificandam fluminis aquam limo plenam admodum necessarij sunt ; donec enim aqua aliquantulum quieverit, admodum turbida , non ita gustui suavis arridet, quamuis sic salubrior iudicetur.

Locatos ab Arabibus simili vacantibus negotio camelos accipiunt qui præ aliis animalibus ad peragrandum hoc desertum maximè sunt idonei : primò , quia prægrandia ferunt pondera , plus enim fert vnus camelus quàm duo muli : secundò , quia in deserto rara occurrunt pascua aliis apta iumentis ; soli cameli reperiunt quod manducant ; passim enim per viam multi occurrunt spinosi cardui , quos cameli procedendo sine vlla læsione ob duritiem pellis depascunt : tertio , quia non singulis diebus inuenitur aqua ; cameli autem facillè per duos aut tres dies ab aqua abstinent, quod difficile, imò fortè impossibile est aliis animalibus : vnde cameli præter assueta pondera, vtres aqua plenos pro equis tali necessariis itineri portant , ipsi verò repertâ aquâ præteritorum dierum abstinentiam compensant.

Præter camelos aliqui muli & asini ; sed plures reperiuntur in comitatu equi, quibus insident mercatores, vt facillè hinc inde discurrere ad mercium custodiam , & latrones insilientes insequi valeant : statim autem ac turba latronum apparet, omnes siliunt camelos , genuflectere faciunt , eosque in vnum congregatos armati defendunt : si enim Arabes stantes ac sparsos reperiunt , lanceis ferientes in varia distraherent. Equi raris occurrentibus pascuis nutriuntur ; vbi enim vel pusillum herbæ apparet , statim à seruis mercatorum secatur , & camelis imponitur deferenda ad equorum nutrimentum , pro quibus etiam deferretur auena.

Modus procedendi is est , summo mane ad ortum auroræ suos quique onerant camelos, nec iter arripiunt nisi omnibus onustis , quod mirabili sit celeritate ; tunc ad imperium Ducis multi præcedunt equites, multi subsequuntur.

sequuntur; alij à dextris, alij à sinistris camelorum incedentium assistunt, vel catapultis, vel arcubus & sagittis instructi; ita vt exercitum crederes: nullus audet nec longo præcedere, nec subsequi intervallo, ne à circumlatentibus inuadatur latronibus, quod malo suo frequenter mercatores ex periuntur; ipsi enim Arabes à longè vel præcedunt, vel subsequuntur hos mercatorum comitatus, ac plures eis parant insidias.

Adest semper aliquis itineris ac locorum, vbi quotidie sistendum est, apprimè instructus; nec enim iter apparet vt in plurimum; sed astris velut nauæ reguntur: solis tantum collium vel aliorum huiusmodi signis norunt, vbi sint putei, ac determinata sistendi loca, vel vbi pascua, vel vbi facilis ad fluuium accessus: cum autem ad dicta loca perueniunt, depositis camelorum oneribus sua explicant & instruunt tentoria in gyrum, crederes videre ciuitatem; in medio relinquitur platea; vbi cameli funibus alligati, ac genuflexi pernoctant; vnde in orbem circunstant tentoria, camelorum oneribus quasi muris ex parte exteriori vallata.

Solent circa meridiem consistere, iter cuiuslibet diei terminantes: tunc extensis papilionibus necessarias toti iter agentium multitudini mactant oues, quisque carnem emittit ad libitum, suasque omnes instruunt culinas, ignem accendunt, sparsas hinc inde ligni ac stercoreum camelorum præcedentium Turbarum reliquias colligunt: dum cœna paratur, ex his quæ parata deferunt vescuntur; sed præcipuè lacte acetoso coagulato, quod facile inuenitur, pastores siquidem Arabes, vbi comitatum mercatorum aduertunt, statim aduolant; panes, lac, & oues deferentes; & sic viaticum reparant, & gregem ouium occisione quotidiana diminutum reftaurant.

Quamuis cameli maxima ferant pondera, ad quæ suscipienda & deponenda genuflectunt; breui tamen la-

bore franguntur ; & cùm aliunde rara sint in deserto pascua , multo indigent tempore , vt dispersos hinc inde tribulos & carduos comedant : ad occasum solis colliguntur , parato eis loco manentes à labore itineris tota nocte recreantur ; tunc alternatis vigiliis quidam ad id deputati , & vbi timentur latrones , plurimi armati castra circumdantes custodiunt , singuli etiam propriis mercibus inuigilant.

C A P V T V I.

De transitu Arabia deserte.

ADuenerat sexta mensis Maij dies , mercatoribus ad discedendum prænuntiata : tunc ille, qui omnia nostro itineri necessaria pactauerat (cum eo liquidem conueneramus, vt solutis pro quolibet septuaginta circiter nummis, vsque in Persidem nobis victum, & equitatum præberet) discedendum intimauit. Post prandium igitur Patribus nostris , Consule Gallorum , & amicis mercatoribus valere iussis , quò potuimus secreto eximus, vnico nobiscum assumpto, qui viam demonstraret , timentes ne aliquem offenderemus Turcam militem , vulgò *Ianisserum* , & aliquid à nobis per fas aut per nefas extorqueret. Hi milites sunt arrogantissimi , & insolentissimi , vt nostri quotidie experiuntur mercatores ; sed valde inuicem vniti, quorum insolentia paucis ab hinc annis toti mundo apparuit ; cùm suum Imperatorem , quia statuerat propter metum Polonorum Constantinopolim deferere , & se recipere in Ægyptum, cum maximo dedecore trucidarunt : sed quod timebamus, euenit ; cùm enim ad portam ciuitatis accederemus , occurrit nobis vnus ex illis baculo instructus, qui minas intèntans breuiaria per vim arripuit ; sed soluto aliquo pretio nostram redemimus vexationem : egressi ciuitate ad locum congressus ad sex milliaria distan-

distantem imminente iam nocte peruenimus.

Transacta nocte summo mane adducuntur quingenti circiter cameli pro toto commeatu necessarij : quique ad Ducis imperium suos onerant, nobis duo parantur, quatuor enim eramus religiosi, cuilibet camelo binæ hinc inde appenduntur cunæ, à parte exteriori panno tectæ ad vitandas solis & imbrium molestias, qua parte verò se respiciunt apertæ mutuo colloquio præbent occasionem : tunc genuflexis camelis ascendimus, ibique partim sedentes, partim iacentes, modò recitantes, modò orantes iter prosequimur.

Quatuor primis diebus lentè admodùm processimus; vt mercatores, qui adhuc aberant, audito nostro discessu se ab Aleppo expedientes accedere possent : prima & secunda die aquam ad potum reperiimus ; non autem tertia, qua supra collem mansimus : quarta verò quemdam riuulum in valle decurrentem, vbi plurima erant pascua, offendimus : quapropter viginti circiter ex nostro commeatu, vt ieiunos & sitientes reficerent equos, malo suo alios præcesserunt : cùm enim ad locum peruenissent, adsunt ex improviso latrones Arabes, qui resistentes lanceis vulnerant, & equos mercibus onustos abducunt : duodecim fuere vulnerati, ex quibus duo interierunt ; furtum Arabum ad decem nummorum millia peruenit. Inter hos erat vnus Pater Capucinus, qui nobiscum veniebat, in illo occursumulum supra quem equitabat, pallium, & quidquid deferebat, amisit : cùm istius casus nuntium ad nos peruenit, iam Arabes, qua poterant celeritate recedentes, euaserant : tota sequenti nocte plurimi armati alternatim vigilarunt.

Vix credi potest, quantam confusionem, & mortis timorem hic Arabum insultus toti incussit commeatui : nec potest explicari, ad quas angustias plures è vulneratis deuenerunt : qui diuites erant, sibi vtcumque pro-

uiferunt; nam confutis statim vulneribus, imposito desuper puluere tormentario, omnes euaserunt; pauperes autem ab omnibus expellebantur, ne sub eorum papilionibus morerentur; timebant enim experientia edocti, ne ab Arabum Rege omnium in deserto morientium perpetuo hærede, eorum facultates ab ipsis extorquerentur: vnde vnus inter alios ab omnibus etiam amicis & cognatis repulsus, erumpentibus è vulnere visceribus miserum in modum animam exhalabat: ego & alij mei socij ipsum signis potius quàm verbis solabamur (Armenus enim erat, cuius linguam nesciebamus) nec alio modo succurrere potuimus; cùm sub directione vnius mercatoris procederemus: cùm transacta nocte discedendum esset, & miser hic nondum expirasset, ab aliis Armenis, vt postea nobis relatum est, adhuc viuus sepultus est; credentibus hoc magnum esse pietatis opus, ne à feris post discessum nostrum deuoraretur: reliqui vulnerati camelis impositi sequebantur; nos quatuor Christianis Armenis camelos & cunas, quibus vehabamur, vltro concessimus, non absque graui incommodo; nam reliquum viæ Solis ardoribus expositi confecimus. Inde discedentes secunda die ad ruinas cuiusdam Ecclesiæ venimus, vbi erat puteus aquæ dulcis, quæ rara est in deserto, antequam ad fluuium Euphratem perueniatur: putei enim vt plurimum aquam sulphuream, & bituminosam ministrant. Tertia verò die venimus Theibas, nunc oppidum, olim ciuitatem; vbi diem integrum ac dimidium ad pascendos camelos fuimus cōmorati. Nobis hîc stantibus venit quidam Arabs nobilis ad Gubernatorem Damascenæ ciuitatis ab Arabum Rege destinatus: hîc aliquos vtres paruos, qui subtus ventrem equorum aqua pleni, suspenduntur, vi rapuit; quod aliquos summè contristauit mercatores: hinc digressi, post duos dies transacta Rheiba ad fluuium Euphratem deuenimus, vbi iterum vno die pascendo-

tum causa camelorū immorati ulterius processimus eiusdem fluuij littora legendo; vbi quadam die tantam reperimus ex inundatis fluuij humiditate culicum multitudinem; vt, cū excitatis circumquaque ignibus fumo expelli non possent, onustis iterum camelis discedere coacti fuerimus; plus nobis, & camelis eorum vexationem timentes, quā duplicati itineris laborem. Cū fluuius à recta via serpentinis gyris declinaret, vtres nostros eius aquis plenos camelis deportandos, in vsum sequentis diei imponebamus. Post decem circiter dies, transactis aliquot oppidis, superatis arenarum periculosis montibus, latronum insidias euadentes ad Annam ciuitatem Arabiæ desertæ præcipuam in vtraque Euphratis ripa ædificatam peruenimus, vbi per mensem ferè integrum commoramur inuiti: postquam enim vectigalia pro mercibus commissario à Rege deputato soluerunt mercatores, & iam se itineri præpararent, aduenit alius ab eodem Rege missus, qui merces & bona illorum, quos à latronibus interfectos diximus, ad regiam exposceret vtilitatem: erant pauperrimi serui mercatorum, penè nihil habentes; sed nullus erat, qui tale responsum referre præsumeret: vnde longo per plures dies inito consilio, eligunt duos, Arabem vnum, Armenum alterum, qui oblato ducentorum nummorum munere, sicque Regi pacato, rei & successus totius veritatem enarrarent: in hac legatione plurimi dies præterierunt.

In ciuitate Anna reperimus alium mercatorum comitum à Babylo[n]e Aleppum proficiscentem, in quo duo erant Europei Christiani: primus erat Gallus dictus Dominus Dormage Chirurgus, hic Arabico more inducus è Curia Regis Arabum veniebat, vbi infirmo Regi suis remediis salutem restituerat; & Aleppum vnde fuerat vocatus, redibat. Alter erat Germanus nomine Bernardus mercator; quadam die cum ipsis apud

diuitem Persam mercatorem cœnauimus, hic Europeos officiis amicitiae prosequebatur, vt Aleppi ab iisdem Europeis similia reciperet: finitâ cœnâ multa de sua & nostra lege differuit Persa, & finxit se mirari, quomodo lex nostra tam malè de ipsorum Propheta Mahomet sentiret; cùm è contra ipsorum lex tam benè de Christo Propheta nostro loqueretur: cui non aliud respondimus; quàm Mahomet fuisse malum pseudopphetam, vnde non mirum si lex Christianorum vera de eo malè sentiat; Christum verò fuisse sanctissimum, & ita bonum; vt nullus, nisi peruersus, de eo malè loqui præsumat: his auditis Persa mirabundus siluit. Dum mensem integrum Annæ commoramur, intolerabiles sustinuimus calores; in principio, tum recreationis, tum solatij causa montes vicinos conscendebamus, vt purioris auræ frigiditatem captaremus; sed ab aliis id facere prohibemur, ne in Arabum insidias à comœatu separati incidamus.

Multi iam mortui erant, vel viribus defecerant cameli: quapropter mercatores iter secundo flumine vsque ad Hellam ciuitatem prosequi decreuerant; sed omnibus bene perpensis ac ponderatis, pristinum iter agendi modum resumunt: quapropter Arabiam deferentes; in alteram Euphratis ripam, mercibus, camelis, & aliis omnibus nauium ministerio transuectis, Mesopotamiam ingredimur. Maximi iam vigeant calores; sed fluminis suauiter præterlabentis recreatione, ac suauis aquarum illius potu, omnia non solum tolerabilia, sed & suauia videbantur.

Duodecim, quod superest itineris vsque Babylonem, diebus perfecimus: nobis cameli sunt adempti; deerant enim ad merces deferendas, & eorum loco asini subrogati. Semper littora Euphratis iam à dextris defluentis incedimus, plura ac maiora occurrunt oppida, occurrit etiam nobis campus bitumine è terræ visceribus erumpente

pente plenus, quo vñ sunt ædificatores turris Babel non longè inde distantis, quam vidimus ipsa die, qua Babylonem peruenimus; qua ciuitate summo manè ab Armenis perspecta, festiuè explosis ab omnibus catapultis salutatur: tribus vltimis diebus Euphrate relicto ad Tigris virentes ripas, palmis confitas properamus. Vnde sexto mensis Iulij circa meridiem ad nominatissimam Babylonem semidirutam peruenimus, ibique vsque ad diem sanctæ Mariæ Magdalenæ in hospitio Patrum Capucinorum commoramur, vbi continuis & intensissimis Solis ardoribus exusti, inquietos dies, & molestissimas noctes duximus. Quæ omnia, non solum grauissima, sed penè fuissent intolerabilia; nisi illorum Patrum nostrorum hospitem charitate, beneuolentia, aliisque modis fuisset recreati.

Tot ibi mansimus dies; quia mercatores camelis relictis, assumptisque ad iter proseguendum mulis, onera diuidere, ac ita leuiora & mulis proportionata efficere debuerant, & simul reales Hispanicos in moneram Persicam transcodere siue transmutare coacti: quod ad magnum Gubernatoris Babylonis cedit emolumentum.

C A P V T VII.

De itinere à Babylone vsque Assahanum.



EXpediti mercatores, vigesima tertia die mensis Iulij, ferè ad Solis occasum Babylonem egressi versùs Persidem proficiscuntur: noctu autem ambulant, ne nimio Solis calore molestantur; cum aliunde nullum sit in Perside periculum latronum; Rex enim Abbas suum à simili peste regnum expurgauit; vt etiam omnes ad illorum persecutionem & extinctionem animaret & cogeret, legem sanciuir, vt si quis à latronibus exspoliatus, vel interfectus fuisset, principaliores vrbs vel op-

pidi viciniore incolarum rationem facti redderent, propter quod plures ubique viarum custodes, quos *Rhadar* vocant, adhibentur.

Prima igitur nocte, confectis ad minus viginti quinque milliaribus, (ob continuam planitiem & mulorum celeritatem plurimum itineris conficitur) peruenimus ad quoddam oppidum ubi est fluuius nomine Dialach, quem supra pontem nauibus innixum pertransiuimus: sequenti nocte venimus in aliud oppidum satis magnum, aquarum riuus abundans, multisque palmis confitum, ubi intolerabili aestu plurimum afflicti, imò ad extremum vitæ periculum adducti fuimus; aliqui enim homines, imò & animalia, cum manè bene valerent, illa die perierunt: nullus fuit, qui tunc ad manducandum aliquid igne præpararet, & vt verum fatear, credebamus illum esse vltimum nobis vitæ diem; continuus quippe sudor guttatim defluens, è fronte instar fontis ad terram vsque cadebat: quapropter multi ex nostro comitatu in illo remanserunt oppido, vt iterum Babylonem redirent. Tertia die venimus ad aliud oppidum, ubi riuus aquæ decurrit. Quartâ attingimus vltimos Caldeæ fines, ubi est oppidum, quod amne non ita magno præterlabente, irrigatur, supra quem Rex Persidis Abbas capta Babylone pontem ex coctis construxit lateribus; vt ita Caldæam Persidi hoc ponte vnitam sociaret. Quinta die venimus ad ingentes destructæ ruinas Elimaidis, circa quas riuulus aquæ, insalubris ob nimiam grauitatem, præterlabitur: ibi omnia confusa, soli distincti apparent aquæductus: paulò inde digressi peruenimus ad portas, vt vocant Persidis; est enim angustus intra duos montes præruptos aditus, ibique præterlabitur fluuiolus, quem lapideo pertransiuimus ponte, statimque ad diffusam introgressi vallem, quam tota nocte incedentes transimus, & ad radices montis cuiusdam peruenimus. In illa valle, sicut & in aliis

aliis Persidis regionibus, sunt pastores casulas panno rudi confectas inhabitantes, qui sæpe locum ob pascuorum opportunitatem mutant.

Ad Solis occasum montem ascendimus, in cuius ascensu sepulchrum magnificum cuiusdam magni Principis, ut dicebatur, reperimus: tota nocte sensim descendentes montem, in quo; licet media esset æstas, plurimum frigui: peruenimus ad aliud oppidum ad radices cuiusdam rupis, ex qua riuulus aquæ promanat, constructum: illa die, qua ibidem mansimus, suspensus est homo, qui per illos montes discurrendo latrocinia exercens captus est: inde progressi post aliquot dies, quibus singulis vrbes aut oppida reperiiebantur, venimus ad quendam locum, cui mons altissimus imminabat, ad cuius fundamentum erant hominum figuræ, aliæque in vivo sculpta lapide: non longè inde quodam loco alteri substracto monti, ex qua maxima profluit aquarum copia, est quædam aula intra montem excisa, ubi plurimæ statuæ, aliæque artefacta visu pulcherrima, fontibus vndeque promanantibus conspiciuntur. Hæc omnia esse Romanorum opera traditione communi iactatur: hæc sunt in medio inter Babylonem & Aspahanum tractu. Ultra progredientes, ac multas vrbes, & oppida prætereuntes quorum nomina ex inaduertentia non notaui; solâ enim vsus memoriâ hæc scribo. Decima nona Augusti Aspahanum Persidis curiam, primum nostri terminum itineris faustè fœlicitérque peruenimus, ubi plurimis charitatis officiis, & manifesta amoris significatione à nostris Patribus excepti, ab omni viarum labore & fatione recreamur.

Paucis diebus elapsis, ad nos venit venerabilis Armenorum Patriarcha Moyse de fœlici aduentu nobis congratulaturus: cum quo variis colloquiis habitis, maximum eius in nos charitatis affectum animaduertimus; vale verò dicens determinato nobis die ad suum

nos Conuentum inuitauit. Quadam igitur die Sabathi, quæ apud eos maximæ est venerationis, Chulfam Armenorum ciuitatem duobus circiter milliaribus Asphanano distantem pergitur, vbi & à Patriarcha, & ab eius religiosis, quæ viginti numero censentur, benignè collecti, paulò post in Ecclesiam introducimur solemnem missam audituri.

Adest Sacerdos sacris vestibus indutus, casula tamen ad instar pluuialis vtens, quam supra brachia ad ceremonias exercendas necesse est replicari, in capite habet birretum ad modum thiatæ Pontificiæ; non quidem coronis tribus, sed aliis laboribus ex auro & argento intertextis exornatum, in cuius summitate crux est paruula: huic assistit Diaconus sola alba & stola amictus, qui continuò à tergo Sacerdotis decantat; ipse verò Sacerdos identidem ad populum conuersus ipsum benedicit, tempore offertorij Altare, quod est in medio capellæ, oblata deferentes sacerdos & ministri processionaliter circumeunt: præter Diaconum autem sunt plures alij ministri; sunt enim duo, qui baculos præ manibus habent, in quorum summitate est platina argentea, plurimis ex omni parte tintinnabulis munita, quæ sæpe, maximè tempore offertorij & cõsecrationis super caput celebrantis concutiunt: sunt alij etiam, qui argentea præ manibus habentes cimbala, sonore percutiunt: est denique alius cū thuribulo; alij verò cantant, & organa tangunt.

Finitâ missâ, quæ ferè duas consumpsit horas, nos ad aulam ingressui monasterij proximam abducunt, vbi postquam aliquandiu mansimus, venientem conspiciamus omnium religiosorum, aliorumque plurium processionem, insigni cantorum & musicalium instrumentorum celebritate deuotam, quæ postquam ad nos peruenit, iterum retrogrediens, nosque assumens simul cum Patriarcha ad Ecclesiam reduxit: quò postquam accessimus, omnibus ad lauandos pedes præparatis,

iussit

Iussit nos Patriarcha sedere; ipse verò genuflexus nostros cœpit lauare pedes, aliis interim versiculos, & antiphonas cantantibus: his finitis ex aqua, qua loci eramus, circumstantem aspersit populum dicens, ni fallor, quàm speciosi pedes Euangelizantium pacem, Euangelizantium bona: denique plurimam supra capita nostra aquam rosaceam effudit, & ita deuota hæc charitatis & hospitalitatis ceremonia fuit terminata.

Paulò post nos ad suum introducentes refectorium, ad instar nostrorum constructum (cùm enim prius more omnium orientalium humi sedentes ederent: exemplo nostrorum Patrum tabulas ex vtraque parte, aliàmque transuersam pro Superioribus adhibuerunt, & Lectorem) simul pransimus hæc post benedictionem mensæ ceremonia obseruatur; vt præses panem assummat, quem aliis omnibus offerendo quisque suam accipit partem: Et hoc pro nunc sufficiant, ad ipsos iterum reuertemur.

CAPUT VIII.

De meo exitu è Perside.

IAM nouem ab aduentu meo in Persidem effluxerant menses, quandò mihi discedendum esse intimatur: tunc enim Imperator Turcarum, ad recuperandum à Persis Babylonicum regnum, ingentem trecentorum, vt dicebatur, millium militum exercitum misit eo animo, vt vexatâ & destructâ Perside, transactis caloribus æstiuis in Chaldæam regionem calidissimam descenderet, eoque processit Turcarum exercitus, vt Amadam ciuitatem Aspahano itinere sex dierum solummodo distantem peruenerit, & destruxerit: sed in hoc perfidia & proditio Generalis exercitus Persici nomine Zenal Kan detecta, & morte plexa fuit. Cùm Persæ viribus, ac aperto Marte pugnare non possint contra Turcas potentio

tentiores ; illos tamen arte & fraudibus bellicis deuincunt ; cùm enim aduentantem audiunt ingentem illum exercitum Turcarum, qui multitudine potius quàm industria, & valore pugnant, collecto suo exercitu, qui ad minus quinquaginta continet millia militum ei obuiam veniunt, & ita Turcis appropinquant ; vt aliquandò vix itinere distent vnus diei, quo in loco sistunt, donec per exploratores exercitum Turcicum ad se moueri audiant : tunc enim & ipsi mouent, atque urbem aut oppidum, in quo stabant, omninò destruunt, domos euertunt, & alia quæ asportari non possunt, igne consumunt ; alimenta secum deferunt, aquas etiam veneno inficiunt ; & ita adueniens tam ingens Turcarum exercitus, ac nullis in illo sic destructo loco pro militibus alimentis ; imò nec pascuis pro tanta equorum multitudine repertis, breui tempore, quam secum deferunt, prouisione consumptâ miserrimè fame pereunt ; Persico interim exercitu ciborum copia ex vicinis vndique confluente prouinciis, lautè ac oppiparè conuiuante : & ita ingens ille exercitus equis etiam præ fame consumptis, penè dissipatus redire cogitur, quem Persæ insequentes viribus præstantes debilitatum adoriuntur, ac ita repetitis sæpe incursums penitus exterminant, suâque iterum populo redeunte reficiunt vrbes & oppida, quod facillimo sit negotio ; domus enim vt in pluribus, non lapidibus, nec lateribus coctis, sed crudis tantummodò, aut simplici terra paleis mixta construuntur : vnde perfidia, vt dixi, & proditione Generalis Persarum vsque Amadam exercitus Turcarum aduenerat, ipsamque ciuitatem direptam, ac penitus dirutam solo æquauerat, quæ cùm Regi Persarum innotuissent, ipsum suum Generalem aggreditur, ac securi percussum propria confodit manu.

Si tunc exercitus Turcarum versus Aspaham properasset, facilè hanc ciuitatem Persidis curiam, omnibus

præ

præ timore confusis aut fugientibus, cœpisset; totumque regnum ea victoria dissipasset: iam enim multi præparatos ad fugam habebant equos; alij autem Turcis nullo negotio cessissent: sed Deo omnia mirabiliter disponente (qui Turcam infensissimum, ac insolentissimum Christiani nominis hostem tanta non vult crescere potentia; propterea Persarum Regem ad ipsum continuis bellis occupandum conseruat) exercitus Turcarum non ausus procedere ultra, Babylonem petiit, ac obsessit; sed post quadraginta circiter dierum obsidionem resistentibus fortiter Persis; quamuis destructo penè ciuitatis muro, ob inopiam ciborum penè dissipatus re infecta discessit.

Dum exercitus Turcarum Aspahantum accederet, & imminentem ab insolentibus ex parte penè victoria Turcis ruinam omnes formidarent, longo Patrum nostrorum consilio decretum est, vt aliqui religiosi inde in alias missionis domos tenderent, ne omnes simul religiosi (eramus quippe septem) ruina ciuitatis implicarentur; cùm difficilè, imò impossibile esse iudicaretur, vt omnes in illis tumultibus latitarent; quod duobus aut tribus facilè fore credebatur: vnde missis sortibus inter alios electus versùs Bassaram accelerato itinere festino.

Decima nona mensis Maij Aspahano discedens vigesima nona Siras perueni, in itinere duæ vrbes & plura occurrunt oppida, vrbes sunt Comcha & Main; oppida verò Aspahaneq, Maiar, Madsudbeq, Annabat vbi plurimi & amœni sunt horti, Astecas supra riuum vbi optimus panis inuenitur, Duguerdu, Gombet, Etalla, vbi exigitur vectigal; Cusensar, Aspas vbi multi sunt Christiani ex Iberia translati, Guion vbi est pulcherrimus hortus, ac domus campestris quondam Gubernatoris Siracensis, Imonzadé vbi est locus deuotionis apud Persas, qui ibi dicunt vnum

ex suis Prophetis esse supultum, ibi est mons satis difficilis, post quem est vrbs Main, iuxta quam est fluuiolus: inde ad nouem milliaria est pons ex lateribus coctis supra quem fluuiolus traicitur: deinde occurrit Deh-calenter, postremò Policour.

Postquam Sirasi in nostra residentia mansi per quatuor dies, vltteriùs procedens octauo post discessum die portum sinus Persici, nomine Bandel-regh, appuli: viæ hîc sunt multum præ montibus & collibus arduæ, inuiæ, & vltimis tribus diebus inaquosæ: ibi enim aquæ tantummodò falsæ, vel fœtidæ reperiuntur: postquam enim montes terminantur, occurrit vastissima planities, quæ vix duobus diebus percurri potest; hanc mediam præterlabitur fluuiolus, cuius aquæ insalubres, ac falsæ sitim non extinguunt; bis in illa planitie traicitur: postea peruenitur ad quosdam puteos, vbi aqua præ limo fœtida est, sed mihi sitim dierum duorum sustinenti suavis apparuit: inter Syras & illum portû sola vrbs Casaron inuenitur, oppida pauca & contemnenda, plures pastorum casulæ portatiles. Secunda die vehemens mihi febris accidit, sed post tres dies quibus Casaron mansi (ibi enim erat domus illorum qui me deducebant) recessit: superata illa planitie portum prædictum peruenimus.

Bandel-regh est oppidum satis magnum, plurimis consitum palmis, paucae domus sunt lapideæ, omnes ferè ex terra, arundinibus, & ramis palmarum constructæ: ibi ardentissimos, cum tamen adhuc esset principium Iunij, sustinuimus calores quatuor continuis diebus, quibus hîc morari coacti fuimus. Ibi erat quidam Gubernator nostris infensissimus; quidam enim ex nostris Patribus arte subripuit ei quendam iuuenem Christianum ex India oriundum, quem à lege Christi peruersum ac in suam conuersum plurimum diligebat: sed non mihi nocuit, quia non potuit; litteras enim patentes Regis Persidis,

Perfidis, & Gubernatoris Syracensis mecum deferebam, quibus omnibus sub graui pœna iniungebatur, vt omnes liberum mihi transitum præberent, iundò & honorem conferrent: quas cùm illi legendas obtulissem, eas deosculatus capiti secundùm morem patriæ superposuit, & vni ex suis præcepit seruis, vt mihi domum prouideret, nec inuisit quæ deferebam Bassoram, scilicet taperem pro Ecclesia, & vinum pro missis, nec pro illis debitum vectigal exolui.

Quatuor elapsis diebus, obtentâ discedendi licentiâ, nauiculam ingredimur: sed illum tractum vno die prosperis flantibus auris traici solitum, ob aduersos ventos, tempestatesque continuas vix viginti diebus magno labore, ac periculo confecimus: cùm enim pro sex tantummodò diebus aquam prouidissent, nòsque exiguum deferremus viaticum, ad illas fuimus redacti angustias, vt paucula aqua tantùm bis in die ardentissimam sitim caloris æstu causatam paululùm subleuaremus, ac cepas, pisciculósque siccos sine pane ad mensuram per multos dies comederemus.

Postquam diù illa littora pedetentim circumlegimus, ad ostium tandem venimus Euphratis ac Tigris, admodùm hilares; quia labores iam finitos, pericula cessasse, & fami ac siti citò prouidendum credebamus: sed ventis contrariis, tumentibusque fluminis fluctibus integra die inter fluminis alueum sistentes, ieiunium violentum prolongauimus, maximùmque incurrimus vitæ periculum: cum enim nauæ nauiculam littori alligassent, ac omnes in terram exiliissent, post aliquod temporis spatium ventorum impetu, ac tumentium perpeti concussione fluctuum agitata soluitur nauicula, & versus mare aquis ac vento præcipitata currit: nauæ prodesse non possunt, immensæ quippe vndæ mortem minantur, si se illis ad nobis succurrendum committere præsumpserint; nos autem, qui in nauicu-

la remanseramus, remos qua poteramus vi trahentes, nauculam ad littus adducere conabamur; sed irritus reddebatur noster conatus, vndarum ex littore reflectentium impetu: vnde iam lassati, ac consilij inopes nauculam vndarum discretioni reliqueramus: iam per leucam & amplius versùs mare præceps defluerat, iamque ad ostium fluij peruenerat, vastissimum nobis mare comparebat: quid agere, quò nos vertere nesciebamus, iam decreueram me aquis committere, vt antequam naus ingrederetur mare, ripam non amplius quàm iactu lapidis distantem attingerem: sed omnes euidētissimum prædicebant naufragium, & hoc cum fundamento; si enim redeuntes fluctus à ripa nauculam remis impulsam repellebant, quantò magis me ipsum repellerent: in hoc constituti periculo omne nostrum solatium & auxilium in Deo collocauimus; cùm desperatam vndique videremus salutem.

Cùm nos in altum mare iam iam deuoluendos crederemus, Domino fauente ac votis nostris obsecundante, incipit mare refruere nanèque nostram intra flumen repellere, quod à suo quiescens feruore locum dedit vni nautæ, vt ad nos accederet, & chordam qua naus alligata erat, arriperet, eamque ad ripam deferret; & ita nautæ nauem attrahentes breui ingredi potuerunt: his factis antequam noctesceret, aliquantùm itineris confecimus, quandiu nobis fluxus maris poterat prodesse: quo finito ingruente iam nocte, missâ ad flumen anchorâ sistimus: dormiunt omnes, tota ipse nocte vigilo; præteriti siquidem periculo diei plurimùm exterritus, notato in fluminis ripa signo, maxima qua poteram diligentia prospiciebam continuò, vtrum naus sisteret, an impetu fluminis in mare raperetur.

Die sequenti prospero flante vento aliquot milliari-
bus coſectis ad initium palmarum peruenimus; non enim, quo falsa maris reflexu fluminis peruenit aqua,
palmae

palmarum nascuntur; & ita donec viginti emensa sint intra flumen milliaria, ambæ eius ripæ penitus denudatæ cernuntur; postea verò mira palmarum amœnitate virescunt: tunc nauicula exeuntes ad vicinum pergimus oppidum, ut ibi nos tot tantisque laboribus fatigatos, ac fame penè consumptos tantillum recrearemus; maximam ibi charitatis, urbanitatis, & hospitalitatis speciem apud Arabes reperimus; omnia quippe nobis necessaria abundè concessere: inde soluentes sequenti die ad aliud oppidum accedimus, ex quo erant aliqui qui nobiscum è Perside nauigauerant: ibi tota die sistimus illorum fruantes humanitate, postea naui nostra relicta exiguam admodum nauiculam conducentes, contrario semper flante vento, quatuor aut quinque dies ad reliquum itineris usque Bassoram conficiendum insumpsimus: cumque iam proximè accederemus, duos è nostris religiosi nobis obuiam procedentes offendimus, qui nos (tres enim eramus religiosi cum sæculari) assumentes in suam nauiculam, & ea quæ deferebamus transportantes breui Bassoram deducunt: & ita decima quinta Iulij, in vigilia scilicet Beatissimæ Virginis Mariæ de monte Carmelo, laboriosam nostram peregrinationem terminamus, ac breui à laboribus illius eximiâ Patrum nostrorum charitate recreamur: ibi ego per quindecim menses linguæ Arabicæ ac Persicæ addiscendæ mansi occupatus.

CAPUT IX.

Profectio mea Indica.

IAM per quindecim ferè menses in nostra Bassorensi residentia, linguæ Arabicæ addiscendæ manseram occupatus; cum ecce multiplicatis epistolis à nostro Visitatore generali in Indias Orientales ad Philosophiam nostris legendam religiosi fui euocatus: iam me

itineri siue navigationi, tam sinus Persici, quam Oceani Indici præparaueram.

Solent mercatores Lusitani duodecima, vel decima quinta circiter Octobris, post collectos palmarum fructus Bassora discedere: hoc anno scilicet millesimo sexcentesimo trigesimo primo coacti sunt accelerare profectionem: huius celeritatis causa fuit quidam iuuenis Lusitanus nomine Bartholomeus Correa, qui capto Ormusio adhuc puerulus in Persidem captiuus ductus est, & in domo Gubernatoris Syracensis Imongoli-Kan, tanquam puer eius honorarius educatus fuit: vnde multa eius consilia contra Lusitanos nouerat. Contigit vt ab ipso Gubernatore ad aliqua negotia Aüesam Bassoræ finitimam mitteretur, quò cum peruenisset, oblatâ hâc sibi aufugiendi opportunitate, Christianæ lëgis amore compulsus Bassoram, qua potuit celeritate, venit; duosque Mahometanos iam ab ipso penè conuersos adduxit: eius fugâ cognitâ, statim è Perside aliqui ab eodem Gubernatore missi aduolant, vt eum aut viuum, aut mortuum reducant: dantur illis litteræ commendatitiæ ad Bassoræ Gubernatorem, vt illum iuuenem illis tradat: his receptis vocat Gubernator Patres nostros, quibus alioquin maximè est affectus, interrogat de iuvene, illum venire iubet, non audet Gubernator illum Patribus eripere, sed tamen ipso consentiente, dum venit, in media rapitur via; tristes recedunt Patres; non tamen se illum habituros desperant, adeunt alia vice Gubernatorem secum ducentes Lusitanum mercatorem grauissimum, eique Indica munera offerunt iuxta morem patriæ, non enim vacuis manibus accedendum est: his placatus iuxta antiquum illud proloquium:

Munera placant homines, Deosque.

Patrûmque rationibus suâsus, iussit iterum iuuenem ad nostram deuenire potestatem. Hic ergo iuuenis, vt
ad

ad rem veniamus, nobis manifestauerat Gubernatorem Syrasensem misisse epistolas Gubernatori Bassorenfi, quibus cum rogabat ut classem Lusitanorum viginti quinque nauibus compositam sibi traderet, asseuerans se hac conditione ei pacem daturum: Persæ quippe exiguas tantum, nec pugnae idoneas habent naues. Cum Lusitani mercatores hæc audiuisent, & plures è Perside aduentantes cernerent, coeperunt suis statim consilere negotiis: vnde ex illo fluuiolo qui à flumine Euphrate Bassoram tendit, suas naues educentes, eas in fluuiio magno collocant, ipsasque magna custodiunt vigilantia, eâ quâ possunt diligentiam expediunt negotia, & naues dactilis onerant; sicque quartâ Octobris secundo flumine descendentes ad principium sinus Persici omnes conueniunt, ac post duos dies prospero flante vento carbasa pandunt.

Quinto nauigationis die conuenimus ad locum, vbi nullo flante vento tumentes sæuebant vnda, quæ naues transuersas maximè vexabant, ac penè funditus vertebant, & hoc tanto impetu, ut arbor nauis inclinata multum hinc inde ad aquam accederet: fuit apud omnes magnus naufragij metus; timebant enim, ne illius commotionis vi & impetu naues in duas partes fractæ submergerentur: diu sic fluctuauimus, naues aliquid detrimenti passæ sunt; sed Dominus nostri misertus ventum misit prosperum nobis, etiam aliquem contrarium experientibus.

Die sequenti occurrit nobis classis Lusitanorum militaris propè insulam Laram; ibi enim inuigilabant, ne ex portu Nichilu nauiculæ piscandis geminis destinatae egrederentur: vnde illis præuiis insulas Cais & Piloro prætereuntes, secunda die ad portum Congo venimus, ibique per aliquot sistimus dies, ut nouas merces naui imponeremus, quibus assumptis discedentes, & insulas Angan, Quexomis, & Ormusum

circumlegentes breui Mascatum peruenimus.

Soluunt mercatores vectigal Mascati, ibique aliquandiu solent remanere; donec aliæ naues ex portu Catifæ veniant, ac sic omnes simul vnitæ propter piratas in Indiam proficiscantur: quatuor tamen nauibus licentia discedendi, aliásque præcedendi concessa est: cum enim essent equis onustæ, ad illorum alimentum multum expendebant. Vnam ex illis ascendens Mascato discessi, tribus primis diebus paulatim procedentes ad initium sinus Persici venimus, vbi sub vesperam flante meridionali vento nobis contrario tempestas suscitatur: sed nauarcho maximè perito nauem moderante, vix sensimus tempestatem: aliæ naues hinc inde dispersæ plurimum laborarunt; vni ex illis arbor ex ventorum impetu fracta est, vnde ad portum Gnadil resarciendi causâ recessit; alia penè fuit submersa, & ita se vento adaptans in contrariam viam ferebatur. Die illucescente duæ tantum naues vnitæ remanserunt: vnde simul procedentes ad Indiæ littora peruenimus, quæ circumlegentes ciuitatem Diuiensem appellimus. Est ciuitas satis magna in duas partes diuisa; in vna quidem Lusitani ciuitatis Domini, in interiori alia gentiles ibi suos ritus exercentes habitant; hac enim conditione ciuitatem Lusitanis ultro tradiderunt: est pulchris exornata domibus, constituta in insula ad sex milliaria longa, in ea est castrum munitissimum, ac penè inexpugnabile; magnam eius partem circuit mare; duplici muro valido, duplicique fossa vallatur; intus sunt plures domus ac Ecclesiæ, vnde belli tempore se omnes Lusitani facillè intus colligere possunt: inde quotannis plures naues versùs Mecam nauigant merces Indicas, vt telas subtilissimas, & aromata deferentes,

Anno præcedenti fames horribilis Indias penè consumperat, homines ad varias transmigrationes compulerat, præsertim iuxta ciuitates maritimas; sed tantæ
inco

incolarum ac aduenarum multitudini alimenta non sufficiebant; vnde per compita, per vicos ciuitatis, & plateas homines miseranda fame enecati iacebant, eoque calamitas deuenierat, vt cadauera mortuorum non sepelirentur; ac proinde omnia erant horrore ac foetore plena. Quando ciuitatem Diuiensem appuli, adhuc crania & ossa mortuorum in ipsis vicis reperiabantur, & cibi carissimo adhuc pretio vendebantur: licet fames ex vna parte Lusitanis nocuerit; plurimum tamen ex alia parte profecit: decreuerat enim magnus Mogor Indiarum Imperator obsidere hanc ciuitatem, iamque turbas militum ad eam destinauerat, sed omnes hac fame perierunt.

Postquam aliquot diebus hic in nostro mansi Conuentu, oblata nauigandi occasione, iterum me mari committo, ac breui illas centum leucas confecimus, quæ inter ciuitates Goënsen, & Diuiensem numerantur: vnde in vigilia Sancti Andreæ Apostoli sub vespere portum Goënsen, vltimum itineris mei terminum, appulimus. E naui ego & alij exeuntes ad ciuitatem inde tribus leucis distantem properamus parua delati nauiculâ, media nocte peruenimus; & sic in domo eius, qui nos deduxerat, vsque ad matutinum tempus quiescimus: summo mane ad nostrum Conuentum accedo, ibi per octo annos continuos mansurus.



LIBER SECVNDVS
ITINERARII

In quo

Plura Orientis Imperia, Regna, &
Prouinciæ describuntur.

CAPVT PRIMVM.

De Imperio Turcarum.

MAXIMUM Turcarum Imperium hîc
leuiter describendum, ad tres orbis an-
tiqui partes dilatatur; ac plurima, &
florētissima continet regna, innume-
rāsque propemodum ciuitates: sedes
illius sæpe mutata, tandem in nobi-
lissima ciuitate Constantinopoli in Græcia, in medio
maris albi & nigri sita, fixaque fuit.

Hoc Imperium magnam partem Europæ, maiorem
Africæ, & maximam Asiæ continet: integrum volu-
men ad exactam sui descriptionem exigeret; sed paucis
illud in præsentī delineabo, cū enim aliqua eius re-
gna sim descripturus, de ipso prius agere in communi
necessarium duxi.

Turcarum Imperio principium dedit Mahometh
Arabs,

Arabs, sæculo ſeptimo à natiuitate Chriſti decurrente: hic vili ſtemmate natus; imò ſeruus Abdemonaplis Arabis fuit; erat ignarus, ſed valde aſtutus; vnde ſic dominæ ſuæ Cadigæ captiuauit amorem, vt mortuo, marito eam habuerit vxorem, & ipſius decedentis hæres vniuerſalis inſtitutus fuerit. Iam diuitiis potens ad regnum aſpirat, quod cùm nec iure, nec vi poſſet arripere, dolo & ficta ſanctitate, communi obtinet applauſu; ſe fingit Prophetam, captus, cœlitum viſiones & colloquia, ac triumphalem ſupra Borac in paradifum ſui ingreſſum ſimulat. Suaſionibus Bayras Iacobitæ & Sergij monachi plures hæreſes ſeminat; maximè contra Chriſti Domini diuinitatem, ſucceſſor Arrij, & præcurſor Antichriſti factus. Vt eius impoſtura Chriſtianis, & Iudæis plauſibilior appareret, ſuum legis Alcoranum partim ex Euangelio, partim ex veteri Teſtamento pluribus admixtis fabulis compoſuit, aliquos ritus Chriſtianos, alios Iudaicos admittens: Moyſem ſatetur Dei Legislatorem, Chriſtum Dei Prophetam eiufdem legis reformatorem, ſeipſum tandem vltimum diuinæ legis inſtauratorem gloriatur: legem ipſam terroribus, & minis à Moyſe promulgatam, miraculis & manſuetudine à Chriſto reformatam, pœnis & gladio iactat à ſe inſtauratam.

Exurgens hoc Imperium, aliquandiu limitibus Arabiæ coërcitum, poſtea ad Caldæam & Perſidem dilatatum, tandem maximam partem Aſiæ, Africæ, & Europæ ſub diuerſis Regibus & Imperatoribus inuaſit, vt libro quarto capite ſexto ſigillatim expendetur.

In Europa totam continet Græciam in plura regna ſiue Prouincias diuiſam, videlicet Achaiam, Peloponneſum ſiue Moream, Epirum, Macedoniam, & Thraciam cuius caput eſt Conſtantinopolis, vbi ſuorum ſedem habet Imperatorum, cùm priùs in pluribus aliis ciuitatibus & nouiſſimè Adrianopoli in eadem Græcia

fixisset : plures , antiquas , diuites , & pulcherrimas in Græcia possidet ciuitates omnibus notas : insuper possidet Illirium siue Sclauoniam, Bosniam, Seruiam, Bulgariam , Tauricam Chersonesum ; & magnam partem Croaciæ , & maximam Pannoniæ , in eâque præcipuas ciuitates Budam , Albam Regalem, Belgradum & alias: Tributarios autem habet Principes Transsiluaniæ, Moldauiæ, Valaquiæ, ac Rempublicam Epidauri, vulgò *Raguse*.

In Asia multò plura continet regna , & primò totam Asiam minorem in amplissimas Naatoliæ & Caramaniæ Prouincias , siue regna maxima diuisam : nominatas & antiquas continentem ciuitates Trebifundam ad mare nigrum, Smirnam, Troiam, & alias ad Archipelagum, Cæsaream, Capadocum, Niceam, nunc dictam Esnich , ex Niceno Concilio celeberrimam , & alias complures ; vltra versùs Orientem , continet Regnum Syriæ nobilissimum , in eoque celeberrimas ciuitates Damascum, Anthiochiam , Aleppum , Aman, Tortosam, siue Orthosiam, Tripolim, Beritum, Sidonem, Tyrium, Ptolemaidam , aliàsque multas : ad Syriæ Septentrionem continet Mesopotamiam , & in ipsa ciuitates Ninuëm nunc dictam Mussul, Diarbequir, Orpham, olim Vr patriam Abrahæ , & alias : deinde partem Armeniæ, & in ipsa ciuitates Arzerum, Van, Bethlis, & alias : continet præterea Caldæam , & in ipsa celeberrimam ciuitatem Babylonem, quondam Turcici caput Imperij, nunc dictam Bagded , Hëllam , & alias : item continet Arabiam fœlicem, & in ipsa plurimas ciuitates ; ad mare rubrum Meccham Pseudoprophetæ Mahometis patriam , Medinam eius sepulchro apud ipsos gloriosam, Aden , Iudam , Sues ; & ad sinum Persicum Bassoram, Lassar , Catifam , Barem , & alias saltem tributarias : tandem continet Palæstinam nobilissimam orbis terrarum portionem, & in ipsa plures celeberrimas, sed penè destru

destructas ciuitates Hierusalem, Nazareth, Bethleem, Hebron, Sefet, & alias.

In Africa denique multa etiam regna continet, videlicet Ægyptum, & in ipsa vastissimam ciuitatem Memphim, nunc vulgò *le grand Caire*, Alexandriam adhuc suo portu celebrem, quamuis antiquam gloriam suis ruinis desentem, Tamiatam, Roxetum, & alias: item Lybiam, & Nubiam: item regnum Carthaginense, à Metropoli dictum de Tunez: item regna Tripolis, & Algezitarum, aliàque plura; quæ vel ditioni, vel saltem deuotioni ipsius subduntur, vt sunt regna Marrocco, & Fez.

Præterea continet penè omnes insulas Orientales maris Mediterranei, vt Cyprum, Rhodum, & alias in toto mari dispersas.

C A P V T II.

Descriptio Terra Sanctæ.

HÆc Mundi prouincia, quam Terram Sanctam, nominamus, pluribus aliis nominibus insignitur; olim dicta est Terra Chanaam, deinde Terra promissionis, quia fuit à Deo promissa Abraham: item Palæstina, Iudæa, & aliis: sed nunc communiùs Terra Sancta, & meritò nominatur, tum quia patria fuit Christi Domini, Sanctissimæ Virginis Mariæ, omnium Sanctorum antiqui Testamenti, Patriarcharum, Prophetarum, item præcipuorum noui Testamèti, qui tempora Christi attigerunt, vt Sancti Ioseph, Sancti Ioannis Baptistæ præcursoris, Apostolorum, & aliorum innumerabilium; quia etiam fuit locus, in quo salus humani generis reparata fuit; & in quo tanquam in Sanctuario, redemptionis nostræ monumenta conseruantur, videlicet in Nazareth Incarnationis, in Bethleem Natiuitatis, in Hierusalem Passionis, Sepulturæ, & Resurre

44 *Itinerarium Orientale R. P. Philippi.*
surrectionis , & alibi alia Christi vestigia.

Haber Terra Sancta suos limites ab Oriente Iordanem , ab Occidente mare Mediterraneum , à Septentrione regnum Syriae , ab Austro desertum Pharan , & Ægyptum : eius longitudo à Dan ciuitate sita ad radices Libani (quæ postea Cæsarea Philippi & Pancas dicta est) vsque Bersabee ciuitatem Tribus Simeonis , ad Austrum sitam , continet sexaginta septem leucas : latitudo verò à Iordane vsque ad mare Mediterraneum continet sexdecim , vel octodecim. Fuit prima portio Terræ habitata : nam si traditioni satis receptæ credamus , Adam primus parens in campo Damasceno prope Hebron conditus fuit cum Eua : & licet in Paradisum terrestrem translati fuerint ; tamen propter peccatum ab eodem mox expulsi , ad pristinum originis locum tandem redierunt , ibique morientes sepulti sunt , in monte scilicet Caluario , vbi Christus Dominus Crucis affixus eiusdem primi parentis peccatum effuso sanguine diluit. Post mortem eorum , filij Seth succedentes hanc vsque ad diluuium incoluerunt : & post diluuium Chanaa filius Chan , nepos Noë eius fuit incola , ab eoque denominationem accepit ; quam multis sæculis conseruauit.

Quando Sanctus Abraham Patriarcha ex Vr Caldæorum diuino mandato recessit , & in hanc regionem profectus Hebron incoluit , tota regio pluribus diuisa Regulis subiacebat , inter quos & bella sæuiebant : legitur enim Genesis 14. quòd Amraphel , Rex Sennaar , & Arioch Rex Ponti , & Chodorlahomor Rex Clamitarum , & Thadal Rex gentium inirent bellum contra Bara Regem Sodomorum , & contra Bersa Regem Gomorræ , & contra Sennaab Regem Adamæ , & contra Semeber Regem Seboim , contraque Regem Balæ , ipsa est Segor.

Sed nobilior cunctis erat Rex Salem , quæ postea dicta

dicta est Hierusalem, venerabilis senex & Sacerdos Domini Melchisedech, quem aliqui dicunt esse Sem filium Noë: hic panem & vinum in Sacrificium offerens in figuram Sanctissimi Eucharistiæ Sacramenti, Abrahæ de prælio reuertenti & gloriosè triumphanti benedixit: tunc Terra illa vocabatur Chanaam, quam incolabant Chananei, Ethei, Gebusei, Gergefei, & alij populi.

Dum ibi commoratur, tanquam aduena & peregrinus, Sanctus Patriarcha, in præmium suæ fidelitatis & obedientiæ, prædictionem immensæ posteritatis suæ, ex qua Christus nasceretur; & promissionem Terræ illius in hæreditatem filiorum accipit: tunc quatuor illæ nefandæ ciuitates Sodoma, Gomorra, Seboin, & Adama cælesti igne in pœnam scelerum concremantur.

Huic Sancto Patriarchæ succedit filius Isaac, & nepos Iacob; qui duodecim habuit filios; videlicet ex Lia vxore Ruben, Simeon, Leui, Iudam, Issachar, & Zabulon: ex Rachele item vxore habuit Ioseph & Benjamin: ex Bala famula Rachelis, Dan, & Neththali: & ex Zelpha ancilla Liæ, Gad, & Azer; insuper habuit filiam ex Lia nomine Dinam: cùm autem Iacob præcæteris filiis Ioseph amplius diligeret, eius ruinæ motuum, sed simul gloriæ occasionem dedit; nam à fratribus venditus in Ægyptum ducitur, vbi post multos labores in præmium inchoatum suæ humiliationis & Sanctitatis, ad totius Ægypti sub Rege dominium eleuatur: tunc patri & fratribus cum paruulis ipsorum ad se vocatis, concessit terram Gessem, pascendis pecoribus opportunam: verùm mortuo Ioseph ingrati Ægyptij eius nepotes dirè vexantes exterminare volebant; sed Deus recordatus fœderis cum Abraham patre ipsorum initi, Moysen misit, qui eos ex dira seruitute liberans, inauditis prodigiis, & Ægyptiorum pœnis ex illis

illis finibus eduxit, & tandem post quadraginta peregrinationis in desertis annos, ad terminos Terræ promissæ perduxit, quos Iosué successor eius iisdem penè prodigiis Chananeos superans illuc introduxit.

Ad mandatum Domini in duodecim partes diuisa, cuique Tribui sua portio cessit. In continente Arabum trans Iordanem, & ad eius ripas confederunt Tribus Ruben ad Austrum, dimidia Tribus Manasses ad Aquilonem, & media inter vtramque Tribus Gad: Citra Iordanem verò omnes aliæ suam fixere sedem, & quælibet portionem sibi sorte datam possedit. Hæc autem distributio ex Iosepho lib. 5. antiquitatum Iudaicarum cap. 1. sic facta fuisse describitur, Tribui Iudæ obuenit tota superior Iudæa pertingens vsque Hierosolymam: latitudo verò eius Sodomiticum lacum attingebat: in hac forte vrbes erant Ascalon & Gaza (has duas vrbes in Tribu Simeonis collocat Adricomius) Secundo loco Simeonis sortita est Idumæ partem Ægypto, & Arabiæ conterminam. Beniamitæ deinde regionem sortiti sunt, quæ à Iordane amne vsque ad mare protenditur, latitudo verò eius patet Hierosolyma inter & Bethela; angustissima autem hæc sors fuit propter agri bonitatem Hierosolyma enim & Hierichuntem acceperunt. Ephræmi autem Tribus terram à Iordane vsque ad Gadara in longum protensam sortita est, in latum parentem à Bethelis vsque ad magnum campum. Manasseridis item dimidia pars agrum à Iordane vsque ad Dora urbem latitudine vsque ad Bethsana, quæ nunc Scythopolis vocatur. Post hos Isacharis in longum parentem à flumine vsque ad Carmelum montem, latitudinis verò mons Itabyrius fuit terminus. Zabulonitæ vsque ad Genesaritem lacum terram Carmelo & mari contiguam sunt sortiti. Quæ autem regio post Carmelum sita est, conuallis ex re nomen habens, tota Asseritis cessit, quæ ad Sidonem est obuersa: in hac portio-

ne fuit vrbs Arce , alio nomine Actipus. Quæ verò ad Orientem spectant vsque ad Damascum urbem , & superior Galilæa Neththalitis obtrigit vsque ad Libanum montem , & Iordanis fontes, qui ex hoc monte oriuntur , qua fines sunt Arces vrbs versùs Septentriones sitæ. Potrò Danitæ adepti sunt quicquid vallis ad occidentem solem vergit Azoto & Doris terminati : horum est Iamnia tota & Gitta , & totus ager, qui ab Accarone pertingit vsque ad montem à quo Iudæ Tribus initium fecit.

In tres principales provincias tota hæc regio diuidebatur ; videlicet in Iudæam quæ partem Australem occupabat ; in Galilæam Septentrionali in parte sitam ; & in Samariam inter alias mediam : hæ singulæ in alias minores prouincias , videlicet Iturcæ , Traconitidis, Abilinæ & similes subdiuidebantur.

Plures olim & inclitas continebat ciuitates , prima, aliarum Princeps, & Regia fuit Hierusalem triplici circumdata muro, altissimis decorata turribus, Regis throno , & summi Pontificis sede nobilis, ædificiorum maiestate conspicua , templi Salomonis gloria celebris ; nunc ruinis plena antiquum deflet honorem , penitusque deserta maneret ; nisi redemptionis humanæ monumenta conseruans, Christianorum illuc deuotionis causa proficiscentium frequentia repleretur. Secunda fuit item Regia ciuitas Samaria, quæ in Tribu Ephraïm sita, diuiso Iudaico regno , Regum Israël curia multis extitit annis. Fuit ciuitas Hierico amœnissima, ad Iordanis ripas declinans. Fuit Hebron sancti Abrahæ , & aliorum Patriarcharum habitatione , & sepultura celebris. Fuit Bethulia à sanctæ Iudith mansionem & cædem Holofernus nominata. Fuit Cæsarea Palæstinæ amplissima, Centurionis conuersione nobilitata. Fuerunt & aliæ ad littus maris Mediterranei consequentes ciuitates , videlicet Ioppe , Accaron , Geth prope quam Cete
Ionan

Ionam euomuit, Ascalon, Azotus, & Gaza. Fuerunt tandem ad mare Galileæ Tiberias, Bethsaida sanctorum Apostolorum Petri, Andreæ, Ioannis, Iacobi, & Philippi patria, Corozain, Capharnaum, & aliæ cum infinitis oppidis & pagis: sed hæ omnes ciuitates vix, vbi fuerint, suis apparent vestigiis; solæ aliquæ vt Nazareth, & Bethleem ob sanctuaria, quæ continent, diuina prouidentia conseruantur; illa enim, quia patria Christi Iesu, Mariæ, Ioseph, & Ioachim; hæc verò, quia locus natiuitatis Christi fuit, æternam merentur durationem.

Quantum ab antiqua illa decidit gloria, quotidie vident, qui ibi peregrinantur; in Galilea vltra Nazareth penè destructam, vix duo oppida in mea peregrinatione reperi, scilicet Sefori, & Debora; in campo magno Esdrelon vrbes solo nomine, sed reipsa pagos Genim, & Naim à monte Thabor conspexi; ita vt honorabile desertum appareat: vnde quàm mutata est ab illa Palæstina, quam sacri codices innumeris vrbibus, & oppidis plenam, populis adinstar arenæ maris multiplicatis habitatam, omnium abundantia rerum diuitem, gloriosam, florentem, & velut Paradisum Dei describunt.

Montes habet plurimos, & in sacris litteris celeberrimos: habet prope Hierusalem interiecta valle Iosaphat montem Oliueti Christi Domini ad cælos ascendentis, signatum vestigiis: habet montes Ephraim, & Samariæ: montem Gelboë ob ruinam & mortem Saül Regis & Ionathæ immensis Dauidis Prophetæ lachrymis deploratum, & imprecationibus maledictum: habet montem Hermon, proximūque montem Thabor Christi transfigurati gloria refulgentem; habet montem Bethulio, proximūque alium in quo Christus Dominus suis discipulis beatitudines prædicauit: habet inclitum nostrum Carmelum, toties in scripturis decantatum, tot Sanctorum ordinis nostri eremitarum habitacu

habitaculum : habet tandem intra muros Hierusalem alios sanctiores, toties à Christo visitatos , montem Moria in quo templum Salomonis eminebat, montem Sion vltima Christi cœna , & Spiritus sancti aduentu consecratum ; & Sacratissimum Caluariz montem ex sacratissima Christi è cruce pendentis morte lugentē & gloriosa eiusdem resurrectione triumphantem.

Quamuis Iudæi triplici captiuitate in scelerum suorum , & maximè idololatriæ pœnam mulctati ad Assyrios à Nabuchodonosor translati fuerint, elapso tamen pœnæ tempore, post septuaginta annos, sub Cyro Persarum Monarcha reditum ad suam patriam inchoarunt, & breui sub Dario compleuerunt : ibique, cùm ante sub Iudicibus & Regibus permanissent , vsque ad Vespasianum & Titum Romanos imperatores sub Principibus perseuerarunt : tunc enim in pœnam execrandi sacrilegij in morte Saluatoris commissi, flammâ, ferrôque deleta patria, per orbem disperguntur , vt vilissima venduntur mancipia , & nunquam redituri in patriam, vbique aduenæ & quasi peregrini, sine lege, sine Rege, sine templo & sacrificijs viuentes , ab omnibus diuexantur : tunc terra illa Christianis primò per multa sæcula, deinde Saracenis subiicitur iterum sub Godefredo Bullioneo Christianis Principibus restituta , nec vno sæculo floret: sed tandem sub Saladino Ægypti Calipha deuictis & pulsis christianis, Mahometanorum legibus tyrannicè subacta, suam deslet captiuitatem & miseriam.

Non alium habet Palestina fluuium præter Iordanem, qui eam ab Arabia diuidit, totamque à Septentrione ad Austrum decurrens exhilarat ; plures autem habet fluuiolos, siue torrentes , scilicet Arnon qui eodem pene cursu ac Iordanis directus , Tribus Gad, & Ruben tràns Iordanem positas suis aquis fœcundat Torrens Cisson, qui mediū percurrens campum Eldreló, partim in mare Mediterraneum, partim in mare Galileæ

decurrit; hic in sacris litteris est celeberrimus: Torrens Carith, qui sanctum Eliam Patriarcham nostrum tempore siccitatis potando, nomen æternum meruit: Torrens Cedron in valle Iosaphat inter montes Oliueti & Sion decurrens: Torrens Ægypti meridionalis Palæstinæ terminus, Besor, Sorec, & alij.

Fructus eisdem profert, quos nostra Europa; sed iuxta mare mortuum ad perpetuam diuinæ vindictæ memoriæ, quæ in nefandi pœnam sceleris quatuor illas Ciuitates igne consumpsit, poma nascuntur extrinsecus pulchra visu, nostrisque simillima; intrinsecus autem solam putredinem continentia, in cineres & fauillas dissoluntur.

Terram sanctam multi, tam sancti Patres, quàm alij scriptores diffuse descripserunt, vt Iosephus Adricomius & alij: sed hæc pauca ex multis decripsisse, ad aliqualem eius noticiam, sufficiat.

C A P V T III.

Descriptio Regni Sirie.

Siriæ Regnum olim nobilissimum fuit; iam à primæ-
Sua decedit gloria. Turca enim venit in mundum, vt destruat mundum, quod ex pluribus huius Regni maximis ciuitatibus destructis apparet: huius rei causam superius attulimus. Reges Syriæ olim fuere potentissimi, vt ex sacris constat literis, aliisque circum dominati sunt Regnis.

Syria ab Oriente terminatur fluuio Euphrate & Arabia deserta, ab Occidente mari Mediterraneo, à Septentrione monte Aman siue Asia minori, à Meridie verò Palestinâ. Duodecim circiter diebus in longitudinem percurritur, duobus verò in latitudinem; multas vastas & amœnas habet planities, multos etiam & asperrimos, præsertim iuxta mare continet montes. Terra ex se fecunda

cunda est ; sed plurimùm ob incolarum defectum deserta , & solùm culta circa Ciuitates ; fructus eosdem, quos Europa gignit.

Præter Euphratem suum orientalem terminum, nullos præter Orontem fluuios; multos verò habet fluuiolos. Orontes prope Libanum nascitur , & à Meridie in Septentrionem decurrit , in suo cursu Ciuitates Aman & Anthiochiam lustrat , ac in mare Mediterraneum, iam multis auctus fluuiolis , riulisque confluit: valde angustus, sed profundus est. Aleppi est fluuiolus nomine Cingus. Damasci sunt duo Farfar & Abana quondam denominati, vt ex libris Regum habetur : à parte orientali ac meridionali Libani scaturiūt fluuioli Ior & Dan, qui simul confluentes Iordanem efficiunt, qui Syriæ terminis egressus, ac in Austrū procurrrens Palæstinā ab Arabia discriminat, in suo cursu mare Galileæ præterfluens, in mare mortuum decurrit ibique terminatus emoritur.

Aliquas habet & pulchras ciuitates ; non tam industria Turcarum , quàm mercatorum aduolantium commercio celebres. Prima dignitate est Damascus ciuitas magna & amcenissima , quondam Syrorum curia Regum, hortorum multitudine ac fecunditate abundans: In ea patet locus vbi sanctus Paulus Apostolus ab Anania baptizatus traditur , nec multò longè à ciuitate locus demonstratur , in quo ei Christus apparuit , ac ex persecutore Christianorum , suum effecit Apostolum, in vas electionis conuersum.

Secunda Ciuitas est Antiochia, vulgò dicta Antachia, olim verò Reblata, partim in decliui montis, partim in plano posita, habens intra muros duos montes , in quorum altiori destructum apparet Castellum : muri eius ex quadro lapide constructi, quadraginta septem turribus quadris ornati adhuc perseverant; ntus autem omnia pene destructa, plena ruinis & hortis: est pons lapideus supra Orentem fluuium, extra muros eius defluen-

tem: ad hanc ciuitatem Syriæ curia sæpe translata fuit; in ea primò fideles denominati sunt Christiani. Ibi prima D. Petri Apostolorum Principis & Vicarij Christi sedes extitit, nunc Patriarchatus dignitate fulget.

Tertia est Ciuitas Aleppi olim dicta Bœrca, quæ omnes alias diuitiis & maiestate præcellit; est maxima; dicitur enim habere viginti sex mille domos, trecenta templa inter quæ sunt septem præcipua plumbo tecta: circuitus murorū ad sex milliaria diffunditur, qui duodecim portis, & tribus subvrbis habitatis vt plurimū à Christianis decorantur. Castellum eius maximum à Ioab Duce Regis Dauid, vt dicitur, fundatum; quasi in media Ciuitate prominet in rupe cincta fossis aqua plenis. Hæc Ciuitas est celeberrimum Orientis emporium: ibi enim plurimi mercatores Europei, Galli videlicet, Angli, Veneri, & Baraui: similiter & orientales, videlicet Turcæ, Græci, & Armeni præsertim qui quotannis è Perside venientes immensam Serici copiam, aliásque merces afferunt. Prope templa multæ sunt turres rotundæ satis excelsæ, ex quibus clamantes aliqui ad hoc deputati alios ad orationem determinatis horis inuitāt; campanarum enim vsum abhorrent: hæ turres mirabiliter ciuitatem exornant. Domus vt plurimū sunt lapideæ, & pulchriores quàm viderim in omni Turcarum ditione. In hac ciuitate sunt duo monasteria religiosorum Mahometicæ legis, in quarum vna præcipuum obseruantix & religionis dogma viget in exercendis choreis extatico quodam modo.

Quarta est Ciuitas Aman, olim dicta Apamen, supra Orontem fluuiū. nunc magna ex parte destructa olim vt apparet fuit pulcherrima & munitissima: mœnia quippe ex lapidibus albis & nigris mixta, castrum verò supra collein dirutū comparet: est cincta collibus, ac in fundo collocata, quāuis mœnia supra colles emineāt: hæ Ciuitates sicut & aliæ sed minores in medio Regni sitæ sunt.

In

In parte maritima, quæ partim Phœnicia dicitur, plures & antiquæ sunt Ciuitates, ac plurimum in sacris & prophanis litteris nominatæ. Prima ordine incipiendo à Septentrione versùs meridiem est Tortosa, olim Orthosia, & Anteradus, prope insulam Aradus, pene destructa, vbi latrones Arabes commorantur; non longè inde est Ecclesia Sancti Georgij à Græcis culta, maximæ apud eos deuotionis.

Secunda est Tripolis, sic dicta, quia tripartita, ac quasi in tres Ciuitates diuisa procul apparet, est sita ad radices montis Libani; quâuis inter ipsam & Libanum sit planities duas leucas continens longa & lata, viridariis plena, arboribus maximè moris confita, ibi quippe plurimum Serici cõficitur: hanc planitiem percurrit fluuiolus nomine Sanctus, riuulis è monte Libano manantibus auctus, qui in suo cursu mediam secat ciuitatem: distat à mari dimidia leuca: ibi est portus non adeo à tempestatibus securus; aliqui enim tantum sunt scopuli, qui tumentes maris vndas aliquantulum effringant; sunt tamen septem turres tormentis bellicis munitæ, quæ illum à Piratis securum reddunt: inter eas est turris dicta Amoris, à quodam Veneto cum muliere Turca inuento, ne occideretur, ædificata: post Tripolim est fluuius Adonis siue Canis, qui sub Biblo Ciuitate, vulgò *Zebellet*, supra montem constructa decurrens in mare delabitur.

Post Tripolim ad Austrum tendentibus occurrit, in loco valde amœno, Berithus antiqua etiam Ciuitas, & ob miraculum Sancti Crucifixi, (qui à Iudæis vulneratus copiosum effudit sanguinem) celeberrima: ibi prope littus maris est locus cauernosus, vbi sanctus Georgius occidit Draconem ad liberandam Regis Berithi filiam. In hac ciuitate inueniuntur ficus indici inferius describendi: hanc renouauit Princeps Sidoniensis siue Mir Fecardin, ibi siquidem pulchrum sibi palatium cõstruxit, in quo ordinariè morabatur, vulgò dicitur *Barut*.

Tertia in ordine est Sidon Ciuitas, toties in sacris litteris nominata; olim fuit maxima, vt ex eius ruinis apparet, etiam ad vicinos colles pertingentibus: nunc mediocris magnitudinis; diuitiis tamen & mercibus diues; habet Castellum in mare procurrans, quo portus à Piratis defenditur; cùm tamen ventis & tempestatibus sic obnoxius; solo enim scopulo ab illis vtrumque munitur, vulgò dicitur *Saita*. Prope portam, qua itur Cæsaream, sunt ruinæ cuiusdam capellæ in loco, vbi Cananea accessit ad Christum. Territorium Sidoniense duplici fluuio terminatur; à Septentrione non longè à Berytho est Adonis; à Meridie verò inter Sarephtham & Tyrum est Eleuterus, nunc dictus Valania, quia Ciuitatem Valaniam, olim Balaneam alluit.

Quarta est Tyrus, olim potentia & gloria fulgens, mari cinctâ; sed ab Alexandro magno congestâ arenâ, hoc maris cingulum, in quo Tyrij plurimum fidebant, vt à Propheta fuerat pronuntiatum, sublatum est: iam plurimum in mare procutrit, vnde procul apparet insula: nunc penitus est destructa; vix ibi paucae domus piscatores incolas habent. Ingentes domorum hinc illinc semidirutarum ruinæ comparent: vulgò *Elser* dicitur, habuit olim nouemdecim milliaria in circuitu, duos habet portus, vnum à parte Septentrionali, alium intra murorum ruinas: ibi decem visuntur marmoreæ columnæ, & ruinæ Cathedralis Ecclesiæ; prope portam verò orientalem apparent ruinæ Ecclesiarum Sancti Stephani, & Sancti Ioannis Euangelistæ. Non longè à Tyro conspiciuntur fontes à vicino monte tanto impetu scaturientes, vt aliquot vertant rotas molendinorum, postea Mare intrant: hi fontes dicuntur à Salomone, Puteus aquarum viuentium; sunt quatuor origines muris ex lapide quadro conclusæ, ex quibus ad irrigandam planitiem circumuicinam riuuli deducuntur ad duo circiter milliaria; iuxta mare extant ruinæ Castelli Alexandrini,

ab

ab Alexandro Magno ædificati, nunc vulgò dicitur *Sandarium*, siue *Scandarium*. Inter ipsam & Sidonem, in medio pene tractu, est Sarephta Sidoniorum funditus euerfa, hospitio Sancti Patris nostri Eliæ apud illam viduam Sarephtanam nobilitata, nunc dicitur *Serfent*.

Vltima tandem est antiquissima, ac inclita Ptolemaïda, tories in Sacris codicibus decantata, hæc dicta fuit Accon, quo tempore Christiani Terræ-sanctæ dominabantur: vltima omnium fuit ab illis perditæ: quia verò ibi equites Melitenfes aliquando sedem fixerunt, Sanctus Ioannes Dacri nunc à Christianis vocatur, à Turcis autem dicitur Acca; fuit maxima, vt eius ruinæ longè latè-que diffusæ manifestant, est figuræ penè triangularis; tres adhuc Ecclesiæ penè integræ comparent, solis fornibus destructis. Prima est Sancti Andrea in eminenti loco sita, in angulo meridionali, ac occidentali ciuitatis, mari prominens, hæc à longè integra compareret: fronsipicium adhuc integrum, tribus portis, longissimisque fenestris exornatum mare respicit: subtus illam aliquæ porticus subterraneæ ex lapide quadro constructæ sunt. Huic adhæret destructum palatium magni Templariorum Magistri: aliquo distat inde spatio versùs Septentrionem Ecclesia Sancti Ioannis, solo carens fornice, pulchra admodum, sed minor alia, proximum adhuc penè integrum adest palatium Magni Melitenfis Magistri, quod Princeps Sidonienfis nuper reneuaerat; multæ ibi aulæ amplissimæ ac pulcherrimæ, cum suis gradibus latissimis ac omninò intactis, apparent: Tertia est Ecclesia Patriarchalis, solo etiam fornice detecta, sed monte arenæ sepulta; Mahometani siquidem obsidentes ciuitatem, arenâ congestâ montem adhuc ibi extantem suscitauerunt, ac ita solum muris Ciuitatis æquantes aditum sibi parauerunt: adhuc aliquæ Turres, partes hinc inde murorum, & aliquæ etiam domus extant: Reliqua sunt pene solo æquata: nunc in illa Ciuitate, vix ducentæ sunt do-

mus habitata, ibi est receptaculum mercatorum, ad modum claustrum quadratum, quod noctu portis occluditur: Portus est pessimus, ventis occidentalibus obnoxius, ingentesque ibi excitantur tempestates, quibus aliquando naues pereunt: nam maris fundum præacutis rupibus constat, quæ Anchorarum cordas corrodunt, & ita naues ad littus concutiuntur, ac elisæ pereunt. Olim portus erat optimus, nam obductus in medio mari murus, tumentibus vndis obiciebatur. Distat duabus à monte Carmelo circiter leucis, quamuis proximior appareat, inter ipsam & montem mare sinum efficit, latissima Ciuitati adiacet planities, duabus longa & lata leucis, quam duo fluuioli per illam decurrentes irrigant.

C A P V T IV.

Descriptio Arabiae desertæ.

Dividitur Arabia in desertam, felicem, & petream: de petrea cum eam non pertransierim, licet à longè viderim; nihil mihi dicendum occurrit; felicem petrea describam: vnde nunc tantum de desertâ agendum. Hæc ab Aleppo statim incipit, & vsque Bassorâ longè latèque procurrit, immensas vt plurimum habet planities; vnde quocumque versus respexeris, oculorum acies non terminatur: idem tamen montes aliqui, & plurimi colles mira decorant varietate. Licet rigoroſè loquendo, quidquid ultra Euphratem iacet, ad Mesopotamiam, & Caldæam pertineat; hodie tamen sub nomine Arabiæ desertæ comprehenditur.

In deserto Arabiæ sunt aliqua oppida & viculi; ac frequentes, iuxta Euphratem maximè, pastorum casulæ: septimo die ab Aleppo peruenitur Theibas, nunc exiguum oppidum, olim grandem, vt apparet ex ruinis non longè distantibus, Ciuitatem: quam aliqui volunt fuisse patriam S. Patris Nostri Eliæ ex eo quòd S. Epiphanius

nus dicat, quòd Elias Propheta ex Theſbis exiſtat è cõ-
 tinente Arabum: ibi eſt aquæ copioſa & dulcis origo:
 diſtat inde itinere duorum dierum oppidum Reiba, in
 loco ſatis eminenti, non longè à flumine Euphrate:
 poſt aliquot dies itineris alia occurrunt oppida prope
 ciuitatē Annam totius deſerti maiorē, & paucis ab hinc
 annis antequam à Perſis deſtrueretur, celebrem: ædifi-
 cata eſt hæc ciuitas in vtraque Euphratis ripa, per vnum
 milliare in longitudinem diſfuſa, ſita eſt ad radices mon-
 tium quibus coarctatur: in medio flumine eſt parua
 inſula, in qua conſtructum eſt Caſtellum, ſed vndique
 prominentibus expugnabile montibus: nunc hæc ciui-
 tas eſt ſemidiruta, & ſuis pene exhausta habitatoribus:
 qui remanent ſunt Arabes, & Iudæi: ab Anna vſque
 Babilonem frequentiora ſupra Euphratem ſunt oppida.

Eſt in deſerto Arabiæ mirabilis & ſingularis ciuitas,
 Curia Regis Arabum non domibus lapideis, ſed mobi-
 libus conſtructa papilionibus. Cum Arabum Rex crea-
 tur; vt audiui, Iureiurando promittit ſe non in oppi-
 dis ſibi ſubditis, ſed in medio deſerti ſub papilionibus
 habitaturum: pauci ſciunt, vbi habitet; cùm propter
 ſecuritatem (ſibi enim à Turcis timet) ſæpe locum ad
 libitum mutet, ſuamque tranſſerat ciuitatem vbi paſcua
 pro animalibus reperiuntur. Hæc ciuitas miro ordine
 eſt diſpoſita, in medio regium habens papilionem am-
 pliſſimum, aulæis in plura diſtinctum habitacula: ab
 ipſo incipiunt varij vici, ſuis noti nominibus, ſingulæ-
 que tentoria ſuo ordine diſponuntur, quotieſcumque
 ciuitas Camelorum miniſterio, quod accidit frequen-
 tiſſimè diuerſa tranſfertur in loca; nam ſemper iidem
 vici ad Orientem, iidem ad Occidentem, iidem ad
 Septentrionem, iidem ad Meridiem, iidem medio tra-
 ctu procurrunt; ita vt, qui ſemel eius diſpoſitionem no-
 uerit, facilè ſingulos vicos ſemper ad eandem mundi
 partem reſpicientes, ſingulæſque domos eodem ordine

in iisdem vicis semper dispositas, ubicumque ciuitas fuerit collocata, reperiet: illius habitatores ad multa millia excreſcunt, in eis duo millia militum Regis numerantur.

Reditus Regis Arabum ex oppidis, aliisque bonis ſtabilibus, & vectigalibus colliguntur; cùm enim illi mercatorum commeatus deſertum pertranſeunt, ad Regis imperium modo hîc, modo illic ſiſtunt, vectigalia ſoluturi: tunc Rex, qui per ſuos ſpeculatores omnia quæ in deſerto fiunt, & quinam illuc tranſeunt, optimè noſcit, aliquem ad exigenda & colligenda vectigalia deſtinat commiſſarium: quòd ſi celebriores ſint commeatus, ipſemet Rex non fidens aliis, vectigalia & munera collecturus accedit; mos quippe eſt apud orientales, vt nullus coram Rege, & Principibus vacuis appareat manibus: in exigendis autem vectigalibus (quod vno aut paucis diebus effici poterat) multùm temporis inſumit, vt ita paſtores, aliique deſerti incolæ ſuos fructus, panes lac, & alia mercatoribus diuendere poſſint: quòd ſi quis ex illis in tranſitu moriatur, omnia quæ deſert, ad Regis deueniunt poteſtatem.

Reperiuntur in variis deſerti locis colles plurimi arenæ vento collectæ, qui ventorum impetu modò huc, modò illuc tranſportantur; qui aliquando pretereuntes obruunt, ex quorum corporibus arena exſiccatis mœnna conficitur, & ſublatis vento ex illa parte collibus ab Arabibus inuenitur: vnde nobis per illa loca tranſeuntibus præceptum eſt, vt omni celeritate poſſibili curſum feſtinaremus, ne aliquod vitæ periculum ex mora nobis immineret.

Sæpe pluit manna in deſerto, quod ab Arabibus collectum deſertur Baſſoram, vbi à Luſitanis commerciij cauſa illuc nauigantibus ad vſum medicinæ ſatis vili pretio comparatur: ſunt quædam reliquæ copioſi illius mannae, quod Deus ingratiſſimis Iſraëlitarum populis,

pulis, hoc desertum, dum ab Ægypto ad tetram promissionis tenderent, prætereuntibus; ob merita Moyſis eorum Ducis, quotidiano pluebat miraculo: plures etiã ex nostris fructibus, scilicet, vuã, ficus, pepones, aliique beneficio Euphratis nascuntur: plurimæ etiam viginti ab hinc annis, ad vtramque fluminis ripam, consitæ videbantur palmæ; sed rigore cuiusdam hiemis exsiccatæ perierunt.

Antequam mercatores ad Euphratem perueniant (nono enim tantum die peruenimus: nam licet tertio die perueniri posset; tamen ne iter prolongent tardius perueniunt) aquarum inopia plurimum laborant; aliquando enim penitus non inueniunt, aliquando verò puteos tantum aquæ sulphuræ, gustui ingratiſsimæ nanciscuntur; occurrunt etiam magnæ bituminis scaturigines; inuenimus enim prope finem deserti riuulum bituminis plenum & circumiacentem campum inundantem, ex quo forte ædificatores turris Babel hauserunt bitumen; quo, loco cimenti, in ædificatione turris utebantur.

In toto deserto plurimæ sunt, siluestrium, & ferocium species animalium, Leones & Tigrides sæpè reperiuntur, Onagri turmatim discurrent, Ceruatum vulgò *Gazellarum* plurimi greges occurrunt: à longè enim conspexi similia ad alteram fluminis ripam animalia, quæ ad flumen potandi causa veniebant: sed ibi præcipuè vidi quoddam animal in cauea ferrea clausum, quod Arabes ducem leonis appellant; est feli simillimum, propter quod aliqui felem Syriæ vocant; aliud Florentiæ, sic nominatum vidi: est enim satis ferox; si quis oblatum ei cibum detrahare tentauerit, nimia tumet ferocia, & in detrahentem, nisi compescatur, insilit: habet in summitate aurium flocculos: dicitur autem dux Leonis: quia, ut dicunt, Leo non ita pollet odoratu & ita sociatus huic animali odoratus acerrimi prædam assequitur, ac
captæ

captæ partem suo duci dispartit : est aliud item animal, quod *disb.* vocant, satis lupo simile ; sed diuersæ , vt ex eius clamore percipitur , speciei : quod etiam in Indiis orientalibus frequentissimum est : plurima sunt etiam & portentosa serpentum genera , quibus alendis & multiplicandis solitudo plurimum confert. Desertum ab Alippo vsque Babilonem vno circiter mense , vsque Bassoram duobus ferè mensibus pertransitur: cameli siquidem onusti quinque tantum , aut sex ad summum conficiunt leucas itinere vnus diei.

CAPVT V.

Descriptio Arabiae felicitis.

Arabia felix , non absolutè , sed comparatione aliarum vocari debet : maior enim incolarum illius pars est miserrima , ac infelix ; non solum ratione legis Mahometicæ quam profitentur ; sed etiam præ inopia rerum temporalium : non omnia quæ in illa reperiuntur , sed tantum quæ in ea viderim, hîc comprehendam.

In hac Arabia plurimum mannæ colligitur , Thus affatim nascitur quotannis ex vrbe & portu Cachanaræ thure onusta circa Natiuitatem B. Virginis, Goam tendit: palmæ passim reperiuntur, omnesque fructus qui hîc in Gallia; sed non in magna abundantia; est enim regio montibus nudis plena; calores sunt ibi intentissimi, ac pene intolerabiles : vnde Mascari dormiunt Lusitani æstiuo tempore supra linteamina madefacta, & tota nocte aquam bibunt; vnde aliquando contingit, quod nullus reperiatur ieiunus Sacerdos , qui missam celebrare possit, per totam penè Arabiam homines sub dio dormiunt, Bassoræ à principio mensis Aprilis vsque ad finem Septembris, ob nimios calores , in solario dormire cogebarur.

Plures sunt in Arabia felici ciuitates, vrbes & oppi-
da;

da; maior & præcipua Ciuitatum, quas ibi viderim, est Bassora ciuitas, nunc satis ampla, mercium Indicarum copiâ abundans; est sita in confiniis Arabiæ desertæ, ad vnum ferè milliare distat à flumine, cuius riuus etiâ ad naues ferendas idoneus, ad ipsam peruenit: abundat multis fructibus, vuis optimis, ficibus, pomis, malogranatis; est calidissima, ac proinde feracissima palmarum, ex vtraque parte fluminis vsque ad initium ferè sinus Persici quatuordecim leucis ab illa distiti, & vsque Babylonem multorum dierum itinere distantem, longè latèque diffusarum. Maior incolarum Bassoræ pars est Arabum, linguâ vrentium Arabicâ, quæ vsitatissima est in multis partibus Orientis, vtpote mater & origo aliarum; aliqui etiam morâtur Turcæ, præsertim milites; multi ad illam commercij causa adueniant Persæ, quos *Agemi* vocant; vnde & Turcica, & etiam Persica viget lingua: paucis ab hinc annis maxima confluente à captis Babylone, & Ormusio mercatorum, & habitantium multitudine, plurimùm creuit. reperiuntur etiam ibi Christiani Armeni; Nestoriani; Iacobitæ, & alij qui verè non sunt, sed dicuntur Christiani Sancti Ioannis, qui à se inuicem *Mendaj*, ab alijs verò *Sobbi* dicuntur. Prouincia hæc Bassorana multis circumquaque abundat oppidulis, varios vt iam dixi, fructus, præcipuè palmarum, & orisam profert: tritico non ibi nato, sed à Perside translato vtitur. Dux illius ab aliquo tempore Turcarum Imperatori rebellis, plurimùm nobis affectus, sæpè nostram visitat domum, largas aliquandò elargiendo eleemosinas: hic Ciuitatē Bassoram ad ripam Euphratis transferre meditatatur: vnde ibi duo castella, mœnia Ciuitatis, pluresque iam domos construxit, factisque latissimis ac profundissimis alueis flumen circumduxit: hi populi eodem modo, ac alij Mahometani, iustitiam administrant, nullos habent Aduocatos, sed solum Iudicem, quem *Alefandi* vocant,

ab

ab ipsis Bassoræ portis incipit Arabicū desertum, quod usque Aleppum & Damascum procurrit; vnde ex illa parte est principium Arabiæ felicitis.

Secunda dignitate ciuitas, ex his quæ sunt prope sinum Persicum (quæ enim sunt in eius interiori parte, ex industria relinquuntur) est Lassa suo Gubernatore siue Bascha insignita: hic piscatione gemmarum, quæ in mari vicino fit, ditissimus est, canonicus item siue præbendarius est in suo celebri templo, quod in Mecha Mahometis patria, vt præcipuum eorum sanctuarium colitur: In hac ciuitate plurimæ sunt palmæ & malograna optima, distat aliquantū à mari, eius portus dicitur Catifa, insalubris oppidum aëris: huc Lusitanorum naues, sicut & Bassoram commercij causa bis in anno veniunt, merces Indicas vendunt, dactilos autem aliósque fructus, tapetes aliáque emunt ad Indias trasportanda; præcipuè autem equos Arabicos naturâ generosos: qui autem decem desert, ab omni vectigali soluendo remanet immunis: quodd si aliquis ex illis in nauigatione moriatur, abscissam eius caudam exactoribus vectigalium tenetur præsentare; vt tali gaudeat immunitate.

Post Lassam sequitur Mascatum præsidium Lusitanorum fortissimum, vbi duo munitissima sunt Castella: est Mascatum iam plurimū auctum; huc enim commercium Ormutianum partim delatum est; ibi quippe portus est valde magnus, commodus, à maris tempestatibus, & hostium incursionibus securus; est supereminentibus vndique conclusum ac quasi sepultum præruptis & exustis montibus; ibi præter Lusitanos sunt commorantes Arabes, Persæ ac Iudæi: inter hos Arabes magna pars dæmoni pacto peculiari deseruiunt, illos vocant *Casatares*, plurimū nocent sed non suis similibus: hi fructum aliquem attentè inspiciendo interius comedunt intacta externa parte relicta; homines respiciendo,

piciendo, corda eorum deuorant; illis verò noceri non potest; si enim gladium quo ferendi sunt aduertant, arte dæmonis ista incantant, vt ferire non possit; si enim percutiuntur, gladius quasi saxo percusso resilit: aliqui ex ipsis ob parrata scelera in mari submersi; post tres dies incolumes è profundo maris educti fuere.

Non longè à Mascato est oppidum Suar, in plano collocatum littore, vbi etiam Lusitanorum est præsidium, ibi plurimæ sunt palmæ, ibi sub terra antiquæ monetæ latinis characteribus inscriptæ sunt: propter quod aliqui Lusitani Niniuem ibi fuisse arbitrantur; sed nullum id afferendi habent aliud fundamentum, quàm prædictas antiquitates, & littus ad construendam Ciuitatem commodum, asserentes Ionam prope Niniuem à cete fuisse vomitum; non aduertentes quibus se difficultatibus implicant; nam præter authoritatem Scripturæ, quæ Niniuem in Assiria siue Chaldea collocat, inauditum fatèri tenentur miraculum, vel quod cete intra tres dies totum mare Mediterraneum à Ioppe vsque in Hispaniam & inde vsque in Arabiam peruenerit; quod spatium vix intra sex menses via ordinariâ confici potest; vel saltem quòd à mari Mediterraneo in Arabiam vsque per terram aduenerit; cùm tamen miracula, nisi ex authoritate scripturæ, vel infallibili euidentiâ confirmantur, admitti non debeant. Denique id traditioni Christianorum orientalium contradicit, qui prope Get urbem Philistinorum, littus ostendunt, in quo Ionas à cete vomitus dicitur. Vterius procedendo intra sinum Persicum reperiuntur alia oppida, scilicet Corsacam, Leuidia, Doba; Comsa, Cassap, Chulfar; ex alia verò parte Mascati est Curiati, Teue, ibi dulcis aquæ fluuiolus, & multa mala aurea nascuntur: ibi maris fundum etiam prope littus non inuenitur, donec ad destructam Calaiati ciuitatem, olim dictam Metacum, perueniatur: hæc ciuitas fuit à Lusitanis destructa propter

pter factam sibi traditionem ; erat maxima , vt ex eius ruinis latè diffusis apparet:adhuc domus & templa manent semidiruta : ibi ad littus inueniuntur candidissimi lapides,maiores ac minores , miro naturæ artificio elaborati : in quibusdam enim sunt rosæ insculptæ,in aliis aliæ figuræ;multæ sunt huius laboris species.

In interiore parte Arabiæ felicitis surrexerat quidam scholæ magister nomine Iman , qui se iactabat à Deo missum, vt cuique sua restitueret ; multi eius partes sequebantur , & sic ibi imperitabat , multumque negotij Lusitanis faceſſebat.

C A P V T VI.

Descriptio Mesopotamiae

OMnis ille tractus, qui inter fluuios Euphratem & Tirim continetur , Mesopotamia dicitur , ab Hebreis verò dicitur Aram siue Charam: vnde Mesopotamia partem Armeniæ , partem etiam Assiriæ siue Chaldeæ complectitur, vt ex ipsa constat scriptura ; constat quippe Vr esse in Mesopotamia , in ea enim natus dicitur Abraham, ad eam dicitur missus Iacob, tanquam ad natale solum suæ familiæ;& tamen eadem scriptura Vr patriam sancti Patriarchæ Abrahæ in Chaldea collocat, vocâtque Vr chaldeorum.

Tota hæc regio est amœnissima , maximè in suis extremitatibus , vbi suauiter delabentium Tigris & Euphratis irrigatur vndis ; ibi enim pluribus incolis habitata, ibi pluribus oppidis ac ciuitatibus ædificatis exornata. Tota regio vt plurimum plana est in vastissimas procurrēs planities;quamuis aliqui, sed rari montes cōpareant;terra,vt apparet,est fœcunda ac fertilissima, sed more aliarū imperio Turcæ subditarum,propter incolarum defectum,penitus inculta, solùm prope aliquas Ciuitates ibi existentes,&rara oppida,parùm culta manet.

Præter

Præter fluuios Euphratem & Tigrim suæ latitudinis terminos, nonnullos alios habet fluuiolos, plures riuos ac fontes, quibus irrigata mirifi- è fecundatur, fructus eisdem producit, quos nostra abundatius producit Gallia; & insuper dactylos palmarum fructus, in parte præfertim meridionali.

Plures olim ac celeberrimas habuit ciuitates in medio quippe Tigris & Euphratis Niniue fuit ciuitas illa trium dierum spatio diffusa, caput primæ Assyriorum Monarchiæ, cuius nunc aliquæ tantum ruinæ ad ripam Tigris apparent, in quibus extructa ciuitas Mussul dicitur, fuit etiam Babilon illa magna, in sacris Codicibus toties nominata, Chaldæorum Curia Regum; ingentes eius reliquiæ hinc inde dispersæ hætenus conspiciuntur: noua Babilon, vulgò *Bagdet*, ultra Tigrim ædificata, Mesopotamiæ terminis non continetur; quamuis eius suburbium, sed à Persis nuper destructum, in ea contineatur.

Nunc inter alias Mesopotamiæ ciuitates nobilis est ciuitas Diarbequir, eiusdem circiter magnitudinis ac Massilia; sed non oblonga, at spherica, in loco amoenissimo supra fluuium Tigrim eminenti collocata, est visu pulcherrima, pluribus rotundis turribus exornata: hanc sequitur Orpha ciuitas, sancti Patriarchæ credentium Patris Abrahæ natale solum, olim dicta *Vr Chaldeo- rum*, est mediocris magnitudinis, in medio regionis duobus ab Euphrate diebus distita: est etiam ciuitas Merdim ad ripam Tigris inter Moussul & Diarbequir sita, in qua plurimi sunt Christiani: supra verò Euphratem est pars ciuitatis Annæ superius descriptæ, nunc pene dirutæ: tandem in littore eiusdem Euphratis est exigua, sed pulchra ciuitas Elbir Castello munita, dicta olim Byrtha: fuit etiam celebris illa Carres à morte Crassi nominata, cui nunc Herem dicitur: fuit & ciuitas Amida plurimum celebrata propter bella Ro-
E manorum

manorum & Persarum ibidem gesta : fuit & antiqua illa Edessa Sancti illius Abagari Regis Curia , ad quam sanctus ille Rex Christum Dominum , tum Iudæorum persecutionis declinandæ, tū suæ salutis causa inuitabat.

C A P V T VII.

Descriptio Chaldaea.

Chaldæa, siue Assyria , caput fuit primæ totius orbis Assyriorum Monarchiæ , quæ à Nino primo eius Imperatore vsque ad Sardanapalum in summo perseverauit splendore; tunc enim Medis & Persis ob ignauiam Sardanapali rebellatis diuisa plurimum decreuit; sed tamen iterum reuiuiscens vsque ad internecionem Balthasaris, diuino trium digitorum in pariete scribentium portento, Daniele scripturam exponente prænuntiatam, perdurauit : tunc enim capta ciuitate, imperatoris Curia deleta, ipsoque Balthesare Imperatore interfecto, sub Cyro Persarum Rege & Dario Medo , ad Persas & Medos Monarchia Mundi translata est. Curia Imperatorum modò fuit Niniue á Nino fabricata, modò Babilon à Belo siue Nembrod ædificata , vt sacris manifestè constat scripturis ; nec defuerunt Babylone succedentibus temporibus Reges vsque ad perfidum Pseudopropheta Mahometem , cuius religioni ac perfidæ legi , hæc confusionis ciuitas Babylon cessit , ibique fuit aliquândo Thronus Imperij Turcarum, quod postea summo Christianorum damno ad multa regna, imò ad Constantinopolim Romani quondam Imperij caput se extendit : quapropter inter Turcas & Persas continua desæuiunt bella ; quisque enim summo ducit honori, hanc ciuitatem Mahometani quondam Imperij caput possidere.

Chaldæa, vt vidi, nullis pene exultatur montibus, sed in immensam decurrit planitiem; nobilissimis ac iucundissimis

diffimis fluminibus Tigri & Euphrate fœcundatur, pluribusque aliis irrigatur fluuiolis, plurima continet oppida; palmarum præcipuè arboribus, aliisque decorata; est calidissima, secundo enim post relictam Babilonem die, tres aut plures homines, nullis præcedentibus morbis, solo intolerabilis æstu Solis suffocati periêre, alique plurimi vix euasêre vltimum mortis periculum.

Protenditur hæc regio versùs Septentrionem itinere quinque dierum, tota plana variis riuulis & fluuiis irrigata, variisque oppidis habitata; terminatur tandem excelsis & asperrimis montibus Persidis, qui angustum præbentes aditum in angustam vallem sed longè diffusam; aquarum copia abundantem; ad alios montes aditum præbent: antequam ipsum montium aditum egrediari, occurrit maxima, vt ex ruinis apparet, ciuitas nî fallor Climaïda, ab Alexandro magno, prout continuata fertur traditione, ædificata: solæ ruinæ, quidam aquæductus, nihil aliud distinctum conspicitur.

Caput Chaldææ est ciuitas Bagdad, id est hortus; ab hortorum, qui ibi reperiebantur, amœnitate sic dicta; siue Babylon noua ex antiquæ ruinis exurgens: antequam paucis abhinc annis à Rege Persarum diriperetur & pene destrueretur, erat maxima; supra vtramque Tigris ripam ædificata; nunc omninò diruta ex qua parte respicit desertum, ac Euphratem itinere vnus diei remotum. Pars quæ adhuc integra manet, est Auenioni æqualis, variis palmarum viridariis intus & foris amœna, validis de nouo à Rege Persarum extructis turribus, ac muris exornata, perangustis inceditur vicis, sicut aliæ Mahometanorum ciuitates; domunculis ex luto, quibusdam etiam ex coctis lateribus fabricatis componitur. Quando per illam transui, suberat dominio Regis Persarum, qui eam non vi; sed traditione siue prodicione cœpit: Dux enim illius, quem Bascha nominant, vltimum sibi timens supplicium ab Imperatore Turcarum Constanti-

nopoli commorante, vltro Regi Persarum Abbas illius obtulit deditiōem: sed mutato consilio illum aduenientem possessionis causa delusit; tandem ab ipso obfideretur, captâque dolo, perfidia & proditiōe filij Ducis, captus ipse Dux siue Prorex in arctam conicitur custodiam, vbi tanquam perfidus primò Turcarum Imperatori; deinde Regi Persarum, intolerabili, inaudito, & diuturno ab eodem Rege Persarum perimitur supplicio: nam per triginta dies oppiparè vescens dormire prohibitus est; cum autem somno pressus dormitaret, statim præacutis excitabatur stimulis, sicque intolerabili mortis genere suæ luit pœnas perfidiæ. Hæc ciuitas paucos sub potestate Persarum perseuerauit annos: licet enim duo aut tres exercitus à Turca missi, re infecta perierint, industria ac generoso Persarum animo; tamen adueniente ipso Turcarum Imperatore Amurath cum quadringentis millibus militum, non tam vi, quàm proditiōe Gubernatoris illius capta dicitur, vbi centum & triginta Turcarum millia perierunt; octodecim verò Persarum millia ab ipsis Turcis, captâ ciuitate, per nefas fuere trucidata.

Infra ipsam ciuitatem itinere vnus diei destructæ videntur antiquæ Babylonis ruinæ, mediæ inter Tigrim & Euphratem, qui non magno distiti fluunt intervallo. Fuit antiqua Babylon ingens ciuitas, totum ferè illud occupans spatium, quod inter Euphratem & Tigrim in latitudine medium iacet: passim enim ibidem maximæ videntur ruinæ: ad sex circiter supra Bagdad leucas, sunt ruinæ turris Babel, quam mihi comites nostri itineris ostenderunt Armeni illarum Regionum peritissimi, quæ adhuc eminentes à longè nobis transeuntibus apparere, cuius rei probabilitatem plurimùm confirmat, quod non longè inde fontes bituminis scaturiant; constat autem scripturâ eius fabricatores bitumine pro cemento fuisse vsos: dicitur quod habet milliare, vel iuxta Christianos

stianos naturales habet 392. vlnas: cùm sit sola in campo eminenti, apparet altior quàm sit.

Habitatores Babylonis sunt Chaldæi, lingua Arabica vulgò loquentes, quorum maior pars constat Mahometanis; quamuis etiam plurimi reperiantur inter ipsos Christiani, Armeni, Iacobitæ, & Nestoriani; qui vltimi plures & præcipui, omnibus aliis exosi sunt & inimicissimi; quia Christum Dominum negant esse Deum; nobis autem magis affecti, & conuersioni magis sunt dispositi; in aliis etiam circumiacentibus morantur oppidis, habent suum Patriarcham Monachum Basilianum, in celebri monasterio in Mesopotamia commorantem, qui paucis ab hinc annis nostrum P. F. Basilium à sancto Francisco Lusitanum spectatæ virtutis Religiosum, pluribus Orientalibus linguis, scilicet Arabica, Persica, Turcica, & Chaldæa præditum; vt simul de religione conferrent, magnis ad se precibus euocauit, eorum Sacerdotes, sicut & aliorum orientaliū, ducunt vxores; sed non Episcopi: in Officiis diuinis lingua vtuntur Chaldæa.

Vltimis his temporibus inuentæ sunt prope Babylonem marmorum fodinæ, quæ ad ornanda templa deseruiunt.

CAPVT VIII.

Descriptio Armenia.

Armenia diuiditur in maiorem & minorem; hæc magis accedit ad Asiam minorem, & Turcarum Imperio subiacer; illa verò Persis est finitima, ac eius Imperio maiori ex parte subiecta: habitatores vtriusque vt plurimum sunt Armeni Christiani; maximè in oppidis; in vrbibus quippe mixti reperiuntur Mahometani, qui ibi præsidia & principatum tenent.

In Armenia plures sunt Ciuitates, prima dignitate,

non magnitudine, est Eriuania subdita Regi Persarum, In qua est Castrum validissimum nuper à Turcis expugnatum; sed nunc iterum à Persis captum, eorum subditur ditioni: hanc tradunt fuisse olim Curiam Regis Armeniæ, dictam Albaniam; propterea Episcopus illius ciuitatis est Armenorum Patriarcha: nomen modernum Eriuania, aliquantulum antiquo Albaniam consonat; Eriuania enim est quasi Albania: non multum distat à monte, in quo traditur esse Arca Noë; proximum est hic monasterium, maximæ apud Armenos venerationis; dictum Tres Ecclesiæ: tum propter sedem Patriarchalem; ibi enim Patriarcha ordinariè commoratur: tum propter conseruatas ibi reliquias sancti Gregorij illuminati Armenorum Apostoli.

Secunda ordine Ciuitas Archiepiscopalis est Nacheuan; Armenè idem est, ac prima habitatio; quia ibi Noë post diluuium habitasse dicitur, cuius Archiepiscopus ex ordine sancti Dominici semper assumitur; quia soli patres Dominicani in illis partibus missionem instituerunt: contigit enim, vt quidam vir sanctus ex illo ordine in Archiepiscopū Nacheuani crearetur: is statim profectionem, ad illa Terras schismaticas, suæ curæ demandatas parauit; tantæque vigilantiam salutem animarum procurauit, vt breui totam illam Armeniæ Prouinciam, quæ dicitur Alingia, Catholicam reddiderit: vt autem in hac fidei sinceritate illam conseruaret, Monasteria sui Ordinis ibi ædificauit: Armeni huius Prouinciæ vocantur ab aliis, Armeni franchi; quod idem sonat, ac Europæis subditi: Ciuitas ipsa Nacheuan est penè destructa; vnde Archiepiscopus in oppido Abraner, trium itinere dierum à ciuitate Tauris dissito, commoratur: Archiepiscopus, sicut & alij patres ibi commorantes, sunt naturales Armeni; quamuis aliqui ex hisce partibus illuc mittantur: ibi non solum Apostolicæ conuersionis animarum officio occupantur; sed
etiam

etiam continuo manuum labori insistere coguntur, ut sibi vitæ necessaria lucrari, & imposita per Regem Persarum tributa soluere possint; unde dicto facto, persolutis diuinis officiis, ad campos procedunt: Nacheuam ab aliquibus numeratur inter ciuitates Mediæ.

Tertia est Ciuitas Chulfa iam omninò deserta, ac penitus desolata; vix enim aliquæ inhabitantur ibi domus; cum enim Rex Persarum Abbas nuper illam de manibus Turcarum eripuisset, totam illam gentem copiosam inde transnigrare iussit, & versùs Aspahanum suam Curiam, quam de nouo fundabat, iter dirigere, ut ibi extructa Chulfa noua morarentur. Et ita sicut vetus Chulfa periit, sic ex populo eius transnigrante noua Chulfa, vetere ditior, maior, ac domorum constructione magnificentior ædificata surrexit. Plures adhuc viuunt Armeni, qui in hac fuerunt transnigratione, quique antiquam adhuc patriam deplorant: plures aliæ intra Persidem sunt Annenorum coloniæ: cum enim Rex ille Abbas aliquam capiebat ciuitatem vel oppidum, partem populi ad inhabitandam Persidem satis desertam transnigrare cogebat.

Quarta est Ciuitas nomine Van, mediocris magnitudinis, mœnibus validissimis munita, fossis cincta profundissimis, ac tormentis bellicis instructa: ibi fortissimum Turcarum est præsidium; quia in ipsis pene est Persarum confinibus: ibi est, supra præruptam collem in angulo ciuitatis eminentem, inexpugnabile, inò inaccessibile Castrum, in quo tunc multi erant milites; quia Persici exercitus non multum distantis aduentum formidabant. In hac Ciuitate reperi quendam Chirur-gum natione Gallum, nomine Fabrum, qui ibi tanquam insignis honorabatur Medicus, nòsque omnibus beneuolentiæ signis prosecutus est. Huic ciuitati adiacet mare viginti circiter leucarum longitudinis, & decem latitudinis, montibus circum quaque vallatum; lacus

denominari posset nisi aquæ illius falsæ essent ; est satis sterile , paucos enim pisciculos quibusdam tantum annis mensibus producit.

Ad sex circiter milliaria est monasterium Monachorum sancti Antonij Armenorum, maximæ apud eos deuotionis ; ibi enim illorum Patriarchæ sepeliendi ex Eriuania transportantur , hoc monasterium est supra montem excelsum nomine Varac ; ibi, vt accepi ab illis Religiosis , illorum decem millium Martyrum crucifixio celebrata fuit, nomen nouum aliquantulum corruptum antiquo Ararat correspondet.

Ex alia huius maris parte est ciuitas vulgò Bethlis, ab Armenis verò Pagues dicta ; est inter angustias duorum montium , ac in eorum decliui collocata ; nulla enim inter montes est planities : in medio montium & Ciuitatis est riuus , variis exurgentibus hinc inde fontibus excrescens : domus illius ciuitatis sunt pulchræ, ac ex lapidibus constructæ, præter vsitatum illarum gentium morem, quæ domos vt plurimum ex luto construunt. In medio est Castellum in loco edito munitissimum , est abundans fructibus, uuis, pomis, piris, prunis, aliisque nostratibus.

Sexta est Ciuitas dicta Coï , in vastissima planitie collocata ; fuit magna, sed nuper ob Turcarum irruptionem penè desolata, nunc denuò construitur, firmisque muris Castrum illius amplissimum cingitur ; plurima in suo circuitu habet oppida : inter Coï & Van sunt aliquæ munitiones, vbi Domini quasi absoluti dominantur. Inter eas est Castrum Cochab munitissimum, quod præterfluens ad eius radices fluuiolus irrigando lætificat : sunt plures aliæ ciuitates, vt Arzeron, Sebaste, vbi martyrio coronatus fuit diuus Blasius ; aliæque, quas, quia non vidi, silentio præteribo.

Armenia, vt plurimum, est præruptis asperrima montibus, & alicubi tam propinquis, vt illic Sol vix appareat ;

reat : propterea frigus intentissimum ibi sæuit hyemis tempore , quod & æstiuo sentitur : Prima enim die Augusti præ frigore Solis radiis nos exponere fuimus compulsi : non desunt tamen planities amœnæ, ac vastissimæ ; præsertim vbi ad Mesopotamiam declinat. In Armenia fluuij sunt nominatissimi Euphrates & Tigris, superius descripti : est etiam Araxis, aliique fluuij, ac fluuioli ex illis Armeniæ montibus exilientes , quos referam, dum mihi occurrent iter agenti.

C A P V T IX.

De Imperio Persarum.

PER nouem circiter menses in nostro mansi Aspahanensi Conuentu : in quo descriptionem Imperij Persarum hîc exarandam didici. Hoc Imperium plurima Regna , variâsque continet prouincias : continet enim primò ipsam Persidem , à qua totum denominatur, quæ attingit sinum Persicum, cuius caput est Syras : habet Mediam siue Regnum Medorum , cuius caput est Tauris, olim Ecbatanis, celebris Ciuitas, quæ ad Armeniam declinat : Parthiam, in qua est Aspahan curia Regis Persarum , quæ inter Mediam & Persidem iacet: habet Regnum Candahar Indis finitimum, à principali eius Ciuitate sic denominatum: habet partē Armeniæ maioris ad Septentrionem declinantis: habet Iberiā Terram Christianorum, vulgò Gorgistam ; quæ paucis abhinc annis , debellato eius Principe, eidem Imperio fuit annexa : habet Regnum Ghilon prope mare Caspium, serici feracissimum, cuius præcipuæ sunt ciuitates prouinciarum capita Raxt, Gaxkhar, Laion, Langarkanon, Delon, Nohum, Tabas : Item est Regnum Korason diuisum in Margianam & Ariam prouinciam, cuius sunt principales ciuitates Merad siue Maret, centum vt dicitur millium annatum, in qua dicitur esse

Turris ex auro & lapidibus pretiosis satis alta, Heres, Thun, Maruuh fundata ab Alexandro ad ripam fluvij Tehun siue Ore, dicta olim Alexandria. In hoc regno præ aliis feles pulcherrimi sunt, pilis admodum longis decorati; alia etiam plura non contemnenda sunt Regna, ut Lorestan: Chaldæam iam non numero; quia dum in illis essem partibus, à Turcarum Imperatore fuit recuperata. Singulis Regnis Rex Persarum proprium Ducem siue Gubernatorem præficit, quem Kam vocant.

Tempore Cyri & Darij, interfecto Balthazare ultimo Affiriorum Imperatore, ac sic dissipata & penitus sepulta hac prima Monarchia, incæpit secunda Persarum atque Medorum, & per multa sæcula vsque ad Alexandrum Magnum floruit: hic enim deuictio Dario illam terminauit; Imperium tamen Persarum sæpe reuiuiscens sub Cosroa, sub Sapore, aliisque Regibus effloruit; sed ut rerum mundanarum vicissitudo requirit, partim sub Turcarum Imperio, partim sub Regulorum dominio fuerat redactum: nunc iterum ad pristinum statum integrè restitutum, modò statim explicando florescit.

Erat in Ciuitate Ardeuilla, tribus diebus à ciuitate Tauris, versùs mare Cuspium distante, quidam Gubernator nomine Ismaël Sophi filius Xéque Aidar, qui excusso Turcicæ Tyrannidis iugo sibi absolutum illius Prouinciæ dominium vsurpauit. Hic fundator est familiæ Regum Persarum, qui ab illo Sophi denominantur, quo decedente eius posterii in dominio successerunt; propter hoc omnes Persarum Reges, vbicumque moriantur, se Ardeuillam imperant deferri, ut ibi in sepulchro suorum Maiorum sepeliantur. Hi paulatim suam ampliarent ditionem; vnde captâ ciuitate Casbim, ad eam Regni curiam deportarunt, ibique perseuerauit vsque ad Cha Abbas, qui exiguum à patre traditum sibi Regnum,

Regnum , circumquaque miris modis dilatauit , & Ciuitatem Aspaham plurimùm adaugens exornauit , ibique sedem Imperij collocauit.

Viuentē adhuc Patre , debellato Rege Syras , hanc ciuitatem, totumque Persidis Regnum acquisiuit: vltra progrediens capto Benoru Castro validissimo, ostioque Regni Lara (est enim supra montem angustissimæ viæ, qua vnica ad Laram perueniri potest, imminentem) ipsaque Larâ subiugatâ, vsque ad sinum Persicum suam dilatauit iurisdictionem.

Validum ac pene inexpugnabile Castrum ciuitatis Tauris , mirabili artificio capiens; dolo , non viribus occupauit: instruxit siquidem copiosum mercatorum commeatum, qui Tauris aduentantes , ac varias merces deferentes propè illud Castrum sua fixere tabernacula: ipsi mercatores erant omnes milites, armis ad intentum exequendum necessariis instructi ; ipse verò Rex nulli nisi suis notus , Ducis eorum munus exercebat ; cùmque Ianisseri illius Castri custodes sæpe ad eos quotidie aduentarent , capta opportunitate , quandò omnes vel ferè omnes extra Castrum , exierant, in eos insurrexit , obuios quosque interfecit ; Castrum ficti mercatores adoriuntur , alij scalas muris admonent, sursùm ascendunt ; & ita priùs captum, quàm obsessum in ciuitate , à qua paululùm distans in loco situm erat eminenti , peruulgatur : vnde insignis illa Ciuitas , totaque prouincia Persarum Imperio subiugatur. Paulò post vltèriùs procedens partem maioris Armeniæ adiacentem inuadens, plurimùm versùs Septentrionem Imperium propagauit : Inde ad Iberos siue Georgianos conuersus principalem illorum urbem , nomine Tesslis, occupat : Deinde subiugatis illius prouinciæ Regulis, ac nouissimè Tamaraskam, totam vel omninò subiugauit ; vel saltem reddidit tributariam.

Cùm ex parte maritima molestos sibi experiretur
Lusita

Lusitanos, maximum arbitratus esse sibi dedecus, quòd aduenæ Christiani in suo quidquam Imperio possiderent, ad eos arma conuertit, ac primò castellum Commoram in continenti situm deuincit, deinde Anglicarum nauium auxilio fretus (ipsi siquidem Persæ nullam habent penitus in mari potentiam, nauiculis tantum illud percurrunt,) ad insulam Ormusium adiacentem peruenit, illamque obsidens & fortissimum illius Castrum cuniculis concutiens ac diruens, breui Lusitanos ad deditionem compellit, & ita celeberrimum totius Orientis Emporium ad Persarum deuoluitur potestatem.

Iam dictum est, quomodò Babylonem, totamque Chaldaeam acquisiuit; Regnum etiam Candar, ab Imperio Magni Mogoris Indiarum orientalium Imperatoris eripiens, suo copulauit: plures alias Prouincias, ut Bassoranam conquirere voluit; sed dum actu obsideret, debitum morti nominatus ille Cha Abbas persoluit, suumque moriens ex primogenito nepotem Regni successorem nominauit.

Post eius obitum Cha Sephi, tum Regnum Babylonis modo iam dicto, tum Regnum Candar proditione Gubernatoris amisit: cum enim Rex illum euocasset; timens ille, ne eadem qua Gubernator Syracensis vir bonus & innocens morte plecteretur, Magno Mogori ciuitatem Candar, simulque totum Regnum, sui Regis proditor restituit.

Iidem, ac in Europa fructus nascuntur; sed pepones gustui suauissimi, ferè omnes optimi: vnde ordinariè, quo maiores, eò meliores. Fluij in Perside sunt rari admodum, & parui; licet enim totam ferè Persidem percurrerim, non tamen fluuium, qui Druentiam adæquaret, inueni. In tota Perside sunt plures montes, maximè qua parte Babylonem respicit; inter eos sunt aliqui montes salis, & gipsi: sed de
his

his expressius agetur in particulari descriptione huius Imperij.

CAPUT X.

Descriptio Regni Persidis.

Regnum Persidis, à quo totum Imperium nomen sortitur, inter sinum Persicum, Parthiam, Chaldæam, & Candar continetur: Plures habet asperrimos montes, plures etiam valles fructiferas, & planities vastissimas; tres tantum in ea vidi fluuiolos, vnum prope urbem Main; secundum in itinere, quod Lara venit Syras; tertium quasi in extremitate Persidis versum Bassoram, & hic maior est aliis.

Plures sunt huius Regni prouinciæ, quæ etiam Regna dicuntur; scilicet Susiana, cuius caput est Suster, hæc Prouincia dicitur etiam Sophiam, siue Cusistan à Cusa ciuitate sita supra fluuium Zennare, olim Eulæe: sequitur prouincia Curdistan valde diffusa, à Susiana scilicet vsque Babylonem, cuius ciuitates sunt Malaga, siue Maraga, Coisalma, & Cormaba; est etiam Prouincia Laræ, sic dicta à præcipua ciuitate eius, de qua paulò infra agitur, quæ supra sinum Persicum valde dilatatur; huic ad Orientem adiacet Prouincia item maritima Carmanæ opposita promontorio Arabico Mossandam, valde montuosa, cuius principalis ciuitas est Kermon, in ea est promontorium Armæze, nunc dictum caput de Isquete.

Olim caput totius Regni erat Persopolis, cuius ingentes etiam nunc videntur ruinae: tempore autem Assueri, qui regnavit ab Æthiopia vsque in Indiam, supra Prouincias centum viginti septem, principium & Curia Regni fuit Susan ciuitas, nunc in urbem exiguam redacta, quæ dicitur Suster; aliqui volunt esse compositam ex Susam & Ester, quæ fuit Regina vxor Assueri,

& inuenitur inter Siras & Babilonem : nunc autem caput Persidis est Siras nobilissima, ampla, & visu pulcherrima ciuitas, sita est ad radices montiũ, supra quos sunt plura Eremitarum Mahometicæ legis habitacula; ab ipsa tamen incipit planities vnus ferè diei longitudinis : hæc ciuitas dicitur habere quatuor leucas in circuitu; quia plures continet hortos, & creditur esse antiqua Cyropolis.

In hac ciuitate manet Gubernator totius Regni; qui quando illuc perueni, erat primus Princeps, & diuitiis, & authoritate, & maiestate supra alios totius Imperij Persarum; vocabatur Imongoli-Kam, vir optimæ indolis, nostrisq; in hac ciuitate habitantibus maxime affectus: inueniuntur ibi pulcherrimæ domus; præcipuè palatium ab illo Principe constructum; sed hæc ciuitas crudelem eius necem deflet; à Rege enim Sephi inter epulas iussus est occidi, ac caput amputatum ad ipsas deferri epulas: poterat si voluisset, fugiendo mortem deuitare; quandò enim nuntium à Rege missum accepit, certò, & indubitanter credidit se ad necem vocari; sed volens suis prodesse filiis, libenter se obtulit morti: sed & ipse periit, & filij eius à Rege iussi sunt occidi.

Plura sunt in illa ciuitate Mahometicæ templa religionis, ampla & pulcherrima, altis, variòque depictis colore testudinibus; sunt plures turres excelsæ, quæ Ciuitatem plurimùm exornant: vltimis his annis magna domorum multitudo, quæ ex luto & paleis vt plurimùm construuntur, inundantibus aquis corruit; ingens quippe niuis copia supra illos montes ciuitati prominentes deciderat, quæ imbre magno superueniente liquefacta, impetu ad ciuitatem subiectam defluens, plurimas diruit domos: & si nocte hoc accidisset, sine dubio totam euertisset ciuitatem; sed quam citissimè factis plurimis canalibus (omnes enim iussi sunt laborare) statim

statim illi aquæ torrentes per illam se effuderunt planitiem.

Sunt plurimæ circum vineæ, & generosissimum ibi nascitur vinum: inde enim ad mensam Regis prouidetur: sunt etiam pulcherrimi horti; vnus quidem est, qui præ amœnitate Ferdou, id est Paradisus nominatur: Est & hortus Regius, longis latisque munitus ambulacris, duplici terminatis ordine cupressuum, quæ sunt tam crassæ, vt vix tres homines eas complecti possent, tam altæ, vt globulus catapultæ ad summitatem peruenire non possit: nec aues explosis catapultis inde auolant. In medio horti est palatium pulcherrimum, cuius aulae infimæ aliquantum supra planum horti eleuantur, circumquaque fluunt riuuli; plurima est ibi aquarum copia, quæ totum hortum, arborésque plurimas fructiferas irrigat, & efficit lacum satis amplum quadrato vndique lapide decoratum. Via, qua ab vrbe ad illum peruenitur hortum, est pulcherrima, longa latæque: similis reperitur ex alia parte ciuitatis, qua itur Aspahanum. Hæc sufficiant pro hac ciuitate, properemus ad alias.

Secunda dignitate huius Regni ciuitas est Lara, quæ est caput vnius Prouinciæ, siue Regni quod sinum Persicum attingit; tota illa Prouincia est valde sterilis, nullæ aut raræ reperiuntur aquarum origines, Cisternis vbique vtuntur incolæ: Ciuitas ipsa est moderatæ magnitudinis; duo rara ibi videntur, scilicet castellum ex lateribus coctis ædificatum supra collem, ad cuius radices sita est ciuitas, est pulcherrimum visu, & natura ac arte munitum; Aliud, quod rarum ibi videtur; est Emporium, scilicet locus in modum crucis longè latèque diffusus, fornicibus miro factis artificio contextus; ibi omnia exponuntur venalia: in illo Regno sunt plura oppida, sed præcipuè iuxta mare sunt varij portus, scilicet Commoram propè Insulam Ormusij, Congo, Nichilu, &c.

Post

Post Laram est Ciuitas Auësa , non longè ab Arabia felice distans : sunt etiam Daureca , Casaron , Iaron : vbi magna palmarum copia, cuius fructus suauitate & dulcedine excedit fructum palmarum , quæ alibi reperiuntur ; est etiam Main. In eius parte maritima ultra portus assignatos , plures, alij reperiuntur, videlicet Assilou , Verdestam , Bandel, Regh , Reghdilem, Rachel & alij : plurima sunt etiam oppida, etsi aliquandò desint , reperiuntur quædam habitacula ad modum Claustri religiosi constructa, ad multos homines recipiendos capacissima, vbi etiam sunt stabula pro animalibus ; & hæc non solum construuntur, vbi non sunt vrbes & oppida, sed etiam in ipsis vrbibus reperiuntur, vbi mercatores ordinariè gratis commorantur: construuntur enim legatis piis mercatorum decedentium ad hoc destinatis; sicut apud nos piorum Eleemosinis Xenodochia ædificantur: cum enim mercatores plurimum patiantur frigoris & caloris , tum defectu aliarum rerum, vbi talia non sunt receptacula; aliorum miseriæ & laboribus compatientes, similia legata pia relinquunt ; licet autem hæc habitacula in locis ab vrbibus & oppidis distantibus construantur ; semper tamen in eis aliquis moratur, qui illorum curam gerat, & omnia iter agentium necessitati congrua vendat.

Duobus circiter diebus itineris à Cinitate Siras versus Aspahanum est locus dictus Cheel-minar , id est quadraginta columnæ, siue turres ; ibi enim totidem videntur, estque mirabilis antiquitas , & memoria Romanorum , vt continuata apud illas gentes fertur traditione; pluribus enim in locis similes antiquitates reperiuntur.

Hoc Regnum est tritici feracissimum : nam iuxta extremam sinus Persici partem, sunt planities vastissimæ, quæ quotannis tritico seminantur, & inde nauibus defertur non solum Bassoram , & in alias Arabiæ partes, vbi

vbi non nascitur : sed etiam ad Ciuitatem Goënsē, aliásque Indiæ orientalis, vbi præ nimia humiditate (tota enim æstate nostra pluit, vt infra dicetur) non nascitur.

Inueniuntur etiam plures riuuli aquæ salis, ad quorum ripas sal candidissimum coagulatur; imò prope Congo est planities per multa milliaria sale candescens, quod tempore pluuiæ liquefcens, ac ita viam penitus delens, maximam iter agentibus causat confusionem, & molestiam.

Iidem in hoc Regno, ac in aliis nascuntur fructus, inueniuntur affatim vix minutissimæ, ac albæ nulla habentes grana, quas Corinthiacas hîc vocamus: sunt etiam mala persica, at non venenosa, vt hîc fingitur: sed singulariter Regnum hoc, in parte maritima, plures habet palmas; vbi etiam ob adiacentem Arabiam, lingua Arabica communiter inualuit; sed in interiori eius parte lingua Persica, vt in propria patria sedem habet.

C A P V T X I.

Descriptio Regni Parthorum.

Persidi adiacet Parthia, quæ est centrum siue medium Imperij Persarum, in ipsâque sistit Curia Regis; hæc Regio, sicut & aliæ plurimos habet montes & colles, ac in amplas diffunditur planities: in ea solum vidi fluuiolum, qui vocatur Sender aut Bendemir, qui ad mœnia Aspahani præterfluit; ipsum Cha Abbas vnito alio fluuiio nauigabilem voluit reddere; sed quia mons integer scindendus erat; vt isti duo fluuij vnirentur, in quo monte præ nimio frigore solum per tres aut quatuor menses æstatis laborantes operarij consistere poterant, ideo Chæ Sefi eius successor longitudine & difficultate operis pertæsus, ab intentione aui sui recessit.

Plures habet ciuitates; sed prima ac inter alias nobilissima est Aspahan, caput imperij, Regisque curia: hanc

ex paruis principiis, translata ibi ex Casbin curia, Rex Abbas plurimum auxit: cùm enim aliquam de nouo capiebat urbem, vel totum populum, vel magnam illius partem illuc transferebat; maximè ex Tauris & Chulfar habitatores prouidit: vnde est amplissima ciuitas; intus enim plures & latissimos continet hortos, est in latissima planitie sita, variis irrigata riuulis; multa sunt in ea visu pulcherrima, in desinenti ciuitatis est via admodum lata, ad tria ferè milliaria in longitudinem procurrens, hinc inde platanis mirificè ordinatis, ac præcellis ex parte confita: incipit à domo Regia, & ad hortum Regium amœnissimum, ac amplissimum rectissimo tramite terminatur; in eius medio fluens per lapideum canalem riuulus, qui variis ex lapide quadro miri artificij receptaculis identidem receptus, totam dimeritur: Circa medium viæ est pons longissimus, lateribus coctis mirabili dispositis arte constructus, sub quo fluuiolus, de quo supra egi, hieme præsertim niuib, & pluuialibus aquis dilatatus præterlabitur: hinc inde per totam ferè viam reperiuntur domus exiguæ; sed pulcherrimæ, æquali spatio circiter quadraginta passuum ab inuicem distantes, auro variisque picturis, etiam de foris exornatæ, quibus pulchri & magni adiacent horti.

Ante Regis palatium est platea, quingentorum circiter passuum longa, & centum quinquaginta lata, vnde quaque similibus arcubus ex latere cocto constructis circumdata, riuulo circumcurrente iucunda; in cuius principio est nobilissimum, ac amplissimum ciuitatis templum, lateribus deauratis, & cæruleis Persico caractere descriptis vestitum, ac quasi in modum crucis dispositum: tres in eo sunt capellæ, maior est opposita portæ principali, & duæ sunt collaterales se inuicem respicientes; ipsum verò medium est cœlo apertum, amplo aquarum receptaculo quadrato lapide constructo, ad sua lauatoria orationem præcedentia destinato occupatum:

patum : in eius frontispicio auro & picturis fulgentissimo, sunt duæ simili artificio & pulchritudine constructæ turres, & in capella maiori est alta, & visu pulcherrima testudo lateribus varij coloris operta. E parte dextera est aliud templum rotundum, sed exiguum, cui à fronte opponitur aditus palatij Regij; quod & in frontispicio, & intus auro aliisque exquisitis laboribus magnificentissimè decoratur, sicut & aliæ aliorum Principum domus : Palatium est amplissimum, horto amœno circumdatum, qui firmissimo & altissimo vallatur muro; præter aulas & cubicula ad Regis & Officialium eius vsui necessaria, ad interiorem circuitus partem est palatium vastissimum pro omnibus, quas alit, vxoribus & concubinis, aliisque scæminis earum ministerio deputatis. Rex magna se tractat gravitate, ferculis quippe aureis, aliisque correspondentibus ex auro fabrefactis utitur. In inferiori plateæ loco, qui templo illi magnifico respondet, est vicus circumquaque muris circumdatus, qui noctu clauditur, vbi omnes merces pretiosiores distinctis habitaculis asseruantur. Illi arcus totam plateam circumdantes duplici ordine sibi tamen correspondente formam religiosi claustrî expriment: inferiores efficiunt porticus, superiores habitationi mercatorum aliorumque, vnà cum retropositis cubiculis deseruiunt. In illam plateam concurrit infinita quotidie vendentium, & ementium multitudo. Multa habet hæc ciuitas templa suis turribus exornata; multa item habet pulchra & commoda, ad instar claustrî, mercatorum receptacula, quæ lingua Persica Carauansara vocantur. Multi in illa reperiuntur Europæi mercatores; ibi Angli, & Bataui procuratores habent; Galli, Itali, Lusitani, & alij quotidie appellant: sunt etiam tres Religiosi ordines; noster scilicet Carmelitarum Discalceatorum, Sancti Augustini, & Capucinorum: Augustiniani paucis ante nos annis illuc ex Indiis orientalibus venerunt;

vnde recepti sunt tanquam Legati à Rege Lusitaniz missi ; Nos quadraginta ab hinc annis misit Clemens Octauus ; vnde tanquam Nuntij Pontificis habemur : Vltimis tandem his annis missi sunt patres Capucini, & tanquam Legati Christianissimi nostri Regis admissi. In illa planitie, in qua est Aspahanum, sunt infinita propemodum circumquaque oppidula ; plura de hac ciuitate breuitatis causâ prætermitto.

Ad vnum milliare vix distat Aspahano vrbs, in qua adducti ex capta patria habitant Armeni, quam Chulfar nominant, ampla satis, aquis irrigua, pulchris ornata domibus, ditissimis habitata mercatoribus: Sex aut plures habet Ecclesias ; sed præcipuè est monasterium Religiosorum, qui se dicunt S. Anthonij, nobis in suis obseruantis simillimi ; plurimùm enim ieiunant, carnibus abstinent, assiduè alternatis vigiliis psallunt, nigro pallio secundùm formam habitus, cum quo depingitur S. Antonius, vestiuntur, Caputium in occipitio cacumen habet ; interius autem melotem siue vestem pelliceam, etiam æstate deferunt, cilicium continuò gestant ; non tamen nudis incedunt pedibus, barbam alunt, cellulæ ipsorum sepulchri speciem præferunt, ipsos enim vix capiunt, humi supra lodicem dormiunt, nobis præ aliis Religiosis sunt affecti, propter obseruantie similitudinem ; & maximè in carnis abstinentia: rarò missam, sed magna cum solemnitate celebrant, est etiam in eadem vrbe monasterium monialium Armenarum, quod titulo Sanctæ Theresiæ propter mutuum in nos amorem decorarunt.

Post Aspahanum, statim ordine dignitatis sequitur Casbim, ciuitas satis magna ; sed propter aëris inclementiam à Rege Abbas relicta, curiæ honores perdidit ; est sita in extremitate planitiei latissimæ ac longissimæ, in qua plurima videntur oppida : decem circiter diebus itineris distat Aspahano ; hanc ciuitatem, olim dictam Arfaciam,

Arfaciam, aliqui & fortè melius constituunt in Regno Medorum: in ea est palatium Regium maximum. Deinde sequitur ciuitas Cassan, vbi est hortus Regius, & receptaculum mercatorum; omnium, quæ in Perside viderim, maximum & pulcherrimum. Deinde est Amadâ, paucis ab hinc annis à Turcis diruta & solo æquata. Item est vrbs Como. Item Saua, aliæque plures, pluræque oppida; quæ omnia, ne nimia prolixitate lectori fastidium ingeram, libenter omitto.

In hoc Regno plurimum orizæ colligitur, eosdè inque fructus habet, quos alia vicina Regna; sed non alit præ frigore palmas: aër vt in plurimùm est saluberrimus; maximè Aspahani, vbi ferè nunquam nubibus tegitur, raròque pluit; & ita tellus solis niuibz adaquatur, vel aquis putealibus irrigatur: ita autem siccus ac subtilis est, vt statim omnes exsiccet humores, caro animalium occisorum per viginti & amplius dies incorrupta perseverat.

CAPUT XII.

Descriptio Regni Medorum.

Medorum Regnum mari Caspio, Armenia maiori, Parthia, & Assyria terminatur: partim in montes assurgit, partim extenditur in planities, aliquos habet fluuiolos; maior omnibus, quos ibi viderim, inter montium angustias propè Mianam vrhem (qui locus est latrociniis infestus) præterfluens, multòsque riuos colligens ad mare Caspium decurrit.

Illustres habet hoc Regnum ciuitates, caput eius est Tauris nunc, olim Ecbatanis, vbi curia Regum Persarum extitit; maximè sub Cosroa Rege; ibi enim locum vidì inter quatuor pyramides, vbi Crux Christi Domini captâ Hierosolimâ in Persidem translata collocata fuisse traditur; hæc enim inter Christianos ibi commo-

rantes traditio perseverat. Ciuitas ista est adhuc amplissima, illam Rex Abbas, vt dictum est, Imperatori Turcarum fraudibus ereptam Persarum vniuit Imperio, castellū autem eius ex parte destruxit, mœniāque ciuitatis euertit; vt si Turcæ illam caperent, diu ob nimiam à Constantinopoli distantiam, & Persidis continuitatem, conseruare non possent: de facto, cū adhuc essem in Oriente, à Turcīs capta, direpta ac pene diruta est; sed ob difficultatem conseruandi, iterum est derelicta. Antequam destrueretur, erat ditissima & maiestate plena, vt ex ruinis eius apparet: in ea plura vidi templa lateribus auro & picturis variegatis constructa, quæ pristinam ciuitatis nobilitatem & magnificentiam testantur, plures adhuc & præcellæ conspiciuntur turres in illo, quod dum erat integra continebat, spatio dispersæ.

Ex quo à Persis capta est, à suo decidit splendore & pene habitatoribus est nudata, & destructis ædificiis euacuata, ac in desertum maiori ex parte redacta; prius castellum, quod semidirutum apparet, erat coniunctum ciuitati; nunc autem plurimū distat; antiquæ ciuitatis portæ nunc ab ipsa multū apparent dissitæ: nullam in toto Oriente vidi ciuitatem, quæ antiquæ suæ gloriæ expressius monumentum repræsentet, ac defleri mereatur: nunc desolatam ac pene collapsam esse post meum audiui reditum; tanto enim terræmotu concussa est, sicut ab vno è nostris Religiosis inde de nouo veniente audiui, vt maxima domorum pars corruerit: En statum nobilissimæ illius ciuitatis, quam Arphaxat Rex Medorum, post subiugatas Imperio suo multas gentes, ædificatam appellauit Ecbatanis, cuius muros ex lapidibus quadris constructos fecit in latitudinem cubitorum septuaginta, & in altitudinem cubitorum triginta; Turres verò eius posuit in altitudinem cubitorum centum.

Sita est ad radices montis Orontis, nunc dicti Karabag

bag visu pulcherrimi ; variis enim depictus coloribus speciem Iâspidis repræsentat ; ex alia verò parte amplissima decurrit planities , ex qua eius ædificia conspecta oculis arrient ; in illa planitie sunt aquarum riui maximè vnus , qui pluuiis ac niuibus liquefactis intumescens latè diffunditur , nec nisi ponte lapideo ibidem extructo , ac pluribus arcubus aperto pertransiri potest. Ibi supra montes proximos toto anno nix copiosa videtur , hanc ego vidi mense Iulio : Ciuitas illa est emporium ditissimum , propterea citò restauratur ; est enim in medio plurium Regnorum & Prouinciarum , in quibus variæ & pretiosæ merces reperiuntur ; inde enim habet Aspahanum , vnde plures merces orientales & aromata afferuntur ; habet Regnum Ghilon prope mare Caspium , vnde immensa serici prouenit copia , hac etiam ex vicinis defertur Prouinciis magna multitudo lapillorum cæruleorum , quos Turchinos vocant ; & multi in Perside in fodinis cærulei coloris , qui ibi perfectissimus est , & vltra marinus hîc nominatur ; passim reperiuntur. In hac ciuitate conueniunt mercatores ex Armenia, Iberia, Polonia, Mosconia, Constantinopoli, Smirna, Aleppo, Trabifonda, aliisque ex Regnis , in quorum medio sita est ciuitas ; ibique commeatus instituentes emptas merces in suas transportant patrias. Ibi generosi, iique plurimi sunt equi ; plurima siquidem millia in vastissimis pratis non multum inde dissitis prætereundo vidi , qui ad Gubernatorem Tauris nomine Rostan-Kam (quem honoris causa vt pote Christianis affectum nomino) pertinere dicebantur : Et hæc pauca de insigni illa Ciuitate sufficiant.

Post Tauris primum inter altas huius Regni Ciuitates obtinet Ardeuilla locum , trium itinere dierum distat à Tauris ; hæc præ aliis gloriari potest , quòd Imperij Persici sit exordium ac fundamentum , vt supra dictum est ; nec minorem confert illis honorem ac decus,

quòd Regum Persidis sepultura sit, vbi cumque enitè moriantur, se illuc Reges transferri iubeat, vt in sepulchro parentum' ac prædecessorum Regum quiescant. In templo vbi Reges sæpeliuntur, plures quotidie pauperibus erogantur eleemosynæ: hæc est patria Xequè Aidar patris Ismaël Sophi Regni Persici reſtitutoris.

Tertia ſequitur ordine dignitatis Sultania, ſeptem à Tauris diſtat diebus verſus Aſpahanum, eſt pulchra viſu, mediocris magnitudinis, in amœna planitie collocata: in ea templa aliqua & domus pulchræ conſpiciuntur, ibique Regius eſt hortus; in ea quippe Rex Abbas sæpe morabatur, tum cauſa delitiarum, tum vrgentium in illis partibus contra Turcas occaſione bellorum; quod non parum ad huius Ciuitatis ſplendorem con-ducit: ibi iam apud vulgus lingua Perſica non reſonat; inde verſus Tauris Turcica incipit eſſe vulgaris; & ni fallor nullibi, præter hîc, apud plebem in vſu habetur.

Quarta eſt Farabat verſus mare Caſpium collocata, vbi magna ſerici copia colligitur. Eſt etiam vrbs Amarant antiqua, duobus verſus Armeniam à Tauris diſſi-ſta diebus. Eſt etiam Sophian in fine planitiei, in qua eſt Tauris, itinere vnus diei ab ipſa diſtans, vrbs anti-qua & celebris: Ex alia verò parte eſt Miana, duobus fluuiolis irrigata; ſed hæc tota Regio illatam ſibi vlti-mis his temporibus ab exercitu Turcarum vaſtitationem hæcenus deſlet, ac demonſtrat.

Præter vrbes iam nominatas aliæ plures, plurimæ-que oppida circumquaque ſita reperiuntur, ibique victui neceſſaria vili pretio venduntur; fructuum, qui hîc apud nos videntur, ingens eſt abundantia; ſed vuæ citius ibi, quàm hîc matureſcunt, ſecunda enim qua Tauris exiui die, ſcilicet decima octaua Iulij, prope urbem Amarant homines verſus Tauris vuas deferentes ven-dendas inueni.

CAPUT XIII.

Descriptio generalis Indiarum Orientalium.

Incipit India Orientalis à fluuio Indo, qui in parte maritima Regni Sindi Persis finitimi partim influit Oceanum, & terminatur propè Chinam; est Regio vastissima ditissimâque, pluribus Dominis, Regibus, Regulisque subdita.

Primus Indiarum orientalium Rex; qui præ potentia, diuitiis, & dominationis amplitudine nomen Imperatoris meretur, maximè quia multi ex aliis Regibus ei tributum quasi subditi soluunt, vocatur Magnus Mogor, qui ab Indo fluuio, à quo India nomen sortitur, usque ad Gangem longè latèque pertingit imperando. Hæc Mogorum progenies Regum antiquis in India nequit iactari prædecessoribus: vix enim octo agnoscat, qui à magno orti Tamerlano ferè totius Indiæ orientalis principatum per fas perque nefas, multis debellatis ac extinctis Regibus vsurparunt, ac ita plurima sceptro suo ac coronæ Regna subtraherunt: habent vltra Indum fluuium Regnum Candahar Persis nouissimè ereptum; huic citra Indum proximum adhæret Regnum Sindi, pinguiissimis Indi fecundissimum aquis, ac cursu iucundissimum: cuius caput est Tatta ciuitas amplissima, in qua nostri Patres multis ab hinc annis hospitium crexerunt. Postea sequuntur Regna Agra; Lahor siue Multon, Deli, Mandao, Citor siue Sunga, Vtrad, Caximir, Xischande: hæc à mari remota; mari verò proxima sunt Regna Guzarati siue Cambaia, Decan, Bengalæ & alia: præcipuè ciuitates sunt Agra, Lahor, Cambaia, Tatta: plures Reges Indiæ sunt eius tributarij, eius redditus pene incredibiles ad centum sexaginta septem milliones auri crescere dicuntur.

Curia Regni eius in ampla ciuitate Agra ordinariè

commoratur, cui Persica lingua vulgaris est, magnificum habet Regis palatium; in quo superbissimis ex auro, gemmis, lapillisque Thronus, multis pretiosior millionibus, ut ab eius artifice Gallo nomine Augustino Hiriart audiui, conspicitur: hunc sibi Rex Selim vir optimus, ac Christianis plurimum affectus iussit præparari, huic filius vel nepos nomine Corron successit, non iure hæreditario, sed usurpato per vim tyrannicam Regno. Et superbus, crudelissimus, ac Christianis hostis infensissimus, qui vivente adhuc Selim rebellionem intentavit; iussit nostrum Sindense destrui hospitium, Patres Iesuitas in sua curia tempore patris florentes penè extinxit, capto portu Lusitanorum in Regno Bengalæ multos Christianos martyrio consumpsit, suæ quippe Mahometicæ legis zelo exardescit.

Regnum hoc Mogoritanum, & aliqua alia Regna Indica, partim Mahometanis, partim Gentilibus incolis componuntur: vnde oppida Gentilium inde, hinc verò Mahometanorum conspiciuntur; imò Ciuitates, & Gentilibus, & Mahometanis habitantur, Gubernatores tamen, sicut & Rex Mahometicam profitentur legem. Ex illo Regno nullæ exeunt pecuniæ: vnde non ex puro auro, vel argento; sed metallo mixto conflantur: multæ verò in illud deferuntur, quia variis abundat mercibus, quæ ibi coëmuntur: Plura alia de hoc Regno describenda occurrerent; sed quia non vidi, leuiter tantùm attinguntur.

Post Imperatorem Mogoritanum sequitur Rex Dialcha siue Dialkam, qui Regnum suum potens & magnum propè ciuitatem Goënsensem habet, cuius olim erat particula, sed nunc à Lusitanis conseruata: Curia eius Regni est ciuitas tripartita Visapor, plures alias habet vrbes, ut Dabul, Reiapor, Punda, aliásque plures ac plurima oppida: est religione Mahometanus, eandemque legem præcipui eius ministri profitentur; quamuis maior

maior pars regni Gentilis existat. Solent omnes Lusitanorum Proreges, quando de nouo Goam veniunt, pretiosum aliquod munus ad illum mittere, quo firmior & diuturnior pax inita inter Regem Lusitaniæ, & illum conseruetur; vocant enim se fratres in armis: Legatus illius Regis semper Goæ assistit, Lusitani autem ad illum Regem Legati non mittuntur, nisi specialis aliqua necessitas vrgeat, quamuis dum essem in Oriente, Prorex duos è nostris Patribus ad illum Regem miserit, vt ibi titulo Legationis manerent, & animarum conuersioni attenderent, sed præcipuè ex illis videlicet R. P. Leandro ab Annunciatione, de quo infra agetur, mortuo, totum hoc negotium irritum fuit.

Tertius est Rex, cuius Regnum à principali eius Ciuitate Cochim, in qua Rex moratur, nomen Cochinnensis habet; hic Rex fuit semper fidelissimus Lusitanis, & licet alij penè omnes bella aduersus eos mouerint, hic vnicus constans etiam in ipso principio eos benignè recepit; & licet propter hoc aliis inuisus esset, tamen locum ad condendam Ciuitatem, nomine Cochim vltro concessit, illamque perpetuò dilexit, & quasi propriam conseruauit: vnde in Consulū electionibus, ac in aliis cōgressibus publicis; ipse Rex assistit, habet enim suum palatium in Ciuitate Cochim superiori, huic quæ Cochim inferior dicitur adiacente. In hoc Regno homines sunt nigri admodum, sicut & in aliis Prouinciis mari proximis ad Austrū accedentibus. Ibi reperiuntur Christiani Catholici dicti Sancti Thomæ, qui in suis officiis lingua vtuntur Chaldaïca, suū habent Archiepiscopum vnus semper ordinis Religiosum; hæc enim religio quasi hæreditario iure hunc Archiepiscopatū possidet; vnde viuente Archiepiscopo successor eligitur, quod illos maximè irritat Christianos, qui propterea sæpe schismata fouent. In hoc regno mulieres pluribus nubunt viris, vnde non est, qui proprios agnoscat filios: &

ita ipse Rex non filios ab vxore propria genitos, sed sororis filios Regni hæredes constituit, quod proportionem seruata in aliis obseruatur; dicunt enim hos citra dubium sibi esse consanguineos.

Sequitur Rex Samarin, qui suam in Ciuitate Calecut tenet curiam, hic infensissimus semper Lusitanis extitit inimicus, ac sæpe ad illorum destructionem, ac extinctionem conspirauit. Dum essem Goæ rumor increbuerat, ipsum velle fieri Christianum; sed breui totum euauit. Prope caput Comorynum sunt plura oppida Christianorum, quos Sancti Francisci Xauerij denominant, hi quippe ab illo Sancto Indiarum Apostolo, cuius corpus sæpe Goæ in domo professæ Societatis vidi, fidei Christianæ ritibus fuere instituti, ibi aliqua Patrum Iesuitarum sunt hospitia.

Vltimis his annis à Magno Mogore superactus ac extinctus fuit quidam Rex satis potens, qui vocabatur Meliq Cambar, cuius Regnum circa Chaülum extendebatur; habet castrum supra rupem inexpugnabile, quod aditum ipsi Mogori ad partem maritimam excluderat, sed eo licet magno cum labore capto, totum illud Regnum facile occupauit, suoque vniuit Imperio. Sunt alia insuper minora Regna suis subordinata Regulis, qui tamen ferè omnes Magno Mogori tributum soluunt: Est Regnum Colconda, vbi adamantes in terræ visceribus inueniuntur, solet Rex hæc mineralia locare, sed maiores ac speciosiores sibi reseruat.

Omnia supradicta Regna sunt Regum Mahometicæ legis: inueniuntur alia, quæ quia non vidi, propterea solum quædam indico, scilicet Gingi, Taniaor, Madurè & plura alia, quæ sunt Regum Gentilium, quos Naiques vocant, imò est vnum non Regi, vt audiui, sed tantum Regina subordinatum, vocatur autem Regina Olalæ, cui omnes viri tanquam clientes obediunt; filia enim, non filij, in Regno succedunt. Inter illos Gentes

les hoc est mirabile, quòd si quis iter agat, & securum viæ comitem habere velit, non hominem, sed puerulum alicuius viri grauis assumit, & quo minor est, maiori incedit securitate; plus enim honoris & reuerentiæ puerulis, quàm propriis illorum patribus exhibetur.

Vltimò tamen est ditio Lusitanorum infra specialiter describenda; hi adinuenta noua nauigatione, superatòque promontorio bonæ spei, emensis penè sex milibus leucis, infinitis laboribus exantlatis, & naufragiis sæpe factis extinctam Christi fidem in Indiis suscitauerunt, & Sancti Thomæ Apostoli successores effecti, plurimos conuerterunt, multique pro eadem fide martyrio coronati sunt: hæc omnia sunt citra Gangem, nam etiam vltra sunt plura alia Indiarum Regna, quarum præcipua sunt Arracan, Pegu, Sian, Camboya, Cochinchina.

CAPUT XIV.

Descriptio partis marina Indiarum.

GLoria & decor Indiarum in ipsa parte maritima maximè comparet; ibi enim quidquid intus variis in locis nascitur, aut fit, asportatum reperitur: ibi littora amœnissima, arboribus præcipuè palmis consita prospiciuntur, ibi frequentes vrbes, frequentiora cernuntur oppida: primò enim à parte Septentrionali prætermisissis aliquibus non ita notis, est vrbs Diuiensis iam superius descripta: Deinde est portus Surrati vbi Angli & Bataui mercatores suas habent residentias, ac procuratores qui merces ex Imperio Mogoritano illuc translatas emant: sequitur Cambaia ciuitas amplissima, quæ proprium sibi Regem ibi commorantem non multis abhinc retro annis agnoscebat, nunc Mogoritano subiacet Imperio, sicut & Surratum, ibi varij rarique

que ac multi pretij lapides inueniuntur, vnde multi pro structura capellæ pretiosissimæ ac in toto orbe singularis magni Ducis Etruriæ dicuntur asportati. Prope hanc ciuitatem in quodam sinu Indici oceani fluxus ac refluxus aquarum tanto impetu procurrit, vt ibi naues expansis vento in contrarium fortiter impellenti velis, iactâque anchorâ illi resistere non valeant; vnde est locus periculi plenus; sæpe enim naues se inuicem collidentes confringuntur, ac submerguntur, & ita Nautæ illuc tendentes aquis viuus, vt vocant, scilicet quo die Lunæ mare plurimum crescit, portum illum ingrediuntur, ibique naues positæ vndique adminiculis in sicco relinquunt, easque mercibus per integram mensē onerant, expectantes alium incrementi diem, vt inde prospero fluxu exire possint, qui vt dicitur Equum laxis habenis totoque impetu currentem præcurrit.

Post Cambaiam sequitur vrbs Daman, ditionis Lusitanorum, quam cùm adhuc essem in Indiis, Magnus Mogor obsesserat, sed pace inita recessit. Deinde est Bassainum ciuitas Orizæ ac saccari feracissima, quæ maris inundatione vltimis his annis pene destructa fuit; tanta enim fuit in mari tempestas, vt ad multa milliaria intra terram & arbores naues transmiserit: hanc credunt fuisse suscitata ad castiganda populi peccata; nam & Cruces & alia multa euerit, solum patibulum Iustitiæ instrumentum relinquens intactum: In illa Ciuitate est Imago Beatissimæ Virginis miraculosa, maximæque deuotionis, apud Gentiles etiam, qui turmatim ad offerenda munera quotidie concurrunt, ob miracula in ipsis patrata; non tamen propterea conuertuntur: vocatur Nostra Domina de remediis, est extra ciuitatem in Ecclesia Patrum Sancti Dominici, qui alium intra Ciuitatem habent Conuentum; sunt etiam alij Conuentus, vt Iesuitarum, Sancti Francisci, Sancti Augustini; nobis etiam

vnum cum redditibus obtulerunt; ego enim epistolas Consulum ac consilij ciuitatis directas Proregi, ab ipso licentiam fundandi exorantes, nobisque fundationem maximo affectu offerentes accepi; sed ob generalem fundandi prohibitionem ab ipso Hispaniarum Rege factam non fuit acceptatus.

Deinde occurrit Chaülum, vrbs parua; sed amœna valde, ac mercimoniis diues; ibi est Castrum à ciuitate remotum aliquantulum, ibi enim mare influit intra terram, fretum efficiens, ex cuius vna parte est Castrum fretum imminens; ac proinde nihil ingreditur portum, nisi adiuuente castrì Duce; sed quomodo miraculosè sit captum postea dicitur: Ex alia verò parte est Ciuitas satis munita. Inde sequitur Danda, postea Daboul paucis abhinc annis ab Anglis pene destructa, deinde Reia-por; exinde Goa Ciuitas nobilissima, quæ peculiari digna est descriptione. Vterius sequitur Calicut, postea Cochinum, vltra verò caput Comorynum est Ciuitas Melia-por, sic dicta ob multitudinem pauonum qui ibi reperiuntur; vulgò tamen dicitur ciuitas Sancti Thomæ, quia ibi Sanctus ille Apostolus martyrio coronatus est: hîc prope est castrum Batauorum dictum Palia-cati: ex industria studens breuitati omnia oppida, ali-quasque prætermisi vrbes, celebriores tantum referens.

In toto illo tractu maritimo sunt infiniti propemodum portus, isque optimi, quidam ad excipiendas maximas etiam naues idonei: à Goa enim vsque Chaülum per spatium sexaginta leucarum sunt ferè triginta portus, inter quos sunt optimi ac profundissimi, Goæ, Reia-por, Daboul, Danda, & Chaül: hi autem omnes portus natura, non arte facti sunt; mare quippe in illis locus quasi flumina efficiens, ac plura sæpe milliaria intra terram procurrit: sed omnes hi portus tempore hyemis modo describendæ, arenâ ventorum vi, in mare proiectâ clauduntur; recedente hyeme, cessantibus hu-iusmodi

iusmodi ventis, contrariisq; flantibus iterum aperiuntur : propterea nullus tunc mare Indicum nauigare potest cum præter tempestates tunc continuas quæ naues ad terram proiiciunt , non sint portus ad quos se recipere possint : solùm duo in tota illa parte maritima sunt, qui non claudantur, scilicet Membaini propter latitudinem , & Mormogani prope Goam ; quia ibi ventus non dominatur , & ita si forte fortuna hyems aliquas naues in mari intercipiat, nisi ad vnum ex istis portum se recipere possit , infallibiliter naufragium patientur.

Hyems in India non est rigida præ frigore, nunquam enim plus friget quàm hîc mense Maio ; sed propter continuas pluuias hyems denominatur : non enim annus in quatuor partes, sicut hîc diuiditur ; tempus veris aut autumnus non agnoscitur , solùm æstas & hyems nominantur ; quatuor mensibus , scilicet Iunio , Iulio , Augusto , & Septembri, quibus continuò pluit , hyems durat ; aliis verò octo reliquis æstas computatur : hoc Diuina prouidentia factum est , vt his quatuor mensibus , quibus intolerabiles essent calores , continuis aër refrigeretur imbribus : mensibus Nouembris , Decembris , & Ianuarij aliquantulum friget ; non ita tamen, vt igne opus sit ; tunc enim flant venti orientales è terra procedentes , deinde Februario incipit calefcere , & tunc vix maturescunt ; mense Martio & Aprili multum intenditur calor, sed mense Maio est pene intolerabilis ; præ calore siquidem , & continuo sudore pellis corporis ex parte exiit : solùm vbi spirat ventus, aër refrigeratur ; inferiores enim partes domus sunt calidiores ; in fine autem Maij, siue in principio Iunij, mirabili Dei prouidentia , flant infallibiliter quotannis venti à mari, qui nubes imbriferas ad terram impellunt, quæ continuis imbribus calorem refrigerant ; aërem autem adeo humectant, vt licet hostiæ non assumantur nisi tempore offertorij,

offertorij, & intra pannos siccæ conseruentur, antequam tamen consecrentur, ita sunt humidæ, vt instar cartæ madefactæ inclinentur, nisi eleuentur vel supra patenam, vel in superiori parte assumantur: tecta etiam domorum, natis præ humiditate herbis, virescunt; ita vt ciuitates prata videantur: non tamen imbres tota hyeme æqualiter decidunt; in principio enim continuo & affatim per quindecim, aut viginti dies sine intermissione fluunt, & ita aër nubibus condensatur, vt Sol penitus non compareat; imò in meridie crepusculum esse videatur. His diebus elapsis imbres paululùm cessant; licèt quotidie, ordinariè loquendo, pluatur parùm aut multùm: iterum mense Iulio copiosi ac continui imbres per multos dies decidunt, quibus transactis rigor hyemis transiit; non enim postea tam frequentes cadunt imbres, sed vel intercalatis diebus, vel noctibus veniunt; tunc enim, scilicet mense Augusto, repentinæ ac citissimæ eleuantur è mari nubes, quæ plurimùm aquæ effundunt; ita vt diluuium videatur, sed citò prætereunt, & ad interiores terras deferuntur, sic pertransit Augustus: Septembri iam rari sunt imbres, Octobri sunt rarissimi, aliis mensibus penitus non sunt.

Quando incipiunt imbres, agricolæ orizam seminant, quæ postquam nata est, solet transplantari, vt melius crescat: tota India maritima est orizæ feracissima, præcipuè in ditione Barcelor & Mangalor tanta crescit abundantia, vt inde trecentæ & amplius naues onustæ, ter aut quater in anno, veniant Goam; oriza enim est quotidianus hominum cibus, nunquam enim ibi mensæ sedent, nisi oriza compareat; quam vel cum pisce salso, vel cum fructibus in aceto conditis, vel aliter; manu, non cocleari vtentes comedunt, imò pauperes non panem, sed solam orizam manducant. Bassaini est etiam magna orizæ copia, vbi reperitur quædam

dam minutissima odorifera ac delicatissima : vbi sunt aquæ riuuli : bis nascitur oriza in anno ; nisi enim continuò aqua humectetur, statim arefcit : Ibidem, ac etiam alibi per totam oram maritimam , maximè Bengalæ sunt frequentes saccari arundines ; & ita communiter Lusitani , præsertim infirmi cibos , aut mala aurea , citronica , aliâque saccaro condita manducant.

Ultra caput Comorynum incipit hyems , quandò citra caput desinit ; licèt quantum ad alia, nullum penè discrimen inueniatur.

C A P V T X V.

Descriptio Insularum Maris Indici.

Plures sunt in Orientali Oceano, eæque celeberrimæ Insulæ , vtpote Insula Sancti Laurentij , Sumatra, Iaua maior & minor , Iaponensis, & Moluciæ. Vbi nux muscata & clauus aromaticus nascuntur. Item Philippinæ , Insulæ Nicobar , aliæque plures : sed meum hîc intentum est, illas præcisè referre , quæ iuxta oram Indicam sitæ reperiuntur ; aliis exigui momenti silentio prætermiſſis : solius Insulæ Ceylam , quam Taprobanam ab antiquis nominatam communis tenet traditio, ac Maldiuarum mentionem faciam.

Insulæ Maldiæ dicuntur esse vndecim mille, Cochino non multùm diffitæ ; illarum incolæ sunt Mahometani , quamuis nunc illorum Rex sit Christianus ; Goæ tamen inhabitans : postquam enim Lusitanorum industria in Christiana fide instructus ac baptizatus fuit, nec non Lusitanæ nobili sceminæ , quam sæpe vidi , matrimonio iunctus , maior Insularum pars se ab eius dominio separauit , & ita Goæ securitatis causâ habitare coactus est , eo præcipuè animo , vt à Prorege Indiarum classem Nauticam ad subiugandas sibi rebelles Insulas obtineret : sæpe de his Regem Hispaniæ certior

rem

rem fecit rogans hanc sibi classem dari, imò & Lusitaniam ea de causa petiit, à Rege obtinuit quod postulabat; sed Proreges Indici nunquam Regis imperium, siue verum vt extrinsecus apparebat, siue fictum vt creditur, executioni mandarunt; vnde Regno expulsus mortuus est: huic successit filius Philippus nomine, mediij coloris scilicèt subobscuri participans aliquid de nigredine patris, & aliquid de albedine matris, hunc sæpe visitaui & allocutus sum, mecum conuenerat vt simul in Europam veniremus; credebat enim se præsentia obtenturum à Rege Hispaniæ, quod per epistolas non poterat; videbat enim, aut eius mandata non esse efficacia, vel saltem in India derideri: non multos habebat redditus; solæ enim aliquæ Insulæ eius Imperio subordinatæ perseuerabant: mortuus est etiam hic adhuc iuuenis innuptus, vnde Regni successorem reliquit suum ex sorore nepotem; quamuis eius patruus, illius Regni legibus, & consuetudini, ac subditorum acceptationi fidens regnum ad se pertinere lite disputaret: Dum Goæ discessi nullus adhuc Rex iusularum erat determinatus. Inter illas Insulas sunt aliquæ mediocres, nullæ magnæ, plurimæ perexiguæ, nihil ibi singulare est, sed communia Indiis quoad victum, vestitum & alia, participant.

Insula Ceylam non multùm distans à promontorio Comoryno, olim apud omnes nominatissima Taprobana nuncupata; multa habet quæ nobilissimam eam, vtilissimamque reddunt; propterea Lusitani hoc decretum à Rege habent, vt illà præ omnibus aliis orientis coloniis conseruent. Est satis ampla, multis olim Regulis subdita, inter quos præcipuus est Rex Candy, à præcipua sua ciuitate sic dictus; hîc continuis præliis Lusitanos aggreditur, sæpe ob multitudinem suorum, & proditionem aliorum qui Lusitanis parent, victor existit: quando primùm in Indiam perueni, ob subdito-

tum rebellionem penè deuicti ac extincti fuère Lusitani, illorum duce Constantino de Saa ibi occiso: Est etiam Rex Vuæ, aliique pauci Reguli; Lusitani enim maiorem & meliorem illius partem, scilicet oram maritimam circumquaque possident. Vrbs præcipua dicitur Colombo, ibi ordinariè moratur, tum Dux Ciuitatis, tum Dux generalis totius insulæ, ac exercitus ibi ob incurfiones hostium semper ordinati.

Postea est vrbs Galli; deinde Negombo, has duas vrbes vel captas, vel obsessas post meum reditum audiui: iam Bataui, Triquilimale & Baticulo castra, dum adhuc essem in Indiis, cœperant; magna auiditate hanc Insulam appetebant, cum enim alia omnia haberent aromata, solùm eis deerat cinnamomum, quod in hac tantùm Insula, saltem optimum reperitur; & procul dubio nisi mutatum fuisset Lusitanorum dominium, non solùm ab illa Insula; sed à tota India à Batauis fuissent expulsi; hi enim potentes viribus in mari ob plures, quæ quotannis ex Batauia appellant naues, cum pluribus illarum partium Regibus fœdus inierant, ad Lusitanos pene viribus consumptos (aliquando enim nec intra annum naucula è Regno Lusitaniæ veniebat) expellendos: vnde sicut iam cum Anglis pacem inierant, sic cum Batauis etiam inuito Rege Hispaniæ inire decreuerant; videbant enim se quotidie viribus deficere, se iam colonias aliquas amittere, se iam nauigare non posse, à quatuor enim iam annis Bataui multis nauibus portum Goënsen obsederant, & naues appellentes capiebant: licèt enim sæpe cum illis viriliter ac generosè pugnassent, tamen viribus inæquales obsidionem soluere non poterant Batauos expellendo; imò paucis, antequam discederem diebus, Dux classis Batauæ ausu temerario, sub Castro tres maximos potentissimósque Lusitanorum Galliones, in quibus erat robur illorum, combusserat; vnde commercium omni-

nò

nò terminatum videbant, sine quo India miserrima, & cum quo felicissima est: Tandem ultimam sibi imminere ruinam prævidebant; propterea iam ad Regem Hispaniæ legatum miserant, vt vel auxilium sibi mitteret, vel perditis suis rebus inita cum Barauis pace consulere permetteret: hac vltima Regni Lusitaniæ mutatione illis optimè consultum est.

De hac Insula dicitur, quòd montes sunt exChristallo, nemora ex cinnanomo, & flumina ex lapillis pretiosis: quia ibi in montibus plurimùm Christalli, in fluminibus lapilli pretiosi, in nemoribus ferè omnes arbores sunt cinnamomi.

Ibi sunt plurimi Elephantes, præ aliis generosissimi ac nobilissimi: vnde ab aliis, si forte occurrerint, vt tales agnoscuntur, ac facta, vt audiui, reuerentia salutantur: propterea isti à Regibus plurimùm æstimantur; sed de illis inferius iterum redibit sermo. Sunt etiam in locis maritimis Crocodili, quibus aliquando homines nefarij, ad mortem damnati traduntur deuorandi.

Non nascitur in hac insula triticum; sed de foris asportatur: vnde sæpe panis inopia laborant; est tamen plurimùm orizæ, quæ ordinarius in toto oriente est cibus; ibi quippe ter in anno nascitur.

Rex Candy suam prosapiam ad ficta ac fabulosa reducit principia: vnde se filium Solis nominat; & quidem optimè; si iuxta Philosophicum Aristotelis axioma intelligeret, (Sol & homo generant hominem) quia Sol ad omnes inferiores has mutationes concurrat cum causis proximis. sed fabulosè alio modo intelligit; vnde ab aliis deridetur.

Prope Insulam est ora maritima, nomine piscationis insignita: quia non multis abhinc retro annis gemmæ piscatione capiebantur; quapropter circa illam variz inter Episcopum Cochinensem & quosdam Religiosos dissensiones ortæ sunt, cuius videlicet esset ditionis:

prælia maritima inter dissidentes commissa sunt; victor Episcopus extitit, victi Religiosi ac inde expulsi. Insuper Episcopus sententiam excommunicationis contra ostrea gemmifica pronuntiavit; nè ad illa accederent littora; res mira, Ecclesiæ imperio ostrea obediunt, cui quotidie homines obedire reluctant; & sic ibi postmodum talia ostrea non comparuerunt.

C A P V T XVI.

Descriptio Insulae & Ciuitatis Goanae.

INsula Goana non in alto mari sita, sed ipsi continenti vnita videtur: mare enim duplici formato flumine siue freto, continentem penetrat, ac ipsam efficit insulam: habet circiter quatuor leucas longitudinis, vix duas latitudinis, qua parte latior est, scilicet in medio; in vtraque enim extremitate sensim restringitur: hi duo fluuij vbi diuiduntur, vt intra continentem procurrant, spatium vnus leucæ continent; ex cuius parte Septentrionali est castrum munitissimum dictum vulgò *d' Aguada*; quia ibi est fons vbi aqua à nauigantibus accipitur; ex parte etiam Meridionali est aliud, dictum *Mormogam*; in ipso verò Insulæ angulo, in medio illius spatij est arx, licet exigua: vnde totus ille tractus faciliè ab inimicis custoditur. Postquam hi fluuij per quatuor leucarum spatium diuisi excurrerunt, iterum coniunguntur in interiori Insulæ parte; multas tamen prius efficiunt Insulas statim describendas, suum fluxum ac refluxum à mari patiuntur: prope locum vbi confluunt, ex parte continentis, est lauacrum Gentilium, quo ex omnibus circumiacentibus oppidis sæpè concurrunt, ibi se lauant, Solem adorant, aliquid in extructa ara idolis sacrificant, sicque redeunt mundatos se existimantes; ibi semel in anno celeberrimum obseruatur festum

stum, ad quod celebrandum plurima hominum millia ex vicinis concurrunt oppidis.

Maiores pars Insulæ Goanæ, muris circumquaque constructis, maximè ubi fluuij non ita dilatantur, munita est; varias identidem munitiunculas habens in circuitu, scilicet Pangi, Ribander, Dangi, Sancti Blasij, S. Iacobi, S. Ioannis Euangelistæ, & Sancti Laurentij: fluuij illi ex vtraque parte sunt amœnissimi, palmis semper virescētes: statim ac quis portum Goensem appellit, præter dicta Castella, videt Conuentū Reformatorum S. Francisci, sub titulo Nostræ Dominæ de finibus, supra montem constructum ipsique mari imminentem, vndeque circumfusam habentem siluam: passim ex vtraque parte fluminis domus recreationis, & villæ passim in mediis palmis conspiciuntur: Ad vnum circiter milliare occurrunt duo castra vnum inceptum & nunquam finiendum, dictum Gasparis Dies in Insula Goana, cui ex alia parte correspondet Castrum Bardès, olim munitissimum, nunc pene desertum, ibi prope est monasterium Regum Magorum à Rege Lusitanæ fundatum, ubi Patres Sancti Francisci educant pueros in doctrina & pietate: his præteritis occurrit oppidum Pangi, ubi est domus admodum pulchra, vbi hospitantur Proreges de nono aduenientes; donec omnia solemni eorum receptioni necessaria parentur: licet enim in Conuentu Regum statim recipiantur, ibique suas patentes coram alio Prorege, totaque nobilitate legendas exponant; inde tamen recedentes ad dictam domum commodiorem accedunt. Post illud oppidum statim occurrit pons per multos arcus latè discurrens, deinde via ad vnam pene leucam diffusa in mediis fluuij antea exundantis aquis fundata, in cuius termino est oppidum Ribander, quo superato statim ciuitas Goana plusquam tribus leucis à mari distans apparet: ultra quam ad tria pene milliaria fluuius procurrens, alteri ex alia parte Insulæ decurrenti

occurrit : tempore hyemis ob continuos imbres fluuius dulcessit, partemq; nominatissimi Gangis fluuij recipit.

In hac Insula dies toto anno penè æquales apparent, saltem non percipitur notabilis differentia, cùm circiter in decimoquinto sita sit gradu; non multum enim à terra eleuatus aspicitur polus, ita vt non solum Vrfa maior, sed & minor in suo circuitu terræ contegatur: Sol ibi bis perpendiculariter in anno pertransit; vnde in meridie nullam producit vmbra, aliis verò temporibus aliquandò versùs Septentrionem vt in Europa, aliquandò versùs meridiem illam efformat, ex hac Solis proximitate maximi procedunt calores, iique sine dubio essent intolerabiles, nisi Deus ventum maritimum quotidie, & continuos imbres calidioribus mensibus, vt dictum est, prouidisset.

Ibi, sicut & in aliis vicinis regionibus, homines vt plurimum nigri nascuntur, solum aliqui inter eos præcipui, dicti Bracmani aliquantulum candidiores apparent; Lusitani verò filios à sua declinantes albedine, & ad matris nigredinem accedentes in principio sui in Indias aduentu procreantur; propterea mixti, vulgò *misticij* vocantur, qui ex patre Lusitano in Indiis nascuntur: paulatim tamen aduenientibus quorannis iuuenibus Lusitanis, ibique cùm puellis misticis nubentibus, progenies ipsæ purificantur, naturales Indi in hac Insula, vicinisque loci nudi omninò, etiam in publico comparent, sola telæ particula dimidio palmo lata ad honestatē vtuntur: mulieres paulò decentius vestiuntur; quamuis alicubi seminudæ incedāt. Mulieres Bracmanæ mortuo primo coniuge in honesta viduitate perseuerāt.

Per totam Goanam Insulam sunt circiter triginta parochiæ: in ciuitate Goa sunt septem præter Cathedralē; extra verò sunt sequentes in oppidis collocatæ, S. Ioseph, S. Ioannis Baptistæ, S. Ioannis Euangelistæ, S. Annæ, S. Crucis, S. Barbaræ, S. Mariæ Magdalenæ,

dalénæ, Nostræ Dominæ Lauretanæ; item Nazarenæ; item de subsidio; S. Laurentij, S. Andreæ, S. Simonis, S. Mariæ d'Aquadeluppe, S. Ioannis Sahagun, S. Agnetis, S. Blasij, S. Iacobi, Conceptionis, S. Michaëlis, aliæque nonnullæ: ex istis quatuor sunt sub regimine Patrum Dominicanorum; videlicet S. Barbaræ, vbi est Conuentus Recollectionis, S. Mariæ Magdalenæ, S. Crucis, & S. Michaëlis: duæ verò sub Patribus S. Augustini, videlicet S. Agnetis, & S. Ioannis Euangelistæ: aliæ clericis sæcularibus subsunt.

Multi reperiuntur in hac Insula fontes optimi: aquam enim regulariter tam Lusitani, quàm naturales Indi bibunt; vinum quippe ex Lusitania delatum; tum carum tum præ calore Regionis est nocivum, sicut & vinum ex palmis elicatum, si abundantius bibatur. Naturales Indi panem non manducant, non enim ibi nascitur triticum, sed vel ex Perside, vel ex interiore parte continentis affertur; non tamen caro venditur pretio: triticum non minuitur in farinam; sed in Crassiores, instar arenæ, resolvitur partes, quæ tamen commixtæ optimum panem efficiunt, ac satis album, gustuque suavem; dummodò recens coctus comedatur: postquam enim induruit, quod post sex horas aduenit, quasi lutum insipidus apparet, ac post paucos dies, maximè dum pluit computrescit: vnde panis quotidie coquitur, ac post prandium dimidio minus pretio venditur. Ipsi autem qui panem conficiunt, suos habent determinatos emptores, ad quos summo mane quotidie panem recentem, iuxta conventionem, pro tota die deferunt; nec magna ibi videntur molendina, quorum rotæ vento, vel aqua voluantur; sed parua, quorum voluendis rotis labor hominis sufficiat.

Prope Insulam Goanam sunt aliquot Insulæ, aliæque terræ adiacentes Lusitanis subditæ: à parte quidem orientali, quæ est intimior, ac magis à mari remota, est

Insula Roderici Dies de Sampaio peramœna, sed exigua, opposita loco lauacri Gentilium; huic proxima iacet Insula Lecma vulgò dicta Sancti Stephani, ob Ecclesiam in ea constructam Sancto illi protomartyri dicatam: à parte Septentrionali est insula dicta Pietatis, ibi sunt tres parochiæ, scilicet nostræ Dominæ Pietatis, S. Bartholomæi in oppido Choram, & S. Mathiæ: prope mare autem est, non insula omninò, sed peninsula nomine Bardes, vbi sunt ferè viginti Parochiæ sub regimine Patrum S. Francisci de Obseruantia: ex parte meridionali est Insula Georgij da Costa dimidiæ leucæ in longitudinem, aliæque perexiguæ: vltra flumen verò est parua prouincia nomine Salsete, cuius præcipua oppida sunt Rachol & Margan, in illa sunt plusquam viginti parochiæ Patribus Societatis commissæ, eorum etiam est Collegium Racholi. In his Insulis præter Christianos tum Lusitanos, tum Indos, est maxima Gentilium multitudo; non tamen ibi suos ritus Gentilicos exercere permittuntur, saltem in publico; quamuis, dum essem Goæ, viginti millia aureorum obtulerint, vt sibi ritus proprij in celebrandis matrimoniis, & comburendis mortuorum cadaueribus permitterentur: hanc & maiorem pecuniæ summam Gubernatori Punda Mahometano ad prædicta in sua ditione celebranda persoluunt; vnde quando infirmi se desperatos vident, ad continentem se deferri curant (non enim mortuorum cadauera illuc transferri à Lusitanis permittuntur) vt post mortem comburi possint.

Superest nunc describenda sigillatim ciuitas Goana, caput ditionis orientalis Lusitanorum, curia Proregis, sedes Archiepiscopalis, vbi Parlamentum siue supremus Iustitiæ Senatus, & sanctæ Inquisitionis tribunal inuenitur.

Goa est ciuitas æqualis Auenioni magnitudinis, componitur ex Lusitanis qui ibi dominantur, Christianis

nis Indicis, Gentilibus; aliquibus etiam Mahometanis, ac paucis Iudæis cognitis, illuc mercaturæ causâ venientibus.

Ciuitas plus longa, quàm lata est; ad ripam quippe fluminis ab Occidente versùs Orientem procurrit; in Septentrionali parte Insulæ intra ciuitatem sunt duo colles, vnus ad Occidentem vocatus Sanctus; quia sex in illo constructæ sunt Ecclesiæ: alius ad Orientem. Collis Occidentalis ex parte meridionali coniungitur montibus totam in longitudinem penè ciuitatem percurrentibus, ac ex illa parte terminantibus: ex parte verò Septentrionali pene ad fluuium pertingit; vicus tamen ad eius radices prope ripam fluuij decurrit, perueniens ad Occidentalem ciuitatis partem satis exiguam, in qua est parochia S. Petri, & Collegium S. Thomæ Aquinatis Patrum Dominicanorum. Collis Orientalis coniungitur versùs Orientem monti, qui latè per Insulam discurret; hic collis duplici valli imminet; vni quidem à parte Septentrionali, iuxta fluuium discurrenti, domibùsque plenæ, vbi est parochia sanctæ Luciae: alteri verò intra ipsum montem, aliúmque iam dictum ad partem Australem diffusæ, domibus ad longum satis spatium ædificatis, ibi est parochia sancti Thomæ Apostoli, ibi etiam in medio tractu est Collegium antiquum Patrum Societatis à S. Francisco Xauiero Indiarum Apostolo constructum, vbi sacrum eius Corpus diu requieuit; sed nunc in domo Professa collocatum est. In vltima parte huius vallis est templum incæptum, sed nondum consummatum eiusdem S. Thomæ, cui adhæret puteus maximus, non multùm profundus, ex lapidibus quadris ædificatus: huic lacus adiacet, vnde plures exeunt vapores, qui aërem ciuitatis, quando vento inde flante deferuntur, corrumpunt. Noster Conuentus est in angulo illius Collis Orientalis, in medio pene ciuitatis; quia à fronte habet præcipuam

puam ciuitatis partem sibi subiacentem: ex quolibet autem latere vnam habet ex vallibus iam descriptis; retrò verò per illum collem facilis est ad campos exitus; rarissimæ enim domus ibi reperiuntur: vnde etiam quasi extra ciuitatem computatur, ac proinde omnium calculo optimus totius ciuitatis locus iudicatur, tum ob prospectiuam, nam totam sibi subditam prospicit ciuitatem; tum ob aëris clementiam: Est enim optimo vento maritimo expositus; prope nostrum Conuentum à parte meridionali supra eundem collem est Ecclesia perexigua sancti Mauri, ad Orientem verò in loco edioriori, ac paulò longius est Ecclesia nostræ Dominæ de Monte. loco tam amœno pulcherrimus noster correspondet Conuentus; licet enim in hac Ciuitate plures sint alij maiores, nullus tamen iucundior est, aut apparet.

Constat ex dictis principalem Ciuitatis partem esse inter duos illos colles, montem meridionalem, ad litrus fluuij constructam; domus ibi satis pulchræ conspiciuntur, palatium Proregis amplum, ac eminens ipsi fluuiò prominet ante latam pulchrisque domibus circumdatam habens plateam; retrò verò, qua parte respicit fluuium aliam habens latissimam, fluuiòque solummodo terminatam, in qua oriza & merces, quæ Goam afferuntur, pro soluendo vectigali deponuntur; ad terminum enim illius orientalem manent vectigalis exactores. In hoc palatio est aula, in qua Senatores ad ius dicendum congregantur; sunt aliæ ad alia tribunaia, statim in ingressu apparent dispositæ tabellæ, in quibus depictæ sunt naues, quæ à principio acquisitionis Indiarum, ad hæc vsque tempora in Indias à Lusitania destinatæ fuerunt; ita vt quolibet anno apponatur vna tabella, in qua sunt depictæ cum propria subscriptione, Capitaneorum etiam nomine expresso, naues quæ tali anno venerunt. Interius est aula Regia, vbi sunt
omnes

omnes veræ effigies omnium Proregum, ac Gubernatorum Indiæ ad magnitudinem hominis, ad calcem est nomen ipsorum, & compendium earum rerum laudabilem, quæ gesserunt tempore sui regiminis: ibi Prorex conuocat consilia, admittit Legatos, aliâque plura facit: huic aulæ est annexa capella, in qua quotidie Prorex missam audit; ibi est Baldachinum ex oloferico rubro, & subtus cathedra ex eadem materia: ultra hanc aulam sunt aliqua cubilia habitationi Proregis destinata, non tamen multum magnifica: huic palatio à parte orientali annexi sunt carceres interiecta perexigua area, ubi etiam apparent receptacula pulueris tormentarij destructa; puluis enim aliquandò concepto igne erupit, locum destruxit, dispersisque lapidibus plures occidit homines; quapropter nunc paulò infra Ciuitatem domum amplissimam pulueri faciendo destinarunt. Ab ipso palatio incipit vicus, qui dicitur rectus, ubi quotidie ad negotia multi confluunt homines; est præcipuus ciuitatis vicus, & terminatur ad Ecclesiam misericordiæ; non desunt alij vici optimi, præcipuè vicus sancti Pauli, sic dictus; quia Ecclesia S. Pauli ædificata à S. Francisco Xauerio in suo Collegio (propter quod Iesuitæ, in India Patres sancti Pauli dicuntur,) in medio illius vici tractu sita conspiciatur, hic vicus est longissimus: Item est vicus nostræ Dominæ de luce, in cuius termino est Ecclesia sub illa inuocatione, sed isti duo vici nunc penè sunt deserti; cum aliàs essent valde habitati.

Non longè à Palatio Proregis est Ecclesia Cathedralis Archiepiscopalis, S. Catharinæ dicata; quia hæc ciuitas die S. Catharinæ capta fuit; est amplissima ac pulcherrima, triplici porticu distincta, quatuor habet ex utroque latere capellas, præterea maiorem capellam, ac duas collaterales ei æquales: in altare maiori est historia martyrij S. Catharinæ, in plures distincta tab

llas,

bellas, sculptas in ligno theca dicto incorruptibili, totumque opus deauratum magnificentissimum apparet; porta huius Ecclesiæ respicit Orientem, ante quam est platea non exigua, denominata de Sabaio, id est platea Domini; quia ibi à parte meridionali est palatium Inquisitorum, quod dicitur fuisse palatium antiquorum Regum illius Insulæ; huic à parte Septentrionali opponitur domus publica Ciuitatis, vbi Consules ad negotia Ciuitatis expedienda congregantur: ad partem occidentalem Ecclesiæ maioris est Conuentus S. Francisci, cui adhæret ex vna parte, sicut & Ecclesiæ maiori ex alia, palatium amplum ac commodum Archiepiscopi; ad Septentrionem huius monasterij est Xenodochium Regium, in quo nullus potest curari, nisi fuerit miles Regius; nec dedecus esse reputant, etiam nobiles, ibi curari; eius administratio est Patrum Societatis: huic Xenodochio à parte occidentali est area amplissima trabibus, tabulis, aliisque ad naues construendas necessariis plena; ibi quippe & naues Regiæ, Galliones, ac triremes construuntur, tormenta bellica conflantur, rotæ pro ipsis fabricantur, aliæque similia fiunt: propterea est ibi locus in quadam porticu, vbi Prorex sæpe assistit, vt prædictis inuigilet; ibi etiam ordinariè moratur Procurator Regius: ibi est locus, vbi aluntur Elephantes, huic ministerio necessarij, tandem est ibi Ecclesia sanctorum Stigmatum, Parochia illorum qui ad triremes damnantur.

In hac Ciuitate præter Ecclesiam Cathedralem, & istam sanctorum Stigmatum capellam, sunt septem parochiæ. Prima est B. V. Mariæ de Rosario, in vltimo angulo collis illius Occidentalis qui fluuio imminet, huic proximæ adhærent, vel non distant multum quinque aliæ Ecclesiæ, scilicet Collegij sancti Rochi Patrum Societatis, S. Anthonij de Padua, alia monialium S. Augustini, duæ Nouitatus & Collegij Patrum S. Augustini

gustini quarum prima titulo Nostræ Dominæ de Gratia, altera verò titulo S. Augustini insignitur. Secunda parochia est Nostræ Dominæ de Luce, supra montem illum Australem: huic proxima est Ecclesia Crucis miraculi, ferunt enim Lusitani, & hoc authenticè probatum est, in Cruce satis longa in dicta Ecclesia, sub olerica theca in eodem loco conseruata Christum in specie gloriosa, luce circumdatum; sed Crucifixum apparuisse, ibique ad pedes Crucis in saxo durissimo fontem miraculosè resiliisse, qui per aliquot dies perseuerans miraculosam pluribus contulit sanitatem: quapropter Archiepiscopus, qui tunc Goæ aderat, Dominus Christophorus Vlissiponensis, ordinis sancti Hieronymi, nobis plurimùm ob sanctam matrem nostram Theresiam affectus amplissimam cœpit sanctæ illi Cruci construere Ecclesiam, quam morte præuentus non multum prouectam reliquit; sed illam ad breviorē formam reducentes Equites Christi sibi que assumētes absoluerunt: ibi est maius altare, vbi Crux erat tempore miraculi, & adhuc ibidem perseuerat. Tertia parochia est sanctissimæ Trinitatis iam penè deserta ob defectum incolarum; ibi ferè tantum captiui sepeliuntur, est ad radices illius montis meridionalis à parte orientali Ecclesiæ Crucis miraculi. Quarta est S. Petri in vltima parte occidentali ciuitatis. Quinta est S. Lucie in vltima parte orientali prope fluuium. Sexta est sancti Thomæ Apostoli in eadem parte orientali; sed multum à fluuio remota. Vltima tandem est S. Alexij prope nostrum Conuentum ad radices occidentalis illius collis.

Præter Parochias sunt multa in hac Ciuitate monasteria. Primum est monialium S. Augustini sub iurisdictione Archiepiscopi, & administratione vnius Patris Augustiniani quantum ad spiritualia simul & temporalia, est magnificum & amplissimum; plures enim habet monia

moniales & magnos redditus : est vnicum in hac ciuitate ; non enim aliæ sunt moniales ; quamuis sit domus prope Ecclesiam misericordiæ , vbi aluntur virgines orphanæ sub strictissima clausura, donec ad statum nubilem perueniant ; ibi etiam plures patres suas filias , & viri vxores custodiunt , dum foras proficiscuntur : est etiam alia domus propè sanctum Alexium , vbi reclusæ manent mulieres pœnitentes, habent ibi Ecclesiam sanctæ Mariæ Magdalenæ dicatam.

Patres Iesuitæ tres habent Conuentus in ciuitate Goa, scilicet Collegium antiquum S. Pauli , de quo supra dictum est ; & Collegium nouum sancti Rochi : in primo penè deserto , nunc pauci Patres ob aëris inclementiam morantur ; ibi aliquando fuit Nouitiatus quinquaginta ordinariè Nouitiorum ; sed nunc ad Collegium nouum translatus est, vbi plusquam centum triginta Religiosi manent, fabrica est vastissima, & altissima cuidam præcipitio imminens : tandem habent domum professam in medio pene Ciuitatis , vbi triginta sunt Religiosi, in cuius Ecclesia est capella à latere dextro altaris maioris , vbi corpus sancti Francisci Xauerij Indiarum orientalium Apostoli in capsâ magnificentissimâ, auro & gemmis ornata reclusum asseruatur ; apparet tantum caput, manus vna, ac pes vnus christallo demonstrante ; aliæ eius partes multo ac pretioso capsæ artificio conteguntur.

Patres Dominicanus duos habent Goæ Conuentus, scilicet S. Dominici nobis propinqui ; est enim in illa valle Septentrionali prope fluuium , ibi est Nouitiatus : est ante ipsum platea paulò eminens. Alius Conuentus est in vltima parte occidentali Ciuitatis, nomine sancti Thomæ, vbi est Collegium illius ordinis.

Patres Franciscani duos item habent Conuentus : Primus est sancti Francisci iam dictus, vbi aluntur nouitij ; est primus totius Ciuitatis antiquitate Conuentus :
alius

alius est sancti Bonauenturae, ubi Religiosi student, hic supra fluuium subtus parochiam B.V. Mariae de Rosario est ædificatus.

Patres Augustiniani habent item duos Conuentus; Primum nostræ Dominæ de Gratia amplissimum, ubi est nouitiatus, nostro oppositum Conuentui; portæ enim vtriusque Ecclesiæ mutuo se respiciunt ac luminaria capellæ maioris noctu apparent: quamuis plurimum distent; ille quippe est in parte occidentali ciuitatis, noster in orientali; sunt tamen, vt dictum est, in duplici colle, inter quos media in valle subiaceret Ciuitas. Secundus est sub titulo S. Augustini, ubi est Collegium solo vico intermedio ab alio separatum; sed factò arcu facilis est de vno ad alium transitus.

Nos etiam duos habemus Conuentus primum iam supra descriptum: secundum verò de nouo fundatum propè lacum adiacentem Ecclesiæ S. Thomæ.

Patres verò Recollecti, nullum quidem intra Ciuitatem, tres autem in Insula Goana, qui eleemosyna ipsius ciuitatis viuunt. Primus est Matris Dei, ubi habent nouitiatum, distans dimidio milliari à ciuitate, ex parte eius orientali in oppido Dangi; secundus sub titulo nostræ Dominæ in finibus; quia in vltima parte Insulæ prope mare in monte constructus apparet; tertius est nostræ Dominæ de Columna, vulgò *Do pilar*, in oppido Guadeluppe, ubi traditur fuisse Goa antiqua; optimus ibi est aer, propterea multi domos recreationis ibi construxerunt.

Denique in Ciuitate præter Regium Xenodochium sunt duo alia; primum quidem sumptibus Congregationis misericordiæ sustentatum; secundum nuperrimè sumptibus Ciuitatis, suasu nostrorum Patrum ædificatum ad inopes colligendos, quia tunc grassante miserrima fame, in mediis vicis ac plateis moriebantur.

In hac Ciuitate, sicut & in aliis à Diuiensi vsque ad

caput Comorynum propter continuos imbres, qui mense Iunio aliisque tribus subsequenter affatim decidunt, solemnis processio Corporis Christi præuenitur: vnde die Iouis post Octauam Paschæ festum celebratur ratione processionis, iterumque de eo proprio in loco solemnitas redit.

Non cingitur hæc Ciuitas muris; cum tota pene Insula cincta sit: quia tamen hostes aliquandò ingressi pene ipsam cœperunt ciuitatem; ideo muros per vltimum spatium discurrentes construere cœperunt; sed ab illo cœpto, nescio quas ob causas destiterunt. Intra ciuitatem non sunt fontes, prope tamen sunt duo copiosissimi, vnus in loco dicto Bangani ad occidentalem Ciuitatis partem; alius non longè in domo pulueris: afferunt etiam aquam in vasis terreis maximis è continenti, vbi est fons ipsi cohærens flumini. Aër non est ita salubris; ob maximam quippe humiditatem & calorem sanguis statim corrumpitur: vnde in vna infirmitate (quæ ibi malignæ & frequentes sunt) sanguis trigiesies sæpe elicitur; mihi in vna infirmitate quaterdecies, in alia terdecies fuit elicitus: huius aëris malignitatem sæpe sum expertus, cum ferè quotannis ægrotauerim, & semel ad vltimum vitæ periculum maligna consumptus febri peruenerim.



LIBER TERTIVS ITINERARII

In quo

Montes aliqui, Maria & Flumina
describuntur.

CAPVT PRIMVM.

Vera Descriptio Sacri montis Carmeli.

AT TENTA mente, & quàm maximâ potui diligentiâ, sacrum montem Carmelum consideraui; vt pote natale solum originis Carmelitarum, venerandû Eliæ Patris nostri ac successorum Prophetarum habitaculum, de quo tam repetita in sacris litteris habetur memoria: aliquando enim eius pulchritudo significatur, dum Isaiæ 35. dicitur de Sponsa, *Gloria Libani data est ei Decor Carmeli & Saron*: dum etiam caput Sponsi Carmelo comparatur, *Caput tuum sicut Carmelus*: aliquando virtus eximia Religiosorum huius sacri montis prædicitur; dum Isaiæ 32. dicitur, *habitabit in solitudine iudicium, & iustitia in Carmelo sedebit*: aliquandò eius prænuntiatur desolatio, quæ tempore Homar successoris Mahometis, aliisque in persecutionibus Barbarorum contigit, vbi omnes Carmelitæ martyrio coronati fuerunt, dum dicitur

Isaia 16. *auferetur latitia, & exultatio de Carmelo*,
 Item, *exsiccabitur vertex Carmeli*: & Hieremiæ 48.
ablata est latitia & exultatio de Carmelo: aliquandò
 reparatio illius, quæ tum tempore sancti Bertholdi
 sub Aymerico Legato Apostolico, tum his vltimis
 temporibus euenit, dum Micheæ 7. dicitur, *Pasce po-*
pulum tuum in virga tua, gregem hereditatis tue habi-
tantes solos in saltu medio Carmeli, pascentur Basan &
Galaad iuxta dies antiquos. Sed præ aliis laudabilior
 est noster Carmelus, quòd Beatissimam Virginem hos-
 pitem habuerit sæpiùs aduentantem; vt plures docent
 authores, & noster sic canit Mantuanus.

Huc igitur, si quando quies, vacuumque negocii
Tempus erat, veniens curas lenibat, & ipsa
Majestate loci largè oblectate redibat:
Propterea montana viri spelæa colentes,
Audito illius fato, sublime sacellum
Apricis posuere iugis primi, atque quotannis
Sacra instaurantes himnos & thura ferebant.

Consideraui celeberrimum illum Eliæ fontem, à
 quo omnes aliarum Religionum riuuli effluerunt, vt
 Idem canit Mantuanus.

Illinc perpetuis ceu missi è fontibus amnis,
Religio, & sacri fluxit reuerentia cultus:
Quidquid habent alij montes pietatis, ab isto
Ducitur, hac una plures è vite racemi
Diffusi latè terras, atque æquora complent:
Hinc Cartusieis aterna silentia claustris,
Hinc varias Benedictus oves collegit. &c.

Propterea exactam eius descriptionem, & delineationem, vt sequitur, propono.

Sanctus mons Carmelus est principium Terræ sanctæ, à parte Septentrionali maritima, est diuisus in plures ac varios colles sibi inuicem cohærentes, mediis prominentes vallibus: Pars Orientalis & Septentrionalis

trionalis est eminentior; Meridionalis autem & Occidentalis demissior: habet circiter tredecim leucas in circuitu, apparet quasi insula, cum sit separatus ab aliis montibus; est valde amœnus, totus viridis, plenus arboribus: in vertice quidem pinis & quercubus, ad radices verò oliuis & lauris: abundat aquis, in medio monte inter oppida Bustan & Dali est locus amœnissimus, variis collibus & vallibus distinctus, pluribus irriguus fontibus nemoribusque plenus, qui creditur esse saltus Carmeli, ubi sunt viginti quatuor cauernæ ita dispositæ, vt Ecclesiæ appareant: nam ex utroque latere duæ sunt quasi capellæ collaterales, & alia maior in extremitate. In angulo occidentali meridionali est maxima aquarum copia è monte erumpens, ibi sunt decem rotæ molendini collocatæ supra pontem antiquum, cuius arcus diuidant aquam singulis rotis: inde olim aquæ deferebantur Cæsaream Palestinæ, cuius ingentes apparent ruinæ. Ad radices Orientales montis est fons maximus subtus locum sacrificij, dictus Mocata ab incolis Arabibus, quod idem est latine ac locus occisionis, ubi traditur S. P. N. Eliam occidisse Prophetas Baal; vnde etiam ab aliquibus dicitur fons Eliæ; intrat in proximum torrentem Cisson, qui procedens ex quibusdam montibus constitutis ad partem Australem Carmeli, percurrénsque campum magnum Esdrelon, nunc planitiem Genim, diuiditur in medio cursu in duas partes; quarum vna pertransiens vallem Thabor & Hermon diudentem decurrit ad mare Galilææ; alia verò magnam Carmeli partem circuiens, & eius radices orientales irrigans, influit fluuiolum dictum Mocatam à celebri illo fonte, cuius aquas iam torrenti Cisson mixtas recipit. Maxima pars aquarum huius fluuioli procedit ex variis riuulis è monte Carmelo scaturientibus, maximè ex quadam aquarum origine ad radices Septentrionales montis

erumpente : hic fluuiolus intrat mare Mediterraneum prope Carmelum , ad Orientem Ciuitatis Caiphæ : illius ostium , dum intumescit mare ventis occidentalibus congestâ vndis arenâ occluditur , eiusque aquæ inundant planitiem versùs Ptolemaidam : cessante tempestate patefit ostium ab incolis ; forte olim tendebat Ptolemaidam , simul vnitus alteri fluuiolo eiusdem fermè magnitudinis , dicto Arabicè Nahame , latinè delitioso : hîc prope muros Ptolemaidæ intrat mare. Hi fluuioli olim diuerso vocabantur nomine ; vnus quidem Belus , alius verò Pagida. In parte occidentali montis ad vnum ferme milliare à promontorio Carmeli , est celeberrimus fons Eliæ , cuius meminit nostra Carmelitana Regula , erumpens è monte in quadam valle , nunc duplici , olim multiplici , vt apparet , canali ; eius aquæ Christallinæ ac dulcissimæ ad magnitudinem brachij exilientes , ad sex passus in Concham excisam in ipsa rupe recipiuntur , vnde iterum , effluentes plurimam vallis partem excurrunt , plures arbores ac plantas irrigantes.

Ex alia parte vallis ad ducentos circiter passus supra fontem Eliæ apparent ruinæ Conuentus , quem incolebat sanctus Brocardus cum sociis , tempore quo tradita fuit Carmelitis Regula à Beato Alberto Patriarcha Hierosolimitano : ibi est alius fons licet non ita magnus : adhuc extat aula integra , & videtur oratorium ferè ruinis sepultum. Conuentus fuit maximus , nam ruinæ ad centum quinquaginta passus in longitudinem diffundantur ; non tamen fuit valde latus , cum esset in decliui montis in cuius summitate est campus plenus peponibus lapideis , qui miraculo sancti Eliæ traditione incolarum adscribuntur : tradunt enim sanctum Prophetam petiisse à quodam rustico illius agri domino peponem , confitus enim erat ager peponibus , qui cum respondisset se non habere nisi lapides , subiunxit

iunxit Sanctus, sint ut dixisti lapides. E regione Conuentus est stabulum excisum intra montem, ubi sunt etiam excisa præsepia pro duodecim animalibus: supra est alia cauerna ad fœnum, & paleas.

In monte sunt plusquam mille cauernæ, olim habitatæ à Carmelitis Religiosis; nullibi tamen tot unitæ videntur, sicut in quodam memorabili loco, quem incolæ hætenus vocant *Schif el Rueban*; id est, Cauernæ Religiosorum: hic locus est in eodem tractu occidentali montis, distans circiter quinque milliariis à fonte Eliæ, continensque vallem multum diffusam, cui ex utraque parte prominent rupes quadringentis fere perforatæ cauernis, ubi sunt fenestræ & lecti excisi in rupe: sunt etiam fontes guttis iugiter manantibus pleni. Antequam perueniatur ad hunc locum in dextera ingredientium vallem, in summitate rupis est alia maxima cauetna, penetrans totaliter vnum collem, circumdata minoribus cauernis, quæ sufficiunt pro centum Religiosis.

Angulus occidentalis à parte Septentrionalj, dicitur promontorium Carmeli, est valde eminens & magno imminet mari, estque sanctior pars ipsius montis; quia ibi præcipue fuit habitatio sancti Eliæ, ibi præuidit Beatam Virginem sub typo nubeculæ, ibi attraxit ignem de cælo ad comburendos duos quinquagenarios cum suis militibus, & alia mirabilia operatus est; ibi est eius cauerna longa circiter viginti passus lata, & alta decem, excisa intra ipsum montem ad radices fere promontorij, quæ est maximæ deuotionis, tum apud Christianos, tum Iudæos, tum Turcas; dicitur ab incolis Arabicè, *el Kader*, quod est epithetum sancti Eliæ, & idem est ac latinè viridis: hoc nomine insignitur, quia in florenti & viridi persistit ætate, non declinans ad flaccidam senectutem: habitatur à solitariis Mahometanis, nec extranei ad ipsam admittuntur,

nisi persoluto diuinitatis numino : Intus ad laeuam ingredientium est alia cauerna , sex circiter passus longa & lata, ibi traditur fuisse multoties B. Virgo : in hac parua cauerna est altare cum imagine eiusdem Sanctissimæ Virginis Mariæ de Monte Carmelo cum lampade ardente, estque iurisdictionis nostræ; cteditur fuisse cella Sancti Eliæ, & quodd in maiori cauerna congregarentur filij Prophetarum tanquam in oratorio. In summitate promontorij sunt ruinae Conuentus Carmelitarum, tēpore quo S. Ludouicus Rex Gallia adduxit eos in Europam, in quibus est oppidum dictum ab incolis, *Mar Elias* , id est, S. Elias; adhuc extant aulae & cellae integre ex lapide quadrato. Retrò ad orientem est ædícula prima in toto orbe ædificata in honorem B. Virginis Mariæ demortuæ , dicitur ab incolis *Maçalia* , distans circiter ducentos passus à dicto Conuentu, est figuræ quadrangularis perfectæ, fuit cooperta fornice innixo super quatuor arcus, quorum duo adhuc extant, subtus habens cisternam : huic adhæret à parte orientali parua cauerna subterranea, in qua nostri Carmelitæ Discalceati erexerunt altare, ibique aliquando celebrant, & est sepultura Fratrum. Paulò subtus in decliui promontorij est cauerna dicta S. M. N. Theresiæ, quam nunc incolunt Patres nostri, satis capax pro quatuor Religiosis, in illa peracto muro ab anteriori parte, & aliis intermediis factæ sunt quatuor perexiguæ cellulæ, Oratorium in medio ipsarum, Refectorium, culina & furnus; foris verò hortulus, stabulum & cisterna: huic subiaceret alia cauerna, quam annis preteritis incolabant nostri dicata S. Onofrio; sed derelicta, quia nimis exigua.

In summitate montis à parte orientali, in medio ferrè tractu, est locus dictus ab incolis Arabibus, *El Korban*, id est, Sacrificium; quia ibi S. Elias sacrificauit coram Rege Achab: est maximæ venerationis inter Iudæos;

Iudæos; ibi sunt duodecim magni lapides ad æternam illorum memoriam, quos posuit S. Elias, non desunt qui credant esse eosdem, habent characteres Hebræicos.

In monte, siue ad eius radices, sunt plurima oppida maiora & minora; in monte quidem sunt ista, in summitate promontorii, vt dictum est, oppidum S. Eliæ, ad partem huius orientalem oppidum Rusnia: prope locum sacrificij est oppidum Essia, id est sanitas, satis magnum in quadam valle inter siluas, vbi multæ videntur antiquitates: in eadem parte orientali, non longè à dicto loco sacrificij, est oppidum Karaq, propè quod est cauerna ad instar illarum, quæ sunt in saltu Carmeli: in parte Australi montis in mediis siluis inter colles & valles sunt duo oppida, Ain Hhud, id est fons siluæ; & Ain Gazal, id est, fons Ceruæ: in ipsa medietate montis, iuxta saltum Carmeli, à parte eius occidentali, est oppidum amœnissimum nomine Arabico Boustan, id est, hortus, inter colles & valles in medio siluarum positum abundans aquis: in parte verò orientali est oppidum Dali in quadam valle; præterea in ipso monte est oppidum Loubi similiter inter colles & valles in media silua: Item oppidum Doubel ad orientem Dali inter eosdem colles, valles, & siluas: Item inter siluas oppidum Nouiabi, vbi est templum destructum, quod traditur fuisse habitatio Prophetarum: Item in summitate montis oppidum Curriturria: Item in vertice montis apparet Damon magna ciuitas destructa, de qua traditur quòd tempore belli multi ad illam confugerunt, ibique suos absconderunt thesauros: ad radices verò Carmeli sunt plurima oppida; incipiendo enim à promontorio versus Orientem hoc ordine se consequuntur, Casser; Saadi, Hassas, Beladcheq, Iaiour, Hauassi, Hachoumaric, Sceloq, Karrubi, Eliajour, Saade, Telamon, Mansoura: prope fontem Mocatam est oppidum

el Montaar , aliâque oppida destructa ; ad radices autem occidentales subitus promontorium est ciuitas Caïpha, vbi est optimus portus ; iuxta vallem, vbi est Schif el Rueban, est oppidum, quod vocatur Tyr, in quo est palatium Principis montis Carmeli (licet ordinariò habitet in ciuitate Genim, in campi Eldrelon extremitate meridionali) hoc oppidum distat medio milliari à mari, ad cuius partem Australem in littore maris sunt ruinæ vrbis dictæ Castrum Peregrinorum, vbi est portus ad quem veniebant peregrini, qui pergebant Hierusalem : paulò vlteriùs ad meridiem est Turtura, vbi sunt ruinæ portus eximij, qui nunc exiguas tantùm capit naues ; ad radices verò montis est ciuitas Casersames destructa.

Distat Carmelus ab Hierusalem quindecim circiter leucis, à mari Galileæ & Iordane septem, à montibus Thabor & Hermon quatuor, à Nazareth duabus, totidémque à Ptolemaïda, non vulgariter dicta S. Iean D'acti ; & similiter duabus à Cæsarea Palestinæ : vnde hæ tres ciuitates ac mare mediterraneum sunt eius limites; Nazareth à parte Orientali, Ptolemaïda à Septentrionali, Cæsarea à Meridionali ; mare verò ab Occidentali, quod ferè alluens ipsum promontorium, paulatim recedit à radicibus montis, quò magis accedunt ad Austrum ; ita vt inter montem & mare sit maxima planities, partim plena oliuis, partim confita frumento, & aliis. Figura montis est satis longa, nam tractus occidentalis respiciens mare, est circiter quinqueleucarum ; non tamen directè procedit : nam duo anguli se mutuò respiciunt ; in medio autem paululùm incuruatur ad modum arcus, cui proportionatur tractus orientalis : nam paulatim dilatatur, & in medio est maximæ latitudinis, postea iterum restringitur : multa alia breuitatis causâ prætermitto.

CAPVT II.

Descriptio Montis Libani.

Libanus Mons Syriæ nobilissimus, sæpe in sacris codicibus exaltatur; maximè, dum sponsum laudans, eius gloriam eidem sponso tribuit dicens, *Gloria Libani data est ei.* Est mons altissimus, septem enim in eius ascensu leucæ computantur, per multas in longitudinem diffunditur leucas: dicitur Libanus, quasi candidus; in parte enim Septentrionali semper niuibuscandet, mense quippe Octobri reliquias niuis in eo vidi; in fine verò Nouembris totum montem nouis niuibuscandidum aspexi, quæ tanta copia decidunt, vt per aliquot menses nec ad illum ascendere ab illo descendere liceat; inde est quòd multi, præsertim hyeme, ex monte procedunt aquarum riuli impetu defluentes, multi enim in planities ciuitatis Tripolis, aliqui etiam magni decurrunt: imò & plures fluuij videlicet ab Oriente Faxfar & Abana; ab Occidente Sanctus, Adonis, & Eleuterus: à Septentrione Orontis: & à meridie Iordanis. Ad radices montis Libani est cauerna, cum tumulo ex vnico lapide longitudinis viginti septem pedum, qui dicitur esse Iosué, vbi est oratorium Mahometanorum; Antilibanus autem incipit à mari prope Sidonem, & procurrit versùs montes Arabiæ ultra Damascum.

In monte Libano sunt plura oppida, & aliquæ sed perexiguæ ciuitates; solùm hoc nomine dignæ, quia Episcopali dignitate fulgent; locus primarius dicitur Canobin, Latine Cænobium in quo Maronitarum Patriarcha commoratur: ibi suos habet monachos, cum quibus manet, eique redditus ex toto monte colliguntur, cuius Ecclesia integra multùm ampla, & pulchra intra montem sculpta est. Primaria Libani ciuitas vel oppidum est Bsarra: non multùm distans à Cedris. Alia est ciuitas quæ vocatur Edem, Sedes Archiepiscopa

piscopalis, ibi Archiepiscopum vidi Religiosum pauper-
 rimum, qui nihil vltra domum satis exiguam, & vineam
 mediocrem habebat, quam suis vidi manibus colentem,
 vindemiantem, ac ex illa lignis onustum reuertentem:
 Insuper gregem habebat ouium in inferiori parte do-
 mus manentem, quem eius nepos ad pascua quotidie
 deducebat: Sicut domus erat paupercula, sic & vten-
 silia eius paupertatem redolebant: non est apud nos vllus
 rusticus, qui non meliorem lectum habeat, quam habe-
 ret ille Archiepiscopus; vnde subridens nobis dixit: En,
 Patres, lectus Archiepiscopi: Capellam domi habebat,
 vbi sacrum celebratur: propè hanc domum riuus aquæ
 christallinæ defluit, qui in imas postea præcipitatur
 valles.

Habitatores montis Libani sunt Maronitæ Christia-
 ni, soli inter alios orientales Catholici; nulli eis admis-
 centur in illo monte Mahometani, terras ibi colunt,
 plurimæ enim sunt intra montem planities, & valles
 quas vineis plantant, frumento seminant, arboribusque
 conferunt; plura sunt pascua, & ita multa boûm armen-
 ta, ac ouium greges, hinc inde pererrant. Per multas
 adiacentes ciuitates, maximè Tripolim, Damascum,
 Aleppum, Sidonem, & Hierosolymam colonias funda-
 runt, ibique mercatoris munere funguntur: imò & Ro-
 mæ Collegium habent, quo iuuenes Maronitæ ex illis
 partibus adducuntur, vt ibi litteras, Philosophiam, ac
 Theologiam addiscant, vt postea ad patriam redeuntes
 conciuies in fide instruant, & affectum erga Ecclesiam
 Romanam, ac summum Pontificem conferuent. Ex his
 verò, qui in Romano Collegio studuerunt, tum Patriar-
 cha, tum alij Archiepiscopi, & Episcopi assumuntur:
 licèt autem fide Romani sint, in suis tamen officiis ri-
 tibus antiquis vtuntur, ieiuniâque siue potius abstinen-
 tias more aliorum orientalium, vt dictum est de Arme-
 nis, obseruant.

In Libano plures ex nostris arboribus reperiuntur, illi propria est Cedrus, arbor sua incorruptibilitate & magnitudine in scriptura sacra celebris maximèque nominata, quia ad conficiendum illud magnificentissimum Salomonis templum, ex Libano ratibus per mare transuecta deseruiuit. In summitate ferè montis huius nascuntur cedri, quas incolæ *Ars* vocant; in planitie admodum lata, à Septentrione montis iugo munita, ac Austro exposita: ibi viginti & vna cernuntur, ex maximis & antiquissimis; vna paulò ante ceciderat, ac semiusta adhuc apparebat: ex paruis autem circumquaque in eadem plantie recenter natæ videntur; has maiores credunt incolæ fuisse à Deo in principio mundi creatas, ac peculiari Dei prouidentia ad hæc vsque tempora perseuerare, & hoc autoritate sacræ Scripturæ confirmant, quæ vno loco sic ait, *Cedri Libani quas plantauit*; & alio, *sicut cedros Dei*; In quibus scriptura productionem Cedrorum peculiari titulo Deo attribuit, quod non esset nisi illas immediatè creasset: horum dictis nec refragor, nec assentior: illud solum teneo indubitatum, illas esse antiquissimas.

Ingentes repræsentant pinos, multumque eis assimulantur: truncus præ magnitudine siue crassitate vix à tribus aut quatuor hominibus illum amplexantibus comprehendere potest: latos sicut pini in summitate protendunt ramos: folia verò & breuiora & minutiora sunt; non enim crassitie & longitudine superant assiculum, sunt aliquantulum adinstar arcus retorta, quæ in immensum multiplicata, plures ad modum rosæ circulos efficiunt, ac condensam arboris comam efformant, nullum ex his foliis inferius, aut in obliquum; sed omnia in cælum sursum respiciunt.

Cedrus nullum comestibilem producit fructum; quædam poma solis corticibus compacta producit; hæc partim similia pomo pini, partim dissimilia sunt: magnitudine

dine ac longitudine, nec non & in materia assimilantur; dissimilia verò sunt in figura: nam pomum pini est infernè crassius, supernè in acumen desinens, ac circum inæquale; Pomum verò Cedri in medio est crassius, in vtraque extremitate magis tenue, non tamen acuminatum, ac per totum lene: quando humidum ac viride est, leuigatum arte comparet; circuli siquidem inferiores superioribus ita cohærent, vt lignum solidum, nec ex partibus compactum appareat; at exsiccatum in suos circulos dissoluitur. Hæc poma in superiori ramorum parte nata in altum protendunt: propter hanc foliorum & pomorum cedri in altum tendentium proprietatem, sicut Palmæ, sic etiam cedro iustus comparatur, dum dicitur, *Iustus vt palma florebit, sicut Cedrus Libani multiplicabitur.*

Post meum in Europam reditum, nobis in hoc monte à Patriarcha fuit concessa quædam sancti Elisæi Ecclesia cum suo hospitio prope Blarraï, & locum cedrorum, tanquam huius prophetæ filiis & successoribus.

C A P V T III.

*Descriptio montis, in quo traditur requiescisse,
& esse Arca Noë.*

ESt in Armenia maiori prope ciuitatem Eriuan mōs præcellus, vicinis aliis eminentior, & procul apparens, in quo successiua auium & proauorum traditione referunt Armeni Arcam Noë decrefcentibus aquis diluuij requiescisse, & ad hæc vsque tempora perseuerare; hunc propterea maximè venerantur, nobisque proficiscentibus à longè comparentem indicant: in eo semper præ altitudine conspiciuntur niues; nullus ad eius verticem hactenus ascendere potuit; licet id multi tentauerint: de vno præsertim Religioso dicunt; quòd deuotionis causâ, vt sacram illam Noë videret Arcam, illuc

illuc magno labore voluerit penetrare; sed cùm tota nocte, qua potuit celeritate, fuisset progressus, se in ipsis montis radicibus redeunte Sole conspexit, Angelumque vidit Arcæ particulam deferentem: sibi que eam tradendo dicentem audit; *Accipe quam exoptas reliquiam: supra montem ascendere nulli mortalium licet*; his dictis evanuit. Propter hoc aliqui Paradisum terrestrem in aliqua montis illius planitie probabiliter constituunt: montem hunc aliqui vocant Pariardem, alij Gordianum: Armeni verò nunc vocant montem Noë.

De Paradiso terrestri multæ sunt apud authores sententiæ. Quidam dicunt Paradisum terrestrem esse totum mundum, fontem illius esse oceanum, ex quo quatuor illa celeberrima flumina oriuntur; sed hæc opinio est Scripturæ dissona: nam ex illa habetur, quòd illa quatuor flumina exeunt de Paradiso; & tamen constat non exire de hoc mundo: deinde Scriptura docet primum parentem de Paradiso post peccatum fuisse eiectum; constat autem in mundo perseverasse,

Alij docuerunt Paradisum hunc esse locum secretissimum, & in concauo Lunæ collocatum: sed hi etiam parum Scripturæ consonant: nam Scriptura dicit in eo fuisse arbores, præcipuè lignum vitæ, & lignum scientiæ boni & mali: deinde in eo fuisse fluvium, qui in quatuor capita diuidebatur: quæ omnia denotant illum esse Terrestrem, non aëreum, aut cœlestem.

Alij denique aliis in locis Paradisum terrestrem collocant, vel in alia terra nobis incognita, vel in Palæstina circa Iordanem, in terra Sodomorum, vel in Insula Taprobana; sed hi quoque à veritate deviant: non enim ex aliquo horum locorum emanant quatuor illa flumina, quæ Scriptura docet ex Paradiso oriri.

Vnde aptius alij constituunt Paradisum terrestrem in Mesopotamia & Armenia; quia ex Scriptura Paradisus fuit in Eden; Eden autem fuit iuxta Haran; Haran verò

secun

secundum Hebræos idem est ac Mesopotamia. Quod confirmatur ex eo, quod Cain ante diluuium, & posterius Noë post diluuium has terras incoluerunt, ut patet ex Genes. 4. & 8. credibile autem est quod Cain non statim transiit ad remotas regiones, sed steterit iuxta regionem, in qua Adam eius ac omnium mortalium primus parens illum procreauit. Denique quia ex montibus Armeniæ & Mesopotamiæ fluuij Tigris & Euphrates oriuntur, quorum origo ad fluuium illum Paradisi reducitur.

Sed nouæ difficultates oriuntur; nam ex Scriptura habetur fluuium illum Paradisi in quatuor capita diuidi siue flumina, scilicet Phison, Geon, Euphratem, & Tigrim: nomine autem Phison, intelligunt aliqui Gangem: & nomine Geon intelligunt Nilum: constat autem, quod Nilus & Ganges, non ex Mesopotamia, & Armenia; sed Nilus ex montibus Lunæ iuxta promontorium bonæ Spei in regno Congo; Ganges verò è Caucaſo monte Indiæ dimanant. Aliqui se ab hac difficultate expediunt, dicentes hæc flumina sub terra abscondi, & per meatus subterraneos defluentia ex variis postea nasci regionibus; sed tamen incredibile videtur, quod hæc flumina tanto spatio sub terra lateant, & tam diffitis oriantur Regionibus, ut ex mundi mappula patet. Quapropter alij per Phison & Geon, non Gangem & Nilum; sed alia flumina, vel etiam ramos ipsius Tigris & Euphratis volunt intelligi: per Æthiopiam autem quam dicit Scriptura Geon percurrere, intelligunt non Æthiopianam Abyssinorum, sed aliam Assyriorum, quam iuxta sinum Persicum constituunt, ibique etiam terram Heuilat collocant prope Arabiam fœlicem cum autoritate sacræ Scripturæ, ut patet Genes. 25. & 1. Regum 15.

Sed ex dictis, aliqua pro mea seligens sententia, dico probabile esse quod Paradisus terrestris adhuc perseuerat

uerat in aliqua planitie amœna montis huius Armeniæ, quem descripsimus, in qua Sancti Henoch & Elias in deliciis viuunt, peculiari Dei prouidentia locum illum, & à frigoris rigoribus, & Solis ardoribus temperante. Cùm enim hi sancti Prophetæ in hoc mortali solo, deliciis pene cœlestis Paradisi affluentes, ad finem vsque mundi præseruentur, verisimile apparet, quòd in Paradiso terrestri, pro ipsis à Deo conseruato maneant, vbi edentes fructum arboris vitæ, senectutis & infirmitatis molestias ignorant.

Ad radices huius montis nascitur Euphrates, de quo nullus dubitat esse eundem, quem proprio nomine Scriptura quarto loco nominat: non longè inde nascitur Tigris, quem etiam Scriptura proprio indicans nomine, de eo ait, *ipse vadit contra Assyrios*: ad radices eiusdem montis nascitur fluuius ab Armenis vocatus Araxes, hic versùs Orientem procurrit: alius etiam fluuius dictus Cyrus non longè inde dimanat, qui Armeniam præterlabitur: forte hi Geon & Phison olim nominabantur; & nomen, sicut & Prouinciæ, quas irrigant defluendo, mutarunt; nisi dicamus Gangem esse Phison, & Indum esse Geon egredientem è Paradiso terrestri, quia Ganges & Indus creduntur oriri è mari Caspio, in quod confluunt Araxès & alij fluuij ab hoc monte Armeniæ profluente: vel Phison est ramus Tigris, dictus à Plinio, Pasitigre corruptè, siue Fisotigris; Arabes enim carent littera P, & mutant in F. Geon autem forte est Geon fluuius nominatus in Perside, qui separat Regnum Korasson à Regno Vzbech: & licèt eius origo distet ab hoc monte, hoc successit ex diluuiò, quod multa in orbe terrarum immutauit. Cui plurimum patrocinator impossibilis, vt ex Armenis pluribus didici, in montem illum ascensus: nec mirum si in illo monte sint aliqua loca mortalibus ignota; cum nuper in medio Hispaniæ in præruptis montibus, oppi-

dum terrâsque habitatas comparuisse dicatur : cum tamen tot sæculis , à tempore scilicet quo Mauri Hispaniam inuadentes ac subiugantes , Christianos per illos montes disperferunt , penitus latuerint Hanc veritatem confirmat,quòd Sanctus Elias illis in locis aliquando apparuit,vt Armeni nostris Patribus in Perside commemorantibus retulerunt : sed hæc sufficiant in tam abstrusa materia , ac tantâ diuersitate apud Authores agitata.

C A P V T IV.

De alijs Montibus.

Montes plurimos in hoc itinere meo, tam eundo, quàm redeundo superaui : sed in præsentì paucos inter alios celebriores adducere mens est.

Vidi in Europa quatuor igniuomos cuique notos: Vesuuium scilicet prope Neapolim , quamuis turc ignem non spiraret , postea tamen ingenti fragore & terræ motu , ignitos cineres , flammâsque circumquaque emittens , vicina quæque deuastauit , & plurima consumpsit. Deinde alium in medio mari prope oram Calabriae, vulgò *Stromboly* dictum, qui non continuum æquale incendium, sed repetitas identidem ignis euaporationes, aliquandò etiam cineres, & lapides eructat. Item montem Vulcanum in Insula Lipari prope Siciliam, apud poëtas celeberrimum , qui de die ingentem fumum , nocte verò ignem continuum exhalat. Denique Æthnam in Sicilia aliis altiorem & nobiliorem, omnibûsque notissimum : vidi montem Idam in Creta & alios.

Traiecto mari Mediterraneo, cùm ad Regnum Syriæ peruenissem : primò vidi montem Amanum , siue Nigrum: deinde montem Saudin, apud Ptolomæum Principem Astrologorum nominatum, quia in æquinoctio instru

instrumentis astronomicis Solis elevationem super eum observauit : quem illustrissimus Dominus du Purèz Aquisensis imitatus , missis ad nostros Patres , aliisque Gallos Aleppi commorantes Astronomiæ peritos instrumentis, obseruatæ elevationis à tempore Ptolomæi variationem deprehendere voluit (quod & in monte Ciuitatis Massiliensis , & in aliis locis ab eodem Ptolomæo indicatis fecit :) sed omnibus instrumentis, & aliis itineri necessariis iam paratis (hic enim mons Aleppo aliquot distat miliaribus) Consulis Gallorum iussu à proposito desistendum fuit ; timebatur enim , & cum fundamento, ne Turcæ profectionem hanc inusitatam pœna plecterent pecuniaria.

Arabiam desertam , Chaldeamque pertranseuntes, nullum montem nominatum offendimus : sed transacta Babylone sexta die montes altissimos , quos Persidis portas vocant , ingredimur : media verò inter Babylonem & Aspahanum Persidis Regiam via , duos reperi-mus montes insculptis hominum , aliorumque figuris (quod opus esse Romanorum traditione dicitur) admodum venerandos : hi sunt montes, quos eundo tanquam celebres adueriti.

Aliquos etiam redeundo vidi : medio inter Aspahanum , & Tauris itinere , mons à recta via non multum distans , & patens , ob spectra sæpius apparentia desertus , & horridus nobis à dextris occurrit ; plura de illo comites itineris narrabant , & maximè quandò aliqui illuc accedentes perierint.

In Armenia vidi montem Arcæ supra descriptum , & montem Ararat , vulgò *Varach* , decem millium in eo Crucifixorum martyrio gloriosum , infra describendum.

Littora Syriæ nauiganti mons Libanus primò ; deinde noster Carmelus mihi occurrit ; vterque nobilissimus, mysteriis plenus, sed ià sigillatim supra descriptus.

Cùm partem Terræ Sanctæ lustrarem, plurimos montes in Scriptura nominatos, & vestigiis Christi Domini consecratos aspexi: vidi montem Ciuitatis Nazareth nunquam satis laudandæ, eo quòd patria Sanctissimæ Virginis Deiparæ, & locus Conceptionis, ac diuturnæ habitationis Incarnati Dei fuerit, aliisque pluribus titulis: hic mons, licet vbi sita est ciuitas, non admodum altus appareat: cùm tamèn post milliare ad depressum campum magnum Esdrelon attingit, altissimus est: inde Iudæi Christum Dominum præcipitio perdere voluerunt.

Conscendi sacrum montem Thabor infra describendum: ex quo ferè omnes Palæstinæ montes sum diu contemplatus: ab Oriente diffiti montes Arabiæ, aliique obiciebantur; ab Occidente noster Carmelus, aliique Galilææ montes; à Septentrione mons Libanus; mons in quo Christus Dominus Beatitudines suis prædicauit Apostolis, aliique montes in Tribu Nephtali; tandem à Meridie vicinus mons Hermon, paulò remotior mons Gelboë, montes Ephraim, aliique comparebant.

C A P V T V.

Descriptio Oceani Orientalis Indici.

Oceanus Orientalis Indicus incipit à fluuio Indo, qui omnibus aliis suum nomen communicat, siue à promontorio Arabiæ felicis dicto Ras Algati, quod prædicti fluuij ostio magis Septentrionali opponitur, interiecto sinu Persico: terminatur autem versùs Austrum ad Insulas Sumatram & Iauam maiorem.

In eo sunt plures, magnæ & celebres Insulæ supra descriptæ; nam præter duas prædictas, est ditissima Insula Ceylam, Insulæ Maldinæ, Insulæ Nicobar, Insula Goana, & plures aliæ.

Multa

Multa recipit flumina ; sed inter alia nobilissima Indum prope Persidem ; & Gangem prope Bengalam multiplici ostio confluentes : hi fluuij apud Indos Gentiles sacratissimi sunt ; vnde se quotannis ad eorum aquas transferunt , vt illis immerfi propriis sceleribus ablutis purificati resurgant : non hâc diutius in eorum descriptione immorabimur ; cùm de illis iterum agendum sit.

Huius Oceani nauigatio est admodum regularis: cùm enim in Indiis, vt dictum est , venti suo ordine vt plurimum sine inuidia , determinatis mensibus spirent: quisque nauta constantis huius ordinis noritia peritus, facile scit quandò ad Austrum , quando ad Septentrionem, quandò ad Occasum nauigandum est; vnde rarissima contingunt naufragia : mensibus Iunij, Iulij, & Augusti ad centum prope littus milliaria, nullus audet nauigare ; tunc enim continuò venti occidentales vehementissimi perflant , qui naues in oceano repertas vel perfringerent , vel ad terram alliderent ; omnes enim portus, duobus exceptis , vt supra dictum est , congesta vento arena clauduntur.

Paucos è nostris piscibus , plures ex aliis nobis incognitis, alibi describendos profert : plura gignit pretiosissima , vt Corallium rubeum & nigrum: Succinum , tam nigrum ad odores , quàm griseum ad cibos: & tandem Vniones maximè prope Insulam Ceylam; propterea littus illud vocatur piscationis : sed iam ab aliquot annis anathemate Episcopi Cochinenfis supra ipsos fulminato , vt supra dictum est , inde expulsi & Ecclesiæ præcepto parentes non comparebant : modus piscandi Vniones postea describetur.

CAPUT VI.

Descriptio Maris Mediterranei.

MARE Mediterraneum incipit ab Hispania in freto Gaditano ad Herculis columnas, & per mille, & amplius leucas vsque ad Regnum Syriæ versùs Orientem ab Occidente percurrit: dicitur Mediterraneum, quia medium iacens antiquum terrarum orbem in tres partes, videlicet Europam, Asiam, & Africam diuidit.

Hæc alluit regna: à dextris in Africa totam Mauritaniam Hispaniæ & Galliæ oppositam; Regnum Carthaginis, vulgò de Tunis, Italiæ correspondens; deinde Ægyptum minori Asiæ obiectam: à sinistris autem in Europa, Hispaniam, Galliam, Italiam, Dalmatiam, & Græciam; cui succedit Asia minor: in extremo autem Syriam, Phœniciam, & Palestinam, quæ sunt in Asia.

Mare Mediterraneum alia duo Germana complectitur; scilicet Adriaticum, quod ab Insula Corcira, & promontorio Hidruntino inter Dalmatiam & Italiam procurrens Venetias attingit; & mare Ægæum quod à Creta Insula ad Septentrionem decurrens ad turres Dardaniæ peruenit: vbi aquas maris maioris, siue ponti Euxinij per Canalem Constantinopolitanum continuò fluentes admittit.

Plures nobilissimos recipit vndeque fluuios: in Ægypto Nilum celeberrimum à montibus Lunæ venientem, & emensa ab Austro versùs Septentrionem tota Africa, multisque aliis auctum fluuiis ostio septemplici exundantem. In Syria inter alios Orontem è monte Libano ab Austro etiam versùs Septentrionem properantem, & pluribus fluuiolis tumidum sub Antiochena Ciuitate desinentem: Danubium è Germania per Pannoniam, aliâque Regna per sexcentas circiter leucas

leucas ab Occasu ad Ortum properantem, ac sexaginta, ut dicitur nauigabilibus fluuiis admissis, primò in mare maius, deinde in ipsum medio canali Constantino-politano exundantem: in Italia Padum, & Tiberim, aliòsque plures: in Gallia Rhodanum suo cursu rapidissimo celebrem, & alios plurimos: in Hispania iberum, & complures alios ex Pirenæis montibus defluentes: alios missos facio, quia non vidi, nec ita celebres habentur.

Plurimas, easque celeberrimas in toto suo tractu continet Insulas: prope Hispaniam sunt insulæ Baleares, videlicet Maiorica Episcopali dignitate fulgens, Minorica, & aliæ: Galliæ propriæ adiacent Stecades, vulgò dictæ insulæ d' *Hieres*, ob vicinam eiusdem nominis urbem, ab Occidente ad Orientem recto tramite coordinatæ; quælibet suum habet nomen, orientaliør insulæ Titanis vocatur: oppositæ ad tria milliaria sunt portui Massiliensi tres insulæ parvæ, suo quæque castro munitæ: minima ipsarum castrum habet munitissimum, quæ toti dominans littori, accessumque prohibens Massiliam defendit; vocatur Castellum D'if: ad finem orientalem prouinciæ sunt Lirinenfes insulæ, vulgò Sancti Honorati, & Sanctæ Margaritæ: non solum apud antiquos propter sanctitatem monachorum ibi commorantium, sed etiam his vltimis temporibus propter bella celeberrimæ; nam primò ab Hispanis captæ, plurimumque munitæ; deinde à Gallis maiori cum gloria fuerunt recuperatæ; plures aliæ sunt, sed non notæ.

Italiam etiam plures adiacent: præcipuæ sunt Sicilia, Sardinia, Corsica & Elba: duæ primæ sunt ditionis Hispaniæ; Tertia ditionis Genuensium; Quarta partim ditionis Gallicæ, partim Magni Ducis Etruriæ: tres primæ Regalis nominis dignitate gaudent, plurimi Episcopatum honore fulgentes, de his sicut & de aliis modo referendis plurima dici possent: sed quia omnibus

notæ, & à pluribus descriptæ, cursim pertransibo ad ignota procellurus.

Sequitur Melita, propter naufragium & hospitium Sancti Pauli Apostoli, in Scripturis sacris nominata; & propter gloriam Equitum sancti Ioannis ibi commorantium inclyta; primus eius Episcopus dicitur fuisse S. Publius, qui ante erat Dominus, ab eodem Apostolo consecratus: deinde ad Orientem nauigantibus occurrit Creta, nunc Candia, partim à Turcis occupata, Venetisque erepta; ad eius Septentrionem in Archipelago sunt sparæ Cyclades, Negropontus, Scio, Pathmos, aliæque plures, & in sacris, & in prophanis codicibus plurimum commendatæ; quas quia non vidi, licet multa de eis afferre possem, sciens volensque prætermitto.

Vltra procedentibus minori Asiæ adiacens apparet Rhodus, diuturna Equitum nunc Melitensium habitatione nobilitata; obsidione Turcarum sub Solimano eorum Imperatore, exercitui præsidente, celeberrima: tandem est Cypus omnium orientaliior toti titulis in sacris litteris exaltata.

Circa littus Africæ inuenitur Tabarca, & aliæ vix notæ; sicut & in mari Adriatico; ad cuius initium sita iacet Corsica, sacris sancti nostri Spiridionis illustrata reliquiis, cuius corpus post mille & ferè quadringentos annos incorruptum miraculosè perseuerat.

Piscibus nostrum mare Mediterraneum abundat: sed sicut dicitur, quòd non omnis fert omnia tellus; sic nec in toto mari iisdem pisces inueniuntur; sed pro diuersitate climatum diuersi generantur: Tunnus vniuersaliter totum percurrit; piscis Spatha, sic dictus, quia in capite os habet adinstar Spathæ efformatum, ad tres palmos longum, & ad tres digitos latum; in freto Messanenensi videtur, irreconciliabiles cum pisce Cane exercet inimicitias, quem continuò prosequitur, & sæpe
sua

sua spatha confodit : in littore Genuensi aliorum piscium penuria laborante mense Martio quidam pisciculi tenuissimi , dicti Albuli , siue candiduli propter candorem , vulgò *Bianchetti* , affatim capiuntur. Plurimi per totum mare apparent saltantes Delphi , qui comitantes Tunnos ad retia deducunt , & vt dicitur ad vocem piscatorum , illis relictis soli foras exiliunt : apparent etiam alij ingentes, dicti mulati , quos Cete mares vocant.

Plurima etiam pretiosa hoc mare producit , sicut in littoribus Africæ & iuxta Stecadas insulas in littore Prouinciæ plurimum Corallij rubri, aliæque quæ passim apud probatos auctores descripta reperiuntur.

CAPUT VII.

• *Descriptio Sinus Persici.*

MAre illud , quod inter Persidem & Arabiam felicem decurrit , vocatur sinus Persicus , qui vento prospero sex dierum spatio præteriri potest ; vno autem die facillè transfretatur:incipit prope Regnum Sindii, vbi fluuius Indus mare influit , ex alia parte Arabiæ correspondet promontorium vulgò dictum *Ras al gatti* , & definit ad ostia fluuiorum Euphratis & Tigris, ad dexteram habens Persidem à qua nomen Persici sortitur , à sinistra autem Arabiam : à suo principio paulatim restringitur , donec ad caput siue promontorium Mossandam perueniat ; (ibi quippe montes ex utroque littore conspiciuntur.) Iterum dilatatur, sicque per totum discurrens ad dicta flumina terminatur.

In sinu Persico aquæ suo ordine bis quotidie fluentes & refluentes , rapidissimo feruntur impetu , cuius effectus in Euphrate compareret ; tanto enim contra proprium repellitur cursum , vt ad centum circiter millia retrocedat ; maximè dum ventus spirat meridionalis:

lis: tunc enim aquæ maris falsæ usque Bassoræ, quæ quatuordecim à mari distat leucis, perueniunt: frequentissimæ sunt ibi tempestates, & omninò mare illud esset innavigabile, nisi plures ex utroque littore essent portus, multæque; est illud sparsæ Insulæ: sæpe enim contingit, ut vi ventorum nautæ ter aut quater retrocedere cogantur: iacentes, quas in illo passus sum tempestates in meo reditu, postmodum enarrabo.

Est locus in illo periculosissimus, ac ordinariè tempestatibus agitatus; in promontorio quippe Mossandam sunt plures scopuli, quos vocant *Salemas*; inter quos unus ita ad promontorium accedit; ut angustum mari vix iactus lapidis præbeant aditum; ibi mare, etiam dum alibi tranquillum est, continuò feruet, ac tam magnos edit vortices; ut in medio illorum maxime dum mare agitur, per aliquod spatium possit lapis magnus dimitti, absque eo quod aquam tangeret; propterea infestus ac periculosus est ibi nautis transitus: nullus quidem mari turbato transit; ipso verò quieto, non velis ob ventorum ibi flantium inconstantiam; sed remis illud decurrunt; rapidissimo quippe aquarum impetu feruntur; & ita ad promontorium accedunt, ut pene transeundo attingant, timent enim ne ad illum scopulum, & ad vortices raptantur; propterea remos, qui illam respiciunt partem, immergunt mari, magnoque conatu insistunt, ut navis fluxui resistens ad aliam feratur partem; brevissimo temporis spatio locus ille periculosus pertransitur, Nautæ Mahometani, aliique mercatores inde transeuntes, aliquid comestibile proiciunt; fingunt enim civitatem subitus reperiri, ubi homines vivant, & commercium exercent; Eoque dementiæ unus illorum devenit, ut omnes suas merces ibi proici iusserit; seque post illas præcipitem in mare dederit; dicens se ibi multum fore lucraturum.

Sinus iste, dum fluxu crescit, per aliqua milliaria in-

tra terram , præsertim in littore Persico decurrit ; ibi enim terra adeo plena ac demissa est ; vt facile tumentes maris vndas latè discurrere , progredi , ac recedere permittrat : vnde nautæ terram attingunt , antequam videant ; sciunt tamen se ad finem maris peruenissè , cum aquas maris ex commixtione Euphratis pallidas , ac quasi flauas aduertunt ; tunc enim assumpto plumbo aquarum altitudinem metiuntur ; & an limus , an arena in fundo reperiatur , tentant ; ex his enim facilè colligunt , quòd peruenerint ; .eò autem vnus Arabs , qui nautæ munus obibat , experientiæ deuenerat ; vt cùm esset cæcus , ex limi vel arenæ odore differentia maris loca distingueret ; illúmque mercatores aliis nautis , vtpotè magis idoneum , præferebant : sed is continuò demisso plumbo adipe linito , quòd aliquid è fundo educeret , mare tentabat : procurant igitur nautæ canalem fluuij dicto experimento attingere ; nam ibi plus aquæ reperiunt : si enim extra illud nauigarent , refluxente mari in sicco naues remanerent , ac fundum tangerent ; non quod ibi sit aliquid periculi , ob maximam quippe limi flauo ac liquidi copiam , quasi in molli culcitra naues quiescunt ; sed quia ibi , vsque ad plenum maris incrementum , coguntur remanere .

His sinus maris est piscium feracissimus , ex quo Arabes prope mare habitantes præcipuum habent alimentum ; ibi enim quotidie piscantur , piscésque retibus captos exenterant , sicque apertos supra illos montes & scopulos Solis ardoribus , ibi vehementissimis , exsicandos exponunt , siccis colligunt , iisque non aliter coctis simul cum Daëtilis vescuntur . Præcipuus piscis , qui in illo mari capitur , vocatur piscis *Serre* à Lusitanis , Ab Arabibus verò *Ser Mahi* : est maior maximis Tunnis , repertos in mari deuorat homines , magnis quippe armatus est dentibus ; recenter captus , est delicatissimus , ac gustui suauissimus ; sed duræ digestionis , salubrior est

est sale conditus : multa vasa illo plena in Indias deferuntur, vbi talis piscis non reperitur, sed multum æstimatur. Inueniuntur ibi etiam aliquando Cete grandia, plurimi etiam serpentes supra mare natantes conspiciuntur : plures tamen in oceano Indico, quinquaginta à terra milliaribus apparent ; propter quod illa pars oceani, mare Serpentum nuncupatur : hi serpentes vi imbrium à terra in mare rapiuntur.

Magda in hoc mari copia corallij nigri nascitur, ex quo rosaria pulcherrima fiunt : ibi etiam Vniones siue Margaritæ, omnium aliarum pulcherrimæ ac pretiosissimæ. Hic autem est piscandi modus ; conueniunt centum, aut ducentæ nauiculæ Arabum & Persarum, qui in illo mari in variis portibus habitant, ac loca in quibus norunt esse ostrea gemmarum productiua : tunc mari tranquillo demittunt in fundum canistrum lapide onustum, vt descendat, ipsi nauiculæ alligatum : deinde, qui ostrea collecturus se mari immergere debet, ad pedem alligat sibi, sed leuiter vt facilè postea soluatur, lapidem magni ponderis ; quo citius descendat : qui item lapis nauiculæ fune nequitur : postea se sub brachiis alio fune cingit, qui præ manibus habetur ab his, qui in naui sunt : Denique omninò denudatus clausis gozipio auribus, constrictis quodam instrumento naribus, oleum in ore gestans se in mare proiicit, & quàm citissimè ad fundum peruenit : tunc soluto lapide, quem pedi ligauerat, colligit ostrea quæcumque occurrunt, identidem oleum ex ore dimittens, quo melius videat ; cùmque canistrum impleuerit, vel cùm halitus deficit, mouet funem quo est alligatus, statimque magna diligentia ab aliis extra aquas educitur, postea canistrum extrahunt, ostrea in naui recipiunt, sic tota die piscantur : non tamen idem se semper aquis immergit ; sed alij aliis succedunt, vt laborem inuicem partiantur. Contingit aliquandò, quod aliqui deficiente halitu moriantur, vel

vel à piscibus deuorentur : sunt inter hos homines, qui ducentos palmos subtus aquas descendant ; sed hi rari.

Multæ sunt in hoc Sinu Insulæ : propè Mascatum est perexigua, dicta victoriæ Insula ; propter insignem, quam Lusitani de multis triremibus Turcicis, hoc in loco reportarunt victoriam ; ad illam sæpe deuotionis causâ accedunt Iudæi Mascati commorantes : huc ex mari rubro classis triremium Turcicarum venerat ; vt primordia Lusitanorum in Oriente deleret. Deinde sequuntur insulæ, siue potius scopuli Suadi, deinde prope Mossandam est Insula dicta *Murium*, ob magnam eorum ibi multitudinem ; item Insulæ *Caprarum*, quia multæ ibi reperiuntur. In promontorio Mossandam sunt plures Insulæ, vt plurimum exiguæ, quas vocant Salemas ; postea occurrit Lareca, cui proximum est Ormusium, nobilissimum & ditissimum olim Lusitanorum emporium ; quia omnes Persidis merces illuc asportabantur ; est Insula non latè patens, ob saluginem sterilis de foris asportanda indigens aqua : nunc sub ditione Persarum redacta ; penè destructa ac desolata est : nos in ea Conuentum habebamus. Ormusio proxima est insula Quexomis in longitudinem satis diffusa, fertilissima, & aquis abundans : sequuntur Insulæ Tombo, Angan, Piloxo, Surrin, Andruuia, Caïs, Lara, Carga, Lera, aliæque hinc inde sparsæ. Ex his vltimis duæ tantum Surrin, & Carga habitantur ; aliæ verò ante aduentum Lusitanorum incolis plenæ erant, sed nunc ob eorum incursiones penitus desertæ. Vltima omnium prope ostia Euphratis est Insula Baren, olim Lusitanis subdita, nunc Persarum præsidio munita : ibi gemmæ plurimæ capiuntur ; ibi etiam reperiuntur fontes aquæ dulcissimæ, sub aquis maris illius salis erumpentes ; creditur his in locis fuisse paruas insulas, nunc mari submersas, in quibus prædicti fontes emanabant : Nau-

tæ, vt ex illis fontibus aquam hauriant (sciunt enim locum, vbi fecurunt) assument vtrem, os eius manu comprimunt, deinde se mari immergunt, os vtrius fonti applicant, vbi plenus fuerit, os eius iterum manu comprimunt, & ab aquis exiliunt.

C A P V T V I I I.

Descriptio maris Armenia.

PAruum in Armenia mare vidi, quod sine dubio lacus vocaretur, nisi aquarum falsedo prohiberet: circumquaque altis cinctum est montibus.

Incipit propè ciuitatem Van supra descriptam, & ad oppidum Tatuan terminatur, vbi magis angustum, retro collem secutam nauibus præbet stationem; tres alibi in eo parum tutos inuenimus portus.

Montes illud cingentes, tanquam corona simul apparent; non enim magna est eius longitudo, vel latitudo: paucis enim horis transfretari potest.

Ciebi in eo perflant venti; cum ex circumstantibus illis spirent montibus, etiam media æstate; circa festum Assumptæ Virginis illud ingredienti, bis, aut ter retrocedere coacti sumus: si enim vento prospero aliquantulum procedebamus, statim exurgente contrario ad oppositam partem deuoluebamur; vnde quatuor, aut plures dies maximo cum tædio insumpsimus, vt illud spatij conficeremus, quod vnica nocte vento moderato facile pertransiri potest: illud adhuc magis tædium augebat, quod intra quartam horæ partem sæuientibus permiscuè ventis omnibus, & labor nautis in velis mutandis, & nobis naufragij metus causabatur: vnde, vt audiui hyeme tutò nauigari non potest.

Pisces in hoc mari admodum rari videntur: nam vt ab indigenis accepi, vnica species piscium, paulò Sardinia maior, nec valde delicata, & adhuc de-
terminato

terminato tantum tempore reperitur.

Vnica compareret, huic mari vicina ciuitas Van, iam supra descripta, & admodum rara oppida, duo tantum vidi in littore eius meridionali, Tatuam videlicet in amœna planitie, & aliud supra collem situm viginti circiter inde miliaribus diffitum, in quo propter contrarios ventos duobus diebus sistere coacti fuimus: raræ etiam aliquæ apparent villæ; horum incolæ sunt Armeni, quamuis aliqui eis admixti sint Turcæ.

Plures hoc mare ex circumstantibus defluentes montibus torrentes, & riuulos admittit, quibus tamen nec augetur, nec dulcescit; sicut nec alia maria redundant, aut dulcescunt susceptis fluminibus.

Creditur hoc mare per subterraneos meatus à mari Caspio, non multum inde diffito procedere, quod in præsentī non describo; cum non viderim: licet per multos dies Aspahano Tauris veniendo, non longè ab illo incederemus, mediis montibus: eius tamen pisces delicatissimos sæpè comedi, dum in Perside cominorarer.

C A P V T IX.

Descriptio fluuiorum Euphratis, & Tigris.

Nobilissimi, & à multis iam sæculis in Sacra Scriptura nominatissimi fluuij, Euphratis & Tigris, fratres verè vnitissimi, ab eodè patre sacro scilicet fonte Paradisi terrestris simul nati, simul pari cursu non longè ab inuicem versùs Assyrios tendentes, iterum vniti simul in sinu Persico moriuntur: quia ipsos in principio, in medio, & in fine cursus vidi; ideo exactam descriptionem exarabo.

Euphrates, qui ab Arabibus *El-farat*, à Turcis verò *Morat* dicitur, à monte Armeniæ, quem iam descripsimus, originem ducit: versùs meridiem iter dirigens, mediam primò præterlabitur Armeniam, deinde Syriam Arabiam

Arabiamque à Mesopotamia & Chaldea diuidens, longo satis tractu Sinum influit Persicum.

In suo cursu aliquas ciuitates, pluraque oppida suis exhilarat aquis, agros facundando; primò enim Armeniæ egressus finibus, inuenit ciuitatem El-bit castello munitam, in Mesopotamiæ littore proximo Syriæ ædificatam, non longè ab Vr Chaldeorum nunc Orha, diffitam : qua relicta emenso plurium dierum itinere, pluribus adæquatis oppidis, attingit Annam ciuitatem olim, vt iam dictum est, celeberrimam; cui postquam plurima suis aquis saluberrimis ac fœcundissimis contulit beneficia, vltra procedens ripis iam palmarum viriditate identidem decoratis, frequentiora etiam præteriens oppida, peruenit Hellam itinere plusquam vnius diei à Babylone distantem, apud Mahometanos ob sepulchra aliquorum Pseudoprophetarum ipsorum plurimum commendatam : digressus inde urbem Aria peruenit, vbi lentus connaturalis eius cursus, refluentibus ob impetum sinus Persici eius vndis (quamuis adhuc triginta & amplius distet leucis) perturbatur : Tandem prope Cornar oppidum viginti distans à mari leucis, fratri suo Tigri sociatur.

Est Euphrates in toto suo cursu iucundissimus; non enim inter scopulos, sed per immensas diffluit planities, ripis vndequaque virentibus: sunt eius aquæ, non solum gustui bibentium deposito iam limo suauissimæ, verum & saluberrimæ : vnde credunt Arabes, se ab omni morbo etiam peste, eius potu sanandos : sunt tamen turbidissimæ adinstar Druentiæ; imò dum ad medium deserti petueniunt, plurimo mixtæ limo ibidem reperto flauescunt, ac tali colore per multa in ipso mari Persico dignoscuntur milliaria.

Lento fluens cursu quietissimo, non profundus admodum, nisi pluuiialibus aut niuium Armeniæ liquefactarum intumescat aquis; sed multis in locis diffusus

Araris

Araris magnitudinem adæquat, abundat piscibus delicatissimis, maximè iis qui ab illo pisces Euphratis nominantur.

Tigris, qui ab Arabibus *Dagella* nominatur, in Armenia maiori, ad radices montis non longè ab origine Euphratis fluuij distantis, ortum habet: In toto cursu, quo versùs Allyriam tendit, candidis rapidisque aliquantulum decurrit aquis, quæ licèt ad bibendum suauissimæ, non ita tamen salubres esse quotidianâ constat experienciâ; ob nimiam quippe subtilitatem, fluxum ventris hominibus causant non assuetis.

Multas, easque celeberrimas in suo cursu pertransit vrbes: in suo ferè principio mœnia Diarbequir, nobilis Mesopotamiæ ciuitatis, alluit: ibi adhuc tenuissimus est, nec latior quàm sit iactus lapidis, nec altior duobus palmis; sed facilè & sæpè intumescit, maximè quandò niues montium Armeniæ liquecunt, vel magni ingruunt imbres; quod ex eius lecto plurimùm coram illa ciuitate diffuso apparet; tunc autem supra pontem ad vnum milliare infra ciuitatem, inter angustias duorum montium fabricatum, pertransitur. Ex his autem paruis principiis in magnum excrescit fluuium; omnes enim fluuiolos, qui passim ex Armeniæ montibus profluunt, in se recipiens, cum Babylonem peruenit, ipsam Euphratem à suis magnum principiis adæquat. Hac ciuitate relicta, hinc radices montium Armeniæ, inde verò vastissimas Mesopotamiæ planities alluens; primò Ciuitatem Merdin, deinde Mossul olim maximam & magnificentissimam Assyriorum Reginam Niniuem, plurimùm receptis auctus fluuiis attingit. Ingentibus eius, quæ adhuc apparent, ruinis superatis ad nominatissimam Babylonem Chaldæorum olim caput decurrit, eiùsque pontem ligneum supra nauiculas fabricatum præterfluens, Persidèinque à Chaldæa diuidens, ad Arabiæ felicis initium suum fratrem Euphratem.

prope oppidum Cornar attingit.

Eius ripæ viriditate , & vtilitate ripas Euphratis superant; cum enim per habitata vt plurimum pertranseat loca, plurimos hortos, & campos palmis confitos, rotis impetu fluminis continuò voluentibus & aquam effudentibus, irrigat; quod etiam in Euphrate contingit: piscium etiam delicatissimorum est feracissimus.

Postquam Tigris & Euphrates ad Arabiam fœlicem peruenerunt, viginti scilicet milliaribus supra Bassorâ, simul confluentes maximum efficiunt fluuium, ambo proprium deperdunt nomen, & flumen Arabum impostum nominantur. Propter fluxum & refluxum maris, suum similiter fluxum patitur & refluxum, qui ad centum ferè contra fluminis impetum ascendit milliaria. Ex illo hinc inde propè infiniti dimanant fluuioli, qui illo ob maris refluxum intumescente, aquis repleti circumuicinas irrigantes terras, fertiles efficiunt, & ad singulas diuisis suis rinulis palmarum arbores attingunt: inter quas, mirabile dictu, reperiuntur & mares & fœminæ: mares producunt quoddam semen candidum, quod nisi determinato tempore hiantibus fœminarum immittatur ramis, ex quibus botri Daëtilorum procedunt, non pingues Daëtilos, sed nucleos sola pelle coniectos producent.

Totus fluuius à flauis Euphratis aquis flauescit, & dum mare in seipsum refluit, flauæ illius aquæ ad multa milliaria intra mare pertingunt, aliquæ in medio fluuiio sunt Insulæ, elatis palmarum comis, sicut & vtraque fluminis ripa, decoratæ: sed antequam ad mare confociatas effundat aquas; in tria diuiditur capita, quorum primum & maximum recto fluit tramite; aliud à dextris valde magnum versùs Barem & Catiffam decurrit; inter quæ relicta satis magna Insula, Kader id est viridis, nominatur; aliud denique paulò minus, flumen Gaban

Gaban vocatur, quodd solùm inter alia capita vsque ad mare dulces suas conseruat aquas, nec fluxum maris patitur; alia verò duo capita intumescens maris salvas ad duodecim intus milliaria recipiunt aquas; vnde per illud spatium nullæ nascuntur palmæ.

CAPUT X.

Descriptio fluuiorum Gangis, & Indi.

Ganges & Indus ab eodem monte Tauro, nunc dicto Imao, qui est pars Caucaſi; imò ab eadem origine procedentes, diuersa tamen decurrentes viâ; Ganges quidem ad partes Indiæ magis Australes, Indus autem ad Septentrionales; sicque inuicem diuisi ad quingentas circiter leucas in oceanum Indicum; ambo ostio multiplici consociatas effundunt aquas.

Indus, qui totam denominat Indiam, eamque à Perside separans à parte Septentrionali terminat, plures easque maximas & celeberrimas irrigando exhilarat ciuitates; videlicet Magni Mogoris Regiam, quæ dicitur Agra & alias; nec longè transit à ciuitate Lahor, cuius fluuium recipit ad sui cursus finem in duo capita diuisus, vno versùs Cambaiam, alio versùs ciuitatem Tatta Regni Sindensis Metropolim propetans, iterum ibi multipliciter subdiuisus, iam multis auctus fluuiis ingressus mare terminatur.

Non solùm piscium piscationi, sed etiam Anatum venationi deseruit: hæ ordinariò aquis fluminis insident, cui cum multa vasa semisfrac̃ta iniecta hinc inde fluctuent, Anates his assuetæ non fugiunt, dum accedunt; & sic homines ad illas capiendas hac vtuntur occasione: accipiunt enim vasa testacea, in eis foramina ad videndum simul & respirandum faciunt, deinde capiti dolosè imponentes flumen ingrediuntur; cautè ambulant, vel tali modo natant, vt nihil præter illa vasa com-

pareat: accedunt sensim ad aues, quæ de his fraudibus non suspectæ remanent, crura eis subtus aquis frangunt, nec propterea gemitum edunt, quo reliquæ de insidiis moneri possint; fractis autem cruribus auolare nequeunt: ita omnes percurrendo venantur; tunc vasa deponentes, & prædam colligentes suam terminant venationem.

Ganges maior Indo mediam præterlabendo regionem Indicam, eamque in citeriorem & vltiorem diuidens, multasque percurrens ciuitates diffusa plurimum conficit spatia, & infinitis propemodum receptis fluminibus tumescens in freto Bengalæ, ostio multiplici mare ingreditur.

Hic fluuius non solum vulgares gignit pisces, sed ad instar Nili formidabiles Crocodilos, qui non solum incautos deuorant homines, sed etiam nauiculas ad prædandum aggrediuntur; ad eius quoque ripas ferocissimæ videntur Tygrides hominibus infestæ; casus in hac materia contrigit admirabilis, quidam Lusitanus fluuiû Gangem enauigans voluit necessitate coactus, ad fluuij ripam exonerare ventrem; dum ibi recedente aliquantum nauicula necessitate detinetur, ex parte fluuij repentinus apparet Crocodilus, dum miser hic territus fugam meditatur, ex parte terræ ferocissima Tigris aspicitur: quid faciet his pressus angustiis, vndique mors certa comparet; si se in fluuium ad effugiendam Tigridis rabiem proiciat, se statim ab hianate Crocodilo certissimè deuorandum videt, si in terram fugiat, vt Crocodilum euitet; se à Tigride discerpendum esse non dubitat: si maneat, præsens imminet vtrinque periculum: quibus, amabò,angebatur curis; quanto mortis sibi imminentis periculo cruciabatur, quibus se Deo, Beatissimæ Virgini Deiparæ, aliisque sanctis obstrangebatur votis, quæ irrita non fuerunt; Deo siquidem illis obsecundante inexpectato sed mirabili modo mortis periculum euasit; Tigris quippe illum discerpere volens

lens, impetu magno fremens insilit; quod aduertens Lusitanus statim se deprimit, ac ita Tygris in fluuium decidit, & à Crocodilo arrepta sub aquis deuoranda immergitur.

Vtriusque fluminis aquas mihi videre licuit: Gangēs quidem prope Goam in terris Salsete, vbi ramus eius mare ingreditur: Indi verò, cum in mea profectioe ad Indias, & in meo reditu regni Sindensis littora nauigare.

Non desunt, qui ambos hos fluuios è Paradiso terrestri procedere dicant; sicut Euphratem & Tigrim, ipsūque Gangem asserunt esse Phison; Indum autem esse Geon: iuxta superius dicta capite tertio facile concedi potest; si vtrumque è mari Caspio vna duntaxat origine procedere dicatur: vnde mediata ab eodem monte Armeniæ, quo Tigris & Euphrates procederent: ex ipso quippe plures emanant fluuioli, qui in mari Caspio recepti suas Gangi & Indo subterraneis meatibus aquas subministrant; vel si dicatur quòd iisdem meatibus subterraneis per multa spatia latitantibus à dicto monte procedant immediate: hos fluuios tanquam è Paradiso dimanantes Indigenæ venerantur, & suaves ac salutiferas exaltant laudibus aquas.

C A P V T X I.

Descriptio fluuiorum Iordanis, & Orontis.

Iordanis quoque & Orontes fluuij fratres esse creduntur, ab eodem monte Libano procedentes: sed Iordanis ad Austrum, Orontes verò ad Septentrionem percurrit.

Iordanis è meridionalibus Libani radicibus è duplici fonte confurgit, vnus dicitur Ior, alius verò Dan, quorum riui paulò post simul vniti Iordanem component, qui versùs Austrum decurrens, pontemque Iacob

præterlabens, in mari Galileæ primò quiescit, sed inde maior exurgens, riuulis & torrentibus auctus tandem in mari mortuo receptus emoritur: hæc duo maria, cum dulcibus gaudeant aquis, potius lacus à Iordane effecti videntur.

Plures in toto decursu admittit torrentes, Cisson; Carith, aliósq; in sacris litteris nominatissimos.


Omnes Tribus Israël: paucis exceptis, riparum eius viriditate, & dulcium aquarum commoditate frui potuerunt, vt in descriptione Palestinæ dictum est; propterea pulchras ciuitates, plurimas vrbes, plurimæque oppida suo decursu irrigabat: circa mare Galileæ erant Tiberias à qua mare Tiberiadis, Gennezaret à qua lacus Gennezaret dicitur, Bethsaïda sanctorum Petri, Andreae, Philippi, & aliorum patria, Corozain, Capharnaüm, &c. In mari autem mortuo, siue lacu Asphaltite erant Sodoma, Gomorra, Seboïn, & Adama, quæ cœlesti igne in pœnam nefandi peccati tempore Abrahamæ, solo Loth viro Iusto cum vxore & filiabus erepto, consumptæ fuerunt.

Pluribus fluuiis minor est Iordanis, si aquarum quantitatem, si decursus longitudinem consideres; omnibus verò maior & celebrior si quæ in eo gesta sunt, attentè perpendas. Primò ad ingressum filiorum Israël in terram promissionis, stupendo, & tunc inaudito miraculo, constituta in medio eius alueo Arca Domini, à parte superiori excrecentibus aquis in altum ad instar montis, ab inferiori verò defluentibus, siccum toti populo transitum aperuit; deinde Naaman Principis Syri ad mandatum sancti Elisei nostri, maculosam lepram absterfit; eiusdem sancti Elisei discipulis continua successione ad eius ripas concurrentibus solitarium ac dulcissimum præbuit habitaculum; sancto Ioanni Baptiste Collegiis ipsorum, tunc essenorum dictis associato, facileque Principi, & quietem, & baptizandi comodi

moditatem subministravit ; quid amplius ? ipsum Christum Dominum , cæli terræque Regem , ad Baptisma Ioannis accedentem suscepit, & undis irrigavit : à quo sanctificatus ipse Iordanis plurimum quotannis Christianorum, illuc deuotionis causa concurrentium, deuotione celebratur.

Orontes fluuius satis exiguus ad Septentrionales Libani radices exurgens, in Cœlesyria versùs Septentrionem suum dirigit cursum ; in quo duas celebres Ciuitates, pluresque alias irrigans ad mare Mediterraneum leniter fluens procurrit. Prima illarum Ciuitatum est Aman, olim Apamea secunda est celebris Antiochia, ad cuius planitiem postquam deuenit, pluribus riuis, torrentibus , & fluuiolis plurimum auctus amœnior & celebrior reliquum viæ decurrit.

Plurimos alios vidi, tum in Syria , tum in Chaldæa, tum in Perside , tum in Armenia, & Mesopotamia fluuiolos ; sed quia vix noti ; ideo propriis in locis eos indicasse satis est nobis breuitatem affectantibus.





LIBER QVARTVS ITINERARII

In quo

Monarchæ Reges & Principes
adducuntur, qui in Oriente
sunt dominati.

CAPVT PRIMVM.

De quatuor mundi Monarchijs in communi.

QUIA plura Orientis regna descripsimus, lectori iucundum & vtile iudicamus; si etiam Principes, qui eis dominati sunt, recenseantur: quod ex parte fiet describendo quatuor mundi Monarchias sibi succedentes: videlicet Assyriorum siue Chaldæorum, Persarum, siue Medorum, Græcorum, & Romanorum: dictæ sunt autem Monarchiæ; non quia erant singulares principatus (sic enim quodlibet Regnum vni Regi subditum, est Monarchia: sed quia eorum imperium ad maiorem orbis partem dilatatum florebat.

De hac quadruplici mundi Monarchia, non solum prophanæ litteræ; sed & sacri Codices plurima referunt, vel describendo præteritâ, vel futura prænuntiando;

tiando ; sed maximè de his agitur apud Daniele in sua prophetia sub figura diuersorum animalium.

Sanctus Propheta Daniel cap. 7. sic ait : Et quatuor bestiae grandes ascendebant de mari diuersae inter se. Prima quasi Leena, & alas habebat Aquilae : aspiciebam donec euulsi sunt alae eius, & sublata est de terra, & super pedes quasi homo stetit, & cor hominis datum est ei. Et ecce bestia alia similis Urso in parte stetit, & tres ordines erant in ore eius, & in dentibus eius, & sic dicebant ei, surge, comede carnes plurimas. Post hæc aspiciebam & ecce alia quasi Pardus, & alas habebat quasi auis, quatuor super se, & quatuor capita erant in bestia, & potestas data est ei. Post hæc aspiciebam in visione noctis, & ecce bestia quarta terribilis, atque mirabilis, & fortis nimis, dentes ferreos habebat magnos, comedens, atque comminuens, & reliqua pedibus suis conculcans : dissimilis autem erat cæteris bestiis, quas videram ante eam, & habebat cornua decem : hanc tamen Propheta non describit, sed eadē forte est, quam sanctus Ioannes in Apocalyp. cap. 13 exprimit his verbis. Et vidi de mari bestiam ascendentem habentem capita septem, & cornua decem, & super cornua eius decem diademata, & super capita eius nomina blasphemiae. Et bestia, quam vidi, similis erat Pardo & pedes eius sicut pedes Ursi, & os eius sicut os Leonis : dicitur autem dissimilis aliis tribus ; quia ex singulis aliquid habens, nulla earum penitus erat, sed ex illis composita robur & furorem ipsarum continebat ; propterea dicitur terribilis, atque mirabilis, & fortis nimis : quod autem hæ quatuor bestiae, quatuor futuras ante Christum Monarchias præfigurarent ; eidem sancto Prophetae denunciatum est : subiicit enim. Horruit spiritus meus, ego Daniel territus sum in his, & visiones capitis mei conturbauerunt me : accessi ad vnum de assistentibus, & veritatem quærebam ab eo de omnibus his ; qui dixit mi-

hi interpretationem sermonum , & docuit me : Hæ quatuor bestię magnæ, quatuor sunt regna , quæ confluent de terra : suscipient autem Regnum sancti Dei altissimi , & obtinebunt Regnum vsque in sæculum , & sæculum sæculorum : post pauca, bestia quarta Regnum quartum erit in terra, quod maius erit omnibus regnis, & deuorabit vniuersam terram, & conculcabit, & comminuet: iam idem Propheta eadem quatuor regna præviderat, & descripserat in statua representata Nabuchodonosor : harum bestiarum, & statuæ partium adaptationem ad quatuor Regna Expositoribus relinquo.

Prima Assyriorum, siue Chaldæorum Monarchia paulò post diluuium à Nembrod, siue Belo inchoata, sub Balthasare desit : Secunda Persarum, siue Medorum victo Balthasare à Dario & Ciro fundata, sub alio Dario corruit. Tertia Græcorum debellato Dario ab Alexandro Magno cœpta, statimque diuisa vix duobus sæculis perdurans; Quartæ Romanorū Monarchiæ cessit.

C A P V T II.

De Monarchia Assyriorum & Chaldæorum.

PRima mundi Monarchia fuit Assyriorum, & Chaldæorum, ab his prouinciis, vt à principalioribus denominata, & apud quas sedes Imperij alternatim, modo Babylone, modo Niniue mansit.

Huic Monarchiæ principium dedit Nembrod, ædificata turri Babel, & Babylone Ciuitatē in regione Chaldæorum Euphratem fluuium : de illo agitur Genesis 10. & dicitur esse filius Chus, nepos Cham, & pronepos Noë; apud prophanos authores vocatur Belus: quāuis non desint, qui Belum filium Nembrod asserant.

Nembrod Patri post sexaginta duos annos Imperij, successit Ninus filius, qui inchoatā sic stabiliiuit, & dilatauit Monarchiā, vt ab ipso quasi fundatore anno mūdi secundum

secundum aliquos millesimo nongentesimo septimo : secundum alios anno millesimo nongentesimo nonagesimo septimo coepisse dicatur. Propter hanc Chronologiam apud authores differentiam nullam annorum mundi mentionem faciemus in singulis Monarchis , tam huius Monarchiae quam aliarum : donec ad tempora Christi Domini accedamus , quando apud omnes authores certa est annorum series. Potest tamen quilibet computatis Imperij singulorum annis, in quorum numero nulla pene est difficultas, eorum imperij & mortis tempus ad annos mundi secundum utramque opinionem , & alias si quae sint) reducere. Hic ad suae potentiae & gloriae iactantiam Civitatem maximam à se Niniuem denominatam supra ripam Tigris fluvij aedificavit : tanta fuit eius magnitudo, ut trium dierum itineris fuisse in sacris litteris dicatur. Hic Ninus Genesis 10. vocatur Assur, à quo haec Monarchia, dicta est Assyriorum : Babylonios, Armenos, Medos, Persas, Parthos, Hircanos , Bactrios, Syros, aliasque regiones Asiae , ipsamque Aegyptum in Africa suo subiugavit imperio, quinquaginta duos imperavit annos , eiusque quadragésimo secundo natus est in Vr Chaldaeorum Abraham Patriarcha.

Semiramis vxor Nini propter minorem filij aetatem imperium administrat , simulque cum eo quadraginta duobus annis imperat : haec Babylonem ampliauit, eiusque muros tanta mole & arte construxit, ut inter mundi miracula numerentur , suaeque ditioni plures subiecit nationes.

Ninyas siue Zameis Nini & Semiramidis filius, trucidata matre , solus triginta octo annis regnat , cuius anno trigésimo tertio Abraham aetatis suae septuagesimo quinto vocanti Deo obediens ab Vr Chaldaeorum, patria parentibusque relictis in terram Chanaan transmigravit : hunc Ninyam aliqui dicunt esse Amxaphel Regem Sennaar, de quo agitur Genesis 14.

Arius regnat triginta annis, quorum decimo Abraham ætatis suæ centesimo genuit Isaac.

Aralius regnat quadraginta annis, quorum ultimo Esau & Iacob filij Isaac & Rebeckæ vno partu nascuntur.

Baleus siue Xerxes regnat triginta annis.

Armamitres, siue Armatrites regnat triginta octo annis.

Belochus regnat triginta quinque annis.

Baleus II. regnat quinquaginta duobus annis, eius tempore Iacob ad filium Ioseph in Ægypto dominantem perrexit.

Althadas siue Sethos regnat triginta duobus annis.

Mamyssthus, siue Maminthus regnat triginta annis, eius tempore moritur Ioseph Patriarcha in Ægypto.

Mancaleus siue Macaleus siue Ascharius regnat viginti octo annis.

Sperus siue Sphærus regnat viginti annis, eius tempore nascitur Moyses.

Mamylus siue Mamilas regnat triginta annis.

Sparetus siue Sparthæus regnat quadraginta annis.

Alcades siue Alcatades regnat quadraginta annis, eius tempore Moyses filios Israël eduxit de Ægypto.

Amyntes regnat quadraginta quinque annis, nono imperij eius anno mortuo Moyse, & succedente in ducis dignitatem Iosue filij Israël terram promissionis ingrediuntur.

Belochus II. regnat viginti quinque annis, & sub ipso Othoniël est iudex Israël.

Bellepares, siue Bellopares siue Balatores regnat triginta annis, sub ipso vixit Aioth Iudex in Israël.

Lamprides regnat triginta annis.

Sofares regnat viginti annis.

Lampares regnat triginta annis, sub ipso floruit Debora in Israël.

Panyas regnat quadraginta quinque annis, eius tempore Gedeon Iudex est in Israël.

Sofarmus regnat nouemdecim annis, sub ipso Abimelech, & Thola iudicant Israël.

Mithræus regnat viginti nouem annis, sub ipso Iair iudicat Israël.

Tautanes siue Teutamus regnat triginta duobus annis, hic misit Memnonem in auxilium Troiæ à Græcis obsessæ.

Teutæus regnat quadraginta annis, sub ipso floruit Sanson in Israël.

Thimeus, siue Thinneus regnat triginta annis, eius tempore fuerunt Heli Sacerdos, & Samuel Propheta.

Dercylas regnat quadraginta annis, eius tempore regnarunt Saul & Dauid in Israël.

Eupales regnat triginta octo annis, eius tempore regnauit Salomon.

Laosthenes regnat quadraginta quinque annis.

Pyriciades siue Pyrithiades regnat triginta annis, eius tempore regnauit Roboan in Iuda & Ieroboan in Israël.

Ophracteus regnat viginti annis.

Ophratenes regnat quinquaginta annis.

Acrazapes, siue Ocrzapes, siue Acracarnes regnat quadraginta duobus annis, sub ipso regnant Amasias in Iuda, & Ioas in Israël.

Thonos-Concoleros, dictus à Græcis Sardanapalus, regnat viginti annis: qui cum nimis esset effeminatus, ita ut purpuram cum mulieribus neret; à suis despectus, & indignus imperio iudicatus est: sub ipso Ionas Propheta Niniuitas ad pœnitentiam conuertit, ipso Rege fidem adhibente verbis Prophetæ: sed cum ad vomitum rediisset, in sua Imperiali ciuitate Niniue ab Arbace Medo, & Beloso Babylonico obsidetur, & ad extremas angustias reductus in ingentem, quem erexerat rogum se, suos filios, & vxores coniiciens, igne consumitur cum quinquaginta mensis aureis, totidemque lectis, ac
decem

decem millionibus auri, centúmque millionibus talentorum argenti. Eius tempore regnauerunt Ozias in Iuda & Ieroboan in Israël. Hæc successerunt anno mundi 3149. secundum aliquos, secundum alios autẽ an. 3108.

Sunt qui credant tunc terminatam fuisse Assyriorum Monarchiam; & Persarum; siue Medorum inchoatam; sed iuxta sincerum sacrarum litterarum sensum, & Sancti Hieronymi, aliorúmque Sanctorum Patrum auctoritatem, dicendum tunc non terminatam, sed tantum diuisam fuisse hanc Monarchiam; quæ denuò in pristinum rediit splendorem, ac ducentis octuaginta quinque annis amplius floruit vt doctissimè probat Noster Franciscus à S. Maria in sua historia prophetica. Licet igitur Arbaces patriam suam Mediam, & Balosus Babyloniam prouinciam tyrannicè vsurpauerint, suosque habuerint successores: Phul tamen desolatam Assyriorum Monarchiam suscipiens regnat 48. annis: & in Palæstinam veniens à Manahen Rege Israël mille argenti talenta exegit.

Teglar-phalassar, siue Phul-Assar successit, & venit in Palæstinam tempore Phaceæ filij Romeliæ Regis Israël, ac tribu Nephtali in Assyrios trāstulit: regnat 25. annis.

Salman-Assar septemdecim regnat annis, Oseam Regem Israël tributarium primò facit; deinde rebellem debellat; expugnatâque Samariâ capit, & decem tribus captiuas duxit in Assyriam.

Sennacherib, siue Sargon septem regnat annis: hic tempore Ezechii Regis Iuda cum immenso exercitu in Palæstinam pergit: sed Deo sanctissimum Regem Ezechiam protegente, Angelus Domini eius exercitum delet, occisis centum octuaginta quinque millibus Assyriorum: ipse verò Sennacherib Niniuem reuersus à propriis filiis Adramelech, & Sarazar in templo adorans occiditur.

Asarhadon filius Sennacherib patri successit, ac decem

cem regnat annis : postea à Rege Babylonis. Merodrac Baladan superatur : vnde iterum ex Assyriis & Babylo-
niis prima hæc Monarchia refloret : quia tamen Imperij sedes Babylonem transfertur : ideò impofterum in
sacris litteris nomen Imperij¹ Babylonici frequentius est.

In Babylone regnauerant Belofus quatuordecim an-
nis, Naffyus duobus, Chinzerus & Porus quinque, Du-
lilæus siue Dilulorus alios quinque : quibus successit
Merodrac Baladan , quem Iosephus vocat Baladar , &
Ptholomeus Mardokempalum : siue filius Baladan, quẽ
idem Ptolomeus vocat Nabonassar : hic deuictò Asar-
hadon, & Assyriâ Babylonix vnitâ primam Assyriorum
& Chaldæorum Monarchiam plurimùm restaurat an-
no mundi secundùm aliquos 3229. secundùm alios ve-
rò 3342. eius imperium aliqui ad quinquaginta duos
annos dilatant : alij duodecim terminant.

Ben-Merodrac , quem alij secundum Merodrac vo-
cant , patri successit, & viginti quatuor annis regnat.

Nabolassar, siue Nabunassar patri Ben-Merodrac suc-
cessit : de hoc fit mentio apud Iosephum lib. 10. antiq.
cap. 11. à quo etiam vocatur Nabuchodonosor : regnat
viginti nouem annis.

Nabuchodonosor, ob præclara gesta & victorias, co-
gnomento Magnus patri Nabolassar successit. Hic in
sacris litteris nominatissimus , & apud prophanos au-
thores celeberrimus, duas Tribus reliquas, scilicet Iuda,
& Benjamin captiuos in Babylonem duxit , Regemque
Iechoniam excæcatum carceri mancipauit : Ægyptum
subiugat , Tyrum obsidione capit : cùmque alia mira-
bilis gessisset, & in eo gesta fuissent, moritur anno Im-
perij secundùm Iosephum 43. secundùm Scaligerum 32.

Eluimerodach successit patri Nabuchodonosor : hic
Iechoniam soluit è Carcere , & aliis Principibus suis
anteposuit : sanctumque Prophetam Daniele plurimùm
coluit : cùm regnasset viginti tres annos, occiditur
proditione

proditione cognati sui Niglifar nomine, qui regnum inuadens quatuor imperat annis, suumque filium nomine Labofardac, siue Labdassarac successorem reliquit: hic suis ita fuit inuisus, ut à propriis seruis primò sui Imperij anno trucidatus fuerit.

Baltassar filius Eluimerodach vsurpatum recuperat Imperium & septemdecim annis imperat; suis delictis diuinam contra se vindictam suscitans; maximè impietate, qua in solempni conuiuio cum Principibus, vxoribus, & concubinis, vasibus sacris ex Ierusalem adductis ad potandum vsus est: quo sacrilegio commotus Deus, mirabili manus in pariete scribentis prodigio proximam eius mortem, Assyriorum & Chaldæorum Monarchiæ ruinam, cuiusque ad Persas & Medos translationem denuntiat: vnde capta Babylone à Dario Medorum & Cyro Persarum Rege, occiditur anno mundi secundum aliquos 3390. secundum alios anno 3445. denique secundum alios anno 3516. quo hæc prima terminatur Monarchia, postquam mille quingentos circiter annos perseverasset in quadraginta nouem Regibus.

C A P. V T I I I.

De Monarchia Persarum, & Medorum.

Secunda mundi Monarchia fuit Persarum & Medorum à Dario Medo & Cyro Persa superato Balthasare fundata: iam, ut dictum est, regnum Medorum & Persarum ab Arbace fuerat erectum, & à successoribus Regibus administratum: sed quia Assyriorum, & Chaldæorum potentia & gloria maior erat; idè Monarchiæ nomen solum sub Dario & Cyro meruit.

Inter Arbacem & Darium octo Reges mediarunt: videlicet Mandances, siue Mandanes ex Diodoro, ex Eusebio autem Medides filius Arbacis: hic regnat 50. annis; pater vero eius 28. Sofarmus qui regnat 30. annis.

Articas

Articas siue Artias ex Diodoro; ex Eusebio autem Cardiceas siue Cardicas regnat 50. annis Arbianes 22. Arseus siue Deioces 40. Artynes siue Phraortes 12. Artibarnas siue Astibaras siue Cyaxares 40. Apandamus siue Astyages pater Darij 35. Hic notandum quod plures ex Regibus Medorum duplici vocabantur nomine: ante Arbacem autem regnum medorum & Persarum Assyriis à Nino subditum fuit, deuictò Pharno primo Medorum Rege.

Astyages, qui Danielis 9. dicitur Assuerus, habuit filium Darium cognomento Astyngem imperij Babylo-nici destructorem, & filiam nomine Mandanem, quam Cambysi nobili Persæ coniugem dedit: Ex illa natus fuit Cyrus apud authores, tam sacros, quam prophanos celeberrimus, quem Xenophon omnibus mundi Ducibus præfert. Cyrus filiam Darij Auunculi accipit vxorem, ab eoque ad partem regni assumitur, simulque cum eo ad expeditionem Babylonicam proficiscitur.

Captâ Babylone, & interfecto Balthasare, Darius & Cyrus secundam Persarum & Medorum Monarchiam simul inchoant, quam mortuo Dario primo Imperij sui anno solus Cyrus moderatur. Græci primum Monarchiam ponunt Cyrum ob eximium animi valorem: Daniel autem testis oculatus ponit Darium ob venerandam Caniciem; utrique autem charissimus fuit Daniel ipse; tum quia ipsum purpura indutum & aliis Principibus à Balthasare præpositum inuenerunt; tum etiam & maximè, quia ob interpretationem mysticæ illius scripturæ & prophetiam celeberrimus erat.

Cyrus mortuo iam Dario solus imperare cœpit: videns se in Isaia Propheta diu ante prænnunciatum mundi Monarcham, & populi Iudaici liberatorem futurum, in signum animi grati primum libertatis eius decretum edidit, eumque ad patriam cum maximis ho-

noribus & facultatibus dimisit, Zorobabel ei Ducem præficiens. Tandem anno sui regni Persici trigesimo, & Monarchiæ septimo apud Masagetas & Scythas cum toto exercitu periit occisus, ut dicit Iustinus, ab ipsa-
met Regina Temin: cum prius immensam gloriam ex tot partis victoriis cumulasset: imperavit 30. annis.

Cambyfes filius Cyri (quem Esdras etiam Assuerum vocat, forte quia nomen Assueri, nomen erat gloriæ & potestatis: sicut apud Ægyptios nomen Pharaonis, & apud Romanos nomen Cæsaris) patri successit: hic non fuit Iudæis ad Palæstinam remissis: unde contradicentibus Samaritanis ædificatio templi cessavit: moritur anno Imperij 7.

Smerdis magus dolo & fraudibus Imperium inuadit: sed his detectis, vix septem conseruat mensibus, & à Persis trucidatur.

Darius filius Histaspis ad Imperium assumitur, filiam Cyri & Cambyfis sororem in matrimonium duxit: eius anno primo Zorobabel è Ierusalem in Persidem proficiscitur, ubi tam prosperè suæ gentis negotia promouit, ut ab ipso Imperatore Regias patentes, & plurima dona ad construendum Ierosolimis templum obtinuerit, & in Iudæam profectus opus absoluerit. Darius totius penè Asiæ Imperio non contentus, plures fecit bellicas expeditiones; maximè contra Græcos, in quibus tamen parum proficiens moritur anno Imperij 35.

Xerxes filius Darij Patri succedens, cœptas eius expeditiones promouit: sed contra eosdem Græcos cum maximo exercitu decies & quinquies centenorum millium militum profectus, ab ipsis debellatur, victusque penè deleto recessit exercitu. De hoc dicit Cicero, quod ambulauit in mari, & nauigauit in terra; quia in freto Traciæ pontem maximum supra naues construxit, supra quem in Europam exercitum transmisit: & montem Aton in Græcia aperuit, ut
indo

inde naues transirent : moritur anno Imperij 20.

Artaxerxes filius Xerxis patri successit : hic creditur esse Assuerus, qui Esther duxit uxorem, cuius Imperium ab India usque Æthiopiam pertingebat : hic tertius est Iudæorum liberator (primus enim fuit Cyrus, secundus fuit Darius Histaspis filius) cuius auctoritate Esdras Propheta Rempublicam Iudæorum perfectè stabilivit. Artaxerxes dictus est longimanus, vel propter liberalitatem, vel quia eius manus extensæ ad genua pertinebant : moritur anno Imperij 40.

Xerxes II. successit qui duobus tantum imperat mensibus. Deinde Sogdianus qui vix sex mensibus imperat. quem sequitur Darius Nothus, cuius tempore S. Esdras moritur: hic imperat annis 19.

Artaxerxes II. cognomento Memnon siue Mnemon id est memoratius in Imperio successit : ita denominatus est, quia tam felicitis fuit memoriæ; ut omnium immensi sui exercitus militum nomina recordaretur. Moritur 40. Imperij anno. Hunc sequitur Artaxerxes Ochus id est magnus, & 26. annis imperat. Deinde Arses siue Arseas qui 4. Imperij anno occiditur. Darius Arsami filius dictus Codomanus ultimus Persarum Monarchia fuit potentissimus, ditissimus, & gloriosus; quippe qui supra centum viginti octo provincias in Asia Maiori & Minori ac in Ægypto dominabatur : sed Alexandri Magni fortunæ, quamvis generosissimus, resistere non potuit, ut capite sequenti dicetur: unde cuiusdam proditoris dolo occisus anno Imperij 6. secundam Persarum & Medorum Monarchiam terminat; postquam in quatuordecim Imperatoribus ducentis triginta circiter annis perseverasset, anno mundi secundum aliquos 3620. secundum alios anno 3654. denique secundum alios anno 3724.

Persæ, Medi & Parthi Græcorum Monarchis subditi legibus eorum obtemperarunt usque ad annum 13. An-

thiochi cognomento Dei, qui fuit ducentefimus quinquagesimus ante Christum natum; tunc enim Parthi iugum Græcorum excutientes; licet non Monarchiam; suum tamen regnum repararunt. Primus eorum Rex, qui & Medis, & Persis dominatur vocatus est Arsaces; huic successit filius eiusdem nominis; deinde Pampacius, siue Phraartes qui regnat 12. annis; regnumque filio Pharnaci reliquit, cui Mithridates frater succedit: hic moriens anno ante Christum natum 136. filium Phraartem II. instituit Regem, qui in bello contra Scythas occubuit.

Artabanus filius Pampacij nepoti succedit, qui in bello vulneratus moritur; filiumque Mitridatem II. successorem reliquit, hic ob præclara gesta Magni nomen obtinuit, multas provincias suo adiecit imperio, Scythas & Armenos debellavit; sed ob crudelitatem deponitur; cuius loco sufficitur Orodes frater, hic Babylonem obsidet, captumque ibidem fratrem Mithridatem occidit, varias expeditiones contra Romanos in Syria paravit: & tandem à proprio filio, quem regni successorem reliquerat, occisus fuit.

Phraartes III. siue Phrahates filius Orodis, & patricida tempora Christi attigit: cui primo Christi nati sæculo successerunt Phraartes IV. Orodes, Vonones, Artabanus II. Gotarzi. Vonones II. qui præerat Medis. Vologeses I filius Vononis, Artabanus III. filius Vologesis, Pacorus filius Artabani, Chosroas I. frater Pacori.

Parthenaspates anno Christi 101. à Traiano Parthis præficitur: sed hic à Chosroa breui è sede deiicitur: cui sæculo secundo successit Vologeses II. eius filius, deinde Vologeses III. filius secundi, Artabanus IV. frater Vologesis tertij, qui ultimus fuit Rex Parthorum; ipso enim ab Artaxerce Persa interfecto, sceptrum Parthorum ad Persas translatum est.

Artaxerxes regnum Persarum Parthis prius subditum,
independens

independens, & gloriosum reddidit tertio Christi sæculo; eique tam Parthos quàm alios subiecit populos. Moritur anno Christi 242. illi successit Sapor filius, qui triginta & vno annis regnat; vnde moritur anno Christi 272. huic successit Hormisdas filius, qui vnico regnat anno: hunc sequitur Varanes frater, qui tribus regnat annis. Varanes II. filius primi dictus Narseus decem regnat annis. Varanes III. filius secundi dictus Saganefnus quatuor tantùm regnat mensibus: cui successit Narses filius Hormisdæ, qui ferè octo regnans annis moritur anno Christi 301.

Misdates, siue Hormisdas filius Narsis penè octo annis regnans peruenit ad annum Christi 309. huic succedit filius Sapor II. posthumus, crudelis persecutor Christianorum: Constantiũ, Iulianum, & Iouinianum Imperatores diu armis vexauit: sed post tot victorias à Valentis duce superatur: septuaginta regnat annis, & moritur anno Christi 379. illi succedit Artaxerces II. frater, qui quatuor regnat annis, & moritur anno Christi 383. quem sequitur filius Sapor III. hic regnat quinque annis, & moritur anno Christi 388. Succedit Varanes IV. filius dictus Cermazat, qui regnat vndecim annis, & moritur anno Christi 399.

Izdegerdes filius Varanis Christianis plurimùm affectus constitutus est ab Arcadio Imperatore tutor Theodosij filij, regnat viginti & vno annis; quo tempore fides Christiana in Perside viguit: moritur anno Christi 421. relicto successore suo Varane V. filio, qui sæpe bellum & pacem cum Imperatoribus iniens viginti regnat annis: & moritur anno Christi 441. Izdegerdes filius Varanis, quem alij Varanem VI. nominant, septendecim regnat annis, & moritur anno Christi 458. Successit Perozes Dux eximius; plus generosus, quàm prudens: hic regnavit viginti annis, & in expeditione contra Hunnos deletò exercitu moritur anno Christi

478. illi successit Valens frater, qui pacificus quatuor regnat annis, & moritur anno Christi 482. huic successit Cabades, sine Cauades eius nepos, filius Perozis, qui ob tyrannidem à subditis deponitur, & subrogatur Zambases frater. Postea secundum aliquos Saha & Adaana: sed iterum vi thronum conscendens, regnat quadraginta & vno annis vsque ad annum Christi 532.

Chosroas I. inter Persas Patri Cabadi successit, & ad eius exemplum Romanis infensus ditionem eorum bellis infestat: sed à Iustiniano duce generali Tiberij Imperatoris victus, & à Perside pulsus, mœroréque confectus moritur anno Christi 580. post quadraginta octo annos Imperij. Illi successit Hormisdæ II. eius filius: sed ob nimiam crudelitatem à suis ducibus è sede deiicitur, & excæcatus carceri mancipatur, ac tandem iussu filij eius successoris, post octo regni annos, directè trucidatur anno Christi 588. Chosroas II. filius Hormisdæ cum Mauricio Imperatore pacem init: sed eo interfecto cōtra Phocam & Heraclium crudele bellum gessit, Syriam, Palæstinam, aliásque regiones Romani Imperij vsurpauit, captáque Ierosolima Crucem Christi in Persidem abstulit, Christianos dirè persecutus est: sed Deo vlciscente à Romanis ter debellatus fugit, ac tandem à proprio filio Siroë natu maiore occiditur, cum Medarse natu minore, quem regni successorem constituerat, post trigesimum octauum imperij annum, anno Christi 626.

Siroës filius Chosroæ & Mariæ filiæ Mauricij Imperatoris, pacem init cum Romanis, Crucem Christi, aliáque restituit, ad instantiã Heraclij baptizatur: cūque octo annis pacificè & iustè populum suum rexisset, moritur peste anno Christi 634. successit illi filius Adesir qui primo regni anno occiditur à Sarbaras, qui regnum vsurpat. Postea subintrat Siahriar qui statim occiditur. Deinde Chosroas filius Kobad, qui etiam breui trucidatur. Exinde succedit Baraina filia Chosroæ cum
filio

filio Bornaim. Post eos sequitur Hormisda III. quem sequitur alia Chosroæ filia nomine Azurmi cum fratre Ferochzad; sed secundo regni anno hic gladio, illa veneno perimitur. Tandem regnat Iesdagird, qui à Calipha Arabum, siue Saracenorum Omar victus occiditur anno Christi 632. Vnde regnum Persidis ad Saracenorum potestatem redactum est vsque ad annum Christi 1258. quo tempore à seruitute liberatum sub propriis Regibus floruit.

Haalon siue Hayton deuicto Calipha regnum Persidis armis conquirat, Babylonem destruit, captumque Calipham fame enecat: vxorem Christianam duxit nomine Doucoscaro è sanguine Magorum, qui Christum adorauerunt, oriundam, cuius suasu templa Mahometanorum destruit; auxiliariis armis Hayton Regis Armeniæ adiutus Mesopotamiam, & partem Syriæ conquirat: cumque maiora meditaretur; moritur anno Domini 1264.

Abaga filius Haalon patri successit, Sultatum Ægypti debellauit, & ex Armenia eiecit; dumque expeditionem in Syriam parat, à domesticis suis occiditur anno Christi 1285. regni vigesimo primo. Hinc successit filius Tangador, vocatus in baptismo Nicolaus: sed ad Mahometanam legem peruersus Mahamet vocatur, & Christianos maxima rabie persequitur, ipsumque fratrem Cobilam Christianum sibi contradicentem occidit, iussitque Argon filium Cobilæ nepotem suum trucidari: sed hic fauore populi ereptus, & ad regnum sublimatus, Tangadorem patrum anno Christi 1287. in pœnam scelerum trucidauit: & amicus Christianorum perseuerans moritur anno domini 1291. Regaytus frater Argon succedit; sed ob ignauiam & lasciuiam à suis strangulatur anno Christi 1295. & sufficitur Baydon eius consanguineus: hic fuit Christianæ legis zelator, sed breui à Cassan filio Argon occiditur: hic in re-

gnum succedens ciuitatem Damasci rebellem reduxit, ac Sultanum Ægypti è tota Syria expulit, rediènsque in Persidem moritur in ciuitate Casbin, & ad ciuitatem Tauris sepeliendus defertur anno Christi 1304. Deinde successerunt Cambaga, postea Carbandes frater Cassani, filius Christianæ mulieris, à qua baptizatus vocatur Nicolaus; sed mortua matre ad Mahometanos defleçit, filiúmque innominatum successorem reliquit, quem sequitur Gempsa Parthus.

Tamberlan siue Tamerlan anno Christi 1369. ad regnum comuni applausu populi propter insignes animi dotes assumitur: coacto ingenti exercitu immensas subiecit prouincias, cœpit Aleppum Damascum, Babylonem; Farachem Sultanum Ægypti debellat, & Baiazet Imperatorem Turcarum captiuum apud se retinet: ipsóque tanquam scabello pedum ad conscendendú equum usque ad eius mortem vititur: Tamerlan ex prosapia maiorum Kan Tartarorum oriundus dicitur: tandem plenus gloriâ decessit. Illi successit filius Tzochius siue Trochius, qui viginti duobus regnat annis. Postea sequitur Tzochius II. qui octodecim regnat annis: Tandem Trauires siue Trauises vltimus Rex ex prosapia Tartarorum post quem regnû Persarum occupat Vsumcassanus Turca, cui succedunt Iacuppus cognomento Chiotzeinal, Iulanerus, Baysingirus, Rustanus, Agniatus, Carabes, Acuantes usque ad annum Christi 1514.

Ismaël Sophi filius Xequé Aidar ex prosapia Aly nepótis & generi Mahometis anno 14. ætatis, & Christi 1500. patris mortem ulturus insequitur Fartok Yagat Regem Xyruan eius interfectorem, debellat & occidit, eiusque regnum inuadit: anno sequenti Ciuitatem Tauris occupat: deinde alias Persidis Ciuitates vt Shiras; anno verò Christi 1510. Babylonem, vulgò Bagdad capit, deinde Susam nunc Suster, totúmque regnum Kistân; anno sequenti regnum Vzbek & Korason acquirit:

quirit : tandem victoriis clarus moritur anno Christi 1524. ætatis 38.

Tahamas Patri Ismaëli successit eodem anno Christi 1524. & quinquaginta tribus annis regnans peruenit ad annum Christi 1576. hic contra Soliman Turcarum Imperatorem bellum gessit, postea cum eo pacem init. Eius filius Ismaël II. ei succedens vno tantum anno, & decem mensibus regnat. Mahamet eius frater & filius Tahamas, quamuis cæcus, imperat septem annis, & moritur anno Christi 1585. illi succedit Xa-Abbas, de quo supra dictum est, qui regnum optimis legibus muniens vndequaque dilatauit, multis adiunctis prouinciis & regnis vt Babylonis, Candar, & aliis; quibus nepoti suo ex primogenito, Xa-Sophi relictis moritur anno Christi 1628. hunc vltimum vidi, & dum redii è Perside, regnantem reliqui.

C A P V T IV.

De Monarchia Græcorum.

TERTIA mundi Monarchia fuit Græcorum ab Alexandro Magno Philippi Macedonum Regis filio inchoata anno mundi secundum aliquos 3620. secundum alios anno 3654. denique secundum alios anno 3724. Hic mortuo patre Rex effectus Ciuitates, prouincias & regna Græciæ arte vel armis primò sibi subiecit: deinde propriæ zelo gloriæ ad totius mundi Monarchiam adhuc iuuenis aspirauit; vnde cum vigesimum primum vix compleisset annum factis heroicis generosos quoscumque superauerat duces. Cùmque deuicto Persarum Monarcha Dario totius orbis potentissimo, omnia sibi facillè paritura & subiicienda præuideret: coacto electorum peditum triginta & quatuor millium, & paulò amplius quàm quatuor millium equitum exercitu per Hellespontum traiciens in Asiam

contra Darium perrexit.

Nouerat Darius ex rebus gestis, partisque victoriis Iuuenem Alexandrum, in cuius occursum misit Ducem cum valido exercitu; quem Alexander ad fluuium Granicum delet. His territis Darius ipse cum sexcentis millibus militum obuiam procedit: sed Alexander multò minori suo exercitu, sed disciplina militari instructo, præteritisque victoriis glorioso immensas inimici turmas undique obsidentes profligat: fugiensque Darius trecentorum rursus millium militum comparat exercitum; sed iterum ab Alexandro debellatus aufugit. Hac parta insigni victoria in Syriam rediit, Damascum, Gazam, Tyrum, totamque Ægyptum subiugauit: Alexandriam à se denominatam fundauit: hisque expletis cum iterum contra Darium procederet, fortuna votis eius secundante, proditione cuiusdam domestici eius occisum inuenit: proditorem punit, ipsumque Darium congruo Monarchæ sepelit apparatu. Totum pene Orientem usque ad Indias summa celeritate percurrrens suo adiicit imperio: sicque Tertiam Græcorum fundat Monarchiam spatio sex annorum, quam etiam sex aliis moderatus est annis. Tandem toto orbe celeberrimus vix attingens trigessimum quartum ætatis annum Babylone moriens; se hominem, non Deum esse agnouit.

Cum Alexander successorem competentis ætatis non haberet (Roxana siquidem filia Darij nondum pepererat, & Hercules adhuc puerulus erat) suis Principibus è Macedonia secum adductis Imperium in partes diuisit. Philippo fratri Macedoniam, totamque Græciam, quasi patrimonium concessit: Ptholomeo Ægyptum, Asiam minorem Antigono Syriam verò & Babyloniam Seleuco Nicanori, in quo eiusque successoribus, tanquam potentioribus Monarchiam Græcorum continuabimus. Hic deuicto Antigono, ac Demetrio eius filio se Syriæ, totiúsque Asiæ Regem nominat. Fuit filius Antiochi cuiusdam

quiusdam ducis Philippi Macedonum Regis, & Laodices: propterea in honorem patris sexdecim ædificauit Ciuitates sub nomine Antiochiæ, & quinque sub nomine Laodiceæ in honorem matris, & nomine suo nouem Seleucias. Tandem moritur trigesimo secundo regni sui anno.

Antiochus Soter siue Saluator patri successit qui nouercam Stratonicam à patre in uxorem obtinuit; cùmque viginti annis regnasset, moritur.

Antiochus per adulationem vocatus Deus alteri Antiocho patri successit, qui postquam annis quindecim regnasset ab uxore Laodicea perimitur veneno.

Seleucus Gallinicus filius Antiochi patri successit, & viginti regnat annis.

Seleucus Ceraunus filius Gallinici patri succedens tribus tantùm regnat annis.

Antiochus Magnus fratri Seleuco successit, Iudeam inuasit, Ptholomeum Philopatrem debellauit; sed à Romanis victus Asiam minorem amisit, moritur anno regni 47.

Seleucus Philopater Patri Antiocho successit: hic omnes sumptus pro templo Hierosolimitano è suis redditibus subministravit: duodecimo regni anno moritur.

Antiochus Epiphanes, siue illustris frater Seleuci, infensissimus Iudæorum inimicus, Synagogæ Antichristus, omnium mortalium pessimus totam Palæstinam bello & crudelitate deuastat; nece zelantes Iudæos perimit: sed execranda eius scelera & sacrilegia in libris Machabæorum descripta mors horrenda & funesta subsequuta est, quæ libro 2. cap. 9. distinctè & eleganter exprimitur: regnat annis vndecim.

Antiochus Eupator successit in regnum, quod duobus tantùm possidet annis.

Demetrius cognomento Soter, consobрино, vel ut alij dicunt patruo Antiocho successit; hic bellum in Iudæos

dæos continuans , misit contra eos Nicanorem & Bachidem duces , qui à Machabæis debellantur: in prælio victus occiditur anno regni decimo.

Alexander dictus nobilis Demetrio tyrannicè succedens aliquandiu pacificè vixit ; sed adueniente ab insula Creta Demetrio primogenito Demetrij Soteris , quinto sui regni anno turbatur , & septimo à Zabdiel Arabe occiditur.

Demetrius II. filius Demetrij Soteris quinto Alexandri anno ex parte regnare cœpit : sed mortuo Alexandro Syris inuisus fuit ; eo quòd militibus tantùm extraneis vteretur. Tandem Triphon , qui Alexandro adhæserat , hanc odij Syrorum in Demetrium occasionem captans , Antiochum Alexandri filium ex Arabia in Syriam adduxit : hoc à Syris in Regem admissò , Demetrius in Mesopotamiam fugit , vbi Dux Græcorum & Macedonum electus contra Mithridatem Parthorum Regem proficiscitur , à quo captus eius filiam postea in matrimonium duxit. Tribus tantùm annis regnavit.

Antiochus Alexandri filius vix regnare cœpit , cùm à Triphone eius tutore in via occiditur anno 142. ante Christum natum.

Triphon occiso Antiocho regnum tyrannicè occupat : sed ab alio Antiocho cognomento Sidete in ciuitate Apameæ occiditur post quartum regni annum 138. ante Christum natum.

Antiochus Sidetes , filius Demetrij Soteris , & frater Demetrij II. ad Thronum Syriæ sublimatur. Hic contra Phraatem Regem Parthorum bellum mouens Babylo-nem occupat ; sed postea in prælio victus occiditur anno regni nono & ante Christum natum 129. eique successit Demetrius frater , qui iterum regnans contra Ptholomeum Regem Ægypti bellum mouit ; sed rebellantibus suis à quodam Alexandro victus est , & à Tyri Governatore trucidatus quarto iterati regni anno ,
ante

ante Christum verò natum 124.

Alexander cognomento Zebenna vix duobus annis regnat: ab Anriochο enim Grypho è Throno deiicitur anno ante Christum natum 122.

Antiochus Gryphus, sic dictus ob nasum longum & aduncum, Demetrii I I. filius regnat, postquam veneni à matre oblari periculum euasit: octo annis pacificè viuit; sed postea ab Anriochο Cyziceno fratre eius vterino, ac filio Antiochi patrui, qui Cleopatram Ptholomei Regis Ægypti filiam vxorem duxerat, è regno deiicitur duodecimo eius anno, & ante Christum natum 112.

Anriochus Cyzicenus fratri succedens regnat octodecim annis: sed postea à Seleuco V. nepote suo, & Antiochi Griphi filio in prælio trucidatur anno ante Christum natum 94.

Seleucus V. in Thronum Syriæ sublimatus à conso-brino Antiocho Cyziceni filio dicto Eusebe expellitur, & fugitiuus in Cilicia occiditur: cùmque inter Antiochum, Philippum, & Demetrium Eusebis fratres bella sæuirent à Syriæ populis Tigranes Rex Armeniæ ad regnum aduocatur, qui octodecim annis pacificus imperat; sed à Lucullo victus eiicitur, & Antiochus filius Cyzicini Rex Syriæ ab ipso Lucullo creatur: sed postea à Pompeio magno deturbatur anno post fundatâ Græcorum Monarchiam 259 quæ tunc terminata fuit: nam Syria, quæ huius Monarchiæ sedes fuit, in prouinciam Imperij Romani redacta est. Non desunt tamen qui Monarchiam Græcorum post centum quadraginta nouem annos à fundatione terminatam fuisse dicant: cùm diminurâ eorum potentiâ Romani vbique potentes, Orientis regna sibi subiicientes, florere cœperunt; suæque Monarchiæ mundi quartæ, cæterarum præcedentium potentiissimæ fundamenta iecerunt.

CAP V T V.

De Monarchia Romanorum.

Romanorum Monarchia à paruis initiis ad summam breui peruenit gloriam. Incœpit anno ante Christi Domini natiuitatem 752. ædificata Roma à Romulo primo eius Rege; cui per raptum Sabinarum & vñionem populi Sabini stabilitæ & auctæ succedēs Numma Pompilius regnat 43. annos: Romulus autem regnauerat 38. Postea Tullus Hostilius regnat 32. Ancus Martius 24. Tarquinius Priscus 38. Seruius Tullius 44. Tarquinius superbus 25. Sed propter huius arrogantiam mutatum est regnum in Rempublicam, nunc sub Consulibus, nunc sub Dictatoribus, nunc sub Decemviris, nunc sub Tribunis militum & plebis florentem: quamuis interdum ciuilibus bellis agitatam.

Iulius Cæsar imperandi desiderio motus, post deuictas Gallias, Hispanias, aliasque prouincias; Lauris coronatus, & militum auxiliis fretus Romam ingreditur; animi magnitudine, & armorum timore omnia sibi subiicit, & tandem Imperator acclamatus Monarchiam restituit; quam pulso & debellato Pompeio eius competitorē stabilitam aliquot annis moderatur: sed in Senatu occisus ipsam Romanorum Monarchiam mundi quartam, Græcorum Monarchiæ succedentem, vix natam reliquit.

Succedit in Imperio Octauianus Augustus filius adoptiuus Iulij Cæsaris: hic Marcum Antonium navalī prælio superās omnes ab imperio tumultus remouet, ipsumque pacificè gubernat quinquaginta septem annis: cuius imperij quadragesimo secundo Iesus Christus æternus Deus, æternique Patris Filius mundum volens aduentu suo piissimo consecrare, de Spiritu Sancto conceptus in Bethleem Iudæ nascitur ex Maria Virgine factus homo:

de

de hoc Imperatore traditur quòd ipsa die natiuitatis Christi prohibuerit se vltra Dominum vocari.

Claudius Tiberius dictus Nero filius vxoris Augusti, postea eius gener & filius adoptiuus, epistolis Pilati de persona & doctrina Christi instructus, Christum inter alios Deos colendum Senatui proposuit, sed ipso recusante saltem sub pœna mortis sanciuuit, ne quis Christianos accusaret: meritò autem noluit verus Deus simul cum falsis adorari. 23. anno sui Imperij decessit & 39. Christi.

Caius Caligula filius Germanici & nepos Tiberij crudelis & lasciuus anno regni 4. & Christi 43. à suis custodiæ militibus occiditur.

Tiberius Claudius filius Drusi fratris Tiberij veneno perimitur ab vxore Agrippina filia Germanici anno Christi 56. & regni 13. dicitur esse natus Lugduni.

Domitius Nero filius Agrippinæ à Claudio adoptatus, Senecæ discipulus; in principio Clemens & bonus; deinde lasciuus, & crudelissimus occidit sanctos Apostolos Petrum & Paulum, Senecam magistrum, Amitam, coniugem Octauiam, matrem Agrippinam, & seipsum; ne decretam sibi à Senatu pœnam incurreret anno Christi 70. regni 14. Sergius Galba ex nobili Sulpiciorum prosapia, à suis militibus Imperator proclamatus, ab iisdem crudeliter occiditur septimo post mense.

M. Siluius Otho post trium mensium spatium seipsum occidit.

Aulus Vitellius post octo luxuræ potius, quàm regni menses ab inimicis captus, manibus retro ligatis, inserto fune collo per urbem tractus & occisus proicitur in Tiberim.

Flauus Vespasianus, dum bello Iudaico occupatur, Imperator à militibus ob eximias animi dotes eligitur; cum multa præclare gessisset, dum fluxu ventris ad mor-

tem laboraret, è lecto surgit asserens Imperatorem creatum, non iacentem debere mori unde decessit anno Christi 81. Imperij. 10.

Titus Vespasiani filius captâ Hierosolimâ, & universâ Iudeâ, cum patre triumphat; electus Imperator virtutibus maximè benignitatis & castitatis clarus, deliciæ generis humani vocabatur; cum omnium lacrimis anno Christi 83. Imperij 3. veneno, ut creditur, à fratre perimitur.

Domitianus filius Vespasiani, & frater Titi in principio pudicus & clemens: postea lascivus & crudelissimus plures nobiles exilio multavit, maximè Christianos, & inter ipsos sanctum Ioannem Evangelistam in Paphos insula, & Flaviâ Domitillam in insula Pontia: ita fuit superbus & arrogans, ut nomen Dei sibi attribui, & statuas erigi iusserit: sed ob nimiam crudelitatem occisus est, eiusque edicta à Senatu rescissa anno Christi 98. Imperij 15.

Nerva Cocceius à Senatu & militibus electus, fuit optimus Princeps, in pauperes misericors: in successorem adoptavit M. Vlpium Traianum Hispanum ut pote benemeritum: febre moritur anno Christi 100. Imperij. 2.

Traianus Phutarchi historici & Philosophi discipulus, ad instantiam Senatus movit persecutionem in Christianos, quam postea sedavit moritur morte repentina anno Christi 119. Imperij 19. ætatis 64. eâ fuit bonitatis opinione, ut acclamatio Principum esset, sis foelicior Augusto & melior Traiano.

P. Ælius Hadrianus industrius in armis, Græcæ & latinæ linguæ peritissimus; optimus Astrologus, Geometra, Musicus, Poëta, Medicus, Pictor, & Sculptor: foelicissimæ quidem memoriæ, sed animi invidi, lascivi, & iactabundi; vel adoptione, vel industria Traiano succedens primò crudeliter insequitur Christianos,

& sine iudicio ad solum populi clamorem occidit, & inter eos sanctū Eustachium cum vxore, & filiis: sed apologiis Quadrati & Aristidis in fauorem Christianorum motus aliquantum mitescit: infirmus sæpe venenum à Medicis & à domesticis expostulabat: moritur anno Christi 140. Imperij 21. ætatis 62.

Antoninus filius Hadriani adoptiuus, ob mansuetudinem & vitæ integritatem Senatus autoritate cognominatus Pius libro S. Iustini Philosophi persuasus Christianos pacificè permisit viuere: sed crescentibus calumniis aduersus eos motus, missis ad Præsidentes Asiæ epistolis exterminare voluit: moritur anno Christi 163. Imperij 23.

Marcus Aurelius, & Lucius Verus fratres ab Antonino adoptati, diuersimode viuunt, Lucius Verus quasi alter Nero lasciuus & impudicus, apoplexia oppressus moritur anno Christi 172. Imperij 9. sed Marcus Aurelius Philosophus Stoicus, ob modestiam & iustitiam vocatus defensor Vniuersi, Verissimus, & speculum virtutum maximo Senatus & populi mœtore moritur anno Christi 182. Imperij 19. pestilentia sublatu.

Commodus Marci Aurelij filius, sed ei dissimilis; nam crudelissimus, impudicus, & adeò superbus extitit, vt nomen patris dedignans vocari voluerit Hercules Romanus Iouis filius: cū venenum ab Ælio Læto & Martia concubina paratum euitasset, à Narcisso strangulatus, Senatus decreto raptatus per Urbem proiicitur in Tiberim anno Christi 195. Imperij. 13.

Ælius pertinax, à militibus consentiente Senatu, ab iisdem octuagesima secunda sui Imperij die, anno Christi 195. occiditur: quia restitutionem Reipublicæ moliebatur.

Didius Iulianus Imperium à militibus emit, à quibus sexagesima sexta post die trucidatur.

Seuerus Carnoti in Gallia ab exercitu Imperator

M

creatus

creatus, à Senatu acceptatur, Albinum Cæsarem declarat, contra Pescennium in Syria rebellem armatus incedit, ipsum occidit anno Christi 197. & similiter occidit Albinum anno 199. tunc etiam rebellem, in cuius locum Cæsarem creat Bassianum Antoninum suum primogenitum. In Anglia non tam morbo, quàm in cœrore confectus decessit anno Christi 213. Imperij 17.

Antoninus Caracalla filius Seueri, simul cum fratre Geta imperat, ipsum paulò post occidit, magiæ vacat arti, & à Martiano centurione ad sollicitationem Marcini Mauri Cæsariensis pugionibus trucidatur, anno Christi 218. Imperij. 6.

Macrinus à militibus creatus Imperator cum filio Diodumene ob crudelitatem occiditur anno Christi 219. Imperij reuoluto anno & duobus mensibus.

Marcus Aurelius Antoninus filius Caracallæ dictus Heliogabalus ab exercitu proclamatus Imperator, ob effrenatam impudicitiam, Senatui, populo Romano, & militibus execrandus occiditur, & per urbem tractus in Tiberim proiicitur, anno Christi 244. Imperij 4. ætatis 18.

Alexander 16. ætatis anno creatur Imperator, ipse à matre affecta religioni Christianæ, & inter Christianos educatus, ipsos pacificè viuere permisit, & Christum peculiari cultu simul cum falsis Diis venerabatur; sed suorum consiliis animum mutat, & Christianos vexat, deuicto Persarum Rege Artaxerxe insolente, & pacis contemptore, Romam reuersus triumphat: sed in expeditione Germanica fraude Maximini Moguntia occiditur cum Mammea matre anno Christi 237. Imperij 13.

Maximinus Imperator in Germania proclamatus, Christianorum persecutor, ab obsidione Aquileæ recedens, ob barbaram crudelitatem à militibus simul cum filio occiditur anno Christi 240. Imperij 3. simulque à mili

militibus occiduntur Maximus Pupienus, & Cælius Balbinus, qui contra eorum beneplacitum imperium vſurpauerant.

Gordianus ætatis 16. anno creatur Imperator; cui ad instantiam militum associatur Philippus; à quibus ipſe Gordianus occiditur anno Christi 246. Imperij 6.

Philippus eodem anno factus Imperator filium etiam Philippum ſequenti anno denominat Augustum: anno verò 249. vterque Christianus effectus leges sanctiſſimas condunt, & piſſimè viuunt: ſed poſtea Pater Veronæ, filius autem Romæ occiduntur anno Christi 253. Imperij 7. dolo Decij.

Decius ex Pannonia oriundus factus Imperator filium item Decium Cæſarem creat, Christianos crudeliter perſequitur: ſed Deo ſuos vlcifcente in bello Gothico, dolo Galli cum filio occiditur anno Christi 254. Imperij 2.

Gallus Imperium inuadit, filium Voluſianum creat Augustum: in principio reddit pacem Eccleſiæ, ſed ſecundo anno perſecutionem renouat, in cuius pœnandū contra Æmilianum Imperatorem proclamatum procedit, à militibus cum filio trucidatur, & quatuor poſt menſibus trucidatur etiam ipſe Æmilianus anno Christi 257. Imperij 3.

Valerianus, & Gallienus eius filius ad Imperium promouentur: Valerianus in principio Christianis affectus in omnibus proſperatur, poſtea eos perſequens ad extremas redigitur anguſtias: nam fraude Macriani Ducis à Sapore Perſarum Rege cāpitur, ei tanquam ſcabellum deferuit ad aſcendendum equum tandem pelle detracta ſale conditur. Gallienus autem ſimul cum fratre Valeriano iuniore & filiis Mediolani occiditur à militibus ſub Duce Cectopio, ſuaſu Flauij Claudij anno Christi 269. Imperij 12.

Flauius Claudius comuni Senatus applauſu electus;

dum Christianos persequitur, pestilentia perimitur anno Christi 271. Imperij 3.

Quintillus frater Claudij vix Imperator creatus à militibus, ob nimiam grauitatem & seueritatem in ipsos 17. die Imperij trucidatur.

Domitius Val. Aurelianus ex vili prosapia natus, à militibus creatur Imperator, persecutionem in Christianos subscripturus brachij immobilitate plectitur, Orientis rebelles imperio restituit, murorum Romæ circuitum ampliavit: tandem à suis occiditur anno Domini 278. Imperij 7.

Tacitus transactis circiter 6. mensibus Imperator à Senatu declaratur: persecutionem Christianorum extinxit, & nominato fratre Floriano successore, sexto Imperij mense decessit: eius successor duobus post mensibus à militibus necatur anno Domini 279.

M. Aurelius Valerius Probus, ad votum Senatus, & populi petitionem in Oriente à militibus proclamatus, Gallias à Germanis potenti exercitu liberat, cæsis quadringentis millibus ipsorum; dum se accingit bello Persico, à suis militibus occiditur, & honorifico sepulchro sepelitur anno Christi 283. Imperij 5.

M. Aurelius Carus à militibus creatus Imperator, filios Carinum & Numerianum Cæsares declarat, Christianis fauit; in expeditione belli Persici, vel morbo, vel fulgure, vt dicunt aliqui, moritur anno Christi 284. Imperij 1.

Carinus imperat in Occidente & Numerianus in Oriente, vix vno anno à morte patris; hic à socero Apro occisus, ille à Diocletiano.

Aurelius Valer. Diocletianus Dalmata, ab exercitu declaratus Imperator & cognominatus Iouius. M. Valerium Maximianum dictum Herculeum sibi in throno Imperiali sociavit; hic Constantium Chlorum, ille Galerium Maximianum dictum Armentarium Cæsares creant:

creant: hi sæniſſimam ſupra prædeceſſores excitant in Chriſtianos perſecutionem; aſſerunt ſcriptores tertiam generis humani partem; vel gladio, vel peſtilentia periſſe: hi poſt triumphum de Perſis, & Parthis, cum viderent Chriſtianorum nomen & genus extingui non poſſe tot perſecutionibus, at potius creſcere, mœrore & rabie ſe imperio abdicantes vitam priuatam degunt, & finiunt miſerrimè: Diocletianus factus amens & diuturno langore tabeſcens cum prius ſe tanquam Deum adorari præcepiſſet. Maximianus laqueo ſe ſuspendens anno Chriſti 304. Imperij 20.

Constantius Chlorus Diocletiano in Oriente, & Galerius Maximiano in Occidente ſuccedunt. Primus fuit vir optimus & humaniſſimus, moritur Eboraci in Anglia anno Chriſti 306. Imperij 2. relicto Constantino ſuo ex Helena filio. Secundus impiſſimus non ſolum fouet, ſed auget perſecutionem, Maximinum & Seuerum Cæſares in Oriente dominaturos creat: mortuo Seuero Licinium ſubſtituit: tandem in pœnam ſcelerum, graui & horribili morbo percuſſus, hæc à Deo eſſe intelligens, perſecutionem ſedat, Chriſtianos ritus permittit, quorum precibus à morbo liberatus poſtea moritur anno Chriſti 311. Imperij 7.

Constantinus Magnus anno Chriſti 306. ætatis 31. Imperium capeſcit, Fauſtam Maximiani Herculij filiam in matrimonium duxit; dum bellum in Maxentium mouet, viſo Crucis ſigno in aëre cum hac inſcriptione *in hoc ſigno vinces* & apparente noctu ſibi Chriſto, ad eius mandatum ſignum Crucis in vexillo, & galea imprimit, quo proteſtus Maxentium, & poſtea Licinium vincit & occidit: anno Chriſti 324. mirabili apparitione ſanctorum Petri & Pauli conuerſus baptizatur à ſancto Silueſtro Pontifice, & à lepra liberatur: relicta Pontifici Roma ſedem Imperij Biſantium tranſtulit, eamque ciuitatem magniſcentiſſimè ornatam ſuo no-

mine insigniens Constantinopolim vocat : post innumera pietatis opera Nicomediæ moritur anno Christi 337. Imperij 31. ætatis 65.

Constantinus I I. Constantius ; & Constans fratres, Constantini magni filij iuxta patris testamentum sibi diuidunt Imperium, Constantinus non contentus Gallia, Hispania, & Anglia ; dum fratris Constantis limites ingreditur, ab eius militibus occiditur anno Christi 340. Imperij 3. Constans etiam Augustoduni à Magnentio occiditur anno Christi 350. Imperij 13. Constantius relictus solus Catholicos persequens fauit Arrianis : sed pœnitens, vt aliqui dicunt ; moritur anno Christi 361. Imperij 14.

Julianus dictus Apostata, quia relictâ Christi fide Christianos omnibus modis persequens, Deorum cultum restituere conatur : dum in Persas bellum parat, voto se diis astringit Christianos sacrificaturum ; si inde victor & triumphans redeat : sed mirabili Dei prouidentia, lanceâ vulneratus diffluentem sanguinem manu receptum in aëra sparsisse dicitur, hæc verba rabidè pronuntians : *Vicisti Galilæe, Vicisti* : hoc nomine Christum in dedecus nominabat ; hoc vulnere moritur anno Domini 363. Imperij 2.

Iouianus ex Pannonia oriundus ab exercitu Imperator electus, clausis idolorum templis Christianam religionem in pristinum decorem restituit : dum Antiochia Constantinopolim proficiscitur, morte repentina decedit nondum expleto octauo Imperij mense, ætatis anno 33. Christi vero 364.

Valentinianus ex Pannonia similiter oriundus, communi consensu ei subrogatur. Hic in præmium pietatis, virtutis, & exilij pro Christi nomine sub Iuliano tolerati, ad Imperij dignitatem peruenit ; fratrem Valentem Augustum declarans consortem Imperij creat : ipse Valentinianus, etsi Catholicus, vxoris & fratris precibus

bus Arrianis fauet, & moritur sanguinis vomitu anno Christi 375. Imperij II. Valens autem in principio Catholicus, postea Artianus Catholicos dirè persequitur, & moritur anno Christi 378. Imperij 15. ætatis 50. à Gothis vulneratus, & viuis combustus.

Gratianus filius Valentiniani tribus annis cum Valente patruo imperat: decreuit, vt frater suus Valentinianus Iunior vix quatuor annorum ætatis Augustus nominetur: cum in Gallias venisset, Theodosium Hispanum Imperatorem Orientis creat, & tandem prodicione sui exercitus occiditur anno Christi 383. Imperij 8 ætatis 28.

Valentinianus II. simul cum Theodosio imperat, Lugduni insidiis Comitæ Arbogasti occiditur anno Christi 392. Imperij 9. ætatis 21. eius corpus cum dedecore suspenditur, sed Mediolanum postea translatum honorificè à sancto Ambrosio sepelitur, facta ad eius & Gratiani fratris honorem panegiri.

Theodosius remanens solus imperat vsque ad annum Christi 395. tunc enim pietate conspicuus, rebus præclare gestis contra Paganismum & hæreses, meritisque plenus moritur Mediolani anno ætatis 50. Imperij 16.

Arcadius & honorius Theodosij filii post mortem patris: hic puer 10. annorum in Occidente: ille 20. in Oriente imperant, in omnibus pietatis operibus maxime zelo Catholicæ fidei contra Paganos, Iudæos, & Hæreticos patrem imitati. Arcadius moritur anno Christi 408. Imperij 13. Honorius autem Romæ moritur anno Christi 423. Imperij 28.

Theodosius II. filius Arcadij, cum post mortem patris imperasset in Oriente, imperante Honorio patruo in Occidente, vsque ad annum Christi 423. imperat cum Valentiniano III. filio Honorij germano suo, quem anno Christi 425. Augustum nominat, mortuo Ioanne tyranno, qui inuaserat imperium Occidentis, sub ipso

celebratum fuit Concilium Ephesinum, cui ex mandato Celestini Pontificis præfuit noster S. Cyrillus Patriarcha Alexandrinus, in quo condemnato Hæresiarcha Nestorio; Decretum est B.V. Mariam esse Dei matrem; moritur anno Christi 449. secundum aliquos infirmitate, secundum alios cadens ex equo inter venandum, secundum alios in flumine suffocatus, Imperij 41: Huic succedit Marcianus vir prudens, generosus, & continens, quem Pulcheria Augusta ex consilio Theodosij fratris sui in maritum assumpsit sponcione facta quodd ipsa virginitatem Deo promissam illibatam seruaret.

Valentinianus III. Imperium cum Marciano regens, in principio benè vixit, & Ecclesiæ fauit: sed postea ipsam oppressit, & magia vsus est ad oppugnandam mulierum castitatem: in quorum scelerum poenam ab Attila Gothorum Rege vexatur, & ni Deus misso in Attilæ occursum sancto Leone prouidisset, fuisset Imperio priuatus; tandem occiditur dolo Maximi, qui Imperium inuadit ducta in matrimonium Eudoxia Valentiniani vidua; quæ cum à secundo marito didicisset ipsum esse interfectorem primi vocat ex Africa Gensericum vindictæ causa, quem fugiens Maximus secundo Imperij mense à populo Romano lapidatur: cui successit Auitus ex Aluernia oriundus, contra suam voluntatem proclamatus: propterea Placentiæ breui se abdicat Imperio anno Christi 456.

Marcianus, qui iam ab anno Christi 449. imperare cœperat in Oriente, anno 451. ad extinguendas hæreses maxime Entichetis & Dioscori, supplicibus epistolis obtinuit à sancto Leone Papa celebrationem Concilij Chalcedonensis: multa alia ad bonum Ecclesiæ sanciuir, & tandem bonis operibus plenus moritur anno Christi 457. Imperij 6. nullus Imperatorum, excepto Constantino, huic præfertur; licet Armeni de eo, utpote

pote ipsorum erroribus contrario, conquerantur.

Leo dictus Magnus ex Thracia oriundus, Senatus beneplacito ad Imperium electus, Maiorianum Ducem exercitus Imperatorem Occidentis declarat; sed hoc veneno pereunte, Anthemium subrogat: huic etiam violenter extincto succedit Olybrius, postea Glycerius: ipse Leo in omnibus laudabilis, nisi erga hæreticos fuisset indulgentior, declarat Leonem ex Ariadna nepotem, Zenonis filium Augustum & successorem: moritur anno Christi 474. Imperij 18.

Zenon Isaurus filij tutor, & Imperij administrator, post filij mortem vsurpat Imperium: erat prauus moribus, & hæreticorum fautor: à Basilisco Leonis magni cognato priuatur Imperio: sed hoc capto & in exilium pulso, iterum capescit Imperium, quod regit vsque ad annum Christi 491. in quo moritur morbo caduco. Tempore ipsius Iulius nepos, tonsus & in Episcopum consecrato Glycerio Imperium Occidentis vsurpat: sed ab Oreste duce exercitus eiectus fugit in Dalmatiam succedente Momilio Orestis filio dicto Augustulo: sed hoc etiam in exilium pulso Odoacer Arrianus nomen Imperatoris in occidente extinguens Italiam inuadit, & sub nomine Regis possidens, non multò post à Theodorico item Arriano occiditur.

Anastasius auxilio Ariadnæ Zenonis viduæ eidem Zenoni sufficitur, contradicente Euphemio Episcopo Constantinopolitano, qui eum noluit coronari; donec Concilium Chalcedonense approbauerit, & professionem fidei Catholicæ emiseric. Hic benè vixerat vita priuata, & in principio Imperij; sed omninò mutatus omnia peruertit, hæreticis fauit, & apertè Catholicos persecutus est anno 494. contemnensque salutaria monita summorum Pontificum Gelasij, Anastasij, & Symmachi, ab eodem Symmacho excommunicationis fulmine percussus anno 502. materiali ful-

mine consumitur anno Christi 518. Imperij 27.

Iustinus ex Thracia oriundus, à Senatu & exercitu ab aratro ad Imperium eleuatur; fuit vir optimus, Catholicæ fidei affectus, hæreticorum hostis acerrimus, erga summum Pontificem obsequentissimus: post multa præclare gesta moritur anno Christi 527. Imperij 9.

Iustinianus Iustini ex sorore nepos, prius ab illo Cæsar nominatus, Imperium regit: eius principia pietate Catholica, & virtutibus admiranda relucet: vnde sub Dei protectione constitutus multas referens victorias maximè de Cabade Persarum Rege, florens regit Imperium, delectis decem Iurisperitis, maximè Triboniano Ethnico, Codicem ex Gregoriano, Hermogeniano, & Theodosiano congestum, propter nouas constitutiones ab ipso additas Iustinianum vocat; Ecclesiam sanctæ Sophiæ magnificentissimam Constantinopoli ædificauit: sed à tam faustis principiis recedens, ob hæreticorum familiaritatem, & nimiam in rebus fidei propria authoritate determinandis temeritatem, anno 563. labitur in hæresim, Catholicos; imò Summos Pontifices persequitur: in cuius impietatis vindictam morte repentina decedit anno Christi 565. Imperij 38.

Iustinus II. dictus Iuuenis, Iustiniani ex sorore Vigilantia nepos, licet pietati & fidei Catholicæ plurimum affectus appareret: corruptis tamen erat moribus: fasci-natus à Magis, applicato sibi freno, in quo erat clauus Christi, miraculosè sanatur. Anno Christi 578. in Collegam assumit Imperij Tiberium: moritur anno 582. Imperij 17.

Tiberius solus imperans multis bonis operibus, præsertim misericordia in pauperes, & insigni pietate celebratur: moritur anno Christi 586. Imperij 4.

Mauricius gener Tiberij, dum religiosè viuit, & fidem Catholicam defendit, cum filiis à Phoca trucidatur

cidatur anno Christi 602. Imperij 6.

Phocas aliqua præclarè gessit, confessionem fidei Catholicæ ad Pontificem Romanum misit, Episcopum Constantinopolitanum vniuersalis nomen usurpantem coërcuit, asserens hoc nomen soli Romano conuenire, Pantheon Bonifacio IV. in honorem Beatissimæ Virg. & martyrum dedicandum concessit: sed postea à recta via declinans, à Photino, cuius vxorem constuprarat, propter impudicitiam, & tyrannidem veste imperiali denudatur, & lugubribus indutus ad Heraclium ducitur, à quo manibus & pedibus, deinde humeris & pudendis, denique capite truncatur, fratribus & sanguineis eius simul extinctis anno Christi 610. Imperij 8.

Heraclius à Sergio Patriarcha simul cum vxore, mutato de Fabia in Eudociam nomine, Constantinopoli coronatur: ad Bellum contra Persas procedens plus Deo, quàm armis confidens triplici victoria Cosroem debellatum fugat, crucem Christi in Persidem delatam à Syroë filio Cosroës recuperat, ipsamque baiulans abiectis imperialibus ornamentis facilè ad montem Caluarium refert, cum prius ornatus progredi non posset: sed in Edessa ciuitate ab Anastasio Iacobita, Sergio Patriarcha Constantinopolitano Monothelita, & Cyro item Patriarcha Alexandrino peruersus cadit in hæresim, & postmodum afflictus animi mœnore, & variis morbis consumptus moritur anno Christi 641. Imperij 31.

Constantinus III. Patri Heraclio succedens, tum in Imperio, tum in miseriis; quarto post mense à nouerca Martina Augusta veneno necatur.

Heracleonas filius Martinæ Augustæ, matris industria, & Pyrrhi Patriarchæ Constantinopolitani fauore ad thronum sublimatur; sed rebellante Senatu inde deiectus, præciso ipsi naso, & amputata matri lingua
sexto

sexto Imperij mense eiicitur in exilium.

Constans II. Constantini filius à Senatu proclamatur Imperator Monothelitis fauens Romæ condemnatur : cumque fratrem Theodosium Diaconum occidisset , ipse Siraculis in Sicilia occiditur anno Christi 668. Imperij 4.

Constantinus IV. Constantis filius , occiso Mezentio Armeno Imperij inuasore, Catholicè viuit, & summis Pontificibus obsequentissimus moritur anno Christi 685. Imperij 17.

Iustinianus II. filius Constantini in principio Catholicus, lapsus postea in hæresim persequitur Sergium Pontificem, & Ecclesiam Romanam ; in cuius sceleris pœnam nasi præcisione , & exilio mulctatur à Leontio anno Christi 694. Imperij 9.

Leontius hæreticus primo anno pacificè imperat: sed tertio mota seditione deturbatur, & præciso naso in monasterium includitur anno Christi 697.

Tiberius III. qui prius dicebatur Abûmarus, Ecclesiam Romanam , & Pontificem Ioannem VI. persequitur : sed Deo vindice ab Imperio deiicitur , & occiditur à Iustiniano II. qui Trebellij Bulgarorum Regis auxilio potens Imperium recuperat , anno Christi 703. in quo sælicius vixit vsque ad annum 710. quia melior effectus erga Summum Pontificem fuit obsequentissimus.

Philippicus, dictus Bardanes , hæreticus imperat vsque ad annum Christi 713. tunc enim 3. Imperij exæcatus exilio mulctatur.

Anastasius II. Catholicus dictus Artemius vno tantum anno imperat, & ab exercitu deponitur anno Christi 714.

Theodosius III. Catholicus permisit Anastasio in statu monachali vivere , ipsèque pacis amore se abdicat Imperio anno Christi 716.

Leo Isauricus III. primo Catholicus , deinde anno 723. Iconoclastis adhærens, in odium sanctarum imaginum Catholicos persequitur : sed moritur anno Christi 741. Imperij 25.

Constantinus V. Leonis filius dictus Copronymus, patrem impietate , luxuria , & crudelitate , & odio in sanctissimam Virginem superans , miserrimè moritur anno Christi 775. Imperij 34, clamans se flammis æternis damnari propter Mariam; quam vt Dei Matrem venerandam asserit.

Leo IV. Constantini filius, patris exhortatione proficiens, in principio Beatissimam Virginem , & monachos coluit : sed præteritis patris exemplis Ecclesiam persequitur , & imagines sanctas destruit: tandem anno Christi 780. Imperij 5. miserè perit.

Constantinus VI. Leonis filius, cum matre Irene Augusta, pietate plena imperat , & pacem Ecclesiæ reddit: sed anno 790. matrem abiiciens solus regnat , & anno 797. excæcatur ac occiditur. Sanctissima Irene Imperium prosequitur vsque ad annum 802. tunc à Nicephoro in exilium acta, in monasterio recluditur, vbi sequenti anno mœrore confecta moritur : ipsa imperante Carolus Magnus Galliarum Rex in præmium tot bonorū operum, & maximè pietatis ac protectionis Apostolicæ Sedis , à Leone III. Summo Pontifice (quem anno præcedenti vexatum honorificè susceperat) anno Christi 800. die Natiuitatis Domini creatus Occidentis Imperator , in Ecclesia sancti Petri solemniter coronatur : cui postea filius, & nepotes in hac dignitate successerunt.

Nicephorus se Catholicum fingens , Manicheis & Iconoclastis fauet , ac Ecclesiæ Catholicæ contrariatur: occiditur anno Christi 811. Imperij 9.

Stauratius Nicephori filius, simul cum patre grauius læsus, duobus tantum mēsis illi superstes imperat.

Michaël

Michaël dictus Curopalata, cognatus Stauratij professione fidei ad Leonem III. Pontificem, & Legatos ad Carolum Magnum mittit : anno Christi 813. & Imperij 2. se sponte sceptro abdicat.

Leo V. dictus Armenus, magnus Iconoclasta, & Catholicorum persecutor anno Christi 820. & Imperij 7. occiditur.

Michaël dictus Balbus eadem hæresi infectus, inter alia scelera hoc sacrilegium commisit, quod Euphrosinam Monialem Constantini filiam in matrimonium duxit: moritur anno Christi 829. Imperij 9.

Theophilus filius Michaëlis etiam Iconoclasta, inter alia bona opera Euphrosinam nouercam suam monasterio restituit : precibus Imperatricis piissimæ vxoris suæ, pœnitentia Deo & Ecclesiæ reconciliatus obiit anno Christi 842. Imperij 13.

Michaël II. filius Theophili simul cum matre Theodora imperat : hæc coacto Constantinopoli concilio Iconoclastas damnari procurat; filius autem vitiiis mancipatus, vt liberius viuat, matrem monasterio recludit anno Christi 855. vbi paulò post moritur ; ipse autem ebrius occiditur anno Christi 867. Imperij 25.

Basilus Macedo à Michaële adoptatus, & creatus Imperator, qui & eius fuit interfector, moritur anno Christi 886. Imperij 9.

Leo VI. filius Basilij secundogenitus, dictus Philosophus, qui iam ab anno 870. coronatus fuerat, verè pius fluxu ventris moritur anno Christi 911. In Occidente Carolo Magno succedit anno 814. Ludouicus pius eius filius qui moritur anno Christi 840. Deinde Lotharius Ludouici primogenitus, à quo Lotharingia denominatur, qui monachus effectus anno Christi 855. Imperij 15. eodem anno moritur. Cui successère Ludouicus II. vsque ad annum Christi 875. Deinde Carolus II. dictus Caluus qui ab Hebræo Medico veneno

no perimitur anno Christi 877. Ludouicus III. dictus Balbus, qui moritur anno Christi 879. Carolus III. dictus Crassus Romæ coronatus, quo mortuo Imperium Occidentis fuit à regno Galliæ diuisum anno Christi 888. prædictis Imperatoribus Gallis successerunt Guido & Arnulphus simul imperantes, quibus è vita sublati anno 899. post longam altercationem sufficitur Ludouicus IV. sed hic anno 904. à Berengario tyranno oculis & imperio priuatur.

Alexander II. frater Leonis & Constantinus VII. eiusdem Leonis filius adhuc paruulus imperant: ex quibus Alexander moritur anno Christi 912. Constantinus autem assumpto prius in Collegam, postea reiecto Romano patricio, vel morbo, vel veneno moritur anno Christi 960. Imperij 49.

Romanus coronato Basilio filio moritur anno Christi 963. Imperij 3.

Nicephorus Phocas ab exercitu proclamatus Imperator occiditur anno Christi 969. Imperij 6.

Ioannes Zemiscas electus Imperator veneno moritur anno Christi 974. Imperij 5.

Basilus, & Constantinus VII I. filij Romani simul imperarunt vsque ad annum Christi 1025. quo morte repentina moritur Basilus: Constantinus autem moritur anno Christi 1028. Imperij 54. In occidente Ludouico I V. successit Lambertus filius Guidonis à Formoso coronatus moritur anno 910. Berengarius à Ioanne X. coronatus à suis occiditur anno 924. Otto I. dictus Magnus moritur in Saxonia anno 973. aliqui ante Ottonem ponunt Conradum I. & Henricum I. postea succedere Otto II. & Otto III.

Romanus Argyrophylus, dolo Zoë vxoris adulteræ, moritur laqueo suffocatus anno Christi 1034. Imper. 6.

Michaël I V. ex Paphlagonia Romani interfectior, ex
auri

aurifabro ad Imperium assumptus, in pœnam homicidij & adulterij, à dæmone possidetur, & sic vexatus moritur anno Christi 1041. Imperij 7.

Michaël V. dictus Calaphates à Zoë Imperatrice adoptatus, & coronatus Imperator maximum ingrati animi signum edidit: nam Zoëm suam benefactricem in exilium actam monasterio recludit: quod factum sic populo displicuit, vt ipsum lapidibus appetierit, & excæcarit, reuocando ad Imperium Zoëm, & sororem eius Theodoram monialem.

Constantinus IX. dictus Monomachus, ducta in matrimonium Zoë, coronatur Imperator, & moritur anno Christi 1054. Imperij 12. cui superstes Theodora Zoë soror imperat vsque ad annum Christi 1056. in quo moritur.

Michaël VI. dictus Stratonicus succedens, anno sequenti renuntiat Imperio.

Isaac Comnenus subintrat, sed duobus post annis, monachalem habitum præferens purpuræ, Imperium relinquit anno Christi 1059.

Constantinus X. nominatus Ducas electus Imperator, moritur anno Christi 1067. Imperij 8. tribus filiis relictis sub tutela Eudoxiæ matris.

Romanus Diogenes ducens in matrimonium Eudoxiam declaratur Imperator; sed captus fuit à Turcis anno Christi 1071. Imperij 3.

Michaël VII. vocatus Ducas filius Constantini priuatur Imperio anno Christi 1078. Imperij 7.

Nicephorus III. dictus Botaniates Imperio item priuatur anno Christi 1080. & in monasterio recluditur.

Alexius I. Comnenus succedens, moritur anno Christi 1118. Imperij 38. In Occidente S. Henricus nomine I. succedens Ottoni III. anno Christi 1014. perpetuam cum S. Chunegonde coniuge seruat virginitatem, &

S. Ste

S. Stephanum Regem Pannoniæ cum regno conuertit: moritur anno Christi 1024. illi succedere anno 1027. Conradus (nam vacauerat Imperium tribus annis) hic moritur morte repentina anno Christi 1039. Imperium vacat vsque ad annum 1046. Henricus II. filius Conradi moritur anno Christi 1056. vacat Imperium 27. annis; vnde anno 1084. electus Henricus III. imperat, & repentinè moritur anno Christi 1106.

Ioannes Comnenus filius Alexij primogenitus, patri immediatè succedens moritur anno Christi 1143. Imperij 25.

Emmanuel Comnenus filius Ioannis Imperat 38. & anno Christi 1180. moritur in habitu monachali in signum publicæ pœnitentiæ.

Alexius II. Comnenus Porphyrogenitus à Tyranno Andronico nocte strangulatur anno Christi 1183. Imperij 3.

Andronicus Imperium inuadit: sed iusto Dei iudicio, & Imperio & vita priuatur duobus post annis; anno scilicet Christi 1185.

Isaac dictus Angelus inuasor Imperij, à fratre carceri mancipatus è Throno deturbatur anno Christi 1195. Imperij. 10.

Alexius III. Cognomento Angelus, item tyrannus, ab Alexio Isaaci filio deiicitur anno Christi 1203. Imperij 8. In occidente Henricus IV. incipit imperare anno 1111. (sedes enim imperialis 5. annis vacauit) & nullis susceptis filiis maribus moritur anno Christi 1125. Imperij 14. huic septem post annis successit Lotharius II. anno Christi 1133. & anno 1138. Imperij 5. moritur anno sequenti succedit non vt Imperator, sed vt Rex Romanorum Conradus II. & anno 1152. sub eodem titulo Regis succedit Federicus Barbarouffe, qui postea anno 1155. ab Hadriano IV. coronatur Imperator, & in expeditione terræ sanctæ

aquis suffocatur anno 1190 illi succedit filius Henricus I V. qui moritur anno Christi 1198. Imperium administrat Philippus Henrici frater creatus Rex Romanorum anno 1199. & paulò post Otto qui moritur anno Christi 1218.

Alexius I V. vix incipit imperare, cum occiditur anno Christi 1204.

Alexius V. cognomento Ducas, vix assumptus, è throno deicitur & occiditur.

Baldoïnus primus Latinorum, qui Imperium Orientis moderati sunt, incipit imperare anno Christi 1204. anno sequenti captivus in bello factus anno postea 1206. occiditur.

Henricus fratri Baldoïno succedit, & imperat vsque ad annum Christi 1216.

Petrus Antisiodorensis succedens Imperium moderatur vsque ad annum Christi 1222.

Robertus Petri filius imperat vsque ad annum Christi 1229.

Baldoïnus II. cùm regnasset vsque ad annum Christi 1259. expellitur è Græcia.

Michaël VIII. cognomento Palæologus, Gallis è throno orientalis Imperij post possessionem ipsius spatio 55. annorum expulsis, imperat vsque ad annum 1259.

Andronicus senex, item cognomento Palæologus Imperium regit vsque ad annum Christi 1332. in quo moritur. In Occidète coronatur Imperator anno Christi 1220. Federicus II. qui postea in Concilio Oecumenico Lugdunenfi priuatur Imperio anno Christi 1245. illi successerunt, vel sub titulo Imperatoris, vel Regis Romanorum, Henricus, Guillelmus, Conradus, Richardus, Alphonsus, Rodolphus, Adolphus, & Albertus, qui anno 1299. creatus regnat vsque ad annum 1308. in quo occiditur.

Andronicus Iuuenis, item Palæologus, Andronico seni succedens imperat vsque ad annum 1341.

Ioannes Palæologus simul cum Ioanne Cantacuzeno imperat 16. annis: sed socio expulso solus imperat 27. annis, & moritur anno Christi 1384. Imperij 43.

Emmanuel II. Palæologus imperat 34. vsque ad annum Christi 1418. In Occidente Alberto succedit Henricus de Luxemburgo, & imperat vsque ad annum Christi 1314. illi succedens Ludouicus Bauarus imperat 33. annis vsque ad annum Christi 1346. Deinde Carolus Bohemus Romæ coronatus imperat vsque ad annum Christi 1379. Venceslaus Rex Romanorum imperat vsque ad annum Christi 1400. & post ipsum Robertus Bauarus Rex Romanorum vsque ad annum Christi 1410.

Ioannes Palæologus filius Emmanuelis patri succedit & 27. annis imperat; hic cum Patriarcha Constantinopolitano, & aliis Præsulibus orientis venit ad Eugenium IV. summum Pontificem, & anno Christi 1440. interfuit Concilio Florentino: anno sequenti moritur.

Constantinus XI. Palæologus filius Emmanuelis septem annis imperat vsque ad annum Christi 1452. vel 53. in quo capta à Turcis Constantinopoli, & Constantino. occiso, Romanorum Imperium in Oriente cessauit. In Occidente autem post Robertum imperant Sigismundus 26. annis vsque ad annum Christi 1437. Albertus II. Austriacus vno anno. Federicus III. item Austriacus 53. vsque ad annum Christi 1493. Maximilianus I. ex eadem domo imperat 25. annis vsque ad annum Christi 1519. Carolus V. imperat vsque ad annum Christi 1558. in quo plenus gloria moritur in monasterio S. Iusti. Ferdinandus I. fratri Carolo succedens imperat vsque ad annum 1564. Illi succedit filius Maximilianus II. & imperat 10. annis. Illi succedit item

filius Rodolphus II. anno Christi 1526 & imperat usque ad annum 1612. in quo succedit ei frater eius Mathias, qui iam senex adoptat Ferdinandum II. Austriacum, ipsúmque Regem Bohemiæ & Pannoniæ coronat: qui Ferdinandus in locum Mathiæ demortui Viennæ eligitur Imperator 28. Augusti anno Christi 1619. sed à Comite Palatino aliquandiu impugnatur: hoc tamen miraculosè debellato & pulso, ad hæc penè tempora imperando, filium Ferdinandum III. successorem reliquit.

C A P V T VI.

De Imperatoribus Turcarum.

Imperium Turcarum à Mahometo Pseudopropheta ducit originem, hic fuit natione Arabs ex Mecha oriundus, fuit astutus; quamvis ignarus: eius pater vocabatur Abdalla, mater autem Emina. Natus est in fine sexti sæculi post Christum natum; fuit seruus cuiusdam Abdemonaplis, cuius demortui vxorem in matrimonium duxit, à qua hæres institutus, poténsque effectus ad regnum aspirare cœpit: quod vt obtineret, se Prophetam finxit: Sergij monachi suasionibus multas hæreses, maximè contra Christi diuinitatem seminat, medius inter Arrium & Antichristum, primum & vltimum in hac materia hæreticum; licet ipsum Christum plurimùm laudet. Librum suæ legis, vulgò Alcoranum, ex Christianis ac Iudaicis dogmatibus, multisque plenum fabulis composuit. Tandem firmato regno Medinæ in Arabia prope mare rubrum moritur ætatis anno 65.

Abbabucker consanguineus mortui Mahometis Calipha creatur anno Christi 632. reliquas prouincias regno subiicit; postquam duobus annis regnavit, moritur anno Christi 634.

Omar filius Alchittab Calipha creatur, multa circumquaque bella excitat, Damascum capit, Palæstinam occupat, plures religiosos Carmelitas in sacro monte Carmelo trucidat, Persidem inuadit, totam Syriam subiugat, Ægyptum tributariam facit, Medina relicta Damascum venit, ibique nomen Imperatoris fidelium vsurpat: moritur anno Christi 643. percussus ab Abulula Persa.

Ostman filius Affan succedit, qui postquam ferè duodecim annis regnavit, à suis occiditur anno Christi 655.

Ali filius Abutalib & Fatimæ Calipha creatur, & ferè quinque annis regnat, postea ab Abdurrahman percussus interiit anno Christi 660. Deinde vsque ad finem septimi sæculi sequuntur Hasen filius Ali, Moaxias filius Cephon, Moabias siue Mahomet filius Abusophian, Iezid siue Hirid eius filius, Maula, Muthar, Maruan, Abdelmelech filius Maruan.

Sæculo octauo creati fuerunt Caliphæ Mahometicæ legis Vlid filius Abdelmelech, Suleiman item filius Abdelmelech frater Vlid, Omar filius Abdulazis filij Maruan, Iezid siue Hirid consobrinus Omar, Huïam, siue Iscan frater Iezid, Walid, siue Vlid filius Iezid, Abraham, siue Ebrahim filius VValid, Maruan, Mahomet.

Sæculo nono sequentes fuerunt Caliphæ, videlicet Abdalla, Abdalla II. Aaron, Mahometh, Abdalla III. Mahometh, tunc multæ erant inter Saracenos factiones, & omnia confusione plena; vnde vsque ad annum Christi millesimum quadragesimum ordinati non reperiuntur Saracenorum, vel Turcarum Principes: præfato igitur anno Turkemani siue Turcæ Regem sibi constituunt, quem Sadoc siue Iustum nominant.

Sadoc Persidem, & Syriam regno adiecit, & successorem reliquit Dogriz, qui Mesopotamiam, & Cili-

ciam ab Imperatore Constantinopolitano armis recuperat.

Aspalam Patri succedit; hic Solimanum nepotem misit in Capadociam, qui totam pene Asyam minorem armis deuicit: deinde propè Niceam Godifredum Bullioneum Christiani exercitus Ducem anno Christi 1097. aggreditur: & tandem Ciuitatem Hierusalem defendens ab eodem Godifredo superatur.

Melechla filius Aspalam patri succedens Arthot Sultanum Mesopotamiæ, & Solimanū misit Anthiochiam, quam armis deuincunt, filiūque Belchiarot successorē reliquit. Hoc sine hæredibus mortuo regnum Turcarum iterum diuiditur, & à variis Principibus vsurpatur, de quibus in gestis Christianorum Terram sanctam conquirentium frequens habetur memoria.

Sæculo decimo tertio iterum Turcarum Monarchia reuiuiscit: nam Osman, siue Ottoman filius Ertücul, (cuius progenitores ascendendo sic numerantur, Solimanus, Cabielpé, Cusulbug, Bainer, Oicoluc, Baifunger, Bakis Aga, Ciaces Aga, Toctemur, Versaiob, Ginkelpe, Ogus, Carachan, Cutluzece, & Lecrac) sua prudentia & magnanimitate Turcici Imperij fundamenta iecit, à quo Imperatoris Turcarum familia Ottomana dicitur; ipse in capta Ciuitate Bursa Imperij sedem fixit; multas deinde ciuitates in Asia minori Ancyram, Sebastem, & alias prope mare mainis, totamque ferè Anatoliam occupat: exercitum traiecto Bosphoro in Europam induxit, qui plures regiones fœdè vastauit: moritur anno Christi 1328.

Orcan siue Vrcan patri succedens, fratres persequitur Imperij limites vsque ad Hellespontum dilatat; Niceam, Nicomediam, Philippopolim, Gallipolim, aliásque Ciuitates; ac totam Misiā, Licaoniam, Phrygiāque occupat: moritur anno Christi 1358.

Soliman filius Orcan Adrianopolim, Pergamum, aliásque

aliásque Ciuitates vltra citráque Hellespontum, partémque Thraciæ biennio Imperij capit, & moritur anno Christi 1360.

Amurath frater Soliman, & filius Orcan succedit, Imperatorem Græcorum multis debilitat præliis Thesalonicensem, aliásque plures at celeberrimas ciuitates capit, obtentisque triginta septem victoriis suum dilatat Imperium: huic aliqui authores Orcan patris, & Soliman fratris victoriás; imò & primum in Europam tractum attribuunt; fuit admodum crudelis, primogenitum enim Siaux Schelebi strangulari fecit: tandem trigesimo tercio Imperij anno, & Christi 1393. à quodam Christiano Lazari Comitis Seruiæ seruo trucidatur.

Baiazeth dictus Gilderum, id est fulgur: quia vicinos terruit Principes; vastauit prouincias plurimas cepit ciuitates, Iconiũ, Cæsaream, Delphum, & alias, Pannoniam, & Bosniam percurrit: anno Christi 1396. Regem Pannoniæ deuicit, in hoc prælio Ioannes Comes Niuernensis Philippi Ducis Burgundiæ filius captus fuit, sed postea redemptus; tandem Constantinopolim obsedit: sed aduentu Tamerlani obsidionem soluit, ei que propè Ancyram occurrit, vbi victus, captusque Imperium cum libertate amisit; nam in ferrea conclusus cauea miserrimam duxit vitam, ipsique Tamerlano equum ascensuro tanquam scabellum subiiciebatur, tandem elapsis huius miseriæ & opprobrij duobus annis præ rabie ad ferreas crates caput allisit anno Christi 1400. vel secundum alios anno 1403. sex habuit filios, scilicet Mustafa Scheleby qui occidit in prælio in quo pater eius captus fuit; Isa siue Iosüë Scheleby, Emir Soliman, quem alij Musulman vocant, Musa, siue Moyse Scheleby, Sultan Mahamet, & Casan Scheleby.

Iosüë post mortem patris Imperium suscipit, dissipatum restaurat: sed à fratre Musa, siue Moyse captus

occiditur 4. Imperij anno.

Emir Soliman, siue Musulman Adrianopoli Imperator salutatur, fratrem Moysem persequitur; in principio mira in bello facit, sed postea deliciis occupatus in quodam oppido occiditur anno Christi 1411. Imperij septimo.

Musa, siue Moyse Scheleby fratri succedit, aliqua generosè exequitur, sed à Mahomet fratre suis prodentibus capitur, ac iussu eius strangulatur anno Imperij tercio cum dimidio.

Mahomet tandem filius Baiazeth Imperium Turcarum tot intestinis bellis penè desolatum ad pristinam gloriam reduxit; Pontum, Capadociam, aliàsque prouincias debellauit; Anatoliam recuperauit, Seruiam, Bosniam, Valachiam, partemque Epiri & Macedonia subiugauit; sedem Imperij Bursa Adrianopolim transtulit, vbi moritur anno Christi 1422. Imperij 8.

Amurath II. filius Mahomet susceptum Imperium nouis victoriis extendit, capit Thessalonicam, Sophiam, aliàsque Ciuitates; imò & totā Moream, ac partem Epiri; Ioannem Castriot ad dandam Croyam Ciuitatem, propriosque filios coëgit: ex quibus Scanderbech sui aui generosissimus multis victoriis Turcas superauit, & patrimonium suum eis eripuit: vnde afflictione & rabie Amurath ipse interiit anno Christi 1451. Imperij 30.

Mahomet II. filius Amurath, & Irenes vigesimo primo ætatis anno suscipit Imperium, secundo eius anno; Christi videlicet 1453. Constantinopolim obsidet, & capit; multas expeditiones aggreditur contra Græcos, Pannonios, Transsiluanos, Venetos, & alios; cumque plures Ciuitates & prouincias Imperio adiecisset, moritur propè Nicomediam anno Christi 1481. Imperij 31.

Baiazeth II. filius Mahometh II. expulso fratre Ze-
mi,

mi, patri succedit; plures Ciuitates inuadit videlicet Tarsum Ciliciæ, Lepantum, Dyrrachium, aliásque plures; tandem à filio Selim, vt creditur, veneno interficitur anno Christi 1512. Imperij 30.

Selim filius Baiazerh occisis fratribus Corcut, & Achmat, ac septem nepotibus, regnum inuadit; partem Mediæ cum Ciuitate Tauris; totam Ægyptum & Syriam, deuictis earum Regibus, nectit Imperio; cùmque Constantinopolim rediisset, indeque Adrianopolim pergeret, moritur anno Christi 1520. Imperij 9.

Soliman filius Selim patri in Imperio succedens, statim Belgradum in Pannonia obsidet, & anno 1622. expugnat; sequenti etiam anno Rhodum insulam capit, aliásque Archipelagi insulas; pluresque Pannoniæ Ciuitates, Budam, Albam regalem, & Strigoniam; item capit Babylonem, Van Armeniæ, Tripolim Syriæ, & aliàs, imò anno 1565. numerosissima triremium classe Melitam insulam, & copiosissimo exercitu Viennam Austriæ obsessit; sed recedere ex vtraque obsidione coactus est. Tandem 4. Septembris anni 1566. moritur, Imperij 46.

Selim II. filius Soliman 42. ætatis anno patri succedit; Cyprum insulam, aliásque Ciuitates Venetis anno 1571. eripit; sicut & Goletam Hispanis anno 1574. sed septima die Octobris anni 1572. ad Lepanthum classis eius trecentarum circiter triremium deleta fuit; vbi viginti quinque millia Turcarum occisa, quatuor millia capta cum generali, quatuordecim verò Christianorum millia à captiuitate liberata fuerunt: moritur anno Christi 1575. Imperij 9.

Amurath III. filius Selim Imperator factus quinque fratres coram se strangulari iussit, bellum mouit contra Persas; & alios vario euentu, tandem moritur 6. Ianuarij anni 1595. Imperij 20.

Mahamet III. filius Amurath patri succedens no-

uendecim fratres, & octo patris vxores enecat, fuit infœlix in bello; nam plures amisit Ciuitates, vt Strigoniam. & Clauarinum; imò & integras prouincias, vt Transsiluaniam Valachiam, & Moldauiam; peste moritur Constantinopoli anno Christi 1603. die 21. Octobris; Imperij 9.

Achmet filius Mahamet patri succedit; fuit vir iustus, & mansuetus, fratri Mustafa parciit, & castello reclusum in fine vitæ suum designat successorem. Pacem cum Persis, Pannonis, & aliis iniit; moritur vndecima Nouembris 1617. Imperij 14.

Osman, siue Ottoman primogenitus Achmet, carceri restituto Mustafa eius patruus; cùm adhuc tredecim esset annorum Imperator declaratur anno 1618. Hic contra Polonos exercitum trecentorum millium militum direxit; sed ab exercitu Polono centum septuaginta millium militum, turcæ superati, ac valde diminuti redire coguntur; cùmque ex metu Polonorum, vt creditur Constantinopolim relinquere, & sedem Imperij Memphim in Ægypt. transferre decreuisset, 18. Maij 1622. Ianisseri rebelles palatium Imperatoris ingrediuntur, plures eius familiares occidunt; & tandem ipsūmet Imperatorem in quadam turri reclusum strangulant, & patruum eius Mustafa è carcere eductum throno restituant.

Mustafa patruus Osman declaratus Imperator, ob incapacitatem matri regimen commisit; eius tempore Abbas Rex Persarum Babylonem capit; cùmque multi in Imperio essent tumultus, mense Septembri 1623. voluntariè è throno ad vitam priuatam redit.

Amurath I V. frater Osman, nepos Mustafa; cum sexdecim esset annorum, Imperio sufficitur: tres numerosos exercitus contra Persas ad capiendam Babylonem direxit; sed duo priores penè deleti, re infectâ redierunt; tertius, in quo aderat ipse Imperator, Babylonem

prodi

proditione potius , quàm armis obtinuit : hic multis è suis interfectis fratris necem vindicauit. Christianis valde fuit infensus ; moritur anno Christi 1639. post reditum in capta Babylone.

Ebrahim frater Ofinan & Amurath ; à fratre morituro Imperator declaratur ; hic cùm filium , quem ad Meccam miserat voti causâ , ab Equitibus Melitenfibus captum vidit , tanto furore Christianos persequi cœpit ; vt statim comparata ingenti triremium classe Venetos impetere cœperit ; & insula Cretæ Caneam , aliâsq; Ciuitates cœperit ; sed Veneti mirante toto orbe iam per aliquot annos tam potentis hostis impetum sustinuerunt ; & vtinam eum ad restituendum malè patta tandem compellant.

C A P V T VII.

De Regibus Indiarum Orientalium.

Semper in Indiis Orientalibus proprii fuère Reges ; inter alios celebres habetur memoriæ sancti illius Iosaphat , quem sanctus Barlahan heremita ab infidelitate ad fidem conuertit ; & à regno ad eremum , spretis mundi deliciis , tandem allexit. Quia tamen in Indiis Reges admodum multiplicati sunt. idè de solis magnis Mogoribus inter alios præcipuis agemus ; maxime quia de aliis certæ non habentur relationes.

Magni Mogores (qui omnes ferè Indias orientales citra Gangem , vel immediatè possident , vel tributarias habent) à magno illo Tamerlan , qui Baiazeth Turcarum Imperatorem deuictum cepit , recta linea procedere dicuntur. Dicitur Tamerlan quatuor procreasse filios , primogenitus fuit Ioon Guir , secundus Hamar Xequè , tertius Miron Xa , quartus Mirza Xarok.

Ioon Guir moritur viuentè patre relictis duobus filiis , videlicet Mahamed Sultan , & Pir Mahamed ; huic ultimo

ultimo Indiarum regnum Tamerlan auus concessit; sicut Miron tertio filio concessit regnum Persidis, Xarok verò post se reliquit Imperatorem.

Pir Mahamed filius Ioon Guir, Tamerlan auo in regnis Indiarum successit, postea occiditur à Pir-Aly.

Abusayd filius Pir Mahamed patri successit, & anno Christi 1468. vocatur ad regnum Persidis; sed ab Vsun-cassan intra montes propè ciuitatem Tauris cum exercitu inclusus, ad extremas famis miserias reducitur: cum fuga euadere conaretur, capitur & occiditur anno Christi 1467.

Hamed filius Abusayd patri successit, & viginti octo annos regnat, & moritur anno Christi 1495.

Babor nepos Hamed regnum assumpsit; hic Patanes ex occupatis Indiis expulsos ad insulas freti Bengalæ redegit: cumque triginta octo annis regnasset, moritur anno Christi 1532. relictis duobus filiis Homayon Mirza, & Kamoran Mirza.

Homayon filius Babor patri successit: sed rebellante Xirkan Prorege, ad Persidem fugit; vbi à Thamas Rege filio Ismaëlis copiosum impetrat exercitum sub Duce Beyran Kan, cum hac conditione, quòd legem Mahometis secundum interpretationem Aly in posterum sequeretur: his auxiliaribus turmis breui regnum restituit occiso Xirkan rebelle.

Gelaladin Akbar, siue magnus, Homayon patri successit, suumque Imperiũ pluribus regnis subiugatis auxit; regna enim Cambayæ, Decani, Caximix, & alia acquirit; totamque pene Indiam citeriorem reddidit tributariam: dilectus erat omnibus, siue Christianis, siue Mahometanis, siue Gentilibus; ita crudelitatem & sanguinem abhorrebat, vt suis ministris prohibuerit quemquam interficere, nisi ipse ter prius iussisset: moritur 27. Octobris anni Christi 1605. tribus relictis filiis, videlicet Scieco siue Selim, Pahari quem alij vocant

cant Morad , & Dan siue Daniel.

Sciëco , siue Selim patri successit , hic fuit Christianis valde affectus , primogenitum rebellem captum excæcauit , & carceri mancipauit , destinato regni successore secundogenito nomine Peruis moritur.

Corron Selim filius vel nepos regnum inuadit , hic est acerrimus , & infensissimus Christianorum hostis ; multum eos vexauit præcipuè Lusitanos in regno Bengalæ , & vt audiui dum essem in Indiis , nisi eius furor à prudentioribus ministris mitigaretur , iam è suis regnis omnes Christianos expulisset.

C A P V T V I I I .

De Regibus , & Principibus Palæstina.

CUm Hebræi Palæstinam promissionis terram ingressi sunt , eam diuersis populis plenam , & pluribus Regulis subiectam inuenerunt , quorum à tempore Abraham Patriarchæ in sacris litteris mentio habetur.

Moyse primus Dux Israëlitarum , siue Hebræorum eos miris prodigiis ex Ægypto educit circa annum mundi 2460. Cumque eos per quadraginta annos in longa illa deserti Arabici peregrinatione rexisset , & ad terminos terræ promissionis adduxisset , moritur anno ætatis 120.

Iosué Dei mandato ab eodem Moyse successor designatus , populum sibi commissum transacto miraculosè Iordane in terram promissam introduxit ; Hiericunthum euersis sono tubarum muris capit ; quinque debellat Reges , cursum Solis sistit ; cumque terram populo sorte distribuisset , moritur anno ducatus 18. ætatis 110. Mortuo Iosue seniores populi gubernarunt 17. annis , postea per octo annos propter idololatriam in seruitutem Cusan Mesopotamiæ Regis rediguntur.

Othoniel filius Cenez frater Caleb electus Dux & Iudex.

dex populum pœnitentē ex hac seruitute liberat ; cū-
que populum iudicasset quadraginta annis, (inclusis vi-
ginti quinque annis Seniorum , & Cusan) moritur.

Aod filius Gera filij Ienimi factus Dux & Iudex, po-
pulum de seruitute Eglon Regis Moâbitarum liberat;
cūque octuaginta annis gubernasset (inclusis octode-
cim prædictæ seruitutis) moritur: quo mortuo Iabin rex
Chananeorum, misso sub Sisara Duce exercitu , popu-
lum Israel idololatram vexauit.

Debbora prophetissa vxor Lapidoth populum Iudi-
cabat, & vocauit Barac filiū Abinoēm; coactōque exer-
citu, cum eo obuiam Sisaræ processit , cūque debel-
lans populum liberauit , postquam quadraginta annis
gubernasset; inclusis viginti seruitutis , moritur.

Gedeon filius Ioas expresso Angeli mandato Iudex
& Dux constitutus ; populum iterum propter idololo-
latiam captiuum, à seruitute septenni Madianitarum ,
cum exiguo trecetorum militum exercitu liberat: cū-
que quadraginta annis (inclusis septem captiuitatis)
populum iudicasset moritur : Gedeon vocatur etiam
Ierobaël.

Abimelech filius Gedeonis, cū omnes suos fratres
septuaginta occidisset , solo Ioatham euadente, ducatū
obtinuit; cūque Thebes oppidum obsideret, ecce vna
mulier fragmē molæ desuper iaciens illisit capiti Abi-
melech, & confregit cerebrum eius.

Thola de tribu Issachar filius Phüa patruī Abimelech
fit Iudex; hic habitans in Samir montis Ephraim iudi-
cavit Israël 23. annis.

Iaïr Galaadites succedens, populum iudicauit 22. an-
nis triginta suos filios triginta ciuitatibus præficiens in
terra Galaad : cūque post mortem eius populus ad
idola declinasset , ad Captiuitatem Philistiim & filio-
rum Ammon deuenit.

Iephthe Galaadites Iudex & Dux populi electus ,
Ammo

Ammonitas debellans, populum suum ab eorum captiuitate liberauit; hic cum deo vouisset se oblaturum in sacrificium primum sibi post victoriam occurrentem; filiam suam vnigenitam sic occurrentem sacrificauit, sex annis iudicat.

Abesan Bethleemites populum iudicat septem annis hic habuit triginta filios & totidem filias; moritur & sepelitur in Bethleem.

Ahialon zabulonites successit, & iudicauit Israël decem annis, mortuusque est ac sepultus in Zabulon.

Abdon filius Illel Pharathonites iudicauit Israël octo annis; habuit quadraginta filios, & triginta ex eis nepotes; mortuusque est ac sepultus in Pharathon terræ Ephraim in monte Amalec.

Samson filius Manuè de Tribu Dan, fuit Iudex in Israël viginti annis; hic fuit miræ fortitudinis, Leonem occidit, Philisteos sæpe prostrauit; sed cum Dali-la capillos abscidisset, in quibus eius fortitudo erat, incidit in manus Philistiim; à quibus diu irrisus, & malè tractatus fuit; sed crescentibus iterum capillis, domum concussis columnis euerit, ex cuius ruina tria circiter millia Philistiim cum Samfone perierunt.

Heli simul Iudex & summus Sacerdos quadraginta annis populum, tam in Ecclesiasticis, quàm politicis gubernauit, eius tempore populus Philistiim plurimum Israël vexauit, duos eius filios occidit, arcam fœderis cœpit; quibus auditis Heli cecidit de sella retrorsum, & fractis cernicibus mortuus est.

Samuël filius Elcanæ & Annæ, Sacerdos & Iudex populum aliquot annis faustè gubernauit, cumque senuisset, & filios suos populo præficere decreuisset, populus eorum arrogantiam & auaritiam indignè ferens Regem exposcit; vnde expresso Dei mandato Rex electus inungitur circa annum mundi 2880.

Saül de Tribu Benjamin primus Rex Israël Ammonitas,

nititas, & Amalecitas deuicit; cūque Dei mandato restitisset, & sacrificium ipse sine facultate obtulisset, à Deo reiectus, miser moritur in monte Gelboë, dum bellum gereret contra Philistiim, postquam regnasset nouem annis.

Dauid de Tribu Iuda, reiecto Saül, vngitur à Samuële in Regem; ab ipso Saül persecutionem patitur, sed post mortem eius in regnum admissus multa, & pro gloria Dei, & in bello generosa patrat, tandem moritur anno sui regni 40.

Salomon filius Dauid ex Bersabee suorum prædecessorum sapientissimus, potentissimus, & ditissimus regnat annis 40: templum Deo magnificentissimum, domum Regiam, & alia ædificat, tandem suarum mulierum arte & amore deceptus, ad cultum falsorum deorum præcipitatur, & si verè pœnituerit dubitatur. Huic successit filius Roboam, ob cuius tyrannidem regnum diuisum est.

Reges Iuda.

Roboam filius Salomonis cū recusasset graua populi tributa diminuere, sui regni diuisionem vidit; vnde imposterum supra duas tantum Tribus Iuda & Benjamin regnat in Hierusalem 17. annis & malè moritur.

Abiam filius Roboam incœpit regnare anno 18. Ieroboam, regnat tribus annis, & malè moritur. Afa filius Abiam incœpit regnare anno 20. Ieroboam,
fuit

Reges Israël.

Ieroboam filius Nadab electus à populo Rex Israël, regnat Samariæ super alias decem tribus: vitulos aureos conflauit, vt sic impediret, ne populus iret ad templum Hierusalem: regnat 22. annis, & moritur malè.

Nadab filius Ieroboam incœpit regnare anno 2. Afa Regis Iudæ, duobus tantum annis regnat, perseuerans in patris idololatria, occiditur.

Baasa

Reges Iuda.

fuit Deo gratus, abstulit armis à Baasa Tribum Nephtalim, vicit Æthiopes, regnat 41. annis.

Iosaphat filius Afa vir sanctus, Legis Doctores per totum misit regnam, vt populum instrueret: in præmium pietatis fuit fortunatus, regnat viginti quinque annis, & benè moritur.

Ioram filius Iosaphat filiae Achab nuptus, vxoris arte efficitur idololatra, fratres occidit; & cum regnasset 8. annis malè moritur.

Ochosias filius Ioram vno tantum regnat anno, mater eius Athalia filia Amri Regis Israël omnes consanguineos Regum Iuda occidit; solo Ioas Ochosiæ filio Iosabæ sororis beneficio euadente.

Athalia regnum tyrannicè usurpatum . septem annis moderatur; his enim elapsis occiditur mandato Ioiadæ Pontificis.

Ioas filius Ochosiæ 17. ætatis anno cœpit regnare, & 40. annis regnavit, benè

Reges Israël.

Baasa filius Ahia de domo Issachar interfecto Nadab incœpit regnare anno 3. Afa, contra quem bellum gessit, viuit, & regnat in idololatria 24. annis.

Ela filius Baasa patri succedit, regnat malè 2. annis, & occiditur.

Zamri interfecto Ela septem tantum regnat diebus; & malè viuens se combussit, vt inimicos effugeret.

Amri idololatra incœpit solus regnare 31. anno Regis Afa, cum regnasset 4 annis cum competitore Thebni, moritur.

Achab filius Amri regnat 22. annis, nubet Iesabel filia Ethbaal Regis Sidoniorum; seruiuit Baal, sanctos Patriarchas nostros Eliam & Eliseum persequitur, pessimè vixit, pessimè moritur vulneratus in prælio contra Syros.

Ochosias filius Achab patris impietatem imitatus regnat duobus annis, & malè moritur.

Ioram frater Ochosiæ
O etiam

Reges Iuda.

benè incœpit consiliis Ioiadæ; sed malè finiuit, à suis occisus.

Amasias filius Ioas incœpit regnare anno 2. Ioas Regis Israël, percussit Idumæos, cœpit Ciuitatem Petram; sed bellum gerens contra Regem Israël, ab ipso debellatur, & capitur capta Hierusalem; eius tempore moritur S. P. Eliseus, & Ionas vadit in Niniuem: regnat 29. annis.

Azarias, siue Ofias filius Amasie, licet benè viueret non tamen idololatriam impediuit; vnde in pœnam lepra laborauit; & sic regni administrationem filio Ioatham reliquit, & moritur, cum regnasset annis 52.

Ioatham filius Ofie incœpit regnare anno 2. Phacee Regis Israël, fuit Rex optimus, 16. annis regnauit, & vixit 41.

Achaz filius Ioatham fuit idololatra, à Rasin Rege Syriæ, & Phacee Rege Israël debellatur, sed missis templi thesauris

Te

Reges Israël.

etiam idololatra, cum duodecim regnasset annis, occiditur cum impia matre sua Iezabel à Iehu.

Iehu filius Iosaphat filij Namsi, Dei mandato à discipulo S. P. Elisei Rex vnctus, benè cœpit occidens Sacerdotes Baal; sed cum regnasset 28. annis, malè finiuit.

Ioachas filius Iehu in idololatriæ pœnam à Regis Syriæ oppressus regnat 17. annis.

Ioas filius Ioachas 16. annis malè regnat & malè moritur.

Ieroboam filius Ioas malè regnat 41. annis, & malè moritur.

Zacharias filius Ieroboam 6. regni mense occiditur.

Sellum occisor Zachariæ 1. regni mense occiditur.

Manachem occisor Sellum auxilio Phul Regis Assyriorum regnum inuadit cumque idololatra 10. annis regnasset malè moritur.

Phaceia filius Manahem

Rex

Reges Iuda.

Teglar Phalassar Regi Assyriorum, ipsum contra Syros adduxit; cumque regnasset 16. annis moritur.

Ezechias filius Achaz Rex optimus incœpit regnare anno 3. Osee Regis Israël, Deo gratissimus veram religionem restituit, à Sênacherib Assyriorum Rege vexatur; sed occisus 180. millibus hostium liberatur; cumque regnasset 29. annis, moritur plenus meritis.

Manasses filius Ezechiae vir duodecim erat annorum; cum regnum Iuda, tunc in terra promissionis vnicum, cœpit regere; in principio non patrem sanctum, sed gentiles imitatus idola colit; unde ab Assyriis Deo vlciscente captus in Babylonem defertur, ubi suorum scelerum pœnitentiam agens veniam meruit, & ad regnum remissus regnat 55. annis.

Amon filius Manasses ætate 22. annorum patri succedit, fit idololatra; & cum regnasset 2. annis, à suis occiditur.

Iosias filius eius, cum esset 8. annorum, regnum suscipit; delata idololatria veram religionem restituit, & 31. annis regnat.

Ioachaz filius Iosiae, in pœnam idololatriæ, post tertium regni mensem, à Pharaone Necao superatus, regno priuatur; & captiuus in Ægyptum ducitur.

Ioakim filius Iosiae, qui prius dicebatur Eliacus, mu-

Reges Israël.

Rex idololatra regnat duobus annis, & occiditur.

Phacee filius Romeliæ occisor Phaceiæ item idololatra 20. annis regnat, à Rege Assyriæ Teglar Phalassar debellatur; captis Galileæ, Galaad, & aliis prouinciis; ac translatis earum incolis; & occiditur.

Osee filius Ela occisor Phacee 9. annis regnat, ab Assyriorum Rege Salmanassar superatur, & populus in Assyrios transfertur finito regno Israël.

tato nomine à Pharaone Rex constituitur, 11. annis regnat, & à Nabuchodonosor captus in Babylonem adducitur.

Ioachim, siue Iechonias filius Ioakim Rex creatur; sed cùm esset idololatra, breui in pœnam criminis ab eodem Nabuchodonosor captiuus in Babylonem adducitur; verum elapso 37. anno ab Euilmerodath Rege Babylonis iterum sublimatur.

Sedecias patruus Iechoniæ filius Iosifæ, mutato Mathaniæ nomine, Rex creatur; cùm idololatra esset, & à Rege Babylonis defecisset, ab eo captus & excæcatus, occisis prius eius filiis, ducitur in Babylonem vinculis onustus, & translato penè vniuerso populo defecit regnum Iuda: relicto tamen Godolia filio Ahican Gubernatore Iudææ.

Transactis 70. annis captiuitatis, Zorobabel filius Salathiel filij Iechoniæ populum reduxit in Iudeam, vt dictum est sub Regibus Persarum; vbi principatum dicitur tenuisse 32. annis. Huic dant successorem Resa Mesulam filium qui gubernat 46. annis. Postea sequitur Ioannes filius Resa & 40. annis principatum habet. Deinde Iudas nomine Hyrcanus 14. Ioseph 7. Semei 11. Mathathias cognomento Eli 12. Moath. 9. Nanges 10. Helli 8. Nahum 7. Amos cognomento Sirach 14. Mathathias cognomento Siloach 10. Ioseph filius Tobia, & filia summi Sacerdotis Onia 60. tandem Ioannes Hyrcanus filius Ioseph vltimus Princeps domus Iechoniæ 17. Hic cùm Regum Syriæ vexationes ferre non posset, seipsum occidit.

Elapsis interregni 80. annis surrexit Mathathias filius Ioannis filij Simeonis, Sacerdos ex filiis Ioa ib zelo plenus, qui resistens mandato Anthiochi Epiphanis Regis Syriæ, populum ad legem Dei seruandam animauit: cùmque vno anno principatum tenuisset moritur in ciuitate Modin.

Iudas Machabeus filius Mathathiae, consilio patris communi applausu Dux & Princeps eligitur, sæpe Regis Syriae exercitus debellat, fœdus cum Romanis init; tandem in prælio contra Bachidem occiditur meritis gloriosus.

Ionathas frater eius, & successor ab Alexandro Epiphane fit summus Sacerdos; sicque populum Israël, tam in spiritualibus, quàm temporalibus regit: magnam Iudææ partem recuperat, templum Dagon apud Philistiim comburit, tandem proditione Tryphon capitur Ptholemaïdæ, cùm rexisset 18. annis.

Simon frater Iudæ, & Ionathæ, in Ducatu, & in summo Sacerdotio succedit, Gazam capit, fœdus renouat cum Romanis, init cum Antiocho Sedete: tandem post octauum Ducatus annum impia proditione à Ptholomæo proprio genere in conuiuio occiditur.

Ioannes Hyrcanus filius Simonis, patri in vtraque dignitate succedit, destruit templum Garizim apud Samaritanos, post quadragesimum Ducatus annum moritur.

Aristobulus Ioannis Hyrcani primogenitus, nomen Regis assumit anno 481. post reditum à Babylonica captiuitate; fuit etiam summus Sacerdos, Antigonom fratrem occidit; alios fratres cum matre vinculis tradit; acquisita Iturea moritur 1. regni anno.

Alexander Iamneus, auxilio Salome vxoris Aristobuli è carcere liberatus, fratri in regno & summo Sacerdotio succedit: fuit Iudeis inuisus; vnde multa rebellium millia occidit, plures capit ciuitates: & cùm regnasset 27. annos moritur. Huic succedit Alexandra eius vidua, quæ regnum in summa pace nouem annis obtinet.

Hyrcanus filius Iamnei, patri & matri succedens, tertio mense à fratre Aristobulo, è throno & sede Pontificia exturbatur; hæc fratrum discordia Romanos ad

conquirendam Palæstinam adduxit ; Iulius Cæsar fauebat Aristobulo, Pompeius Hyrcano Aristobulus à partialibus Pompei veneno perimitur, eiûsq; filius Alexander capite plectitur ; Hyrcano restituitur summum Sacerdotium ; sed Antipater fit Procurator Iudeæ, cui veneno morienti Herodes filius succedit, donec adueniēte Pacoro Rege Parthorum Antigonus filius Aristobuli throno restituitur : sed ab Herode Idumeo, qui à Romanis Rex fuerat electus, debellatur & occiditur.

Herodes regno potitus templum reædificat, consilium Sanhedrin dissipat; huius tempore Christus nascitur, quem indiscreta Innocentium cæde voluit extinguere : fuit crudelissimus ; nam aliquos ex propriis filiis, suamque occidit uxorem ; cūque regnasset 34. annos, miserrima morte perit.

Archelaus filius Herodis patris testamento regnum assumit, Antipas eius frater fit Tetrarca Galileæ, & Philippus alter frater fit Tetrarca Trachonitidis. Archelaus post decem annos regni ad querelas Iudæorum mittitur à Romanis in exilium Viennam in Gallia, sicut Antipas missus fuit in exilium Lugdunum in eadem Gallia : hic fuit ille Herodes qui S. Ioannem Baptistam decollauit & Christum irrisit.

Tunc regnum Palæstinæ Romanis imperantibus subiacebat; cūque Iudæi rebellassent, à Vespasiano & Tito iterum subiugati, ac pene deleti sunt, innumerabilibus occisis, aliisque inde dispersis ; Sicque vsque ad tempora Heraclij perseverauit, tunc enim sub Omar Calipha ab Arabibus inuaditur anno Christi 637. & seruatur vsque ad annum 1099. tunc enim aduenientibus ex Europa Christianis idem regnum Mahometanis eripitur.

Godifredus Bullioneus, captâ Hierusalem, anno Christi 1099. Rex communi applausu declaratur, propter eximia eius facinora, sed tenuit corona aurea in ecclē cinitate

ciuitate coronari, in qua Christus Dominus corona spinea fuerat coronatus, moritur anno Christi 1100. regni vnico.

Balduinus Princeps Edesse fratri succedit, hic capit insignes Ciuitates, Ptholemaidam, Tripolim, Sidonem, Berithum, & alias; moritur anno Christi 1118. regni 18.

Balduinus II. duplici prælio Gazis Sultanum Damasce prope Antiochiam superat, sed ipse postea prope Edessam captus est: è captiuitate post 18. menses liber, moritur anno Christi 1131. regni 13.

Fulco Andegauensis, ab aliis dictus Polacus, ad regnum assumptus bellum ciuile sedat Turcas è finibus Antiochiæ pellit; moritur anno Christi 1142. regni 12.

Balduinus III. eius filius, capit Ascalonem, Noradinum debellat; & moritur anno Christi 1162. regni 21.

Almericus filius Fulconis, & frater Balduini Sultanum Ægypti tributarium facit, capit Tamiatem; & moritur anno Christi 1173. regni 2.

Balduinus IV. Almerici filius adhuc iuuenis patri succedit, sub tutela Raymundi Comitis Tripolitani; cumque lepra laboraret, noluit nubere; & moriturus nepotem suum ex Sybilla sorore filium Guillelmi Marchionis Montis Ferrati regni hæredem, & suum successorem declarat; moritur anno Christi 1185. regni 12.

Balduinus V. nepos Balduini IV. adhuc iuuenis regnum capefcit, sub tutela Comitis Tripolitani, octauo regni mense moritur veneno à propria matre regni auda, vt creditur, ipsi dato.

Guido de Lusignano Comes Ioppe Sybillæ maritus, Templariis fauentibus priuigno sufficitur; quod indignè ferens Raymundus Comes Tripolitanus, cum Saladino Calipha Ægypti fœdus init, ex quo regnum Christianorum capto Guidone pene dissipatum est;



LIBER QVINTVS ITINERARII

In quo

Christianorum Orientalium
mores referuntur.

CAPVT PRIMVM.

De Colonia, ac dominio Lusitanorum in Oriente.



VAMVIS Lusitani non indigenæ, sed aduenæ sint in Oriente: quia tamen plures ibi colonias possident, & imperant multis gentilium locis Catholicam fidem prædicantes; idè inter Christianos orientales primi numerandi sunt.

Prima dignitate Colonia, cui aliæ omnes subordinantur ac obediunt, est Goana Ciuitas: capta fuit hæc ciuitas die sanctæ Catharinæ martyris, ac propterea constructo in eius honorem Archiepiscopali templo magnifico, illam vt Patronam & protectricem veneratur. Locus etiam, in quo naui exeuntes Lusitani Ciuitatem ingressi sunt, etiam nunc dicitur littus sanctæ Catharinæ; hanc cœpit Alphonsus D'Alburquerque anno Domini 1508.

Idem Lusitanorum Dux cœpit Ormusium, quod an-

nis præteritis fuit florentissimum Orientis emporium, vt supra dictum est : hæc ciuitas Ormusina erat curia Regis ab illa ciuitate dicti Ormusini, qui latè in Sinu Persico suum dilatabat regnum; plurimæ enim illius maris insulæ, & longus maritimæ partis tractus illi subdebantur. Postquam à Lusitanis captum fuit ex compositione Ormusium, Rex suam ibi tenebat Curiam, ac plurimum habebat authoritatis; quamuis Ciuitatis regimen, & arcis custodia, ac iustitiæ administratio ad Lusitanos pertineret: ibi Dux ciuitatis magno apparatu cum timpano, & tubis in publicum apparere tenebatur; quod etiam hodie in tribus aliis principalioribus arcibus, scilicet Diuiensi, Moçambici, & Malaccæ obseruatur: dimidium vectigalis & reddituum Regi Ormusino dabatur, venit vnus ex illis Regibus Goam, ibique aliquandiu manens, vt Mahometanis mos est, cum multis nefandum commisit peccatum; propterea iubente Prorege (qui tunc erat Dominus Frater Alexius de Menezes ex Ordine sancti Augustini, Archiepiscopus etiam Goënsis postea Braccarensis) captus in carcerem coniicitur, factoque processu ad mortem damnatus capite plexus est: sed ô mira Diuinæ prædestinationis efficacia! quæ permissione illorum scelerum vsa est, vt Rex ille Mahometanus efficaciter ad fidem vocaretur, vocatus in ipso instanti antequam finiret vitam iustificaretur, iustificatus vitam consequeretur æternam: accidit enim, vt Rex ille ad cognitam fidem Christi in carcere alliceretur; ibique idoneos ac pios suæ instructionis magistros assumeret: noluit tamen ante baptisari, quàm ad Theatrum publicum, in quo capite plectendus erat peruenisset: ita factum est, educitur è carcere, deducitur ad locum supplicij, solemniter cum omnium exultatione spiritali de conuersione eius, ac lachrymis de eius morte, baptisatus est, ac immediatè capite plexus, rectò in cœlum tramite perueni-

nisse piè iudicatur. Captum tandem fuit Ormusium à Persarum exercitu, captusque Rex in Persidem delatus, captiuus Syrafi detinetur; adhuc superest Princeps illius prosapiæ, qui Curiati prope Mascatum manet; ipsum verò Ormusium penè desolatum est.

Ipsemet Alphonsus cœpit Malaccam, ditissimum etiam Orientis emporium, ac in optimo situ constitutum; est enim in media inter Indiam & Chinam via, oppositam habens Insulam Sumatram, vbi est fretum maris angustissimum, cuius ostium est ipsa Ciuitas: vnde prope nauigare tenentur, quicumque ex India Chinam petunt, vel nauigationem plurimùm dilatare coguntur inter Sumatram & Iauam Insulas, vel vltra Iauam nauigando. Malacca est parua ciuitas, sed fortissima; sæpe à Batauis in vanum obsessa; hanc enim ob situs commoditatem maximè expetunt: sæpe etiam à Rege Achem, tanquam sui caput Imperij, impugnata; sed nunquam fuit expugnata, de illa impugnatione infra aliquid dicetur: nuper tandem à Batauis capta dicitur.

Post Malaccam est ciuitas Diuiensis iam descripta: hanc non vi & armis cœperunt Lusitani; sed illam conuentione facta incolæ Lusitanis dederunt: vnde Gentiles partem interiorem ciuitatis obtinent, suosque ritus publicè obseruant; non tamen templa condere, aut vetustate labentia reficere possunt: ibi est dux Gentilium, qui ab ipso Duce Lusitano in honore habetur: Mahometani etiam ibi habitant, suumque obtinent Ducem, sicut & Iudæi quibus omnibus propria templa conceduntur. Inter Diuiensem ciuitatem & Goam est ciuitas Daman, fortis admodum, vi capta à Lusitanis; deinde sequitur Bassainum, Tana, aliæque oppida: postremo est Chaulum, in quo est castrum fortissimum, ac pene inaccessible, præter intentionem miraculosè ab ipsis captum Lusitanis: contigit enim, vt quadam die Lusitani

Chaulo

Chaulo exirent, vt contra hostes continuò ex hac arce excurrentes pugnarent; totam noctem in mundanda per confessionem conscientia insumpserunt: summo mane audita Missa, sacrâque refecti communione; ad prælium procedunt, hostes ex arce Elephantem armatum ad illos dimittunt; sed mira Dei prouidentia votis Lusitanorum obsecundante, in ipso ostio Elephas interficitur, impeditque ne ostium recludi possit; ac ita Lusitani vltèrius progredientes castrum animosè ingreditur, præsidium expugnant, ac celeberrima perfruntur victoria; huius victoriæ memoriâ quotannis initio mensis Septembris solemniter in ciuitate Goensi, ac alibi, vt credo, per totam Indiam celebratur.

A ciuitate Goa versùs Austrum vsque Malaccam, præter multa oppida, vt Onor Cranganor, Corlan, Manar, aliâque; sunt duæ ciuitates, scilicet Cochinum citra promontorium Comorynum, ciuitas Episcopalis satis ampla: hanc Rex illius Prouinciæ Lusitanis ædificandam proposuit, eamque singulari prosequitur amore: vltra verò promontorium est Meliapor, dicta vulgò ciuitas Sancti Thomæ, quia ibi Sanctus ille Apostolus martyrio coronatus est.

In ditione orientali Lusitanorum; est castrum ac oppidum Moçambicum in parte Africæ; quæ respicit Insulam sancti Laurentij, ibi est Dux siue Gubernator ex quatuor præcipuis Indiæ, tum dignitate, tum vtilitate; breui enim mercibus ibi comparatis, quæ in auro puro ibi in Africa nato, in Ebore, ac Ebano consistunt, plurimum ditantur. Hoc castrum fuit à Batauis aliquandò obsessum, sed Lusitani auxilio Æthiopum sibi addictissimorum freti fortiter restiterunt. Mirum est, qua erga suos Dominos hi Æthiopes polleant fidelitate; nam contra suos consanguineos & affines, pro suis pugnant Dominis; imò ad eorum nutum quemlibet occidunt: qui autem fidem Christi amplectuntur, optimi & constâtes sunt

sunt Christiani, contra naturam Indorum; qui facile conuertuntur; sed iterum facile peruertuntur; sunt amicissimi musicæ ac Choræarum, unde semper præmanibus aliquod habent instrumentum musicum: vnum vidi ex lignis semiustis compositum, subtus vacuas habens cucurbitas, quod percussum baculo, in cuius fine erat neruus Elephantis quasi globus, intensissimum ac gratum auribus edebat sonum: quatuor talia erant instrumenta, iuxta quatuor musicæ partes, vnum enim sonum edebat acutum aliud grauem, alia duo alios sonos. Ultra Moçambicum ad interiores Africæ partes est castellum Sofalæ, ad quod, sicut & ad alia oppida, per flumina Quamæ peruenitur: ibi est Regio, vbi aurum purissimū inuenitur: licet autem aër sit pessimus, & aquæ insalubres; auri tamen affectu multi illuc proficiscuntur, iuxta illud Poëtæ; *Quò non mortalia pectora cogit auri sacra fames?* Ibi etiam ob infinitam Elephantum multitudinem est maxima Eboris copia, nemorâque Ebani.

In eadem Africæ parte versùs Orientem occurrit Regnum Melindi, cuius Rex benignè Lusitanos ex Europa in Indias proficiscentes, in prima eorum nauigatione suscepit, eisque vltioris nauigationis Duces vltro subministravit: illuc etiam Lusitanorum dominiū pertingit. Post Melindi est ciuitas Mombassa, accedens ad mare rubrum, cuius Rex eosdem Lusitanos illuc primò accedentes facta proditione perdere tentauit; quapropter illum postea debellantes Regno exspoliarunt, illudque suo hospiti beneuolo Regi Melindi ob benignam illam hospitalitatem concesserunt, illudque diu possederunt: donec anno millesimo sexcentesimo trigesimo Rex Mombassæ in fidem Christi à pueritia conuersus, Gubernatorum tamen iniuriis irritatus expulit Lusitanos, fidemque Christi reliquit: factâ enim proditione quadam die multis ex suis stipatus, castrum parum munitum ingressus, Gubernatorem confodit, deinde alios

Lusitanos præcipuè aliquos Patres sancti Augustini, apud quos iuuenis in fide Christi fuerat educatus, tum furore in gentem Lusitanam concepto, tum Christianæ Religionis odio crudeliter enecauit : tandem mulieres Christianas assumens , quia fidem Christi constanter profidebantur, nec Mahometanam amplecti suadebantur, immaniter trucidauit: Dux illarum erat Natalia de Saa , matrona admodum generosa, quæ efficacibus suis exhortationibus omnes alias ad martyrium incitauit: ô felix corona martyrum, qui illius perfidi Regis furore enecati, ex illis Mahometanorum terris simul in cælum eublastis ! Occisis multis , aliisque paucis fugientibus Lusitanis , castrum qua potuit diligentia muniuit ; sed postquam semel classi Lusitanorum restitisset , timens ne in eorum manus deueniret ; denegato , quod à Mechana ciuitate poposcerat, auxilio castrum Lusitanis liberum reliquit , aufugiens ad terras Mahometanas , secum Christianam circumducendo vxorem, quam longo martyrio paulatim consumebat.

Insula Ceylam, vt dictum est, Lusitanorum vt plurimum, maxime in parte maritima subditur ditioni: multos habent portus in terris infidelium ; vbi procuratorem habent commercij causa : vnde & ad Insulas Moluccas , & sancti Laurentij, Sumatram, & Iauam, & Iaponensem nauigant : sed iam ad hanc vltimam non pertingunt ; sed ad aliam proximam : iam enim à multo tempore cogebantur mercatores omnes , quos secum deduxerant , iterum reducere , ne ita aliqui Religiosi conuersionis causa in Insula remanerent : cui rei maximam adhibebant diligentiam ; & si fraudem ibi reperissent, eorum merces fisco addicebant; sed nunc quia vnus fidem Christi negans Regi suasit , ne quidem illuc accedere permetteret Lusitanos, ad paruam Insulam Iaponiæ proximam veniunt ; vbi pecunias pro mercibus emendis soluunt ; ibique asportatas merces recipiunt.

Ille

Ille apostata omnes, qui erant in Insula, Christianos Regi manifestavit: quapropter multi martyrio coronati sunt, suasitque Regi, ne in suo Regno permetteret fieri Cruces optimè elaboratas illic fieri solitas, nec pro hostiis Scutulas, aut pulpita pro altari, nec alia diuino cultui deseruientia: imò, quod si de aliquo suspicaretur, an esset Christianus, iuberet illum pedibus conculcare Crucifixum, asseuerans illum nequaquam id facturum, si fuerit Christianus. En Diabolica hominis consilia; sed vtinam scandalosus hic lapsus ad gloriosius resurgendum; imò ad subeundum martyrium, quod pene in carcere prægustauerat, ex Diuina bonitate ei deseruiat: vxorem duxit, Curiámque sequitur. Contigit autem, vt quatuor Patres Dominicani causâ fidei ibidem comprehenderentur, quorum vnus erat Auenionensis nomine Guillelmus Cortet: Præses illorum, dum ante Iudicem sisterent condemnandi (glorioso enim martyrio occubuerunt) astantes sciscitatus est; num iter illos est ille, nominans eum proprio nomine; cui responderunt adesse; quem cum aliorum indicatione agnouisset, obtulit ei epistolam ad ipsum directam, zelóque scriptam Apostolico, in qua miserrimus eius lapsus, eiúsque deformitas exprimebatur, ac efficaces ad resurgendum rationes afferebantur: supra verò sic scripta erat; Apostatæ fidei Christianæ, &c.

Hanc cum ille superscriptionem legisset, mille in vultu mutauit colores: recessit inde, nec amplius ab illis Patribus visus est: hanc historiæ seriem in Indiis publicam, quam etiam hîc Massiliæ & Genuæ audiui, à testibus fide dignis accepi. En status Religionis in Iaponia; non tamen de eius conuersione desperandum est, effusus enim tot sanctorum Martyrum sanguis, quo sæpe ac abundantissimè irrigata est, fidem iterum Christianam maiori impetu & gloria faciet pullulare.

In Sinu Persico sub ditioe Lusitanorum continetur

Masca

Mascatum, aliâque oppidula, ac munitiunculæ, Curiati, Suar, Corfacan, Leuidia, Daba, Comsa, Cassap, & aliæ nonnullæ : tandem sub eodem dominio est Colonia Chinenfis in Ciuitate maritima Macao, quæ lingua nostra interpretatur Ciuitas Dei ; hæc Ciuitas est bipartita ; pars enim est Chinenfium sub suo Governatore siue Mandorin ; pars altera est Lusitanorum sub Generali Duce ; hæc Ciuitas est Regis Chinæ ; quamuis Lusitani illius incolæ Tribunalibus & officialibus Lusitanis vtantur : ibi est libertinus Christianæ Religionis vsus, ibi est ordinariè Episcopus, aliique Religiosi ordines : nobis etiam incolæ Lusitani, dum Goæ adhuc essem, Conuentum obtulerunt : quia autem hæc Ciuitas ab Anglis & Batavis obsessa fuit ; ideò Rex Chinenfis iam de Lusitanorum fidelitate securus, permisit muris circumdari, ac bellicis tormentis muniri.

En dominiura temporale Lusitanorum in Indiis orientalibus, ac aliis adiacentibus Regnis : sed valde debilitatum, ac ferè extinctum ad tuam tendebat occasum ; iam enim continuis Batavorum Piratarum incursionibus commercium penè defecerat : quotidie enim naues Lusitanorum ab illis capiebantur iam aliquas, vt dixi, amiserant colonias : sed iterum Lusitanos sub nouo Lusitano Rege, pace cum Batavis inita, prosperaturos cuncti proclamât. Lusitani in Indiis plures habent captiuos emptitios & captiuas ; quod quidem ex vna parte animarum saluti plurimùm conducit, illi enim ex infidelibus Christiani efficiuntur ; ex alia verò parte multorum peccatorum est seminarium, sed hoc transeunter dixerim de statu temporali.

Quod attinet ad statum Ecclesiasticum : in India est Archiepiscopus Goënsis, ac quatuor Episcopi, scilicet Cochinenfis qui mortuo Archiepiscopo totius Archiepiscopatus Apostolicus est Governator. Deinde est Episcopus Meliapor siue ciuitatis sancti Thomæ. Tertius est

est Episcopus Malaccæ. Quartus Chinenſis ; licet hi duo aliquando confundantur in vnum. Est inſuper Archiepiſcopus Chriſtianorum ſancti Thomæ qui Cranganori propè Cochinum manet. Quando eram Goæ, ibi erat Patriarcha Æthiopix Dominus Alphoſus Mandez, ex Societate Ieſu aſſumptus, vir doctiſſimus, qui multum in Æthiopia pro animarum ſalute laborans, multa paſſus, ac tandem expulſus fuit. Erat etiam Dominus Ioannes de Rocha ex eadem Societate Episcopus Hierapolis, vir item doctiſſimus : horum mentionem feci, quia me ſua dignabantur amicitia. Religioſi Ordines in India ſunt hi ſequentes, ſcilicet fratrum Minorum de obſeruantia, qui primi omnium in vinea Domini ibi laborauerunt, ex quibus prodierunt Recollegti : primi habent vnâ provinciam ſub titulo ſancti Thomæ, cum aliquot Conuentibus, multisque reſidentiis ; alij etiam ſuam habent ſub titulo Matris Dei. Poſt Patres ſancti Franciſci Indias petierunt Patres Dominicani, qui aliquot Conuentus ſub vno Vicario Generali habent. Tertio ordine ſuccedunt Patres Societatis, qui duas provincias, Goënſem & Cochinenſem, cum multis Collegiis, & reſidentiis habent : olim etiam habebant Iaponenſem. Succedunt Patres ſancti Auguſtini, qui ſub vno Vicario Prouinciali congregationem habent. Vltimo alios ſequimur Ordine, qui Goæ duos Conuentus eximios, vnum in Ciuitate Diuienſi, & alium Moçambici habemus, haſtenus alios in Indiis non admiſimus, vtrò etiam oblatos : Moſcati euim, Baſſaini, in China, & in Inſula Cheilam magna ad fundandum ſollicitabamur inſtantia : ſed tum prohibitio Regis Catholici erga omnes Religioſos de non fundandis nouis monaſteriis ; tum noſtrorum decreta Superiorum, qui paucos tantum Conuentus, ad ſolacium & ſubſidium aliarum miſſionum, in indiis volunt ; nos à fundandis monaſteriis continuerunt : hi noſtri

Conuentus Indici , sicut & aliæ residentiæ , sub Vicarij Prouincialis in Perside commorantis regimine continentur . Omnes Religiosi illic strenuè in conuersione & salute animarum laborant , Ecclesiámque nouis quotidie fidelibus fœcundant , cœlósque Martyribus implent.

C A P V T II.

De Regimine Lusitanorum in Oriente.

Quantùm ad Regimen temporale attinet ; Lusitani in Indiis habent Proregem , vel Gubernatorem : Prorex venit à Lusitania Gubernator in Indiis nominatur : hi summam habent authoritatem ; omnia enim officia ad libitum distribuunt , si in Lusitania non sint concessa ; ab officiis possunt suspendere , quacumque pœna etiam capitis delinquentes punire : denique , ut vno verbo concludam , omnia licent : Cùm enim tanta inter ipsum Regem & illos sit distantia , quandò querelæ de ipsis in Lusitaniam perueniunt , iam ad dimidium sui Gubernij peruenerunt , & absoluerunt quandò propter querelas amouendi essent ; quamuis aliqui pœna carceris , aliisque post reditum fuerint multati.

Quando de nouo Prorex venit , multi obuiam procedunt Nobiles , eúmque è naui in Conuentum Regam Magorum ordinis sancti Francisci deducunt , ibique hospitatur ; donec Prorex cuius officium expirat , ad eum die sequenti veniat , magna nobilium aliorúmque stipante caterua : venit autem in Tritemi multis præcedentibus militum turmis ; cùm ad Ecclesiam peruenerit , primò genuflectit in pulpito ad hanc ceremoniam præparato : deinde in Cathedra sedet , expectans aduentum noui Proregis , qui interim à Secretario Status , ac Procuratore Regio euocatur . Cùm venit , præmissis
vrba

urbanitatis ac benevolentia signis, tradit Secretario suas parentes, quibus à Rege in tale officium eligitur: has alta & clara voce Secretarius legit, iisque lectis statim Prorex qui officio expirat, cedit loco Proregi nouo; deinde omnes ciuitates, ac præcipuè munitiones, & castella; Galliones; Triremes, aliâque similia, legente Secretario, ei committit, quasi rationem reddens rerum, quæ sibi in tali ceremonia fuerant commissæ. His factis, alterumque salutans, eodem comitatu stipatus recedit, sibi que extra ciuitatem, suisque domum præparat, Ordinariè autem, recedente Prorege, in eodem Conuentu se recipit per quatuor aut quinque menses, donec nauigandi in Lusitaniam tempus aduenit.

Postquam nouus Prorex in illo Conuentu aliquandiu mansit, pergit ad domum Pangi commodiorem: ibique tandiu expectat, donec omnia ad solemnem eius in ciuitatem ingressum necessaria sint parata: ornant enim vicos per quos transiturus est, aliquos arcus triumphales efficiunt, orationem præparant, aliâque ad solemnitatem conducentia: postquam dies ad ingressum designatus aduenit, ipse multis nobilibus comitatus, triremi vectus ad littus ciuitatis accedit, Triremi exiens à Consulibus sub Baldachino recipitur, statimque veniens orator, multa ad eius laudem, ad Ciuitatis commendationem, aliâque huiusmodi edisserit; tunc ei Ciuitatis clauis offeruntur; deinde recta ad Ecclesiam Cathedralem deducitur, ibique ab Archiepiscopo totoque Clero solemniter admittitur; ad altare maius accedens, oblato Euangeliorum libro, multa se obseruaturum iurat; his tandem finitis ad suum palatium magno pergit comitatu.

Quandiu Prorex in ciuitate manet, nullus cum eo potest comedere; quandò autem foras proficiscitur, ad suam mensam Nobiles admittit; tenetur autem ad por-

tum proficisci, quoties aliqua classis maritima dimittenda est: coram ipso siquidem milites in libro scripti nominantur; ut appareat si quis delit, & sæpe suspensio necantur, maximè si bis aut ter acciderit: hoc saltem obstat, ne in aliquod officium assumantur; cum enim de aliquo promouendo agitur, statim hi libri peruoluuntur; quando Prorex ad classem dimittendam ad portum proficiscitur, ad suos sumptus ex ærario Regio subministratur.

Si Prorex in suo triennio moriatur, (ordinariè enim per triennium tantum durant; aliquando tamen confirmantur,) aperiuntur patentes Regiæ, quas Vias vocant, ad hoc custoditæ. In Conuentu sancti Francisci est ærarium Regium, locusque secretus, ubi quotannis patentes Regiæ reconduntur: tres sunt huiusmodi patentes sigillatæ intra velum sericum, ac ponuntur in scrinio trium clauium, quarum vnâ habet Secretarius, secundam Cancellarius, tertiam Administrator gazæ Regiæ. In qualibet autem ex his patentibus est scriptus vnus vel plures, qui à Rege in Gubernium Indiæ assumuntur. Igitur delato Prorege mortuo, ad Ecclesiam in qua sepeliendus est, ac in medio Ecclesiæ collocato, omnes Nobiles Consiliarij Status, Senatores, Archiepiscopus, ac penè tota Ciuitas illuc conueniunt, affertur scriniolum in quo patentes sunt reconditæ, aperitur coram omnibus; educitur prima, ut dicunt, Via; à Secretario legitur: si qui in ea scriptus est, viuit & sit in India, statim ut Gubernator promulgatur & admittitur: si autem, vel discesserit, vel mortuus fuerit, ad alias legendas suo ordine procedunt, præferendo semper recentiores: cum semel huic ceremoniæ interfui, sex Viæ apertæ sunt.

Prorex suos habet à Rege determinatos status Consiliarios (quorum primus est Archiepiscopus) qui cum ad statum optimè regendum adiuuant; sunt etiam à Rege

Rege prouisi aliqui Duces generales, vt prouincias à Goa diffitas gubernent. Primus omnium est Insulæ Ceylam; secundus est sinus Persici; deinde Chinensis, Malaccæ, & sancti Thomæ; hi habent turmas militum & classes maritimas, quibus commissas sibi prouincias custodiunt. Præterea est Dux Generalis Gallionum, quos propter Batauos & Anglos armauerant: sed vno mense, antequam Goâ discederem, die S. Hieronymi anno millesimo sexcentesimo trigesimo nono à Batauis combusti sunt: id fortè Deo permittente, quia mutato Lusitaniæ statu, ac pace cum Batauis inita, non erant ampliùs necessarij. Insuper est Classis Septentrionalis, Classis Diuisiensis, & Classis meridionalis; constantes quindecim & ampliùs nauigijs ad piratas debellandos. Vt autem milites alacrius spe præmij Regi deseruiant, postquam per aliquot annos, vel in mari, vel in terra militarunt, authenticum de his à suo Duce postulant instrumentum, in quo apparet quantum seruerint, quibus in occasionibus pugnaverint, quid mirabile fecerint; deinde illud proferunt consilio Goënsi, quod proportionatum meritis adiudicat præmium; habita tamen ratione personæ, plus enim nobili cæteris paribus datur, quàm alteri; & sic isti hoc officium vel iudicis vel Ducis, alteri aliud decernitur: deinde hæc ita consultata in Lusitaniam mittuntur, vbi ordinariè à Rege confirmantur.

Tandem ad negotia iuris expedienda, præter Auditores, qui in singulis resident vrbibus, ac oppidis; est Goæ Parlamentum siue Caria maior, quam vocant Desembargo, in qua sunt sex vel octo Senatores, quos Desembargadores vocant: hæc Curia plenariam, tam in ciuilibus, quàm in criminalibus habet iurisdictionem in omnes, exceptis Nobilibus, quorum causæ criminales in Regno Lusitaniæ deciduntur: caput huius Senatus, cui sæpe Prorex assistit, est Cancellarius, deinde alij

Senatores alia exercent officia ; vnus quidem est Auditor generalis in criminalibus, secundus est Auditor generalis in ciuilibus , tertius est Procurator Regius siue Coronæ, alius denique est prouisor defunctorum, ad quem pertinet testamenta approbare, & omnia decidere ad defunctos spectantia.

Quantum verò ad Regimen spirituale attinet & Ecclesiasticum; non communia, sed tantum quæ ibi vidi singularia referam. Et primò Rex per suos ministros colligit decimas; cùm enim magna pars subditorum sit Gentilis, facilius id exequentur Ministri Regij, quàm Ecclesiastici; ipse verò Rex præbendas siue pensiones, quas ordinarias vocant, omnibus ac singulis taxatas Ecclesiasticis persoluit: Archiepiscopo Goënsi sex circiter millia nummorum; Episcopo Cochinenfi duo millia quingentos; aliis Episcopis mille nummos, Inquisitoribus octingentos nummos; & sic proportionem seruata aliis tum Canonicis, tum Parochis: ac Conuentibus Religiosorum, vt animarum conuersioni inuigilent; omnibus etiam Religiosis, qui in Indias veniunt, viaticum abundè prouidet: hi singulis annis die determinata baptisant, quos toto anno conuerterunt: Patres Societatis ad hanc ceremoniam diem conuersionis sancti Pauli deputarunt, cui tota penè ciuitas, in prima eorum Ecclesia sancti Pauli præsens assistit. Omnibus Baptizatis datur à Rege vestimentum integrum, à quo decretum est, vt paruuli Gentilium, si careant parentibus, inuitis etiam cognatis, baptizentur. Ad hoc regimen spirituale pertinent etiam Congregationes, quas dicunt Misericordiæ, in singulis vrbibus ac oppidis fundatæ: sibi eligunt vnum prouisorem, quod officium est maximi apud Lusitanos honoris; electio autem fit die Visitationis B. Virginis, eligitur etiam Secretarius & Thesaurarius; hi tres habent clauēs Thesauri; multa enim semper habent disposita, vel legata pauperibus
erogan

eroganda. Officium huius Congregationis ipso nomine exprimitur : subuenit enim omnibus miseriis proximi ; nam in alendis pauperibus quorum nomina scripta habentur , maximè si sint honesti , multum expendit , visitat carcere mancipatos , egentes ibi sustentat ; si condemnentur , ad supplicium comitatur , eorum corpora siue potius ossa è patibulo solemnī processione delata , in die commemorationis omnium defunctorum , officio decantato , sepulturæ mandat , alit puellas pauperes in monasterio , ac postea honestis viris nuptas tradit ; alia denique huiusmodi misericordiæ , & pietatis officia exequitur.

Denique ad hoc optimum regimen pertinet tribunal sanctæ Inquisitionis , quo Christi Ecclesia purgatur erroribus , & fides maioribus incrementis dilatatur. In eo misericordia primum locum obtinet ; peccata enim infidelitatis , & alia ad hoc tribunal pertinentia , etiam enormissima , verè poenitentibus ac integrè confitentibus prima vice condonantur ; solum relapsi , & impœnitentes , ac inconfessi iuxta canones sacros puniuntur : quæ in illo tribunali succedunt , tanto manent sub secreto vt nihil vnquam de iis sciatur , nisi postea quando culpæ omnium reorum publicè leguntur , & sententia adhibita puniuntur. Est igitur in ciuitate Goensi palatium in platea Ecclesiæ maioris amplissimum , vbi Inquisitores habitant , ibique sunt carceres secretissimi , vbi rei custodiuntur , iuridicè interrogantur ; ac processus formantur factis processibus conueniunt Archiepiscopus , Inquisitores , ac Consultores deputati ad ferendam sententiam vnicuique Reo iuxta propria demerita : his ita terminatis , iubent Inquisitores ingens in aliqua Ecclesia , vel platea theatrum excitari , vbi sunt cathedræ pro Inquisitoribus ac deputatis Consultoribus , aliæ separatæ pro Archiepiscopo & Prorege , quando assistunt : in alia theatri extremitate

sunt scamna paulatim insurgentia pro reis; in plano verò alia scamna pro assistentibus præsertim Religiosis: in medio erigitur altare, in quo tria collocantur missalia, in quibus plurimi rei iubentur iurare se in eadem crimina non relapsuros: hîc prope est pulpitum ad concionem habendam adueniente determinato die, ac in omnibus Ecclesiis intimato (qui ordinariè est dies Dominicus, quò plures assistant) in quo nulla in aliis Ecclesiis habetur concio, summo mane ordinatur processio; præeunt Patres sancti Dominici cum vexillo, in quo ex vna parte est Crux, ex alia imago sancti Petri martyris: Deinde est alia Crux à Clericis delata, quam sequuntur Rei suo ordine; ita vt qui leuiores commiserunt culpas, priores incedant; qui verò graues subsequantur: quando procedendum est, qui fert vexillum alta voce decantat; *Vivat nostra sancta Fides*; alij genuflectentes respondent; *Vivat*: sic processio mouetur, procedunt rei pedibus nudis, ac detecto capite, accensam præ manibus habentes candelam, si Christiani sint; à latere sinistro assistit cuilibet quidam vir honestus, ab Inquisitoribus ad id deputatus, misso ad eum baculo quem gestat si qui grauissimas commiserint culpas, quibus mortem mereantur; & tamen ob pœnitentiâ ac propriam confessionem ei remittantur, habitu pœnitentiæ dicto sancti Benedicti flauî coloris, crucem rubeam ante & retrò, adinstar crucis sancti Andreæ, habente; cooperti vsque ad medium corpus incedunt: si autem aliqui iam ad ignem damnati, vltimis diebus pœnitendo veniam consequantur, non crucem in illo habitu, sed depictas gerit flammâs. Post hos omnes succedunt mulieres eodem ordine. Si aliqui, vel quia obstinati, aut inconfessi, aut relapsi, brachio sæculari relaxandi sunt, gestant eundem pœnitentiæ habitum, in quo non solum flammæ, sed & vera eorum effigies inter flammâs depicta est; subtus verò crimina, nomen, pa-

tria, & similia descripta sunt: quòd si sint obstinati, aut impœnitentes, circa eius effigiem Dæmones depinguntur: post eorum mortem hic habitus, simul cum aliis, in Ecclesia Sancti Dominici suo ordine expanduntur: habent semper assistentem Confessarium, qui eos morti disponat; Deuotissimus autem crucifixus ante eos immediatè defertur; vltimò tamen deferuntur ossa aliquorum comburenda, cum eorum statuis: si tali pœna Rei ante sententiam decesserint: Item libri hæretici: & tandem capsâ omnium reorum processus continens.

Postquam processio partem ciuitatis circuiens, ad locum iudicij peruenit, cunctis proprio loco sedentibus, incipit concio huic actui proportionata, qua finita ascendit suggestum Lector, eique processus sigillatim legendi traduntur, eo ordine quo inferius Rei ad gradus altaris adducuntur, vbi adstantibus & candelam præmanibus accensam gestantibus; incipit Lector his verbis: Processus Talis (nomen eius indicans) filij. N. nati in tali loco, qui reus præsens astat: postea summatim legit eius culpas, ac tandem sententiam contra eos latam promulgat; pro qualitate enim criminis quibusdam pœna carceris etiam perpetui, aliis pœna tritemium, aliis pœna verberis publici citra tamen sanguinis effusionem infligitur: alij denique ad opera publica, putà, domus pulueris, damnantur: Omnibus autem iniungitur, vt victus sui tempore reclusionis expensas soluant; illi autem qui maiora crimina commiserunt, bonis suis fisco adiudicatis priuantur Quia autem Rei ad numerum centenarium & vltra perueniunt, plures adhibentur Lectores sibi inuicem succedentes: hic enim actus à summo mane vsque ad noctem ordinariè perdurat.

Cùm iam alij omnes expediti sunt, accedunt illi qui igni adiudicandi sunt: vnde post lectas eorum culpas,

sublatâ omni emendationis spe (quod vel relapsus, vel impœnitentia , vel negata culparum confessio demonstrat) inuocato Christi Iesu nomine brachio sæculari traduntur ; sitque in fine protestatio , quòd Ecclesiastici illi Iudices non expetunt eorum mortem : sed potius petunt vt benignè ac piè tractentur:lectis eorum processibus Auditor generalis in criminalibus ; per suos lictores eos comprehendit. Tunc aliis Reis ad carceres redeuntibus , vt determinata pœna mulctentur : illi qui brachio sæculari traditi sunt , præcedente aliquorum clericorum Litanias B. Virginis pro eo decantantium processione , ad tribunal Senatorum sæcularium, qui statim congregantur vnâ cum Prorege, deducuntur; in quo visis eorû actibus ad ignem condemnantur : tunc eadem processione præeunte , ac Confessore sibi adstante ad locum supplicij eademmet nocte diriguntur : cuilibet reo paratus est rogas , siue strues lignorum pice illitorum, cui adhæret stipes à quo dependet funis, facta confessione rogam ascendunt, illo fune strangulantur , postea igne admoto omnes simul comburuntur. Quòd si aliquis pertinax in hæresi ac obstinatus , comburendus sit viuus , paratur lignum satis altum. inferius ligna multa adhibentur ; tunc reus super illud lignum eleuatus , duplicique catena in collo & in medio corporis alligatus, miserrimè & ingenti cruciatu igne viuus concrematur : hæc pauca pro multis in hac materia sufficiant.

C A P V T III.

De commercio Lusitanorum in Oriente.

Quia Lusitani primi nauigationem orientalem per Promontoriû bonæ spei , ductore Vasco de Gama Excellentissimo Nauarcho , postea creato Comite de Vidighieres sub Regno Serenissimi Regis Emmanuëlis.

lis magnis exantlatis periculis, laboribus, ac naufragiis adinuenerunt, siue restituerunt (sunt enim qui dicunt olim Ægypti Regem à mari rubro classem dimisisse, vt omnia Africæ littora perscrutaretur; cuius classis nauis vnica multa post tempora, tota superata Africa, mare Mediterraneum prope Hispaniam ingressa Alexandriam peruenit) propter hoc Rex Lusitanix post titulos suæ iurisdictionis, vocat se Dominum commercij Persidis, Indiæ, Chinæ, Æthiopix, ac totius pene Orientis, nec alias olim illuc accedere permittebat nationes, donec Lusitanis proprio Rege priuatis, ac potentia deficientibus Angli & Bataui, viribus maritimis superiores, illuc accesserunt: nec solum inuitis ac reluctantibus Lusitanis ibi commercium exercebant; sed etiam ipsos Lusitanos, ne illud exercerent, impediabant: imò se breui expulsuros, & cum fundamento iactabant: sed mutato Lusitanorum regimine omnia sub auspiciis noui Regis, & spiritualia, & temporalia: siue commercium animarum, ac aliarum mercium ibi floreunt.

In India venti sunt adeo regulares, vt quisque suo ordine, quotannis certis mensibus perfler; sciunt enim quibus mensibus versùs Austrum, quibus versùs Septentrionem, quibus versùs Occidentem & Orientem nauigare liceat: vnde rarissima audiuntur naufragia. Goæ omnes merces variis ex Orientis partibus congregantur, vt inde in nauibus maximis, quot annis mensibus Septembris aut Maij veniunt, Vlyssiponem transmittantur. Hæ naues sunt maximæ, septem aliquandò subordinatas habentes mansiones, aliquas vidi quolibet Gallione maximo duplo maiores, ordinariè sexaginta tormenta bellica maiora deferunt: quando in Indias profiscuntur, mille aut circiter homines vehunt, tam nautas, quàm milites in India mansuros: potius ibi videtur ciuitas, quàm nauis; omnium artium opifices ibi laborantes videre licet, diebus festis missa,
diui

diuinumque officium ordinariè decantatur, conciones habentur, musica auditur; Imò deficientibus ventis comedix repræsentantur. Præter victum tot hominibus, per sex & amplius menses qui in nauigatione consumuntur, necessarium (Rex enim & militibus & Religiosis ad missiones euntibus abundè prouidet) deferuntur plurima vini dolia, olei oliuarumque vasa in Indiis vendenda, aliæque similia; sed præcipuè deferuntur pecuniæ emendis mercibus Indicis necessariæ. Mense Martio Vlyssipone ordinariè discedunt, mense verò Septembri vel Octobri Goam perueniunt: si verò aliquandò venti deficient, & dictis mensibus appellere non possint; Mossambici remanent (sciunt enim sequentibus mensibus ventos orientales contrarios perflare) donec iterum rediuiuis occidentalibus mense Maio peruenire possint. Vix, qui non vidit, credere potest quantâ lætitiâ aduētus nauium excipitur; amēntes enim apparent homines hinc inde discurrentes, nuntia aliquandò fabulosa dispergentes: licet media nocte accedant, statim totius Ciuitatis campanæ iucundè personantes talem aduentum indicant, omnes surgunt; & varij hinc inde populi concursus & occurfus apparent; quod non solum apud sæculares, verum & apud quoscumque Religiosos obseruatur. Non mirum, cur tanta sit lætitia, primò enim de salute Regis gaudent; deinde de nuntiis; toto enim anno illis priuantur; denique quia omnibus vel pecuniæ, vel merces adueniunt.

Postquam naues appulerunt, illas exonerant; quod vix viginti diebus absoluitur; incredibile quippe est, quantum quælibet ex illis nauibus afferat: deinde reficiuntur, semper enim præ tempestatibus oceani aliquid detrimenti patiuntur: denique præparatis iam mercibus onerantur, non totaliter intra portum; onustæ siquidem vsque ad septuaginta palmos intra aquam descendunt;

cendunt : latera earum sunt crassissima , globulis tormentorum impenetrabilia , merces, quas deferunt, sunt immensa piperis copia in fundo navis loco lapidum onerariorum : piper est solius Regis, eius commercium omnibus aliis sub pœna mortis interdicitur ; aliæ infra describendæ, & tandem cinnamomi infinita congeries, faccis pelliceis inclusa : qui sacci hinc inde extra nauem penduli apparent , & ad medium arboris perueniunt : donec consumptis aquarum doliis ac contractis, in illorum loca cinnamomum immittatur ; vnde primis viginti nauigationis diebus , nec ignis in naui excitatur, nec magna expanduntur carbasa: omnibus iam absolutis, mense Febuario, vel in principio Martij, præsentæ ac iubente Prorege vela faciunt.

Commercium Lusitanorum in multas Regiones pertingit : nam primò in partem Africæ orientali Oceano adiacentem nauigant : vnde infinitam auri copiam, sicut & Eboris ac Hebani vilissimo coëmunt pretio ; interiorẽ enim Africæ partem per fluuios Quamæ, vbi Lusitani castrum Sofalam aliásque munitionulas habent , penetrantes ; ac naues onustas farina, vino, telis gozipinis, & globulis vitreis diuersi coloris deducunt; easdem auro, ebore, acebano, paruulis Æthiopibus, quos postea baptizant, plenas reducant : imò ab ipsis Æthiopibus irridentur, quòd vitæ necessària per tot locorum ac marium spatia , inter tot pericula ac naufragia ad se deferant, vt ea quæ tam vilia in illis locis censentur, reportent ; & meritò irriderent, nisi ipsi vilioribus, vt campanulis aliisque similibus illecti, pretiosiora prodigerent metalla ; ibi aer pessimus , aquæ melæ ; sed auri sacra fames mortalia cogit pectora.

Ex China etiam maximam auri copiam educunt; ibi enim aurum , vel adinstar panis , vel adinstar nauiculæ efformatum eruunt: inde etiam Moschum, pannos sericos pulcherrimos ; metalla, Tambac cupro non multum dissimil

diffimile sed pretiosius, & Calai, plumbo simillimum afferunt; sicut & lignum Chinenſe medicinale; ac tandem vaſa illa porcellana, quæ ad comedendum aptiſſima ac mundiſſima ſunt: licet alibi conficiantur ſimilia, non tamen ipſa in bonitate ac excellentia adæquare poſſunt: inter ipſa enim aliqua ita ſubtilia ſunt, vt transparentia ſint adinſtar Criſtalli; & tamen aquam calidiſſimam abſque læſione continent: materia ex qua conficiuntur, vt à naturalibus audiui, conſtat vt plurimum excremento humano; ſed per quinquaginta & amplius annos in terra ſepulto; dicunt enim quòd habent caueas his excipiendis deſtinatas, quas ubi compleuerint, terra deſuper iniecta contegunt, eaſque teſtamento ſuis relinquunt hæredibus, qui eas elapſo prædicto annorum numero aperiunt, & immunda hac materia, aliquibus aliis adhibitis, ad mundiſſima conficienda vaſa vtuntur.

Præterea ex ſinu Perſico infinitas afferunt gemmas, ex Regno Colconda pretioſiſſimos Adamantes, ex Pegu Rubinos, aliunde Smaragdos, aliòſque educunt lapillos: vidi coclearia ex vnico Smaragdo: Ex Ceylam habentur lapilli, qui propter ſimilitudinem, oculi Bouis, & alij oculi felis nominantur: plurimi etiam reperiuntur Topazij; ſunt etiam lapides medicinales magni pretij, vt Beſoarij, inter quos vidi maximos; meliores ſunt vel in Perſide vel in Regno Malaccæ: eſt & lapis Cananor, aliique multi: hæ ſunt merces quas in Luſitaniam mittunt Luſitani; inſuper maximam Algalix, & & ſuccini odoriferi ſive grifei, ſive nigri copiam: ſicut & clauorum odoriferorum, quos ex Moluccis Inſulis extrahunt: & nucum, quas vulgò muſcates vocant: illiùſque arboris flores quos Maciz vocant: mittunt & cornua Rhinocerotis, ex quibus pocula ad bibendum conficiuntur, in quibus immiſſum dignoſcitur venenum; ac proinde plurimum æſtimantur: plura vidi ad

tres aut quatuor palmos longa, crassa, ac in summitate acuta: ac tandem plura opera, vt serinia, mensas similiâque ex ebore ac ebauo, miro artificio, ac inenarrabili pulchritudine confecta.

CAPUT IV.

De aliis Christianis qui sunt in Indiis.

TRes aliæ, præter Lusitanos, reperiuntur in Indiis orientalibus Christianorum Catholicorum differentia. Non enim hîc agimus de Anglis, Danis, & Batauis, aliisque Europeis, qui illuc commercij causâ proficiscuntur; etiam si residentias; & Bataui vrbes, oppida, & castella possideant.

Primi Christiani, cæterisque antiquiores vocantur Christiani sancti Thomæ: quia se ab hoc primo Indiarum Apostolo ad fidem Christi conuersos, ad hæc usque tempora, non interrupta successione, perseuerare gloriantur: fides illorum diuersum statum habuit; nam in illo principio fuit purissima, deinde à puritate illa primæua deficiens, aliorum orientalium Christianorum erroribus infecta: denique post annos multos à Lusitanorum appulsu pristino fuit reddita nitore: subnigri sunt omnes coloris; in regno Cochîn, ad loca montana præcipuè, suas habent sedes; vnde ipsorum Archiepiscopus, qui Granganori manet, Archiepiscopus montis vocatur; ritum Catholicum in omnibus sequuntur, etsi aliquas ex antiquis obseruent cæremonias: habent Archidiaconum magnæ apud ipsos auctoritatis.

~~Secundi in ordine~~ Christiani, à secundo Indiarum Apostolo suam deriuant appellationem; vnde Christiani sancti Xauerij vulgò nominantur; quia illius præcipuè diligentia & studio, fidem Christi susceperunt: plurimi à Cruce cognomen accipiunt; eo quod quidam Dominus

Dominus à Cruce cognominatus ipsorum conuersioni principium dederit : in maritima regni Samorini ora commorantur , quorum instructioni & conseruationi Patres Iesuitæ sedulò inuigilant.

Tertij tandem sunt alij Christiani , in tota Lusitanorum Indica ditione diffusi ; iisdem in diuinis officiis Missæ sacrificio , ac Lusitani ritibus vtuntur ; quia verò non omnes Lusitanam linguam intelligunt ; propterea eis Parochi connaturales præficiuntur : quotannis plures è gentilibus ad Christi fidem conuertuntur , & licèt omnes religiosi ordines ad eorum conuersionem plurimùm laborent ; maiori tamen solemnitate Patres Iesuitæ in hoc procedunt ; vnum quippe è suis eligunt ; quem Christianorum Patrem vocant ; cuius officium in hoc præcipuè consistit , vt de nouo conuersos foueat , iuuet , & in fide conseruet ; deinde vt aliorum conuersionem procuret ; quod vt efficiat , autoritate Regia gentilium orphanos mortuis parentibus , ab aliorum societate separatos in vnum congregat locum ; vbi cum aliis , qui sponte iam adulti conuertuntur , Christianis instruit dogmatibus , & ritè instructos in solemnitate Conuersionis sancti Pauli , qui primæ eorum Ecclesiæ à sancto Francisco Xauerio fabricatæ titularis est , coram Prorege & toto populo baptizandos producit : qui omnes vestitu nouo , & aliqua pecuniæ summa donantur. Sed sicut Indiani faciliè ad Christi fidem conuertuntur ; sic ab ea faciliè peruertuntur , & nisi sacrae Inquisitionis rigorem timerent , quotidie fidem mutarent ; nec defunt , qui bis , aut ter sacramentum Baptismi susceperint , dicentes se magis esse Christianos aliis , qui semel tantùm illud susceperunt ; ad hanc autem in fide mutabilitatem plurimùm conducit , & aliorum gentilium , consanguineorum maximè familiaritas , & facilis ad gentilium terras proximas timore pœnæ transitus , dum aliquod crimen commiserunt.

CAPUT V.

De Armenis.

Quia diu cum Armenis, siue cum illis iter agendo, siue in Perside manendo, conuersatus sum: ideo ad eorum fidem, mores, & Politicam describendam accedam: pauca, sed certissima ex multis seligendo. Quantum ad fidem, Armeni Christiani sunt, sed ut plurimum schismatici: errores illorum præcipui sunt sequentes. Primus, quod licet Pontificem Romanum primum oranium Episcoporum agnoscant suum tamen, sicut & alios Patriarchas ipsi subditos esse negant. Secundus, Purgatorium negant; quamuis fateantur animas in alia vita pati tristitiam, & fidelium votis & orationibus ab illa solari; dicunt enim (quod tertius error est) animas gaudiis Paradisi, ac Dei visione non fruituras, nisi post diem Iudicii. Quartus tandem & maximus est circa Christum, in quo non duas, sed vnicam fatentur esse naturam; sed hic error, ut ipsi explicant potius in Theologia, quam in fide est, ex ignorantia tamen ipsorum procedens. Omnes alij Orientales Christiani irreconciliabile erga Nestorianos odium exercent: hi cum in Christo duas constituent personas, humanam quasi propriam; diuinam verò tantum in ipso velut in templo inhabitantem. Alij Christiani, ut nefarium hunc impugnent errorem, nescientes tamen distinctionem naturæ & personæ, in alium turpissimum incidunt: volentes enim duas in Christo negare personas, duas etiam in ipso naturas esse negant; sed ut dixi hic error, prout nunc ab illis tenetur, non est in ea extremitate, quâ erat prius: dicunt enim in Christo esse naturam Diuinam sine destructione humanæ, & humanam sine destructione Diuinæ, ac ex illis duabus tanquam partibus vnâ totalem componi: nimis adhærentes his verbis Symboli

Athanasij: sicut anima rationalis & caro, vnus est homo: ita Deus & homo vnus est Christus: quod tamen impossibile esse Theologi multis demonstrent rationibus, cum D. Thom. 3. part. quæst. 2. art. 1. sed eorum ignorantia parcendum est; nulla enim apud eos florent studia; soli scripturæ memoriter addiscendæ nauant operam: vnde ille doctior, qui plura eius loca in promptu referre potest; vnum ex suis, quem Philosophiæ studuisse iactabant, tanquam oraculum venerabantur: in illa autem epistola, quam supra dictum est ab ipsis summo Pontifici missam, asserunt hunc modum dicendi omninò cohærere Catholicorum confessioni, quæ duas in Christo naturas, non separatas, sed in persona Diuina constituit vnitas.

Priusquam cum ipsis ageremus, acerrimi erant huius sui erroris defensores, propterea sanctum Leonem Pontificem, cuius opera hic error in Concilio Calcedonensi fuerat condemnatus, inter Missarum solemnias anathematizabant: sed propter nos ab hoc nunc abstinere anathemate: Marcianum Imperatorem huius Concilij fautorem maledictis impetunt; inter alia verò, eum librum Euangeliorum in ignem propria manu coniecisse mentiuntur. In Canone Missæ Dioscorum hæreticum condemnatum inuocant, vt sanctum.

Non desunt tamen inter ipsos, qui suorum errorum veritatem agnoscant; tum ex consortio nostrorum, aliorumque Religiosorum; tum experientia; quam de Catholicis mercatores Armeni huc aduenientes habent: Episcopus præsertim ciuitatis Chulsæ, nomine Cachatur, id est Crucifer, qui sæpe à nostris sciscitatus est; vtrum sufficeret Catholicam fidem interius profiteri, non audens exterius à suis erroribus recedere, suæ nationi plus profuturum se dicens: sæpe nostris promiserunt Concilium indicere, vt inter nos ac ipsos concordia iniretur, cui volebant nos interesse: nunc

maximè

maximè id speratur ; cùm diligentia vnius Patris Dominici professio fidei , olim à sancto Gregorio illorum Apostolo facta , fuerit inuenta : vnde commoti ac inter se diuisi sunt Armeni.

Quantum ad mores attinet , Armeni non tam milites , quàm mercatores sunt ; totum pene discurrunt orbem ; hinc Massiliæ aliquos vidi , quos videram in Perside : in varias sunt dispersi regiones ac ciuitates , vix vna ex principalibus orientis ciuitatibus inuenitur , in qua non sint plures Armenorum familiae . Die Mercurij & die Veneris asperissimam seruant abstinentiam , sicut & tota quadragesima ; tunc enim non solum carne , ouis , & lacticiis abstinent , verum etiam piscibus ; imò & oleo ; hæc enim attingere nefas est vnde solum orizam , herbas , fructus , & legumina ; sed tamen quoties libuerit , comedunt : vnde non ieiunium , sed abstinentia debet iudicari : carnem in Sabatho manducant , quod tanta penè veneratione , ac Dominicum diem colunt : antiquas Ecclesiæ festiuitates celebrant ; sed quatuor præcipuè ; scilicet Natiuitatem Domini quam simul cum Epiphania decima sexta Ianuarij colunt , solent in illa processionaliter ad aliquem fluuium accedere , si loci commoditas id permittat , ibique aquam præterlabentem multis ceremoniis benedicunt , quam populus ex deuotione hauriens domum asportat . Secunda est festiuitas Dominicæ Resurrectionis . Tertia est festiuitas Transfigurationis . Quarta tandem sancti Gregorij illuminati sui Apostoli , cuius reliquias in monasterio Trium Ecclesiarum venerantur : ibique quendam liquorem ex floribus conficiunt , quem harum reliquiarum contactu sanctificatum per Armeniæ Ciuitates , & oppida diuidunt .

Quantum ad politicam , Armeni sequuntur leges illorum Principum , quorum Imperio subduntur ; non enim Regem Armenum manifestum habent : Imperator Turcarum , & Rex Persarum Armeniam sibi diuiserunt ;

quamuis secretum Regem habeant ex antiquorum Armeniæ Regum prosapia descendentem, quem Patriarcha secretò consecrat, vt ipsemet nostris Patribus indicauit, paucique sunt qui id nouerint. Patriarcha Armenorum se in spiritualibus absolutum, & absque vlla Pontifici Romano vel cuiumque alteri subordinatione credit; huic pene omnes Armenorum Episcopi obediunt; quamuis Hierosolymitanus, & alius prope Aleppum manens, se tanquam independentes gerant: Episcopi verò non habent Ciuitates & Ecclesias determinatas, sed ad nutum Patriarchæ transmutantur; soli vt plurimum Monachi fiunt Episcopi, cum enim Episcopi non possint esse coniugati, & Clerici sæculares nubant: inde est quod Episcopi tantum ex monachis assumuntur, sicut & ipse Patriarcha: Et hæc, ordinatiè loquendo, Patriarchæ electio fit ab Episcopis; sed à Rege Persidis cõfirmatur: sedes eius Patriarchalis est in monasterio Trium Ecclesiarum, vbi cū aliis habitat monachis, habitu monachorum supra descripto vtens; quauis solemnioribus diebus olosericas assumat vestes: sepelitur autem in monasterio Varac, in sepulchro recondito ipsis Patriarchis deputato: ipsum vidi, dum illum montem visitari.

C A P V T VI.

De Gracis.

Constat ex dictis libro 4. cap. 5. quanta fuerit Græcorum authoritas, dum Constantinopoli Imperatores Christiani residèrent: nunc quasi mancipia, Turcarum subiacent tyrannidi; vnde solum de eorum schismate & erroribus superest agendum.

Græci inter primos fidem Christi susceperunt: quod arrogantia ipsis ansam præbuit, grauiter ferentes subiecti Latinis in Christi fide iunioribus: vnde data schismatis causâ, ab illis in malum suum recesserunt, & cum

cùm schisma sit errorum seminarium, in plures postea sūt lapsi errores:quāvis inter ipsos multi sint Catholici.

Huius Græcorum schismatis radix assignatur, quòd anno Christi 854. celebratum fuerit Constantinopoli Concilium à S. Ignatio, Michaëlis Imperatoris filio, eiusdem ciuitatis Patriarcha: in quo Gregorius Episcopus Siracusanus condemnatus fuit hac conditione, quòd eius depositio à Romano Pontifice confirmaretur: hac sententia indignatus Gregorius totis viribus depositionem S. Ignatij Patriarchæ procurando obtinuit, eique Photium Eunuchum laicum & hæreticum subrogauit, qui tamen à Romano Pontifice condemnatus S. Ignatio cessit: sed ipso mortuo, iterum Patriarchalem sedem inuadit: hic in odium Ecclesiæ Romanæ, summique Pontificis, à quo fuerat condemnatus, schisma Græcorum procurat, pluresque seminat hæreses, quæ postea plurimùm creuerunt.

Cùm solius Ecclesiæ Catholicæ sit iudicare de rebus fidei, quæ solùm ex peculiari Sancti Spiritus assistentia definiri possunt: non mirum, si schismatici ab eadem Ecclesia separati, sicut Græci, in turpissimos labantur errores: quos hic breuiter referemus.

Primus & notissimus error Græcorum est circa processionem Spiritus Sancti, quem à solo Patre procedere contendebant: sed hic damnatur in symbolis Niceño, & S. Athanasij.

Secundus error, Gloriam sanctorum, & poenam damnatorum non statim post mortem secururam; sed vsque ad diem iudicij differendam affirmabant, sed hic damnatur in Concilio Florentino.

Tertius, negabant purgatorium, & consequenter iustitia viuorum pro mortuis irridebant.

Quartus, credebant matrimonium ad libitum dissolubile, & secundas nuptias viduis vt illicitas prohibebant; & simplicem fornicationem, vt licitam permittebant.

Quintus, prædicabant nullum esse peccatum res sacras vendere, pecuniã in vsurã dare, nec latrones & vsurarios ad restitutionẽ teneri; insuper licitum esse nocere inimicis, quantumuis mendacium, & periũrium interuenirer.

Sextus circa Baptismum, iterum baptizabant à Latinis baptizatos; non baptizabant pueros etiam in extremo periculo ante octauum diem.

Septimus circa Eucharistiam, asserebant non esse licitum consecrare in azimo, sed debere consecrari in fermentato; solum vinum nulla apposita aqua consecrandum esse, necessarium esse laicis communicare sub vtraque specie; malos in Eucharistia nõ recipere Corpus Christi; dandã esse Eucharistiam paruulis statim post Baptismum; Eucharistiam esse efficaciorum in die Cœnæ.

Octauus circa extremam vnctionem; ipsam enim asserebant nihil conferre ad salutem corporis.

Nonus, negabant Ecclesiam Romanam esse, primam, caput, & matrem aliarum, ipsique Constantinopolitanam præferebant.

Decimus, in pluribus ceremonias Iudaicas admittebant: circa abstinentiam à suffocatis, & aliis cibis in lege veteri interdictis.

Hi errores in Concilio Florentino penitus cessarunt: in quos postmodũ, renouato schismate, lapsi sint, incertum est, cum propter maximam omnium orientalium ignorantiam vix sciatur, in quibus nobiscum conueniãt, & in quibus discrepent: Græci autẽ non solum in Græcia, sed etiam in Syria & alibi commorantur: suosque errores ad longinquas etiam nationes effuderunt.

C A P V T VII.

De Nestorianis.

Nestorius Episcopus Constantinopolitanus suos incepit errores prædicare anno Domini 428. cuius

ius sectatores adhuc plurimi in Mesopotamia, Chaldea, & Arabia commorantes aliisque Christianis orientabilibus inuisi, ab ipso Nestoriani denominantur.

Hic Heresiarcha funesta morte decessit: nam damnatus à primo Concilio Ephesino anno Domini 431. in quo à Celestino I. Præses nominatus fuerat sanctus noster Cyrillus Patriarcha Alexandrinus, & in exilium eiectus in Insula Oasi, corrosa & consumpta vermibus eius blasphematrice lingua, miserè periit.

Plures fuerunt eius errores: sed præcipui quatuor. Primus & radix aliorum fuit, quòd Christus Dominus natus de Maria Virgine, non sit Deus, sed purus homo, qui in præmium sanctissimæ eius vitæ dignus iudicatus est, qui diuinati coniungeretur; non quidem hypostaticè, sed quia ipsa speciali modo inhabitantem haberet: propterea Iesus Christus non Deus sed Deifer ab ipso vocabatur; sicut Beatissima Virgo non mater Dei, sed mater Christi: vnde sicut in Christo duas naturas diuinam & humanam, sic duas in ipso ponebat personas.

Secundus fuit, quòd in Eucharistia contineatur vera Caro; non Dei, sed hominis puri iusti & sanctificati, qui est templum & habitatio Dei.

Tertius, Nestoriani in solo fermentato consecrantes, sub vtraque specie magnos & paruos communicabant, credentes Christum Dominum non æquè sub vna, ac sub vtraque specie contineri.

Quartus, fastidiebat Nestorius scripta sanctorum Patrum, suam autoritatè ipsis omnibus præferens: alij fuerunt eius errores, qui in discipulis ipsius hætenus perseverant.

Postquam in Concilio Ephesino, procurante tum scriptis, tum autoritate sua autoritate S. Cyrillo Carmelita Concilij præside declaratum fuit sanctissimam Virginem Mariam esse Dei matrem: addita sunt Angelicæ salutationi hæc verba, *Sancta Maria mater Dei ora pro nobis, &c.* quæ verba ex tunc in ore fidelium continuò resonabant.

CAPVT VIII.

De Iacobitis.

IAcobitæ, dicti alio nomine Syri, à quodam Iacobo Zanzalo Syro nomen & originem ducentes, in variis regionibus orientis adhuc perseuerant: hos sicut & Nestorianos vidi in Chaldæa, Perside, & Arabia: eorum Heresiarcha admodum vilis ex erroribus Eutichetis, Dioscori, Seueri & aliorum sua dogmata composuit.

Primus error Iacobitarum fuit, negare mysterium sanctissimæ Trinitatis, vnicam admittendo diuinam personam, in cuius signum vno tantum digito Crucem efformabant: ita referunt authores; sed non credo eos nunc in hoc esse errore.

Secundus, fundati dictis sancti Præcursoris Matthei 3. relatis (ipse baptizabit vos in spiritu & igne) suis paruulis ignito ferro Crucis signum in media fronte inurebant: cum tamen illa verba de aduentu Spiritus sancti in forma ignis sint intelligenda.

Tertius; etiam lactentes paruulos sub vtraque specie communicabant.

Quartus, confessionem sacramentalem sacerdoti factam damnabant, asserentes soli Deo esse confitendum:

Hic Iacobus principium fuit & origo omnium pene errorum quos Armenis attribuant Authores: quia tamen, præter adductos supra, in eis alios ~~non~~ aduertii; ideo ibi prætermittos, hic breuiter perstringam. Asserebant Christum resurrexisse in Sabatho; peccatum non à libero arbitrio, sed à solo Dæmone procedere; negabant peccatum originale; dicebant quòd perseuerante statu innocentie homines non fuissent per generationem, sed alio modo multiplicati; quòd ante Passionem Christi omnes damnabantur; negabant Sacramentis virtutem conferendi gratiam; res spirituales vendebant;

bant; paruulos fidelium sine baptifmate morientes ad Paradifum terreftrem tranfire, infidelium verò ad infernum defcendere dicebant; paruulos baptizatos communicabant; baptizatos in Ecclefia Romana iterum baptizabant; negabant matrimonium effe facramentum, & effe indiffolubile; ficut & pœnas inferni effe æternas; dicebant aliqua peccata effe irremiffibilia; Chriftum ad inferos defcendentem eduxiffe omnes damnatos; omnes in fexu virili refuscitandos: multos alios eis attribuunt errores; certum tamen eft plures ex modo relatis inter eos non vigere.

CAPUT IX.

De alijs Chriftianis Orientalibus.

VLtra prædictos plures alios in Oriente vidi Chriftianos: videlicet Maronitas in monte Libano, & tota Syria. Iberos vulgò *Georgiens* in Perfide, Cophos & Abiffinos in Ciuitate Baffora Arabiæ fœlicis.

Maronitæ Libani montis incolæ, de quibus fupra libro 3. cap. 2. dictum eft; à fâncto Marone deriuare & denominati dicuntur: anno Chrifti Domini 699. incipientes, procurante Aimerico Patriarcha Anthiocheno Ecclefie Romanæ fubduntur, eique, inter alios orientales Chriftianos, vniti foli perfeuerant: videantur quæ de ipfis loco citato dicta funt.

Iberi funt populi Chriftiani propè mare Cafpium, à quibus non longè diftant alij dicti Circaffi, fortè Hircani, vtrique Græcorum erroribus infecti: Iberia prius Regi proprio fubiecta, nunc à Perfis cum præcipua Ciuitate Teffis capta in aliquot principatus diuifa eft: eius populi funt milites ftrenui: vnde Rex Perfarum femp̃r duodecim millia captiuorum habet: ex quibus exercitus Perfici neruus conftat.

Cophiti, fiue Chriftiani Ægyptij Patriarchæ Alexandrino

xandrino subditi plures aliorum orientalium Schismaticorum errores sequuntur : nam unicam in Christo Domino admittunt naturam , voluntatem , & operationem : negant etiam in extremo vitæ periculo paruulis baptismum ante quadragesimum ætatis diem : statimque eis sacramentum Confirmationis , & Eucharistiæ administrant; olim omnes circumcidebantur ; nunc verò Alexandriæ , & Mëmphi , siue Cæiri non circumcidentur , sed à parentibus signo Crucis in fronte , vel manu signantur , vt tanquam Christiani dignoscantur. Concilium Chalcedonense , & sanctum Leonem Pontificem expressè damnant , ac similes profitentur errores.

Abyssini , siue Æthiopes sub imperio Regis potentissimi ; quem Europei Presbyterum Ioannem vocant , in Africa degunt , de quibus fusè agunt Franciscus Aluares in sua Legatione , & Damianus à Goës in libello de rebus Æthiopicis ad Clementem VII. plura vtriusque sexus habent monasteria. Pene omnes Cophthorum sibi vicinorum errores amplexati sunt , Concilium Chalcedonense non admittunt ; matrimonia faciliè dissolunt , simul cum Baptismo Circumcisionem colunt ; quam quidem suscipiunt , non vt necessariam ad salutem , sed tantum ad perfectam Christi imitationem , quam hoc moriuo aliqui authores licitam dicunt , alij verò sub quocumque prætextu probant esse illicitam. Credunt etiam Abissini animas rationales non creari , sed per seminalem propagationem traduci eo modo , quo animas brutorum : tenent animas infantium sine baptismo decedentium eo ipso saluari , quia nati sunt à parentibus fidelibus ; quia virtus Eucharistiæ à matre prægnante susceptæ , prodest infanti in utero existentis ; alij plures errores ipsis attribuuntur.



LIBER SEXTVS ITINERARII

In quo

Agitur de variis sectis Infidelium
Orientalium.

CAPVT PRIMVM.

De lege, moribus, ac politica Turcarum.

DV M Aleppi opportunitatem vltcrius procedendi expectaremus; non pauca de lege, moribus, ac politica Turcarum didicimus, quæ hîc sigillatim, sed cursim breuitati semper studentes pertractabimus. Lex Turcarum condita fuit à pessimo omnium, qui hætenus fuerunt, Pseudopropheta Mahometto, qui primò ductor camelorum, dolo postea Propheta creditus ac Rex creatus plurimam orientis partem nefaria sua lege peruerit.

Lex Turcarum, tum ex Christianis, tum ex Iudaicis dogmatibus collecta est, sicque Mahometh omnia omnibus factus est, vt omnes perderet. Propter Iudæos circumcicionem introduxit, sicut & abstinentiam à porco & aliis: non tamen Sabathum celebrat, sed diem Veneris. Propter Christianos verò optimè de Christo ac Beatissima Virgine locutus est: Christum non quidem

dem Dei filium, sed tamen magnum Prophetam asse-
 rens, cuius legem aliquando fuisse bonam dixit, sicut
 & Mosaicam; utramque tamen expirasse, sua in orbe pro-
 mulgata, quam non rationibus, sed armis iuber defendi.
 Mirum est quot absurda ac turpia cōtineat: docet para-
 disum non alias quàm corporales habiturum lætities;
 quas tamen animalis homo, quæ Dei sunt ignorans, spi-
 ritualibus præfert delitiis: poligamiam permittit, unde
 non tam vxores quàm concubinas habent, maximè
 quia facilè dant illis repudium: apud Turcas sodomia,
 imò & bestialitas ita permittitur, vt parum absit quin
 publicè sicut bestię illis vacent; quin imò, quandò ali-
 quis Christianus in regno Sindi legem Mahometanam
 amplectitur, similia cogitur committere; ne vltra ad
 Christianos, formidine pœnæ his sceleribus debitæ,
 redire præsumat: fatum admittunt, unde nec pericula
 multum vitant, nec multum de euentibus commouen-
 tur: dicunt in porta paradisi sitam esse arborem maxi-
 mam, cuius vmbra ad multas leucas pertingere fabu-
 lantur, in foliis eius scripta esse dicunt omnium mor-
 talium nomina, unde quando quis de nouo nascitur,
 nouum quoque nasci folium arbitrantur; quotidie verò
 vnus angelus ad hoc destinatus arborem illam excutit,
 folia quę decidūt à morte colliguntur, nomina inscripta
 respicit, eosque rapit quorum sunt nomina: asserunt
 etiam in paradiso aliqua reperiri animalia; hoc cum
 mihi quodam die vnus è nostris Patribus retulisset, &
 hanc ego ineptiam riderem, accidit vt domum nostram
 intraret quidam inter ipsos grauis & doctus, qui illud
 sua autoritate confirmauit, dicens in paradiso esse asi-
 num qui Christum Dominum baiulauit, camelum Ma-
 hometis, formicam Salomonis, canem quendam ciui-
 tatis Mechæ, & septem alia animalia. Christum Domi-
 num negant fuisse à Iudæis occisum; dicunt enim, quòd
 tunc, quandò Iudæi voluerunt illum occidere, à Deo

translatus fuit, & eius loco phantasma oblatum, indignum dignitate Christi reputantes, quòd morte Crucis trucidatus fuerit: multas alias sectantur fabellas. Faciunt professionem suæ legis pronuntiando verba sequentia: *Non est Deus nisi Deus, Mahometi Apostolus Dei*: hanc sapissime faciunt, & maximè tempore Circumcisionis; propterea non circumciduntur pueri nisi post vsum rationis: circumcisionem puerorum magna solemnitate ac iucunditate celebrant; conuiuia enim amicis & consanguineis parant; solemnius tamen celebrant circa illos qui ex aliis sectis ad illorum legem accedunt; equitantes enim magno cum tubarum & timpanorum comitatu per urbem circunducuntur, sagittam præ manibus ferentes, in signum quòd legem illam Armis defendent.

Bona opera faciunt, vt videantur ab hominibus; in publico enim orant, modò stantes, modò genuflexi; plurimas inclinationes ac prostrationes faciendo: exterius multas faciunt orationes iaculatorias, & tam frequenter vt Deum præ oculis habere videantur: rosarium recitant, sed in quolibet grano vnicum proferunt vocabulum, exprimens aliquod diuinum attributum, vt *Misericordia, Iustitia*, & ita breuissimo percurrunt intervallo. Trigesimalam ieiunij obseruant, idest ab vno nouilunio ad aliud, tunc tota die nec edunt, nec bibunt; imo aliqui nec saluam deglutiunt: sed apparente prima stella comedunt, & in commensationibus tota nocte perseuerant, carnes & quæcunque alia edere licet; vnde noctem in diem, & diem conuertunt in noctem: insuper noctu larvati incedunt, vnde potius Bacchanalia, quàm dies penitentiae videntur.

Aliquas instituunt peregrinationes, scilicet ad Heliam prope Babylonem vbi dicunt esse corpus Ali; ad Mecham vbi est templum ita apud illos celebre, vt sanctum sanctorum credant: cum autem, dum essem Babilonem,

foræ, partem eius cecidisse nunciatum fuisset, multi clamare cœperunt, eorum legem tendere ad interitum: Mecha est patria Mahometh, vnde multis gaudent priuilegiis, qui ad illam accedunt, & vocantur Agi, forte à nomine Græco Agios, id est sanctus; & tandem ad sanctum Christi Sepulchrum. Aliqui ex his peregrinis, post quam hæc loca viderunt, opposites oculis laminam ignitam sibi visum adimunt, dicentes rem esse indecentem, vt oculi videant alia, postquam supradicta viderunt: ex Mecha solent afferre aliquos lapides, quos iuxta se ponunt dum orant.

Sua habent templa; non tamen in eis imagines ponunt, credentes illas esse idola; sed vel collocant lanceam in memoriam Ali, vel ensen in memoriam Mahometh, vel aliquas sententias magnis characteribus exprimunt. Iuxta templa erigunt turres altissimas, vt plurimum rotundas, quas bis aut ter in die aliqui ad hoc deputati conscendunt, indeque elata voce clamantes alios ad orationem excitant: faciunt etiam aquarum receptacula, vbi faciem, manus, pedesque lauant antequam ad orandum accedant: suos quoque habent religiosos, sed non multum laudabiles, nec ab ipsis laudatos; sceleratè quippe vt plurimum viuunt, religiosos verò Christianos æstimant, eorum vitam considerando.

Non in templis mortuos sepeliunt, sed extra ciuitatem more Iudæorum, iuxta aliquam viam publicam, tum vt illac transeuntes pro defunctis exorent, tum vt tumulos videntes mortis recordentur: mortuos tangere nefas est, & destinatos ad eorum lauanda corpora habent homines, quos vilissimos tenent; & magna renetur iniuria, si quis lauator mortuorum vocetur. Dum Turcæ ad extremum vitæ periculum perueniunt, tibicines introducuntur, qui magnum suis instrumentis tumultum excitant; & sic miseros ex his miseriis ad

maiores dimittunt, ex quibus constat quàm sint antiquitatis obseruatores.

Quantùm ad mores; Turcæ sunt admodum arrogantes aliòsque omnes superbiendo despiciunt; non secus ac si essent canes. Sunt crudelissimi in administranda iustitia; nec plus vitam hominis, quàm alicuius bruti æstimant: inde est quòd crudelia reis destinant supplicia: sunt inimici canum, dicunt enim Angelos Dei non ingressuros domum illam, in qua canis, aut campana sit: sunt admodum desidiosi, vt plurimum ignauia torpent quæ multorum est alina scelerum: nec ipsi efficiunt tapetes aut eximia alia opera, quæ ex Turchia asportantur, hæc enim omnia veniunt ex Perside: scholas rarò frequentant; solùm enim legere & scribere addiscunt, nulla quippe Philosophiæ, aut Medicinæ, aliarumque scientiarum studia apud eos vigent: vestes eorum non multùm differunt ab aliis orientalibus, quas hîc notas ac sæpe visas non describo.

Illorum Imperator vocatur Sultan, qui Constantinopoli sedem habet Imperij: supremum ac despoticum in suos exercet dominiũ: vnde non tanquam clientes; sed tanquam captiuos gubernat, & tyrannicum administrat Imperium: quod iubet sine vllò discursu subditi exequuntur; etiamsi grauissimum sit quod iubetur: tributa imponit intolerabilia, quæ etiam pauperissimi soluere tenentur, & alicubi non solùm pro bonis, sed pro se solunt. Ipse Imperator est vniuersalis hæres; nam domos, quas pulchras videt, aliæque prædia, imò & omnia bona vt plurimùm contra iustitiam vsurpat: & inde est, quòd apud illos domus ordinariæ belluarum cauernæ videantur: aliter enim suis filiis eas relinquere non possent; ex quo procedit, quòd non sunt pulchræ apud illos ciuitates; Imperatoris consuetudinem alij Gubernatores imitantur, qui eas prouincias, ad quas regendas mittuntur, omninò destruunt; propterea rara inueniuntur

inueniuntur oppida, omnes enim ad ciuitates confugiunt, in quibus suam tyrannidem ita liberè exercere non possunt: multi ex his propter similia capite plectuntur. Inter Gubernatores ciuitatum sunt aliqui principales, & manent in ciuitatibus capitalibus regnorum: hi supra totum regnum, aliósque Gubernatores aliquam habent iurisdictionem; vnde Proreges nominari possunt, huiusmodi sunt Gubernator Memphis vulgò *grand Caire* in Ægypto, Gubernator Damasci, Gubernator Babylonis, & aliqui alij.

Imperator suos solet occidere fratres, vel in castris munitissimis recludere, nec apud Turcas hoc fratricidium abhorretur cùm necessarium asserant ad rectum sui regimen Imperij; timent enim, ne si multi essent Principes sanguinis Regij, rebelliones apud eos suscitarentur: & ita nulli sunt Principes; sed ex infima plebe creantur, propterea non tam nobilitas, quàm pecuniæ in toto ferè Oriente æstimantur: maximè commendantur captiui Imperatoris, qui vt plurimum sunt milites & vocantur *Ianisseri*; hi sunt filij Christianorum; in quibusdam quippe regnis sibi primogenitum in tributum extorquet, in lege Mahometana postea educantur, & sunt Christianorum hostes infensissimi, ac omnium Turcarum pessimi; inter se verò vnitissimi; vnde qui vnum lædit, omnes lædit, eiúsque iniuriam omnes vliscantur: non est qui horum insolentiam cohibere possit, suum habent Præfectum, qui maximis gaudet priuilegiis, nec aliis subest Gubernatoribus: alij sunt milites sed equites, quos *Asphainos* vocant: sunt hi nobiliores, sed non tantæ potentiæ.

In Turchia est magnus Visir, qui Constantinopoli propè Imperatorem commoratur, hic omnibus alijs præsidet ministris, & omnia ex eius arbitrio dependent: sæpe tamen, more aliorum, si errauerit, capite plectitur: sunt etiam Iudices, ad administrandam iustitiam

tiam deputati, qui difficillimas causas, ac lites nullo processu prævio, vnica voce concludunt, hos vocant Caddi. Habent Turcæ in spiritualibus suos præsides, quos Mophti vocant. Non amplius his immorandum est; si enim omnia Turcarum officia, mores aliæque ad eos pertinentia exprimenda essent, longo discursu indigerent: sed hæc pauca sufficiant, vt quæ sit eorum religio, lex, mores, & politica dignoscatur.

CAPUT II.

De Moribus, & politica Arabum.

Non omnes comprehendimus nomine Arabum, qui lingua loquuntur Arabica; hæc enim ab vltimis Arabiæ feclicis propè Indiam orientalem terminis; vsque ad regnum Marroco, scilicet in triplici Arabia, Ægypto, Mauritania, pluribusque insulis etiam Melita in vsu habetur: sed solos qui Arabiam inhabitant.

Hi eandem, quam reliqui Mahometani, sequuntur legem, & religionem: si mores attendas, Arabes sunt natura feroces, latrociniis addictissimi: nullum occidunt nisi resistentem, at omnes ad nudum spoliant: sed hæc præcipuè conueniunt illis, qui errabundi vastissimum percurrunt desertum, consuetudine tamen mitescunt: omnia, quæ vident, appetunt & petunt; si verò negetur, furari conantur: si alicubi comedentes inspiciant, accedunt etiam non inuitati, simulque discumbunt.

Vestes ipsorum non sunt aliis communes: caput enim birreto, telis subtilioribus candidis, pluribus gyris circumuoluto, sicut cæteri orientales operiunt: sed nisi telarum gyri à parte dextera infra aurem magis demittuntur: indusium ex tela portant, manicis latè patentibus, quas vbi pugnandum est, supra humeros reflectentes facto nodo coniungunt: supra indusium

aliam habent vestem ordinariè candidam, ad genua pertingentem, cuius manicæ non ad eò latæ usque ad cubitos tantum perveniunt: pallium insuper, quod *abba* vocant, vel nigrum vel griseum portant: zonas coriaceas latitudine vnius palmi renibus constringendis apponunt, ex qua Arabes, qui per desertum vagantur, cultrum, coclear, & bursam ubi omnia continentur ad ignem excutiendum necessaria habent pendula, qui similiter, ne frigore aut nimio calore fatigentur, crispa nigra genas & mentum cooperiunt: suis sicut alij vtuntur tibialibus & calceis.

Arabes desertum incolentes, maximè qui se latrociniiis addicunt, lanceas deferunt & equas cursu velocissimas ascendunt; in Arabia enim robustissimi nascuntur equi maximi pretij, qui per biduum obtinentes continuò currere dicuntur: si quando autem turmas mercatorum insiliant, hoc apud ipsos receptum est; vt ex eo, quo ventus spirat, parte aggrediantur, ne pulvere equorum cursu concitato aspergantur: si quis autem longè venientes respicit Arabes, & an latrones sint desiderat nosse, statim obuiam procedit, & equum supra quem sedet, in gyrum vertit: si alter idem faciat, non fur est, sed amicus: si aliquandò contigerit, furatos aut raptos fuisse ab Arabibus commeatus mercatorum camelos statuto redemptos pretio solent restituere.

Vescuntur in deserto Arabes ouium, bouum, caprarum, & aliquandò camelorum carnibus aliisque venationibus; lacte acetoso, triticeo pane, & oriza, necnon & propriis illius terræ fructibus; sunt enim quotidianus, maximè in Arabia foelici cibus: sed Arabes littora sinus Persici incolentes, vix aliud præter palmarum fructus, & pisces ad Solem, qui ibi calidissimus omnia torret, exsiccatos edunt.

Maxima veneratione nouilunium celebrant: nam & trigessimale suum ieiunium in nouilunio incipiunt, &

terminant in sequenti: in illo tota die, non solum à cibo, sed etiam à potu abstinent; imò aliqui nec propriam deglutiunt salinam, sed statim ac prima comparet stella, quidquid voluerint, & quoties, ac quantum potuerint, usque ad sequentem diem comedere possunt; & ita ieiunium in hoc tactum consistit, ut diem in noctem, & noctem in diem conuertant; tota enim nocte comedunt, & bacchanalia agunt; die verò tota dormiunt: ut etiam dictum est de Turcis, adueniente verò nouilunio, quod ieiunium terminat, maximas celebrant festiuitates. Contigit nobis desertum transeuntibus hoc nouilunium, quo omnes comineatus Arabes districtis ensibus plurimam noctis partem duxerunt insomnem: si quando autem Lunæ ecclipsim animaduertant, omnes assumunt vasa ænea aut ferrea, & simul percutientes maximum edunt strepitum, quo Sol & Luna, à mutua pugna (credunt enim inter se tunc pugnare) desistant.

In prouincia Bassorensi ad ripas fluminis, hospitalitatem erga iter agentes magnis beneuolentiæ signis exercent: dicam quid mihi, meisque sociis acciderit: veniebam è Perside, defecerat viaticum; sexdecim enim diebus propter contrarios ventos continuò flantes tantum confeceramus iter, quod vno die vento secundo conficitur: vnde deficiente pane, imò & aqua, penè consumpti fame & siti eramus: statim ac ostium Euphratis & Tygris ingressi fuimus, ad quoddam oppidum accessimus, ut nostræ subueniremus necessitati: subito nobis offertur panis, lac, dactili, & alia quæ tunc temporis reperiebantur; cumque ad libitum his vescerentur famem expulissimus; plura alia ad reliquum itineris conhciendum exposcentibus nobis, cuncta breui parata obtulerunt: nec vllò modo induci potuerunt, ut oblatum à me pretium illorum acceptarent: dixerunt enim se hospitalitatem erga omnes exercere transeun-

tes; vnde ne illorum vrbani-
tate vincerer; pueris quan-
tū pecuniæ credidi necessarium
recedens dedi: & hoc non
semel sed sæpe nobis euenit.

C A P V T III.

De lege, moribus, & Politica, Persarum.

COnueniunt in lege omnes Mahometani, & in ri-
tibus in Alcorano præscriptis: sed ob diuersam
aliquorum interpretationem Turcæ, & Persæ se mutuò
vocant hæreticos; principalis eorum differentia in hoc
sita est, quòd Turcæ Homar Mahometi successorem
tanquam Dei Prophetam maximum venerantur: Persæ
verò illum tanquam tyrannum abominantur; dicunt
enim quòd Hali post Mahometh regnum debebatur
iure hæreditario; quod tamen sibi Homar per nefas
vsurpauit: & hæc indignatio Persarum contra Homar
eò deuenit, vt primum quod paruulos legere & scribe-
re docent, sit quædam maledictio, & abominatio con-
tra illum, eiúsque sectatores: Hali verò summopere
venerantur.

Non sunt Persæ tanto suæ legis zelo pleni, sicut Tur-
cæ: cū enim ad nos veniunt, ac de nostra & sua lege
sciscitantur (sunt enim maximè curiosi) cum omni li-
bertate respondemus, falsam esse eorum legem, & fal-
sum esse Mahometh eorum prophetam, nec responso
indignantur; sed potius mirantur, cur nos malè de Ma-
hometh loquamur, cū tamen ipse de Christo fuerit
optimè locutus. Hæc autem apud Turcas citra pœnam
capitis responderi non possent. Ieiunium, non prima
die Lunæ, sicut Turcæ, incipiunt aut dissoluunt; sed
prima die qua Luna apparet: publicè vinum bibunt,
quod non faciunt Turcæ; imò Cha Abbas dicebat il-
lum non esse laudabilem, qui vinum non biberat: ce-
lebrant pes plures dies quandam festiuitatem, quam
vocant

vocant Sausen: hoc enim nomen est cuiusdam illorum falsi prophetae, qui ab inimicis occisus est: illis autem diebus multi iuvenes ciuitatem percurrentes fustibus armati, Sausen mœsta ac lugubri voce identidem inclamant: præcipua autem celebritatis die in maxima Aspahani platea theatrum componunt, vbi & fere trum aptant: tunc præsentē Rege lugubri veste induto, ac assistentibus ei regni Magnatibus, & infinita populi multitudine, quidam illorum Doctor totam mortis Sausen historiam voce lugubri recitat; cūque totam finierit narrationem, omnes astantes lachrymabiles eleuant voces, pectoraque percutiunt: postea multi iuvenes mutuo lapidibus pugnant, & ille beatus ac martyr reputatur, qui in illo prælio percussus obierit; illum enim maxima pompa deferunt ad sepulchrum: semper aliqui quotannis interficiuntur: apud Arabes eandem vidī festiuitatem celebrari.

Quantum ad mores attinet, Persæ vt in plurimum sunt affabiles, amici extraneorum, quos Regis hospites vocant: sunt valde curiosi, & ita faciles & idonei conuersioni, si eis permitteretur: lingua eorum est suauissima, illorum moribus conueniens: apud Reges Indos est celeberrima; in curia quippe magni Mogoris vt vulgaris habetur: in curia autem regis Persidis lingua Turcica præualuit; cū enim Regum familia ex Ardeuilla, vbi vulgus Turcico loquitur idiomate, processerit; inde est quoddam tale idioma, in memoria prædecessorum, in eorum curia perseverat: Persæ optimi sunt equites, equo siquidem corrente sagittas emittunt, easque in terra colligunt: maxime sunt laboriosi; nam præter agriculturam, aliosque labores ad vsum vitæ necessarios, pannos olivarios ac ex auro, argento, & serico intertextos conficiunt; sicut & tapetes, tum ex lana, tum ex serico contextos. Quia Regis Abbas sæpe mentionem fecimus, utpote qui Imperium Persarum plurimum dila-

tauerit, operæ pretium est, vt aliquid de eo dicatur: fuit vir maximi iudicij, vt ex rebus gestis apparet, suum magno rigore populum regebat, vnde faciliè & grauiter delinquentes puniebat: aliquandò patres nostros interrogauit, quomodo Christiani Principes suos clientes regerent; cui cùm responsum fuisset; non tatum apud Christianos exerceri rigorẽ, subiunxit: vestri Principes regunt homines, ego bestias: fuit crudelissimus multos enim sine causa ad libitum interfecit: quadam die ceperat castellum, eiusque gubernatorem occiderat; cumque duos paruulos eius filios aduertisset, adduci iussit, aliquandiu eis blanditus est, deinde accepto cultro propria manu abscisso collo confodit; conuersus ad nostros patres de tali spectaculo attonitos, ac horroris plenos ait, hi paruuli semper præ oculis mortem sui patris haberent, & fortè vlciscerentur: sed non mirum, si crudelis in alios fuerit; cum in proprios filios fuerit crudelissimus; fertur enim quod multos recenter natos iusserit occidi. Quid egerit erga suum primogenitum toti innotuit mundo: is erat bonæ indolis, patri addictissimus; & propter hoc pœna capitis plectitur ab illo, vnde laudari, & amari ampliùs ab ipso inueruat: magnates regni seueritate patris indignati patrem occidẽre; ipsum verò regem constituere decreuerant: reluctatur ipse vt bonus filius; imò coniurationem patri reuelat; is prima vice gratias filio agit; cum autem id iterum accidisset, iussit filio caput amputari; volens sic radicem coniurationis extirpare; imò dixit aliquando, se occisurum centum filios si haberet, vt vno die amplius regnare posset maximè rationes status nouerat, suumque regnum tali rigore optimè composuerat, familiarissimè eggerat cum nostris Patribus de religione disputans; vnde apprimè fidei nostræ dogmata callebat: iisdem patribus, quos tanquam Pontificis legatos admiserat, plurima contulit priuilegia, & beneficia, vt infra dicetur; & præcipuo
semper

semper habuit in honore: imò quando capta Babylone pompa triumphali Aspahanum ingrediebatur, duos è nostris Patribus sibi proximos habebat.

Quantùm denique ad politicam spectat, Rex illorum, quem Cha nominant, absoluto & despotico regit illos Imperio, sicut & alij Infidelium Principes: cui omnes inauditum præstant obsequium: ibi Principes vocantur Mirza; duces & prouinciarum gubernatores denominantur Kan: ipsi absolutè tanquam veri Domini prouincias administrant; tributum tamen à Rege taxatum soluunt, & tempore belli determinata militum millia suis redditibus in exercitu regio sustentant: administrator Gazæ regiæ dicitur Visir, qui etiam Aspahanum gubernat, dum Rex abest: Iudices dicuntur Darogo, hi vno die solis fustibus, & multa pecuniaria implicatissimas etiam dirimunt lites; vnde nec causidicis siue aduocatis, nec notariis egent: qui enim alium accusare vult, debet reum & testes simul adducere, qui voce tenus deponentes nihil in scriptis relinquunt. Illorum Episcopi vocantur Mophti, qui circa legalia maximæ sunt authoritatis; Vicarius, vt ita dicam, generalis nominatur Cadi, eius est administrare matrimonia, autenticas suo sigillo & subscriptione reddere scripturas; illorum Doctores vocantur Moula, ipsorum autem doctrina in notitia linguæ Arabicæ, & in cognitione fabularum sui Alcorani consistit; quamuis præcipuè Syrafi publicas moderentur scholas, vbi aliquid Philosophiæ, imperfectè tamen addiscitur: solent hi etiam mittere sortes circa futura dignoscenda, hisque multam adhibent fidem habent suos religiosos, quos Deruise siue Calenter nominant; qui non viuunt in communitate, nec viuunt apud Turcas; sed diuagantur per ciuitates, & sola pelle aut aliis vestibus induti, quæ potius ad risum, quàm ad deuotionem excitant.

Lingua Persica est suauissima & facillima, descen-

dens ex Arabica ; similis ei in vocabulis , sed in modo pronuntiandi dissimilis ; urbanos illorum mores, ac naturam humanissimam sua exprimens dulcedine ; sicut nimia linguæ Arabicæ ruditas Arabum feritatem, & nimia Turcicæ grauitas Turcarum exprimit arrogantiam. Quædam mirabilia in Perside videntur: homines quippe nent , mulieres terram fodiunt , ac instar hominum ordinariè equitant parietes fiunt ex lapidibus, clauces ex ligno.

Persæ maxima tenentur erga suas vxores zelotipia : propterea in suis domibus , ad interiorē illarum partem , pro eis habitacula construunt , vbi perpetuo quasi carceri mancipatæ morantur: nullus homo; nisi fortè sit eunuchus, illuc ingreditur; idèd *Aràm* id est locus prohibitus nominatur : quòd si iter agent , & suas vxores velint ducere, illas in cunis ex omni parte contextis, supra camelos imponunt , sunt homines qui eos præcedant, quique omnes iter agentes obuiam repositos è via cogant recedere : sed hoc maiori diligentia obseruatur, quando Rex suas deducit mulieres, aliqui enim ex eunuchis, quos ad mulierum custodiam & seruitium adhibet, multo tempore illas præcedunt, qui admonent iter agentes, ne vltra procedant, sed ab illa recedant via : deinde antequam ipsæ compareant, alij præcedunt, qui ab itinere remoueant illos, qui fortuito irrepsierint : sed tertij, qui illas immediatè præcedunt, quoscumque obuios repererint , fustibus cedunt ; & ni recedant , protinus occidunt.

Iisdem pene vestibus vtuntur Persæ, quibus alij Mahometani : sed præ aliis caput maximè ornant, telisque sericis auro & argento variegatis contegunt ; cùm tamen alij Mahometani telis gossipij tenuissimis tantum vtantur : illud etiam cingulum , quo renes præcingunt, est maximi pretij , & in his duobus eorum vanitas apparet : aliæ enim vestes ex solo panno , vel serico simplici

plici fiunt : habent subligacula & tibialia ex panno; indusium ex tela gossipina, non candidum sed varij coloris ; supra quod est vestis , cuius dexteram partem sinistra superpositam, quibusdam in latere sinistro ligulis aptant : domus vt plurimum ex lateribus crudis conficiuntur ; intus tamen auro & cœruleo colore exornantur, ac sternuntur tapetibus, super quos sedent, & manducant more aliorum Orientalium.

CAPUT IV.

De Mahometanis Indicis.

LVes Mahometana pene totum orientem peruasit nam præter imperia Turcarum, Arabum, & Persarum de quibus egimus : præter regna Monibassæ , Melindi, Chiloæ, & alia orientalis Africæ ; præcipua pars Indiarum eius veneno tabescit.

Imperium Mogoritanum, quod aliis Indicis præeminet , Mahometis religionem colit : magnus enim Rex Mogoritanus Ayman Parthxa siue Homayon in Persidæ confugit, vbi concessio auxiliari exercitu perditum restituit regnum; & vt promissis staret , Mahometanus efficitur , Principes illius , prouinciarum Gubernatores, Duces, Nobiles, ac pene Ministri omnes eandem Mahometis legem profitentur : in hoc imperio mixti Gentilibus Mahometani degunt ; nam alicubi ciuitates integræ , & oppida ad Mahometanos pertinent ; alibi ad Gentiles ; alibi ex vtrisque componuntur.

Sequitur regnum Dialxa , siue Dialkan Mogori tributarium, Insulæ Goanæ adiacens, quod eadem captiuatur lege Mahometis ; ibi etiam mixti Gentilibus sunt Mahometani.

Deinde ad Austrum succedit regnum Cochim, Lusitanis benè affectum, cuius Rex & præcipua populi pars Mahometem veneratur : huic adhæret regnum Samo-

rinum, iisdem Lusitanis infensissimum, quod speciali Mahometicæ legis zelo flagrans Christianos dirè persequitur, & quotidie multos afficit martyrio.

Omnes penè maris Indici Insulæ hac peste laborant; sicut Maldiuæ, quæ Regem suum nuper ad Christi fidem conuersum expulerunt; cuius filij pij parentis exemplo malunt regno, quàm fide Christiana priuari. Insula Sumatra, cuius Rex Christiani, & Lusitani nominis acerrimus & infensissimus hostis, Christi fideles vexationibus, & aliquandò crudelissima morte ad Mahometis legem peruertere conatur. Insula Ceylan, cuius licèt ora maritima Lusitanis subiecta Christum agnoscat: interior tamen pars in plura regna diuisa, vt Candy, Vuæ, &c. Mahometem veneratur: vnde eius populi, tum causa religionis, tum ratione status Lusitanos continuis infestant bellis, & subiectos Lusitanis alios insulanos in rebellionem excitant; & captiuos Lusitanos diris tormentis excruciant. Insula Iaua maior à Sumatra, non longè dissita, cuius Rex Matarron nominatur, & Mahometicæ legis subiectus Christianos odio prosequitur, & maximè Batauos; quia ipso inuito Ciuitatem Iacatorum in eadem Insula captam, & muris, castróque fortissimo munitam possident, quam sæpe iteratis frustra obsidionibus à Batauis recuperare tentauit; imò cùm ex Indiis discessi, libertatem conscientiae in fauorem Christianorum concessisse didici; vt sic Lusitanos in societatem alliceret, & ipsis vnitus communes hostes Batauos ex illis partibus eiiceret, penitusque deleteret.

Sunt in Indiis alij Mahometani pessimi, & Christianorum hostes sæuissimi; videlicet piratæ dicti Malahares, in ora maritima regni Sannorini degentes, de quibus agetur libro vltimo capite secundo: hi miseros captiuos, tum vt pretium redemptionis extorquant, tum vt cogant fidem Christianam abiurare, & legem

hometanam amplecti, miris vexant tormentis, &rimos afficiunt martyrio.

Hæc peruersa Mahometis religio Indias transgressa, ue ad Moluccas peruenit Insulas: audiui quòd Rex ebes Insulæ inter Moluccas celebris, gentiles ritus, ore rationi dissentaneos, & contemptibiles, ac vt rimum ridiculosos fastidians, & legem in melius tare desiderans; Legatos misit, tum ad Christianos, n ad Mahometanos sibi proximiores, cum hac anideterminatione, quòd legem illorum, qui primò acerent, siue Christiani, siue Mahometani, amplecterar: malo ipsius, totiúsque populi prius accessere Mahometani proximiores, qui integram Insulam falsis gmatibus imbuentes Mahometanis ritibus initia- t: non desunt alia regna, aliæque prouinciæ Maho- tricis institutis subiectæ, tum in Indiis, tum in aliis ribus orientalibus: sed hæc breuiter indicasse suffi- t, ad aliqualem horum infidelium notitiam.

C A P V T V.

De lege, & moribus Gentilium Indiarum Orientalium.

Multa in hac materia dicenda occurrerent; sed breuitatis causâ pauca seligemus: plures de sua gine ac religione fabulas confingunt Gentiles mul- licitatem deorum admittunt, inter quos celebres at Crisna, Probrama, &c. quosdam ex suis diis cor- te humano cum capite Elephantis depingunt, alios n pedibus ad instar Lunæ nouæ, aliis denique por- trofis exprimunt figuris, vel etiam simiæ, vel mulie- : in ciuitate Diuiensi est templum Idoli, quod vo- ut Calangani; & Chaüli est aliud nomine Crama- ten: hoc vltimum vidi; est capella non magna, ultis hinc inde idolis plena; in medio est ædícula muris

muris vndique cincta, sola ianua ad illam intratur, intus videbatur lampas ardens, & quidam ex illis pseudoreligiosis: ibi enim orationis causa diutius includuntur: extra illam capellam erant tria aut quatuor oratoria, aliis idolis dicata; sed ante fores capellæ erat figura vaccæ lapideæ, quam præcipuo venerantur honore: ante hæc oratoria est locus satis amœnus, præcellis ac patulis confitus arboribus, est etiam magnum aquæ recepraculum in quadro politis lapidibus, adhibitis circumquaque lapideis, ad descendendum in aquam gradibus ædificatum: subtus arboribus ludentes reperi quatuor aut quinque Iogues idolorum religiosos, omnes habebant crines cineribus plenos, valde longos, ac variè manipulatim intertextos, ita ut angues ex capitibus peridentes apparerent: ibi erat vnus sedens super cinerem, quem à duodecim annis nunquam locutum fuisse iactabant. Verum quidem est, quòd magnos per aliquod tempus exercent rigores, sed hoc tempore præterlapso se omnibus tradunt immunditiis: Plures ex his sunt peregrini; sed quotannis die statutâ congregantur in Ciuitate Cananor superiori, vbi suum eligunt superiorem: emendicatis viuunt elemosinis; sunt & alij religiosi dicti Verteas simul conuiuentes, vestibus albis induti, capite nudo, barba euulsa, valdè pauperes, à mulieribus separati, qui calidam aquam bibunt, & incedentes scopant vicos, ne minima conterant animalia.

Magno ac diuino cultu gentiles Vaccam venerantur, vnde si quis mane domo exiens vaccam primò habens obuiam, se sælicem hac die futurum credit: si illam mingentem videat, se eius vrina manibus excepta, sicut Christiani aqua benedicta, perfundit: si moriens caudam vaccæ manibus tenere possit, non minus sæliciter, quàm Christiani lucrati iubileum, mori se arbitratur: quotannis Gentiles vaccam cum Tauro matrimonio

onio magna festiuitate copulant, tantóque venerantur honore, vt licet ad fidem Christi conuertantur; nunquam tamen præ naturali horrore carnem vaccæ comedunt: inter alia solemniora iuramenta vnum est, gentiles gladium supra caput vaccæ quasi eam occidit teneant; quodlibet potius detrimentum patientur, quam ad hoc iuramentum deuenire cogantur.

Gentiles animarum transmigrationem, etiam in beluina corpora credunt: inde est quòd nihil comedunt his quæ vitam habent, scilicet nec aues, nec pisces, nec bestias campestres; imo aliqui eò deueniunt scrupulosi, vt nec herbas rubeas quasi sanguineas attingant: de solùm comedunt orizam, lac, legumina, fructus terræ, & similia; quamuis aliqui non ita scrupulosi, oves & arietes comedant, dicentes eos esse fructus montium: nullum etiam nocium animal, puta serpentem, occidunt: vidi vnum viginti circiter palmorum longitudinis ad quamdam domum ingredientem, hantibus id patienter ferentibus; imò si videant christianos velle occidere aliquod animal, oblato prelo sæpe à morte liberant: vnde contingit, quòd pueri venientes passerem, aut aliam volucrem adeunt gentes, minantur se occisuros, ni aliquid tribuant; & sic ab his pecunias extorquent in ciuitate Cambaia, vt à teo oculus oculatis audiui, est Xenodochium volucrem, & animalium; vbi animalia, quæ inuenta fuerint læsa, cunctantur, ibique ad comedendum cibi administrantur; aut & volucribus, quæ ad sonum campanulæ congregantur.

In templis Gentilium adhuc mira à dæmonibus parentur, vt ita miseros illos decipiant: in templo maximo quod est in ciuitate Nagana propè regnum Indi, vt à nostro religioso teste oculato audiui, est quidam lapis rotundus, qui seipso arte dæmonis voluitur. In regno & ciuitate Sion est templum, in quo sunt idola

idola figuræ humanæ magnitudinis portentosæ ; vix enim altissimo templo contineri possent , vt audiui à nostro V. P. Dionysio martyre de quo infra : sunt aliqua templa ; in quibus mulieres etiam nobilissimæ in prouentum idolorum se aduentantibus prostituunt.

Inter Gentiles paruuli & paruulæ vix vsu rationis tamen fruentes matrimonium contrahunt : bigamiam tamen non admittunt: in India gentiles albis induuntur vestibus ex tela gozipina confectis, eisdémque telis subtilissimis & albis caput inuoluunt: aliquandò vestes supereffuso flauo colore conspergunt , frontem vero sandalo rubro liniunt ; funiculúmque triplicem nodos aliquos habentem , suæ religionis protestatiuum ferunt ; qui si frangatur , non prius comedunt , quàm illum refecerint.

Nobilitatem prosapiæ plurimùm æstimant ; nobiles enim etiam pauperrimi cum aliis inferioris notæ etiam ditissimis non nubent : contigit in ciuitate Tatta, quòd vnus Gentilis ditissimus multa nostris patribus illic residentibus contulerit beneficia; Patres in signum grati animi ipsum rogarunt, vt aliquid fauoris peteret , velle inquit, vt filia illius Gentilis (proprio indicans nomine , qui etiam nobis plurimùm conferebat , & erat pauper) meo filio nuberet , cui cùm Patres facillimum fore respondissent, adeunt illum Gentilem, negotium proponunt : is etsi pauper illā propositionem fastidiens repulsam dedit. Comburant Gentiles mortuorum cadauera, sæpè odoriferis lignis ignem excitantes: sed quod mirandum & desolandum est , cogunt vxores se præcípites dare in illum rogam , vbi mariti corpus concrematur , dant illi quid ad manducandum , quo imaginatio perturbatur , & census confunditur , deinde magna parentum & amicorum circunstante turba , circa rogam discurret, denique se in illum coniicit : si tardet , à parentibus coniicitur ; tota enim familia simili casu

casu honoratur ; sicut dedecore notatur , si se in ignem iacere recusauerit : euenit quadam die , vt dum quædam mulier iuuenis circum ignem , in quo mariti corpus cremabatur , gyraret , & se intra proiicere cogeretur , venerit in illas partes nauis Lusitanorum , quam illa videns rapidissimo ad illam cursu fertur , auxilium postulat , à morte iam imminenti liberari precatur ; illi misellæ succurrentes ad nauem deducunt , aliò deferunt , ibique Christiana euasit.

Præter generalem deorum multitudinem omnibus Gentilibus communem , propria sunt aliquarum prouinciarum numina : nam in regno Syon fuit Elephas albus , qui ibi vt Deus colebatur , vt retulit mihi idem V. P. Dyonisius martyr , de quo infra , qui in illo fuit regno : in alio autem adorabatur Simia , cuius demortuæ dens vnus , pretiosissimæ instar reliquæ conseruabatur : accidit autem , vt Lusitani in quadam irruptione illum raperent , ac Goam deferrent ; quod illam gentem summo affecit dolore , cuius Princeps misso ad Lusitanos Legato , magnam auri copiam pro dente reddimendo , adhibitis etiam summis precibus obtulit : sed Prorex Lusitanorum , quamuis alij secus suaderent , vocat Legatum , ostendit ei dentem , ab ipso agnitum iussit in mortariolo comminui , ac in puluerem redigi , ipsûmque puluerem vento spargi ; eligens potius hoc auro priuari , quàm idololatriæ nouum obiectum restituere.

CAPUT VI.

De aliis Gentilibus orientalibus.

Gentilitas multum per Orientem dilatatur , ab ultimis Africæ partibus vsque ad vltimum Chinæ regnum : in Africa sunt Gentiles , quos hîc vocamus Æthyopes ; sed immeritò , Æthiopes enim sunt Christiani ,

stiani , licet Schismatici : deinde sunt coloris quidem nigri, sed tamen vultum optimè formatum habent ; unde illi alij gentiles à Lusitanis , vocantur Cafres , quod Arabicè idem sonat , ac Latinè infideles ; verè enim sunt infideles , nullam quippe habent fidem , ac more belluarum viuunt , & aliqui tanta cum feritate , vt sylvas incolant , carnem crudam comedant , imò homines occidant , ac eorum vescantur carnibus ; præcipuè Imbij , & hi dentes limatos ac acutos , vt vidi , habent : quin imò eo impietatis deueniunt, vt patrem suum iam senem super arborem collocent , ipsam arborem excutiant ; si non cadat, deponunt ; si cadat vt fructum iam maturum , comedunt : vnde non minus disformes sunt moribus & animo , quàm corpore. Chineses sunt albi , vultu vt plurimum rotundo , plano , oculis parvis , capillis reticulo collectis , barba rara ; eius quippe capillos euellunt : sunt maximæ industriæ , vt ex eorum patet operibus , Typographiam enim adinuenerunt : perfectam habent politicam , omnes laborant , nullus mendicat ; & quamuis Gentiles , Deos colant ; tamen cum aliquid non benè succedit , eos irrident : non crudeles , potiùs ignaui : hæc , tantùm occasione gentilitatis , dicta sint ; multa enim & mirabilia de illis dici possunt.

C A P V T VII.

De Sobbis , siue Mendais.

IN Arabia felici , eique adiacente Perside sunt quidam populi , qui se inuicem vulgò vocant Mendai, ab Arabibus vocantur Sobbi ; à Lusitanis autem dicuntur Christiani sancti Ioannis ; quamuis verè Christiani non sint : hi peculiari suis in libris idiome vtuntur , quod dicunt esse Chaldæum corruptum , à Nestorianis descendisse præsumuntur : solùm in Bassorana ciuitate & circumiacen

cumiacentibus vrbibus & oppidis ; videlicet Auësa, Argia, Daureca, Gesaër & aliis reperuntur : sunt deuotissimi S. Ioanni Baptistæ, quem sua lingua Iaïa ben Zacharia , siue filium Zachariæ vocant & conceptum esse ex aqua fabulantur : sunt infensissimi & acerrimi Mahometanorum inimici, quos à Noë & Dæmone generatos asserunt : in suo baptismo, quod sæpè quotannis iterant, non vera vtuntur forma ; sed tantum dominica præcepta baptizato pronuntiant : suos habent sacerdotes, more orientalium matrimonio iunctos, quos Cancscuros appellant : sunt Christianis plurimum affecti, & ad terras Lusitanis subditas animo perfectæ conuersionis, Patribus nostris qui in ciuitate Bassorana commorantur suadentibus, transmigrare diu procurarunt ; imò iam ex parte multi executi fuerant ; sed Dæmonis inuidia à cœpto desistere sunt compulsi, vt infra dicitur lib. 9. cap. 5. vbi de ipsis iterum sermo redibit.

CAPUT VIII.

De Iudæis Orientalibus.

Dispersti in toto Oriente Iudæi reperuntur ; nūquam Domini, vbique serui ; nec minus in Oriente, quàm in Occidente vexati : vt in pœnam maximi omnium sacrilegij, in Christi Domini dira crucifixione ab ipsis patrati, Sanctorum Prophetarum implerentur vaticinia, quibus prædicitur ipsos è Iudææ regno eiiciendos, in omnes terras dispergendos ; sine Rege, sine templo, sine sacrificio futuros, plurima incommoda & mala passuros, quæ omnia in eis conspiciamus esse completa : nam & rari sunt in Palæstina ; vir enim ibi præterquam in Hebron & Sephet, & aliqui reperuntur inter omnes nationes quasi aduenæ & peregrini, sunt omnibus ludibrio ; ita vt contra eos omnis creatura conspirasse videatur.

Om nibus noti sunt Iudæi, eorum obſervantiæ in ſacris litteris habentur expreſſæ: in hoc omnes errant, quod Meſſiam futurum expectant, nondum adueniſſe credentes: ac proinde præcepta cæremonialia, quæ ipſum prænunciant, adhuc obſervant. Tres huius erroris ſunt cauſæ præcipuæ: prima, quòd omnia ſcripturæ loca circa Meſſiam literaliter interpretantur, cum plura tantum myſticè ſint intelligenda. Secunda eſt, quòd utrumque Saluatoris aduentum confundunt; unde cum videant nondum completa eſſe, quæ de ultimo glorioſo dicuntur, negant primum humilem. Tertia tandem eſt, malitioſa obſtinatio & odium originale, ut ita dicam in Chriſtum: quamvis enim ex Prophetis euidenter concludatur omnia completa in Chriſto Ieſu, quæ promittuntur de Meſſia; quod etiam ipſe Pilatus aduertit, ut conſtat ex eius epiſtola ad Tiberium Imperatorem directæ: hæc tamen omnia reiicit obſtinatio, odium peruertit; eoque deuenit, ut non defuerint peſſimi Iudæi, qui malitioſè dixerint ſe perpetuis affligi pœniſ; quia vnus ipſorum (Chriſtum intelligunt) ſe Deum fecerit: cum tamen potiùs præmiandi, quàm puniendi eſſent; quandoquidem ipſum zelo diuini honoris, ut putant, tam dirè crucis ſupplicio affecerint: unde non mirum, ſi communiter Theologi cum Doctore Angelico doceant, neceſſariam ad credendum eſſe piam affectionem; verè enim pia affectio omnia in bonum; odium autem omnia in malum interpretatur.

Iudæi orientales ſunt in duplici differentia; alij ſunt cogniti, alij ſecreti: cogniti ſunt inter Turcas, Arabes, & Perſas diſperſi; Iudæi autem ſecreti inter Lufitanos reperiuntur.

In tota Syria; maximè in ciuitatibus, ubi viger commercium, plurimi commorantur, Aleppi facilè ab aliis diſcernuntur: nam deſerunt togam oblongam violacei,

vel cærulei coloris , cum birreto eiusdem coloris in summitate strictiori ; vidi & eorum synagogam in ciuitate Anna in medio Atabiæ desertæ : vidi etiam in Arabia foelici in ciuitatibus Balloræ , & Mascati : quos audiui frixis ibi vesci locutis : vidi in Perside in ciuitate Lara & aliis , ac tandem pene in omnibus regionibus , quas pertransiui : ita vt hæc viperarum genimina , vt sancti Præcursoris verbis utar , vbique reperiantur : hi sunt Iudæi cogniti , & Iudaizantes :

Iudæi secteti plures sunt in Indiis inter Lusitanos latitantes , propterea peiores & magis nociui. Tradunt Lusitani, quod Iudæi ex Hispania pulsi in regnum Lusitaniæ recesserint , cùmque ibi Iudaizare publicè non permitterentur , fingunt se Christianos fieri , & baptizari velle ; sed hypocritæ & seductores exterius Christianam legem profitentur , interius autem lupi rapaces Christum insequuntur , suosque filios Iudaicam legem edocent , sicque hæreditaria successione ad hæc usque tempora peruenerunt : à Lusitanis dignoscuntur , & Christiani noui vulgò nominantur , & in derisum Equites montis Caluarij : sed proh dolor ! plus nocent occulti, quàm noti, cùm enim baptizati Christianis annucentur , cum veris Christianis matrimonia contrahere permittuntur ; & cùm pecuniæ cuncta obediunt, etiam nobiles implicantur : tunc filij procedentes, siue solus pater, siue sola mater sanguine Iudaico etiam minimùm inficiatur , suis parentibus in hac re peiores existunt ; & sic in illis regula logicalis est vera , quod conclusio sequitur deteriorem partem , & nisi sacræ Inquisitionis vigilantia, multis eorum singulis annis igne consumptis, obstaret ; hæc lues in omnes serperet.

Quantùm sit eorum in Christianos odium , nouit qui publicis sacræ Inquisitionis actibus interfuit : ibi audit Parochos ex illis assumptos nunquam verè sacramenta administrasse, sed fictè delusisse suscipientes ; ibi

audit Medicos venenatis remediis infirmos necare ; ibi denique , vt paucis concludam , audit aliquos nullum diem transigere , quin aliquod nocumentum Christianis attulerint , credentes se in hoc obsequium Deo præstare : possem in hac materia propemodum infinita ferre exempla ; sed pro omnibus sit hoc vnicum.

Legi in quodam libro Lusitanè conscripto , quòd cùm Iudæi ex Hispania pulsi , in regnum Lusitaniæ recederent : vnus ex ipsis Christianum rogat amicum , vt se causâ securitatis vsque ad Castellæ limites comitaretur : hoc illi Christianus obsequium amicitiae præstat , cùmque inuicem essent separandi , & Iudeus amico Vale diceret , sic conclusit : scis , quanta inter nos fuerit amicitiae necessitudo , quasi fratres credebamur : scis , quòd quandò tibi maiora beneuolentiæ signa dabam , te capitali odio in corde prosequèbar , veritate cogente loquor ; hoc vnicum à te separandus , in præmium tot beneficiorum à te mihi collatorum , præbeo documentum : noli Iudeo cuicumque , quamuis amicus tibi videatur , vnquam fidere , dictoque Vale recessit.



LIBER SEPTIMVS
ITINERARII

In quo

Peculiares species animalium arborum, & fructuum Orientalium declarantur.

CAPVT PRIMVM.

De Elephantibus.



ERIT ò sanctus Arcopagita Dionysius inter aurea ac mystica sua protulit effata, quòd supremum infimi attingat infimum supremi: hoc maximè in Elephantibus apparet, qui ad discursum ac iudicium humanum plurimùm accedunt. Licèt enim simiæ in multis homines imitentur, propter quod Cafres solent dicere, quòd simiæ non loquuntur, ne laborare cogantur: attamen si Elephantibus comparentur, brutissima videbuntur animalia; honestissimi enim sunt; se vt dicitur, videri non patiuntur, dum ad fœminam accedunt; quòd si quis in casu viderit, nisi aufugiat, ab illo occidetur, sunt animalia altissima, satis graua, ac difficillimè in gyrum mobilia: velociter tamen currunt, nec in suo cursu percipiuntur; non enim

ungulam, sed callum sub pedibus habent; oculos adinstar bouis magnos apparentes habent, sed tantæ molis corporis improporionati ac parui sunt; aures habent valde latas; ita ut; qui eorum curam gerit, supra illas sedere possit; proboscim extensam ac solum pertingentem habent, infernè strictiorem, supernè latiore, vacuam per totum: in vltima eius parte est carnis particula, quæ constringit; quæ apprehendit: fortitudo Elephantis consistit in Probosce, hac trahit ingentia, vel impellit onera, ac vtitur quasi manu ad cibum capiendum, vel aquam hauriendam, quæ omnia, reflectendo ipsam, supposito ori deponit; hæc est cibus ad comedendum delicatissimus; ex utraque oris parte præter interiores dentes, sunt illi duo eburnei, maximæ longitudinis, exterius prominentes, in summitate concaui, in extremitate solidi & acuti; vidi aliquos octo circiter palmorum longitudinis; Elephas genua inflectit, cuius contrarium aliqui scripserunt; imò illis flexis, sicut & dimisso capite salutat, & pedem suo gubernatori ascendere volenti, quasi gradum, præbet: multa, quæ subiungam, fabulosa forte ab aliquibus iudicabuntur; sed ex his quæ vidi, certissima esse iudico; præsertim cum publica illorum relatione perceperim, qui quotidie similia vident.

Capiuntur Elephantes duplici viâ; vel foucas eis parando, in quas ramis arborum rectas incauti incidunt; vel venatione, quæ hoc modo succedit: dicunt, quodd in insula Ceilam, vbi est maxima Elephantum multitudo, qui venationi & eorum capturæ insistent, habent Elephantes fœminas, quas vocant *Alias*; hi quando sciunt in aliquo loco Elephantes agrestes discurrere, eò tendant, duas secum ducendo Alias, quas viso Elephantem dimittunt; illæ hinc inde accedentes medium illum tenent, ac ita constringunt, ut effugere nequeat: tunc accedit venator, Elephantem captum ligat pedibus, de-
inde

inde coram facie apparens salutat , se excusat quòd eum ligauerit , asseuerans se hoc non in damnum , aut contumeliam eius fecisse ; sed potiùs in bonum ac vtilitatem ; subiungens ac obiiciens ei , quòd ante in mediis campis inter Solis ardores , ventos & deficientibus sæpè necessariis ad victum vagabatur ; imposterum verò se curam eius domi habiturum promittens ; his ita gestis tanquam mansuetissimus agnus sequitur : non inde inferendum est , quòd linguas intelligat ; sed tantum quòd ob perfectissimam æstimationem , affectus hominum erga se , honoris vel vituperij , amicitiae vel inimicitiae , aliòsque percipiat ; & propter hoc non tam verberibus ; quàm rationibus domatur. Omnes alij Elephantès , illos qui in insula Ceilam nascuntur , tanquam inter ipsos nobiles , ac principes reuerentur ; & propterea hi plusquam alij ab Indiarum Regibus æstimantur.

Quando Elephantès ad bella ducuntur , duplici ministerio deseruiunt ; vel enim parua eis imponitur lignea Turris , ex qua aliqui milites desursum præliantur : vel eorum probosci gladius catenis ferreis alligatur , ac ita in exercitum contrarium dimittuntur , quem generosè aggrediuntur , ac sine dubio dissiparent , nisi lanceis igniuomis repellerentur ; cum enim Elephantès ignem metuant , in summitate lancearum ignem artificialem præparant , quo fugantur Elephantès.

Priusquam aliquas de Elephantibus historias enarrem , quæ in Indiis nostro sæculo contigerunt , quas à testibus oculatis & fide dignis accepi ; quæ ipse meis vidi oculis , præmittam : semper sunt Goæ aliqui Elephantès , constructioni nauium deseruientes : Veni quodam die ad littus fluuij , prope quem nauis ingens construebatur , in ipsa Ciuitate Goa ; ibi est platea maxima , trabibus ipsi nauium constructioni deseruientibus plena ; homines ligabant fune aliquam trabem in

summitate, deinde funem Elephanti proiiciebant, qui cum ori imponens, ac duplici ductu probosci circumuoluens, solus ipse sine ductore, ad locum ubi naui construebatur semel sibi monstratum, trahebat maximam trabem, quam viginti & forte plures homines non possent trahere; sed quod maiori dignum admiratione vidi, fuit; quòd dum in itinere trabes aliæ occurrebant, quæ impedirent, ne suam traheret, suo pede submisso extremitatem trabis eleuabat, vt ita supra alias curreret: quid amplius faceret homo iudicij compos?

Contigit, vt cuiusdam Elephantis Dominus ostenderit Elephanti cacabum fractum, hoc signo causam afferens, cur ei orizam non coqueret, arripit cacabum Elephas, defert ad fabrum ferrarium; solidatum sed malè, refert (effluebat enim aqua) quod aduertens Elephas, iterum ad fabrum defert, resectum accipit, ad aquam pergit, cacabum replet aqua, quam videns non effluere, domum retulit.

De alio refertur, quòd dum Goæ ad potandum iretis visus à quadam muliere in fenestra consistente derisus est, quod aduertens Elephas, ac memoria retinens; ubi aquam sibi necessariam potauit, proboscim suam aqua replet; deinde rediens, illamque mulierem adhuc in fenestra perseuerantem aspiciens, effusa illam perfudit aqua: vidi & fontem, & fenestram ubi hoc accidit.

Erat quidam Elephas Goæ nomine Pericco, qui solebat in quadam domo, quam sæpè vidi, aliquam vini portionem accipere, cum illuc transibat: contigit, vt quadam die fureret, & elapsum multi insequerentur; ubi peruenit ad illam domum, omnibus præ timore eius aufugientibus, relictum à matre paruulum ciulantem inuenit; illum ab Elephante discerpendum mater formidabat; sed Elephas beneficii memor paruulum accipiens, ac supra tectum domus eleuans (sunt quippe
in

in India plures domus superiora non habentes habitacula) positis circum tegulis, ne caderet, constituit; ne insequentium pedibus conculcaretur:

Illatas sibi Elephantibus vliscuntur iniurias: contigit in ciuitate Tatta, vt audiui à quodam nostro Religioso, qui tunc in illa ciuitate erat, quòd quodam die Gubernator ciuitatis iusserit adduci coram se omnes, quos alebat, Elephantibus: erat ipse cum aliis nobilibus in quadam porticu superiori; Elephantibus verò in area palatij: de singulis decreuit, quid faciendum erat, vbi peruenit ad vnum iam senem & malè habentem, iussit vt tanquam inutilis dimitteretur; quod aduertens Elephas furore percitus, ascendit supra locum paulò eminentem, ac extensa probosce Gubernatorem arripere tentauit; sed eius fuga delusus furibundus exiuit, multa causans hinc inde nocumenta; nisi vestis Gubernatoris fuisset tenuissima, de eius vita actum erat; nam Elephas vestis ipsius fugientis extremitatem arripuit ac trahens lacerauit. De alio dicitur quòd à suo domino percussus illum occiderit; supra eius pectus ponens instrumentum; quo ab eo fuerat percussus.

Voluit quidam Prorex Lusitanorum mittere vnum Elephantem in munus cuidam Regi; ille qui Elephantis curam habebat, nolens priuari hac utilitate, suasisit Elephanti ne iret; asserens hoc in maximum fore ei dedecus; si à ministerio maximi Monarchæ Hispaniarum Regis ad alium Regulum mitteretur: vim rationis percipit Elephas, dum naus imponendus est, ire renuit; mirabantur omnes, quid causæ esset ignorabant: donec recognita Prorex euocat Gubernatorem Elephantis; suspendium minatur, nisi Elephantem eundem persuaaserit: tunc ille mortis metu contraria via aggreditur Elephantem, asserens illum Regem, ad quem mittendus erat, esse maximum; & quòd honori Hispaniarum Regis intererat, vt ipse iret, quòd mittebatur,

&

& quòd melius ibi excipiendus esset ; his dictis statim nauim ingreditur.

Contigit pariter dum essem Goæ , vt vnus simili modo missus , vt Regi Dialkan offerretur, ire noluerit, donec socium simul ire concesserint : Alius autem cùm inuitus naui fuisset impositus, se præ rabie in mare proiecit , vbi suffocatus est.

In ciuitate Cochin erat tormentum bellicum ingens, quod alio Lusitani transferre volebant ; adhibentur multi homines ; sed illud mouere non possunt ; adducitur Elephas , ei intimatur quid sit agendum , probosce tormentum conatur impellere , sed immobile persistit : tunc Gubernator Elephantis iratum se simulans, exprobrat ei eius ignauiam, asseuerans ex hoc maximo afficiendum esse dedecore : Tunc Elephas proprij zelo honoris omnes vires , neruósque contendit, proboscin tormento submitteus tanto impellit impetu , vt statim crepuerit.

Quis hæc certissima audiens , dubitet de aliis similibus , quæ de Elephantibus referuntur ; De vno enim dicitur , quòd à suo domino, quandam ad victum mensuram orizæ taxatam haberet ; sed dimidia pars à seruo, cui eius cura fuerat demandata , retinebatur : contigit quadam die ; vt Dominus illi comedenti voluerit assistere , affert seruus mensuram integram ; sed Elephas illam diuidens in duas partes , partem tantum sibi dare solitam comedit, aliam relinquens intactam ; quod Domino magnum causauit stuporem , ac mysterium sciscitatus seruum ad rei veritatem detegendam coëgit.

Elephas sua probosce lapides recta ac procul dirigit, ipsa aquam effundente corpus suum lauat : pili eius, maximè postquam senuerit, ab aëre corrupto gestantes liberant, illum ad se trahentes. Fuit in Indiis vnus Elephas albus , qui tanquam Deus à Gentilibus adorabatur. Nullibi tot reperiuntur , quot in interiori Africæ parte,

parte, vt apparet ex infinitis eorum dentibus, qui inde asportantur: Occiduntur autem sic, illi Barbari, arbores ascendunt, iuxta quas transituros credunt Elephantes, inde transeuntes lancea perfodiunt, deinde elapso aliquo tempore vestigia sanguinis effusi sequentes, ad Elephantem sanguine exhaustum, ac mortuum perueniunt, illius carnem ibi comedunt, eiusque dentes Lusitanis vendendos deferunt.

C A P V T II.

De Camelis.

Camelorum naturam, & proprietates per duos menses, quos in traiectu ab Aleppo vsque Babylonem consumpsi, mihi contemplari licuit: vnde in eius descriptione aliquantulum immorabor.

Nullus est, qui vel ipsos, vel eorum figuram videns altitudinem, collum valde extensum, & dorsi gibbum non aduerterit; eorum natale solum est Arabia; quamuis enim alibi, non solum aduentitij, sed etiam natiui reperiantur; nullibi tamen tanta eorum multitudo, ac in Arabia conspicitur.

Hoc animal peculiari prouidentia Dei mercatoribus est prouisum, ad superandum Arabiae desertum: cum enim ibi fontes & putei sint rari, & aliquando deficiat aqua: & similiter aridum hoc desertum saepe pascuis deficiat; sola Camelorum tolerantia has omnes molestias, & defectus superare valent: nam ipsi per plures dies à potu abstinentes, & carduos aliisque viliora, quae nullibi desunt, comedentes; vtres aqua plenos & cibos pro hominibus, aliisque animalibus, dum necessitas urget, tanquam supererogatorium onus deferunt.

Dum ipsis imponenda sunt onera, grani ductorum sonitu ad genuflectendum alliciuntur: quod si genuflectere tardent, vel genu eorum baculo percutitur, vel collum.

collum deprimitur ; tunc quasi coacti & suo modo gemitus edentes , & genua & crura flectendo ventrem humi deponunt, & sistunt donec onusti surgere iubeantur: ventri autem, cruribus, & genibus, qua parte terram attingunt , durissimi adhærent calli: si nimium oneris sibi sentiant imponi , & onerantes crebris ictibus capitis percutiunt , & lamentabiles edunt sonos : onus eorum ordinarium , est duplum oneris validissimi muli.

Noctu etiam sic genuflexi dormiunt , ruminando quod interdiu comederunt : sunt admodum stupidi; unde, cùm respiciunt, quasi attoniti apparent; onusti non multùm itineris , exonerati verò plurimùm conficiunt; maximè illi qui agiliores & subtiliores Dromedarij vocantur.

Vt oneri portando præparentur, clitellæ eorum gibbo proportionatæ desuper imponuntur; & sic onera ex vtraque parte pendula, vel etiam cunas hominibus, vel mulieribus deferendis idoneas gestant.

Carnes eorum ab Arabibus faciliè comeduntur, sed non multum gustui suaues esse peribentur; ex lacte à feminis elicitò casei, sed admodum parvi conficiuntur, qui iisdem Arabibus in deliciis sunt.

Ductores Camelorum apud Turcas plurimùm æstimantur , ob venerationem sui Pseudoprophætæ Mahometh, qui vili hoc officio maiori parte suæ vitæ in Arabia functus esse dicitur : postea tamen ficta propheta ad honores peruenit.

C A P V T III.

De alijs Animalibus progressivis.

Sicut India orientalis aliquibus caret ex nostris animalibus (ibi enim non reperiuntur equi, muli, asini, & plura alia animalia; nisi vel ex Perside, vel ex Arabia,

Arabia, vel aliunde adducantur) sic plura habet propria hîc sigillatim describenda.

In partibus Bengalæ prope Gangem frequentes sunt Rhinocerotes, vulgò *Abades*, quorum plurima cornua Goam deferuntur: in inferiori parte, qua fronti inhaerent, ad duos circiter palmos circumferentiæ, quæ paulatim in acumen desinentia pro armis defensivis huic animali deferuiunt, sunt coloris fusci: ex ipsis elaborata ad bibendum pocula plurimum æstimantur, cum innatâ proprietate liquoris venenati, si infundatur malignitatem euacuent.

Tygrides plurimæ in Indiis reperiuntur, maximè prope Gangem, duæ sunt earum species: aliæ vocantur Regiæ, quia licet aliis minores; tamen generosiores, ac robustiores sunt; vnde cum audacia & furore præfunt, periculosus est eorum occurfus: aliæ vocantur Tygrides bibò, quæ licet maiores; sunt tamen timidæ, ac facilè fugiunt si insequentem aliquem videant, vnde non multum timentur.

Est in Indiis infinita propemodum Simiarum multitudo præsertim in ora maritima; qui illuc præterit, hinc inde saltantes, ac per arbores videt discurrentes; suos præ manibus ferentes catulos, & aliquando plures in vnum conueniunt, ac prætereuntes viatores insequuntur, ac forte aggredierentur, nisi armatos inuenirent: quando autem quis catapultam gestat, ac in simias tentat explodere, statim aufugiunt, arbores ascendant, seque in tuto consistere loco credunt, si folia arborum ob oculos ponant; & ita facile occiduntur. Si quis autem viuos capere velit, assumit fructum palmæ Indicæ dictum cocco, in cuius durissima cortice paruum facit foramen, ac prope locum ubi sunt simiæ, proiicit; statim adest aliqua, quæ foratini manum immit tens, facile capitur, nam manum replet illa materia, quæ intus est, nec extrahere potest: & tunc venator insequitur;

guitur ; cum enim , quod semel apprehenderit manu ; nunquam dimittat ; non potest hoc obice prapedita celeriter fugere , nec arbores ascendere ; ac ita incidit in manus venatoris.

Fertur , quod in promontorio dicto *Rama* aliquot ultra Goam milliaribus sit magna simiarum copia , & quòd ibi simiæ aliquando videntes ducem Lusitanum in Indiis natum è suo exeuntem nauigio , vexillum cohortis suæ in terra defigere , statim accurrentes illud rapuerunt , & ad summitates arborum deferentes , illum coram aliis stupētibus & ridentibus stridore affecerunt , cuius euentus historia , quoties illuc Lusitanorum nauigia appellant , cum risu & dictariis recolitur hoc enim factum veri Lusitani milites misticiis siue Indis , si qui sint , in derisum obiiciunt. Contigit etiam ibi , vt quidam mercator biretta deferens , illa soli propter humiditatem exposuerit , statim adsunt simiæ quælibet suum capit birretum , & super arbores aufugiunt ; anxius diu mansit bonus ille mercator ; sed alio suadente naturali simiæ vtitur inclinatione : imponit sibi vnum in capite birretum , quod imitantur simiæ ; deinde diuersimodè illud mouet , quod etiam faciunt simiæ ; denique in terram illud proiicit , proiiciunt & simiæ : & sic omnia recuperauit.

Prope Malaccam inueniuntur Onæ , quæ sunt animalia simiis admodum similia , supra frontem habent cingulum crinium , vnde quasi anus apparent suis amictæ ornamentis ; vnum verbum Gallicum , scilicet *Ouy* continuò proferunt : in locis calidissimis nascuntur , & frigus etiam leuissimum timent : vnde Goæ , quando minimum frigus vrget , mensibus videlicet Nouembris , & Decembris , etiam vestibus amictæ facillè moriuntur ; supra suos pedes erectæ sæpè incedunt ; sunt valde domesticæ ; si lugentes vident , lugere se fingunt ; si pugnantes aduertant , in medium accedentes separare conantur ,

nantur, & plura alia perfectæ æstimatiuæ opera exercēt.

Aliqua sunt animalia parvis canibus, siue Vulpibus similia, ex quibus conficitur muscus: repetitos enim actibus occiduntur; tunc carnes confissæ & sanguis in bursis villosis ex eius pelle confectis, quas Lusitani *papos* vocant reclusi & putrefacti odoriferam musci materiam præbent.

Præter feles ordinarios alij sunt omninò similes, vulgò dicti *Algalia*, qui illam materiam odoriferam producunt, quam hic in Gallia vulgò *Ciuette* vocamus, Lusitani autem *Algaliā* nominant: quando illam materiam colligere volunt, illos irritant: ac in furorem vertunt; & tandem, ne dentibus, aut unguibus noceant, intra portam, vel alibi medio intercipiunt corpore, & assumentes coclear argenteum, materiam illam in pellicula subtus ventriculum collectam eliciunt: dicitur quòd hoc æstu furoris materia ista perfectè decoquitur: ac omnino perficitur.

Sunt canes in India, qui murium venationi, non secus ac feles vacant; sunt mures maximi, qui potius terrent feles quàm his terreantur: hos prædicti canes insequuntur, captos occidunt, & morsibus omnia eorum ossa comminuunt: sunt & alij mures minores admodum odoriferi, muscum redolentes, os habent acutum, & si quem momorderint, veneno suo necare dicuntur.

Est aliud animal, quòd quia continuò palmas ascendendo percurrit, animal palmarum vocatur; est in magnitudine, figura & aliis sciuro plurimùm simile.

Est & cameleon paruo non maior lacerto; sed grisei coloris, illi similis, qui continuò ore aperto hians, aëre dicitur victitare: ad instar colli columbæ iuxta si apposita colorem variat, breues habet in collo spinulas: vnde suo non correspondet nomini, quod camelum, & leonem sonat.

CAPUT IV.

De serpentibus, & aliis reptilibus.

Variæ sunt in Indiis orientalibus serpentum species: quidam dicuntur serpentes caputij, vulgò *Cobras de Capello*: quia in collo quandam habent pelliculam, quæ dum irascuntur, dilatatur ex utraque parte eleuata, ac formam capucij repræsentat, dum caput demissum in medio eius apparet: hi serpentes sunt maximè venenosi, ac mortiferi, sunt ordinariæ magnitudinis & coloris grisei.

Alij dicuntur serpentes murium: quia mures venantur: duo videntur habere capita; saltem extremitas caudæ capiti assimilatur: sed hi licet magni, non sunt ita venenosi, sicut nec alij quos serpentes Maniliæ vocant, habentes corpus circulis variegatum.

Alij sunt serpentes maximi, qui boues comedere perhibentur: duos in medio inter ciuitates Goam & Chaulum tractu reperi viuos; quos catapulta, & ense occidi vidi: minor ipsorum viginti circiter palmorum longitudinis, & humano crassior brachio inter ramos præcellæ arboris repebat cum quidam itineris nostri comes explosa catapulta primo ictu vulnerauit, secundo ex arbore detrusit, quem cadentem ense penitus interfecit: maior autem multò longior & crassior, ex domo vnius gentilis per tectum egrediebatur, cum visus ab eodem itineris nostri comite gladio percutitur, & cum dolore ac mœstitia gentilis illius occiditur, qui facilem ei ad suam domum præbebat aditum, & victui necessaria subministrabat: hi etiam serpentes non ita venenosi creduntur.

Est aliud reptile, Osga à Lusitanis dictum lacertæ æquali, sed crassiori, capite excedit: est animal homini affectum, nec ipsum facilè lædit: si in oleo frigatur, illud

Illud oleum efficacissimum dicitur esse venenum.

Sunt aliqui vermes adinstar Bombycis, qui mense Augusto nascuntur; tunc maxima eorum multitudo conspicitur, subtilissimis, & breuib; pleni sunt pilis, qui si corpus hominis attingant, magnum in carne pruritum excitant, ac intumescere faciunt, & donec auferantur, dolorem causant: hi vermes ex parte Bombycis imitantur: nam cum ad finem vitæ denegerint, quod paucis post natiuitatem diebus contingit: parietem aliquem ascendunt, sibi que mortis locum eligunt; ibi pilos sui corporis ore proprio sigillatim euellentes, ac circumquaque componentes sibi domunculam efficiunt, ibique moriuntur; ex quorum cadaueribus quidam papiliones; non candidi vt in bombycibus, sed nigri, vel obscuri coloris nascuntur; cadauera verò illa in pelliculas exsiccantur: sic autem parieti adhærent pili, vt nisi paries eradatur, amoueri non possunt. Aptissimus hic esset Dei prouidentiam exaltandi locus, sicut in simili de bombycibus exaltant alij.

Vidi alios vermiculos ad instar gemmæ rotundos, quosdam aureos, quosdam argenteos, quibus nihil pulchrius videri potest: exterius enim globuli potius aurei & argentei, quàm corruptibilia apparent animalia.

In aliquibus locis ex aquarum impuritate in humano corpore generantur vermes, qui ad tibias descendentes exire contendunt; tunc carne perforata ad odorem olei, quo linitur, caput emittunt; non vi extrahuntur, -nam facîle frangerentur, & intus putrefacti inflammationem causarent: sed caput eorum modico colligante lino, nec iterum retrahant; & quotidie lino inuoluuntur, prout consentiunt, tandem integri vermes longissimi & subriles educuntur.

Quia de serpentibus actum est, idè aliquorum venenatos effectus adducemus: si contingat, quod tales serpentes super linthea, vel indusia, dum ad Solem ex-

siccantur, transierint: tunc circa lumbos eorum, qui illis linteis, vel indusiis vtuntur, intrinsecus nascuntur in eorum carne serpentes, qui paulatim crescentes totum corpus circumplectuntur; capite autem & cauda unitis, statim mors sequitur; vnde ad illam euitandam, sæpe caput illorum serpentum nouaculis, aut lanceolis pungentes mortificant, & sic ipsorum incrementum impeditur.

C A P V T V.

De Volucris Indicis.

A Liquæ è nostris volucris, maximè domesticæ, vt Galli, Gallinæ, & Columbæ in Indiis reperiuntur, plures etiam desunt, quibus natura alias subrogauit, quarum aliquas notiores subiiciam.

Pauones, qui in Europa reperiuntur; nati sunt ex aliis, qui ex Indiis adducti sunt, ibi enim illorum est patria, ibi natale solum; vnde Pauo avis Indica meritò nominatur: tanta eorum multitudo reperitur; vt ex illis Calamina ciuitas Indica, in qua sanctus Thomas Apostolus martyrio coronatus est (propter quod iam à Lusitanis Episcopali dignitate illustris ciuitas sancti Thomæ communiter dicitur) apud connaturales Indos Meliapor, id est Pauonum ciuitas nomen acceperit. Mira de hac aue dicenda forent, nisi huc adducta fuisset, & visu quotidiano tam mira & stupenda viluissent: nihil enim pulchrius effingi potest, lectorem remitto ad symbolum R. P. Ludouici Granatensis, ordinis sancti Dominici, qui mira huius auis pulchritudine descripta ad summam Dei pulchritudinem contemplandam animum lectoris suauiter excitat.

Vidi in Ciuitate Goana aliam auem, quæ vocatur Cacatua, quia hoc vocabulum ordinariè pronunciat, habet rostrum oblongum, ac pennas variegatas: non

ita tamen est visu delectabilis, in magnitudine Pauoni fere æqualis.

Struthiones etiam ibi, sed maiori copia in Arabia fœlici reperiuntur: cum hic etiam apud nos visi sint, ideo ab illorum descriptione abstinemus non quidem volant elati à terra ob corporis pondus, & alarum debilitatem; illis tamen adiuti velocissimè currunt, propter colli longitudinem à Persis vocatur avis Camelus, lingua Persica Chutumorgh.

Innumera est in Indiis Cornicum multitudo, quæ malitiosæ omninò apparent, si domorum fenestras videant apertas, statim intus aduolant, obuia quæque euertunt: si lucernam aduertant, educto lychno omnia inficiunt oleo; si atramentum in calamaris reperiant, arreptum gossipium supra cartam, & quæuis alia ibi reperta ducunt, ac omnia rostro lacerant: ut vident, etiam à longè, catapultas, statim auolant; & odore forte pulueris veras catapultas à fictis discernunt, obiectis enim arundinibus Indicis quæ catapultæ videntur, immobiles persistunt: vnicum habetur remedium ad vitandas earum molestias, videlicet si capta earum aliqua alicubi exponatur, tunc ad eius crocitationem infinitæ propemodum aliæ simul congregantur ibique diu crocitantibus intolerabilis rumor auditur, postea recedentes per aliquod tempus illuc non reuertuntur: similiter si capta aliqua pennæ eius in fenestris appendantur; certum est, quòd quandiu pennæ ibi permanebunt, ipsæ non ingredientur.

Ingentes vespertilioes in Indiis apparent magnitudine gallinis æquales: alas ex pelle intermediis netuulis compactas habent, in quibus fiunt ungulæ, quibus in arborum ramis ad deuorandos fructus suspenduntur, mirum est quantum afferunt arboribus detrimentum, nisi custodum vigilantium diligentia deterreantur.

Reperitur etiam Avis paruula, quæ mirabilem suum

palmis affigit nidum contra serpentum, aliorumque animalium insidias securum: ad hunc nidum fabricandum, assumit particulas foliorum palmæ, quas palmarum ramis innectens mirabili modo textit, rotundum; nam continuò sed paulatim dilatando ad longitudinem trium palmorum perducitur: à summo vsque ad extremum vacuus, è ramis pendulus circumquaque defertur: eius aditus est in inferiori parte, qua itur vsque ad medium, ibi enim sinus magis dilatatus, pullis educandis aptum & securum præbet habitaculum: en quot proprietates, & habilitates author naturæ Deus, mirabilis vniuersi prouisor suis indidit creaturis.

C A P V T VI.

De Piscibus Indicis.

PAUCOS admodum è nostris piscibus in Indiis me vidisse recorder: solos, videlicet Mugilem, quem Lusitani vulgò *Taigna*; & Alosam, quam *Sauel* vocant; plures verò hic inuisos.

In oceano Indico Cete plurima reperiuntur, quæ à longè insulæ mobiles apparent.

Propè Insulam Ceylam & Gangem fluuium multi reperiuntur Crocodili, sicut & in Nilo Ægypti fluuiò, qui homines vel casu, vel etiam morte damnatos deuorant: vnum vidi militem, qui postea deuoratus à Crocodilo dicitur: qui Crocodilos in illis partibus esse ignorant, vel eorum insidias non formidant, ad mare accedunt, & à superuenientibus rapiuntur Crocodilis.

Sunt etiam Sirenes, præcipuè iuxta Insulam sancti Laurentij in orientali parte Africæ, quæ vulgò à Lusitanis pisces mulieres nominantur: in superiori enim parte corporis mulieribus assimilantur, in inferiori autem in piscem desinunt, quarum ossa ad multos proficiunt vsus; sunt enim maximè frigida: si sanguis alicui

cui eliciatur , & ossa huiusmodi præ manibus capiat, præ frigore, quod in manu & brachio percipitur , sanguis effluere non potest , & quasi congelatur. Proregi Indiæ perforata fuit alteria, dum ei sanguis eliceretur, iam de salute eius desperabatur, sed oblato ei dente vnus ex illis piscibus , statim sanguis arterialis effluere cessauit; ad castitatem & ad comprimendos carnis motus hæc ossa plurimum iuant, imò homines reddunt impotentes : multis aliis vsibus ad salutem humanam deseruiunt.

In iisdem partibus boues marini frequenter inueniuntur , qui aliis terrestribus dicuntur simillimi, hoc vno excepto , quod pellem rasam sine pilis habent; è mari exeuntes ad prata , aliâque pascua properant , vbi sæpius dolo capiuntur in illis quippe pascuis sepem circumquaque extruunt , aditum ad illa præangustum relinquentes , qui ingressis bobus statim occluditur; ac ita clausi , captique remanent , & vt dicitur terrestres consuetudine sensim euadunt , eisque pili crescunt: ibidem etiam lupi marini , & alij pisces nobis incogniti apparent.

In sinu Persico est quidam piscis, vulgò dictus *Serre*, valde magnus ; qui præacutis dentibus occurrentes homines , siue naufragos , siue natantes , siue in piscatione vnionum occupatos dilacerat: eius caro , maximè sale condita est gustui suauissima, & Goam ad Magnates grati loco muneris deportatur : tanta autem est in hoc Sinu piscium multitudo ; vt & canes , & feles ad mare accedentes faciliè pisces capere dicantur.

Prope insulam Goanam quidam piscis reperitur nomine *Bombarda* , sic dictus , quia vento intumescens, si pondere comprimatur , quasi fragorem bombardæ edens procul auditur.

Est ibi etiam piscis valde ordinarius , ac vilis pretij, quia insipidus, nomine vulgari *Coruion* , forte *Coraci-*

nus, cuius caro multum viscosa, & fecibus plena apparet: hic est piscis satis magnus.

Est & alius piscis valde exiguus, nomine vulgari dictus *Canalle*; gustui satis suavis, sed non ita sanus, & pruritus in toto corpore excitat.

Est immensa ostrearum & conchyliorum copia: ita ut ex ipsis igne combustis in insula Goana, & adiacentibus aliis partibus fiat calx omnibus necessaria fabricis.

Plurimi in toto mari Indico natantes apparent serpentes, & intra mare ad aliquot milliaria tanta eorum multitudo confluit, ut pars illa mare serpentum nominetur: hi serpentes, dum continuè ingruunt pluviæ, & torrentes intumescunt, ex vicinis montibus & campis aquarum impetu rapi, & ad mare deuolui dicuntur.

Certus sum paucos è nostris piscibus in mari Indico reperiri: ibi nec Thumnum, nec Salmonem, nec Soleam, nec alios similes vidi: imò nec sardinias aliorum escas piscium: quarum loco subrogari videtur piscis canalla, ad instar haleculæ magnus, sed huius piscatio non toto anno, sed determinato solùm anni tempore viget: & piscis vulgò dictus *Mordichi* delicatissimus, qui etiam infirmis solet administrari, valde paruus.

C A P V T VII.

De Arboribus fructiferis.

EX nostris Europæ fructibus rari in Indiis reperiuntur: nulli enim alij sunt, præter limones, mala aurea & Citronica, aliquæ Vuæ, quæ mense Februario maturescunt & ficus rarissimi; arbores enim fici vix ad sex palmos crescunt decem aut duodecim tantùm ficus quotannis afferunt, & ad instar vitis putari debent omnes alij fructus indiæ connaturales (hi enim iã dicti sunt penitus aduentitij) hîc in Europa sunt ignoti,

ac omninò inuisi : quos tamen breuiter , sicut & arbores describam.

Arbores Indicæ semper toto anno virescunt paucis exceptis, non enim simul folia decidunt ; sed continua successione quibusdam decidentibus alia nascuntur : quia ibi nec frigus , nec pruina vrgent ; vnde nec glaciem, nec niuem, nec grandinem sentiunt ; solæ aliquando adueniunt nebulæ satis calidæ, quæ fructus recenter natos decoquunt.

Prima tum dignitate, tum vtilitate , tum multitudine inter arbores Indicas est palma , de qua seorsim capitulo sequenti agetur. Post palmam statim sequitur arbor afferens fructum , qui dicitur Manga , arbor est satis magna ad instar pomi maximæ, fructus autem est malo Persico quantum ad colorum varietatem , figuram, & gustum valde similis ; sed externam pellem habet paulò duriores, & nucleum omninò æqualem , figuræ cordis humani : hic fructus est admodum calidus, sicut & ferè omnes alij Indici ; & esus in fine aromata redolet : colligitur mense Maio , & Iunio arbor autem mense Ianuario suos emittit flores candidos.

Iambus est fructus pulcher visu, & gustui suavis, figura pyræ nostræ similis : sed variegato ex albo & rubro colore ; sapore verò aromatico aquam rosaceam redolente, pellem habet tenerrimam, materiam quasi spongiosam , nucleum rotundum & tenerum : in principio veris arbor illius mediocris magnitudinis rubicundos suos expandit flores : hic fructus dicitur esse frigidus, & humori melancholico proficius : inter Iambos sunt aliqui quantitate minores, quos è ciuitate Malacca, denominant, quia inde ad Indias translati sunt , gustui suauiores, & odoriferi.

Iacca est fructus per totum arboris truncum, ramosque maiores pullulans ; est magnus ad instar maxima-

rum cucurbitarum, ipsis figuræ similis; foris asper-
tissimam, ac inæqualem habet corticem; intus plurimas
habet castaneas flava quadam materia comestibili, ac
gustui suave, in aliquibus liquida, in aliis solida vesti-
tas: arbor illius est admodum procera; nullum autem
emittit florem.

Ficus Indicus est fructus gustui delectabilis: sed non
ita æstimatur; quia toto anno maturescit, est magnus
adinstar parvi Cucumeris, eiusque figuræ; pyrum valde
maturum suo exprimit sapore: non tam ex arbore, quam
ex planta procedit; quæ non ramos, sed tantum sex vel
octo folia unius vnae longitudinis habet: in desinente
trunco è mediis foliis emergente penduli circumqua-
que prominent fici variis ordinibus distincti, primò
virides, deinde flavi: semel tantum vna ficus ramum
ficuum producit, postea succiditur, sed aliæ hinc inde
ex eius radicibus pullulant, breni suos fructus allaturæ:
truncus eius non solidus, sed valde tener variis corti-
cibus compositus nullos emittit flores: inter ficus ali-
qui sunt odoriferi.

Papaia est fructus peponis figuram, intus præsertim
exprimens, in principio videtur insipida, sed postea
dulcissima est: in summitate trunci arboris primo plan-
tationis anno nascitur; hæc arbor est mediocris ma-
gnitudinis, non forti trunco, sed omninò medullato:
ita ut vno securis ictu facillè excidatur, fructum pro-
fert præsertim mensibus Nouembris & Decembris, in-
tus rubeum, foris cortice viridi, deinde flavo, & ad in-
star peponis sulcato vestitum.

Cagion est fructus coloris, vel rubei, vel flavi; est
pectori proficuus: sed non suavis gustui: in eius summi-
tate est nucleus, qui igne tostus amygdalo assimilatur,
fructus hic est instar pomi oblongi, sed in parte supe-
riori, in qua est nucleus, crassior aliquantulum; arbor
autem non ita procera odoriferos præmittit flores.

Carambo

Carambola est fructus oblongus, in sulcos diuisus; partes prominentes sunt valde tenues, granis plenæ: hic fructus flauescit, dum ad maturitatem accedit: vix etiam maturus præ acrimonia comedi potest; vnde solum saccharo conditus pro infirmis reservatur.

Goïana est fructus pyri similitudinem habens; propterea in Indiis etiam pyrum vocatur; quamuis specie à nostro differat: grisei est coloris, non multum gustui, sed plurimum pectori placet, & prodest; vnde plurimum digestionis deseruit, ac proinde in fine mensæ comeditur.

Iangoma est fructus sorbo non admodum dissimilis, qui nunquam bene maturescit: sed compressione digitorum emollitur; & sic comeditur, nec multum gustui arridet.

Iambelum est fructus nigri coloris, oliuæ figura simillimus: intus sicut oliua habet nucleum, non tamen durum: gustui satis suavis est.

In partibus magis australibus circa Malaccam inveniuntur alij fructus delicatissimi, vnus dictus Mongostan, similis malo aureo, dulcis & gustui gratissimus: alius dictus Durion, magnus vt pepo, circumdatus cortice spisso, aculeis breuibus, sed acutis munito, sulcatus est adinstar peponis: intus continens plures massas figura & magnitudine oui, gustui suauissimas; quamuis dum aperitur in principio cepam putridâ redoleat: eius arbor, dicta Batan, satis alta flores candidos aliquantulum flauescences, folia verò ad dimidium palmum longa, & ad duos lata digitos emittit.

C A P V T V I I I.

De Palma.

PAlmarum duæ sunt species, vt ex fructuum quos producant, varietate colligitur: primam possumus

T 5 voca

vocare Arabicam; quia etsi alibi reperiatur, nullibi tamen tam frequens, ac in triplici Arabia, hæc satis est nobis nota; quia etiam in Gallia nostra nascitur; licet infructifera, hæc producit Dactylos: secundam possumus vocare Indicam; quia in sola India orientali fortè reperitur, est primæ quantum ad externam speciem simillima quamvis eius folia sint paulo longiora, & latiora: sed hæc non Dactylos, at Cocos producit: utramque sigillatim, verùm succinctè describemus.

Per quindecim menses in ciuitate Bassora, quæ est in Arabia fœlici, quotidiana palmarum visu & dactylorum esu fruens permansi: inter palmas, aliæ sunt dictæ fœminæ, alij mares; mares quandam emittunt materiam candidam, quæ velut semen hiantibus femellarum ramis dactylorum feracibus, debito tempore immittitur à cultoribus, alioquin dactyli pullulantes non pinguescerent, sed sola cortice & nucleo constantes arescerent: septem primis annis palmæ sunt steriles: inter ipsas aliquæ dactylos producant maiores, aliæ producant minores; aliquæ producant oblongos, aliæ ouales adinstar pruni imperialis: aliquæ producant rubeos, aliæ verò & frequentius flauos: recenter esu sunt suauissimi, sed admodum calidi, maximæ substantiæ: ex ipsis quoddam mel exprimitur, & etiam virtute ignis elicatur vinum: cum palma incipit germinare, producit tres, aut quatuor ramos; non quidem foliis plenos (sicut sunt rami eius comam constituentes in latum extensi) sed nudos qui in varios multiplicésque ramulos subdiuiduntur: hi è media coma erumpentes, ac in altum erecti, pullulantibus dactylis repleti, ipsisque paulatim crescentibus onusti, ad modum arcus inclinantur, & simul cum dactylis iam maturis præscinduntur. Incipiunt dactyli maturescere mense Iulio, mense autem Septembris meridionalis venti feruere decocti colliguntur, & partim separati asseruantur, partim cum ipsorum melle conditi

conditi vasis includuntur, partim denique in Cofinis ex foliis ipsius palmæ contextis compressi in quotidianum vsum reponuntur, vel alio transportantur: Arabes aliis arboribus magis idoneis carentes, vtuntur palmarum truncis loco trabium, ramis verò intertextis, vel simul insertis, laquearia domum & lectōs: ex foliis autem scopas efficiunt; quia hæc palma ordinaria omnibus pene nota est, ideò illa prætermiſſa ad aliam properamus.

Palma Indica arbori Paradisi in Apocalypſi deſcripto quantum ad fructus productionem, aſſimilatur: ſingulis enim menſibus fructus novos producit; vnde ſemper onuſta & proficua manet: non ergo mirum quòd vir iuſtus ei comparetur, dum in ſcriptura dicitur, Iuſtus, vt palma florebit, non ſolùm ob continuum bonorum operum productionem, & quia flores eius non euaneſcunt, id eſt eorum deſideria non pereunt; ſed efficaciter ad ſancta opera perducunt, ſicut in palma, cuius flores ſunt ipſimet fructus: ſed etiam quia cadens iterum reſurgit, ſicut palma; quæ dum cecidit, vel eſt ad folium ferè inclinata, novos, quos producit ramos, recto tramite in cœlum dirigit, cuius radices vix terræ adhærent, quaſi dedignentur terra operiri; ac proinde foras exeunt; vnde ſemper eiſ apponitur humus, in quo etiam iuſto aſſimilatur, qui terrena ſatiandus ad cœleſtia ſemper aſpirat.

Hæc palma eſt arbor domeſtica: cum enim propè domos, aut caſulas plantatur, fumo, cineribus, & ipſa habitatione fœcundata fructum aſſert duplicatum: propter quod palmaria domibus & caſulis plena ſunt; earum habitatoribus in principio aliqui à dominis diſtribuantur nummi, qui ab eiſ, quandiu ibi manent, exigi non poſſunt, eiſque dum fructus colliguntur, ſua portio cedit: mirabile autem eſt quòd cum fructus palmæ ſint maximi ac duriffimi, & sæpè ab arbore præ
maturi

matritate, vel vento, vel à muribus corrosi cadant; non auditur quòd subiectos vnquam læserint habitatores.

Hæc arbor sola ad fabricandam nauem, & ad subministranda nauigantibus omnia victui necessaria sufficit: profert ad comedendum quandam materiam candidam, sed calidam, quam vocant Copram, gustui suauem, profert ad bibendum vinum, aquam. & Suram liquorem suauissimum; profert etiam acetum, lac, oleum, & saccharum: modum statim figillatim exponam: ex ligno eius, quamuis imposito conficitur nauis, ex foliis intertextis conficiuntur vela; sicut & vmbacula propter solem & imbrem: cordæ verò ex quibusdam eius corticibus, nec aliæ in Indiis reperiuntur: eis non nocet salsa maris aqua, sed plurimum nocet dulcis aqua fluminum.

Si palmæ permittatur suos producere fructus, in summitate trunci pullulant quatuor plurimorum Coccorum botri (coccus enim vocatur huius palmæ fructus,) qui primò crasso ad duos digitos cortice foras tegitur: intus autem reperitur globus ex materia durissima quasi ligneus, struthionum ouis magnitudine & figura simillimus; colore autem fuscus: in ipso tria sunt foramina, per quæ liquor arboris in illum pertingit, & dum terræ mandatur, per ea germen pullulat: hæc autem foramina ita sunt disposita, vt capitis humani figuram exprimant; nam duo in transuersum sibi correspondentia oculos repræsentant, aliud autem ipsis suppositum os efformat, cui subiecta quædam sola lignea barbam efficiunt hic globus in principio est tenerrimus, ira vt esus carduus appareat, postea fit durissimus crasso liquore candido, quasi aqueo, gustuique suauissimo plenus, qui paulatim ad instar lactis coagulatur; deinde indurefcit in quandam comestibilem materiam candidam, gustui etiam suauem; quæ contrita pistello resoluatur

luitur in oleum, non quidem multum gustui suaue, sed admodum medicinale & lucernis idoneum: comminuta verò & ad instar niuis resoluta, & aquæ infusa, si exprimatur, lac præbet suauissimum: ipse verò globus ad multa deferuit; ad facienda scilicet coclearia & fercula ad comedendum, ac pocula ad bibendum: item ad vasa pro puluere tormentario, aliaque huiusmodi.

Aliquando non permittitur palma suos efformare fructus; sed illi ramuli, in quibus cocci pullulare solent, quotidie bis amputantur; tunc suauissimum quemdam emanant liquorem, qui in vasa ipsis ramulis appensa gustatim stillat, hic liquor vocatur Sura; qui ad bibendum gratissimus; coctus verò & ostreorum calce permixtus in saccharum subnigri coloris, liquori ipsi simile, dulcissimumque (Iagra dictum) concrefcit; coctus autem absque addito, ac fecibus expurgatus, fit vinum fortissimum (Nippa, siue Oracca dictum) quod corruptum conuertitur in acetum: en quanta vnica arbor commoda profert.

Ad optimam palmæ conseruationem requiruntur sal, cinis, & arena ad radices posita: cum enim palmæ radices tenuissimæ sint, ac penè in superficie terræ promineant, facile à vermibus roduntur, nisi sale condiantur; arena verò ipsas ab immodico refrigerat æstu: infinitæ propemodum palmæ in tota India reperiuntur, maximum afferentes suis possessoribus emolumentum.

C A P V T IX.

De Arboribus, & Plantis Aromaticis.

ARbor Cinnamomi est admodum lauro similis; quamuis ipsam excedat altitudine, si crescere permittatur: pro semine nigros similes producit globulos, folia eundem aromaticum habentia saporem, lauri folia plurimum imitantur; sed sunt paulò latiora, & minus

nus obscura licet in tota India orientali vt in regno Cochinchin, & in insula Goana hæc arbor reperiatur ; non tamen optimum vbique producit Cinnamomum (quod est huius arboris cortex exsiccat) sed tantum in insula Ceilam ; nec alibi tanta copia sicut ibi reperitur ; cum nemora integra hac arbore confita sint. Certo anni tempore homines ad hoc deputati ad illa pergunt nemora, & cultris corticem ramorum huius arboris lacerant, qui postea calore solis exsiccat aperitur, & ex ramis decidens colligitur ; ipsi postmodum rami cortice nudati ad instar salicis amputantur ; vt iterum arbor novos emitat : sicque quotannis magna Cinnamomi copia in diuersis nemorum partibus alternatim colligitur.

Arbor nucis Aromaticæ, vulgo muscatæ, quæ frequens est in partibus Malaccæ, dicitur aliquantulum similis malo persico : hæc nux ad instar nostrarum simili cortice tegitur, simulque cum eo saccharo condita plurimum pectus confortat : flos eius dicitur Maciz, pallentis rubei coloris, tribus anni temporibus, videlicet mensibus Aprilis, Augusti, & Decembris maturescit.

Arbor clauis aromatici, vulgo gerosse, habet folia aliquantulum similia foliis lauri : tanti dicitur esse caloris, & siccitatis vt sub ipsa nullæ nascantur herbæ ; clauus ipse est flos illius arboris, qui ex violaceo colore in nigrum transit ; ita siccus est, vt faciliè omnem humiditatem depellat : solent in Indiis, quando maxima viget tempore pluuiarum humiditas, sacculum hoc aromate plenum inter ornamenta, & vestes pretiosas ponere, vt ipsas ab humiditate, & putredine præseruent : & nautæ, qui similia ferunt aromata, sæpè ea maris aqua perfundere tenentur ; ne aquam dulcem potui necessariam paulatim exsiccant : hæc arbor solum in Moluccis, ac vicinioribus insulis nascitur.

Piper est fructus ; non arboris, sed plantæ, quæ circa arbores, vel arundines ad instar hederæ crescit ascen-

dendo,

dendo, in ea pullulant quidam botri ex pluribus granis primò virentibus, deinde nigrescentibus, contiguis & valde ordinatis compositi. Zingiber est radix cuiusdam plantæ, quæ ad duos tantum excrefcit palmos; quando recens colligitur, & manducatur, linguam suam mordacitate molestat, solet cum saccharo condiri, & sic pectori plurimum prodest: in tota India, sicut & Piper nascitur.

Plurimum sacchari in Indiis orientalibus nascitur, arundines in locis valde humidis natæ illud producunt: hæ arundines nostris ordinariis quantum ad externam superficiem plurimum similes, etiam nodosæ existunt: intus autem dissimiles; non enim vacuum habent calamus; sed plenum materia candida, humore plena, ipsi cohærente; hæ arundines rotis contritæ & comminutæ sub torculari expressum reddunt liquorem, qui postea igne purificatus & concretus perficitur.

Cardamomum crescit ut frumentum, cuius fructus sunt duodecim, aut plura grana valde minuta, odoris, & saporis gratissimi, inclusa in dura pellicula ovalis figuræ, sulcata, pisi maioris quantitatem non excedente; pellicula hæc est grisei coloris, grana autem sunt rubea.

Aliæ sunt arbores aromaticæ; sed non frugiferæ in regnis Sian, Camboya, Pegu, & aliis vicinis sunt proceræ arbores, ex quibus gumma odorifera, vulgo beniojun, distillat; nigra est optima; in Arabia felici sunt arbores Thuris productivæ: nascitur unde succinum, vulgo ambre, nascatur, licet è mari profluat: aliud est nigrum ad solum olfactum suo deseruiens odore; aliud est griseum maioris pretij, quod cibus magnatum condendis deseruiens plurimum sanitati, & robori confert. Sunt insuper alia ligna odorifera, scilicet Calambe, Castur, Aquila, siue Aloë, ex quibus rosaria, aliaque pretiosa opera conficiuntur: sunt alia medicinalia, videlicet

delicet lignum Chinæ , lignum Solor , sandulum , & rossellago quæ est radix maximæ virtutis contra omne venenum.

Sicut autem in Indiis sunt arbores grati, vt diximus, odoris , sic est vna odoris ingratissimi : nam etiam incorrupta , est fœtidissima suo fœtore humanum exprimens excrementum ; vnde ab illo absque circumlocutione denominationem habet.

C A P V T X.

De aliis arboribus , & plantis Indicis.

Sicut in Indiis orientalibus nostræ arbores , tam domesticæ , quam siluestres deficiunt ; sic plures nobis ignotæ ibi reperiuntur : aliquæ sunt floriferæ , aliæ ad artefacta conducunt, aliæ quædam producant humano vsui necessaria.

Inter floriferas prima occurrit arbor dicta Tristis; quia quandò aliæ ad solis aduentum exhilarantur suos expandendo flores , hæc suos amittit : vnde in noctis tristitia florens , in diei lætitia deposito florum ornameto tristatur ; eius flores sunt albo lasinino similes, pedem habentes flauum , quibus Indi ad quotidianum vsum Croci loco vtuntur ; propterea Crocus Indicus etiam vocatur : hæc arbor ad moderatam crescit altitudinem cuius folia aliquantum aspera & parua sunt; coloris quidem viridis ; sed non virentis.

Est arbor dicta S. Thomæ , quæ non fructus ; at tantum flores ad instar lilij violacei & suaue-olentis producit : hæc arbor etiam satis excresecit , cuius folia hæderæ foliis & figura , & colore similia sunt ; sed magis tenera.

Est arbustum ad instar roseti floriferum , cuius flos suauissimus , quasi parua rosa candida, nomine Mogrini insignitur : ex hoc stillantur aquæ , sicut ex rosa
suauif

suauissimi odoris ; sunt in Indiis alij sed rari flores, nec valde eximij ; vnde ab illis describendis abstinemus.

Est arbor inter agrestes, dicta Saponis , inter paucas, quæ folia exuunt, numeranda : hæc producit quosdam globulos sorbo non absimiles cortice viridi primò, postea flauescenti tectos , interius granum nigrum exiguum habentes : hi globuli manibus confricati in saponem optimum & candidissimum, etiam serico lauando Idoneum, excepto illo grano, resoluuntur : & quia naturales illo vtuntur ; sapo Indicus communiter appellatur.

Est alia arbor agrestis, quæ multum crescit, & quandam materiam candidam ad instar gossipij ; sed in tenuissima diuisam fila, quodam folliculo valde duro ad digitum lato, & ad dimidium palmum longo reclusam emittit : hæc materia dicitur Pagna, estque optima ad ceruicalia & culcitræ molles conficiendas.

Est alia arbor etiam agrestis deferens fructus, exterius rubeos, intus ficibus similes ; sed rotundos, ac paruos, solæ cornices illis vescuntur ; propterea ficus cornicum appellatur : hæc arbor peculiare hoc habet, quòd postquam ad debitam attingit magnitudinem, nouas ex ramis dimittit radices, quæ paulatim recta ad terram descendunt ; ac illam penetrantes nouam quasi arborem efficiunt : noui siquidem pullulant rami, ac ita plures inferius apparent arbores ; cum tamen superius sint vnitæ.

Est alia arbor, vulgo dicta palma agrestis, hæc aliqualem cum palma domestica habet similitudinem, sed crassior & altior est, folia producens latiora, & tene-riora : vnde in Indiis ad exornandas Ecclesias loco tapetum, illorum communis est vsus : parietes enim diuersa ipsorum dispositione figurati, & admodum exornati, sua viriditate recreant intuentes : hæc arbor nullum emittit fructum, sed quædam quasi rosaria pro-

ducit , materiam videlicet virentem , identidem nodosam , è summitate trunci hinc inde pendulam ; ita ut intuentibus præcarij globuli optimè inserti appareant.

Est alia arbor dicta Tamaris satis alta , quæ pro fructu producit quandam materiam adinstar maioris siliquæ fabarum , eiusdem ferè longitudinis, & figuræ, quibusdam seminibus velut fabis constantem , cortex est rudior , materia ipsa valde acetosa ad cibos condiendos inferuit.

Est alia arbor nomine Areca ; subtilis , sed alta & recta : non habet ramos , nisi in summitate , qui comam adinstar abietis , non magnam , sed latioribus foliis perfectè rotundam , visuque pulcherrimam efficiunt : quæ etiam ad exornandos Ecclesiarum parietes festiuis diebus assumitur : fructus eius Areca etiam dicitur , & est globulus nuci æqualis , coloris grisei , nullo sapore præditus , sed pectori valde proficiuus : unde simul cum calor , ac herbæ dictæ bethli foliis comeditur ; esus autem os linguam , dentesque rubore perfundit : quia autem hæc arbor est maximè lenis & flexibilis , qui fructus eius quasi botros ex ramulis pendulos colligunt , ex vna ad alias faciliè transeunt ; commouent enim ac concutiunt illam , quam primò ascenderunt , donec suo motu ad aliam viciniorum pertingat : tunc enim illam apprehendentes successiuè ab vna in aliam transeunt, & sic omnes breui spatio percurrendo perficiunt collectam.

Est alia arbor inter eas numeranda, quæ folia exuunt, quæ fructum vulgo Ambarè dictum producit : hic magnitudine & figura exiguo malo Persico similis , intus nucleum habens , cibis condiendis adhibitus acetoso sapore suo gustui arridet : hæc arbor est mediocris magnitudinis.

Est alia etiam arbor , quæ corticem valde subtilem ; sed ad duos ferè palmos longum hinc inde è ramis emittit,

emittit, unde quasi pendulæ candelæ virentes apparent, intus sunt plura grana quasi pisa candida, quæ cocta orizæ mixta comeduntur.

Gossipium in pluribus orientis partibus nascitur, ex quadam planta, quæ in agris feritur, & ad sex circiter excresecens palmos plures emittit globos, materia hæc gossipij candidissima & tenuissima, sed plurimum compressa plenos; quæ materia per totum orientem ad subtilissimas relas conficiendas, & ad plures alias humanæ vitæ vsus deferuit.

Sunt aliæ arbores omninò steriles; primæ inter ipsas est hebanum, quod arbor siluestris in parte orientali Africæ prope Mozambicum, cuius lignum solidissimum intus nigrum, sub spisso cortice grisei coloris adinstar quercus, ad artefacta pulcherrima conficienda, candidissimo mixtum ebori deferuit: ad communiora opera, ut capsas arcas & similia deferuiunt arbores Thecæ & Angely incorruptibiles.

Sunt denique arundines Indicæ communi vsui utilissimæ, & ad plura opera concurrentes; nam & ad hastilia lancearum conficienda sunt idoneæ, utpote longæ, rectæ, ac leues, & aptæ ad formandos doliorum circulos, cum sint flexibiles, ac duræ: quædam intus sunt solidæ & mares vocantur, aliæ sunt vacuæ, & fœminæ nominantur; omnes autem vulgò dicuntur Bambores: sunt & aliæ arundines ex Bengala denominatæ, inter quas aliquæ omninò nigre, aliæ sunt quasi grisei coloris: maculatæ tamen & nodosæ quas hîc in Gallia Duces, aliique maiores Officiales ad ostentationem deferunt, & vulgò arundines Indicæ nominantur.

Superest ad perfectam horum notitiam, ut aliquid de plantis Indicis disseramus: sicut autem nostris caret India arboribus, paucis exceptis, abundans propriis: sic nostris ut plurimum caret plantis, proprias habens Europæ non notas.

Prima inter plantas, & fructifera, dicitur Ananas adinstar Cardici, quæ ad congruam sui educationem umbram non murorum, sed arborum requirit: fructus eius oblongus ad palmum, circum verò rotundus, in summitate aliquibus foliis, quasi coma decoratur, quæ abscissa & terræ mandata radices mittit, & in nouam plantam excressit, vnde huius plantæ multiplicatio est facilis. Hic fructus admodum rudi cortice tegitur, quo ex viridi flauescente maturitas eius indicatur: intus albus est aut flauus, gustui suauissimus, sed inter alios Indiæ fructus calidissimus.

Est alia planta, siue arbustum producens fructus Carandas, non dissimiles & in quantitate, & in figura, & in gustu granis vuæ nigræ valde maturis.

In hortis vulgares nostræ non apparent herbæ exceptis Caulibus, lactucis & aliis paucis, & si aliunde, verbi gratia, ex Perside semina asportentur; nascuntur quidem herbæ; sed vt experti sumus, semina non restitunt: nascuntur tamen cucurbitæ, cucumeres, & pepones; sed valde insipidi: nascuntur autem propriæ, inter alias frequentior dicitur Bredos.

In campis, saltem in littora maris non nascuntur nostra legumina, nec triticum: sed maxima orizæ copia & plures radices comestibiles, vulgò dictæ *Batas*.



LIBER OCTAVVS ITINERARII

In quo

Agitur de missionibus Carmelitarum
discalceatorum in Oriente.

CAPVT PRIMVM.

De Missionibus Orientalibus.

ACTVRVS de nostris missionibus, conueniens esse duxi, aliarum religionum in oriente missiones saltem indicare; vt sciant omnes, qui nobiscum in vinea Domini laborent: ipsi proprios labores & fructus sibi notos exponant; dum ego in nostris exponendis aliquantulum hinc immorabor.

In Orientali missione laborant sequentes Religiosi, videlicet sancti Dominici, S. Francisci, S. Augustini; Patres Iesuitæ, Theatini, & nostri Carmelitæ discalceati.

Patres sancti Dominici sunt penè in omnibus Lusitanæ ditionis vrbibus, duos habent in ciuitate Goana Conuentus, alium in insula Goana in Parochia sanctæ Barbaræ, quam administrant, sicut & parochias Sanctæ Crucis, Sancti Michaëlis & Sanctæ Mariæ Magdalenæ,

V 3 alios

alios habent Conuentus in Macao Ciuitate Chinæ ex parte Lusitanis subiecta, Malaccæ, Columbi in Insula Ceylam, Cochini, Chaüli, Bassaini duos, Daman, Diu, & Mozambici: In Armenia maiori aliquas habent residentias in prouincia Alinia, quam vnus ex ipsis factus Episcopus reddidit Catholicam: in littore etiam orientali Africæ in regno Monomotapa, & in insula Solor suas exercent missiones.

Patres Minores sancti Francisci in omnibus ferè prædictis vrbibus, & aliis eiusdem ditionis Lusitanæ Conuentus habent, & in terris Bardez Goanæ insulæ à parte Septentrionali adiacentibus pene viginti administrant parochias; ibi est Collegium ipsorum, sub nomine Regum, vbi iuuenes instruunt, & vbi nouus Prorex coram suo prædecessore, & tota nobilitate lectis suæ dignitatis patentibus regiis, ad gubernij possessionem admittitur. Suas præterea residentias habent in Terra Sancta, maximè Hierosolymis ad sanctum Sepulchrum, & Conuentum sancti Saluatoris, in Bethleem, & Nazareth: similiter in Græcia, vt Constanti-nopoli, siue Galatæ: in Syria, vt Aleppi, Damasci, Sidone: in Ægypto, vt Alexandriæ, Memphi & alibi, in quibus Patres Recollecti aliis de obseruantia permixti viuunt: qui Patres Recollecti etiam in Indiis sub ditione Lusitanorum prouinciã habent.

Patres calceati sancti Augustini in præfatis ferè omnibus Indiæ vrbibus Conuentus habent, insuper Mombassæ, Mascati & alibi: suas etiam administrant parochias in insula Goana, videlicet sancti Ioannis Euangelistæ & sanctæ Agnetis: plures etiam fundarunt missiones, Aspahani, & in portu Congo Persidis, Bassoræ, in Arabia felici, in portu Syndi ditionis Mogoritanæ, & nouissimè in Iberia, vulgò *Gorgistan*.

Patres Capucini à viginti circiter annis, magno cum seruire missiones in oriente instituerunt, videlicet

Constan

Constantinopoli & Smirnæ in Græcia : Aleppi , & Sidone in Syria ; Aspahani in Perside ; Babylone , & Niniue ; siue Mussul in Chaldæa , & alibi.

Patres Iesuitæ duas in Indiis orientalibus habent prouincias : prima est Goana , sub qua sequentia continentur Collegia , domus , & hospitia ; Collegium , nouitiatus , & domus professa in Ciuitate Goa , Collegium Racholi in terris Salsete , vbi viginti duas administrant parochias , Collegia Chaüli , Bassaini , Daman , Tana , Diu , & Mozambici. Superioribus huius prouinciæ subordinatur missio Mogoritana in Ciuitate Agra , & missio Tibeth versùs Tartariam. Secunda est prouincia Cochinenfis , sub qua comprehenduntur Collegia Cochini , Coilan , Columbo , Meliapor , Malaccæ , & alia ; sicut & multæ missiones in ora maritima regni Comorini , & aliæ plures. Tertiam habuerunt in Insula Iaponia , sed modo desolata vnicam domum habet in Ciuitate Chinenfi Macao , è qua aliqui sub habitu mercatorum ad interiora regni Chinenfis penetrant.

Patres Clerici regulares , vulgò Teatini , ab aliquot annis ad Iberos schismaticos directi sunt , vbi sicut & alij prædicti in Vineâ Domini strenuè laborant.

In Iaponia iam Christiana religio florebat , iam Ecclesiæ magnificentissimæ , & Conuentus religionum , quas in Indiis collocauimus , ædificabantur , iam ibi creati Episcopi populos in fide constantissimos moderabantur ; cùm ecce inimicus homo mediis quibusdam hæreticis Europæis zizania seminat : hi Catholicæ religionis inimici , Iaponiæ persuadent Imperatori Christianos præmissis religiosi omnium vsurpare regna , his motus crudelissimam excitans persecutionem , variis & inauditis tormentis , vt lento igne , plurimos effecit martyres , ibique fidem pene extinxerat : non decant tamen aliqui , qui spretis periculis clam itrepebant , vt fidei reliquias fouerent , sed nuper malitia cuiusdam

à fide deficientis (pro qua tamen iam carceres & cruciatus passus fuerat) omnes Christiani penitus extincti sunt; imò & illuc accedendi spes ablata, nisi sanguis tot sanctorum martyrum fideles Deo cooperante iterum germinet.

Vt fructus missionum orientalium sciatur, aduertendum est tria esse hominum genera, cū quibus agunt missionarij. Primum est Christianorum, qui ex Europa, vel commercij, vel curiositatis causâ, vel alio titulo illuc proficiscuntur: & circa hos eadem charitatis opera exercent, quæ hîc in terris fidelium exerceri solent. Secundum est Christianorum Orientalium, putà Græcorum, Armenorum, Nestorianorum, Iacobitarum, Cophthorum, & aliorum schismaticorum, quos instruunt ritibus Catholicis: cū enim, vt plurimum sint simplices, nullam credunt inter nos & ipsos esse religionis differentiam. Tertium tandem est sectatorum Mahometicæ legis, quorum obstinationem in sua fide totus orbis agnouit: eam enim non ratione, sed ense defendunt, sic iubente Pseudopropheta ipsorum Mahomete; aliqui tamen conuertuntur ad fidem.

C A P V T I I.

De fundamento, & origine nostrarum Missionum.

DIu dubitatum fuit an spiritus missionum nostro discalceatorum instituto contradiceret; in duas inter nos etiam grauissimi patres diuisi sunt sententias: quidam asserebant; alij negabant, imò spiritum missionum maximè nobis esse consentaneum scriptis defendebant: inter hos fuit Venerabilis Pater noster Thomas à Iesu, qui veniâ Summi Pontificis ex Hispaniis, vbi feruentissimus eius missionum spiritus coarctabatur, Romam veniens, præter eximia alia, quæ fecit

volumina, aureum de conuersione omnium gentium librum edidit, vbi omnes omnium infidelium errores, eorúmque remedia describuntur: item libellum inferuit, cui titulus affixus est (Stimulus Missionum) quo etiam insensibiles ad succurrendum tot infidelium animabus, quæ pereunt, faciliè excitari possunt.

Primus inter nos orientales incœpit missiones Venerabilis noster Pater Petrus à Matre Dei Aragonensis ex vrbe Daroca, qui nostram congregationem in Italia fundauit, & ordinarius fuit concionator Summorum Pontificum Clementis VIII. Leonis XI. & Pauli V. vir tantæ doctrinæ, & sanctitatis, vt Baronius dixerit, quòd Roma non habuerit hoc sæculo, nec doctiorem eo, nec sanctiorem, cuius cor in præmium tanti zeli animarum incorruptum perseuerat: hic vir egregius Clementem VIII. inducere voluit ad fundandâ Congregationem de propaganda fide, & induxit vt aliquot è nostris mitteret in regnum Persidis, cui in zelo succedens V. P. N. Dominicus à Iesu Maria Bilbiliensis; toto notissimus orbe propter vitæ sanctitatem, & mira quæ fecit, huius congregationis institutionem apud Gregorium X V. Non solum consilio, sed & opera promouit: multa siquidem aureorum millia pro fundandis missionum redditibus, ex piorum eleemosynis collecta, huic sacre contulit Congregationi: propterea, quandiu vixit, inter Eminentissimos Cardinales & alios Præsules, huic sacre Congregationi priuilegio speciali assistebat. Hunc missionum spiritualium in nostra religione Patres nostri continua successione conseruauerunt, ad cuius stabilitatem Romæ seminarium dictum sancti Pauli, (quia huic admirabili omnium Gentium Apostolo dedicatum est,) ædificauerunt: ad quod ex omnibus religionis nostræ prouinciis bini mittuntur religiosi, vt instruantur linguarum peritia, controuersiarum doctrina, & aliis quæ ad errores infidelium

refellendos, & Catholicam veritatem confirmandam opportuna videntur: insuper in Capitulis generalibus principaliter agitur de missionibus cœptis alendis, & novis tentandis.

Quia verò aliqui solitudinis spiritum quam regula nobis inculcat, missionum exercitio destrui contendebant, ad eorum iustam satisfactionem & quietem, Capitulum nostrum generale anno Domini 1632. Romæ congregatum, die vndecima Maij sessione matutina; sequens condidit decretum, quod hîc integrum cum aliis ad hoc pertinentibus appono.

Actum est de missionibus; cùm enim R. P. N. Præpositus Generalis ante aliquos dies indixisset Patribus, ut magna cum attentione, ac maturitate secum cogitarent, & fuis precibus enixè à Deo peterent, ut diuino lumine perfusi discernere, ac deliberare possent, an spiritus missionum statui nostro congrueret, vel illi aduersaretur; ut ablati nonnullorum opinandi ac loquendi modis id ipsum deinceps diceremus ac sentiremus omnes, quodque in hoc capitulo in Spiritu Sancto congregato, & cui ipsum Spiritum Sanctum peculiari modo assistere indubitatum est, communibus omnium calculis dicereretur; id certum, firmum, sanctumque posthac haberent omnes, & ne latum vnguem ab hac sententia discedere, ac in contrarium loqui deinceps alicui liceret; immò contrarium cogitare velut piaculum ducerent omnes. Hæc demum vox omnium vna fuit, tale animarum lucrandarum studium optimè cum instituto nostro congruere, quod licet contemplationi primùm ac principaliter incumbat; non tamen contemplatiuæ vitæ totaliter suos alumnos addicit, sed etiam secundariò actioni ac proximorum salutis tanquam contemplationi minimè repugnantî attendere præcipit; die noctûque in cella Deo vacare iubet, iustas tamen occasiones excipit; nullam autem esse

esse iustiores occasionem , quàm eam quæ de lucrands animabus sese offert , vnanimi consensu semper senserunt omnes. Hoc profecto studium nascentis Religionis tempore viguisse compertissimum est, cuius veritatis , quæ omnium animis iam insedit , luculentissimos testes habemus Illustrissimos Marryres Angelum , Anastasium , Petrum Thomam , vt innumeros alios prætereamus , qui profuso pro animabus lucrands proprio sanguine veritatem hanc ipso cruore , quem fuderunt , veluti scriptam testatamque posteris reliquerunt. Nec alius fuit Sanctissimæ nostræ Theresiæ spiritus , quæ moniales ipsas eo fine instituit , vt pro prædicatoribus , & iis qui in lucrands animabus insudant , continuas Deo preces effunderent ; homines verò , vt Deo primum vacantes , mox exemplo , studio , prædicatione proximos iuarent : qua superstitute , & adhuc in viuís agente Religiosi nostri non pauci ad missiones pro animabus infidelium lucrands in terras infidelium missi sunt. Hoc Spiritu Congregatio nostra alumnos suos semper aluit ; nam præterquam in morem inductum est , vt singulis annis bis solemni ritu professionem renouantes , vnusquisque firmum addat propositum ad terras infidelium , pro conuersione hæreticorum iturum , cum votis ipsius obedientiæ iussio accesserit : In primo capitulo generali celebrato Romæ , quod ex primis illis ac lectissimis congregationis nostræ Patribus in quibus exactissimæ obseruantiaæ vigor , ac ardentissimus Religionis zelus vigeat , congregatum fuit , omnes etiam ipse Præpositus Generalis , Definidores Generales , & omnes gremiales Capituli ; propriis officiis renunciantes se missionibus deuouerunt. Hinc Pontifices Summi in suis Bullis ac diplomatibus tale lucrandarum animarum studium approbantes , propria auctoritate , proprioque (vt aiunt) motu Religiosos nostros ad remotiora regna , vt Christi Saluatoris negotium in lucrands

lucrands animabus agerent , non semel destinauerunt. In hoc tamen conuenerunt omnes Capituli Patres , vt studium hoc ita à nostris Patribus perficiatur , vt potioris partis nostri instituti memores sint , & negotia alia, quæ ad animarum conuersionem minimè spectant, omninò relinquant ; immò optare se vniuersi Patres apertè significarunt, vt qui ad huiusmodi missiones deputantur , contemplationi maximè addicti essent, & ab ipsis eremis , cùm iter arripiunt , vela explicarent ; vt in terris ad quas pergunt , si fieri potest , Conuentus nostros fundari curent , in quibus regularis obseruantia ; & quoad fieri possit , recessus curam gerant, & vbi hoc obtineri non potest , locum aliquem habeant , ad quem aliquando redeunt more oculatorum animalium , quæ vidit Ezechiel , iterum & iterum reuertantur in modum fulguris nouo concepto feruore , nouisque virtutum radiis coruscantium.

Egeramus de istis , & paucos post dies videlicet 21. Maij Eminentissimus D.D. Cardinalis Ginnettus nomine sacræ Congregat. de propag. fide , magna animi significatione patres omnes Capituli allocuturus locum ipsum Capituli ingressus omnibus Patribus aperuit sacram Congregationem vehementer optare vt negotium missionum toto pectore à Patribus ageretur , ne soli contemplationi ita incumberent , vt negotium hoc aliqua ratione negligerent ; eo vel maximè quòd sacra Congregatio non dubitaret instituto nostro id maximè congruere, magnum Religioni nostræ splendorem, Deoque gloriam allaturos Patres ; si totis viribus missiones amplecterentur , committere se libentissimè studium hoc Religioni adeo illustri , in qua tantus obseruantia rigor tantusque ampliandæ fidei ardor vigere conspicitur , quod vt intimis Patrum cordibus infingeretur , eadem sacra Congregatio appositissima , & verè aurea D. Ioannis Chrysostomi sententia persuadebat , quam
habet

habet oratione de B. Philogono in hæc verba.

Quàm multa propter hunc gregem passus sit Christus, homo factus est, serui formam assumpsit, conspu-
tus est, Alapis cæsus est, postremò ne mortem quidem
recusauit, & quidem ignominiosissimam; quin & ipsum
sanguinem suum effudit. Itaque si quis voluerit illi
commendatus esse, curam habeat ouium illius, pu-
blicam quærat vtilitatem, fratrum suorum saluti pro-
spiciat; nullum enim officium hoc Deo carius.

Alia petiit Eminentissimus D. Cardinalis nomine
sanctæ Congregationis hoc negotium concernentia;
quibus cum Capitulum prompto animo satisfacisset,
concluserunt Patres Capituli generalis maximas gratias
agentes congregationi quòd tantam de Religione no-
stra existimationem se habere ostenderit, & maxima
promptitudine operam suam se oblaturus dixerunt, vt
negotium istud de missionibus, quod ad Dei gloriam &
bonum Religionis maximè conducere non dubitant, in
dies maiora recipiat incrementa. Hæc omnia adducta
sunt, vt omnibus pateat quanto feruore congregatio
nostra spiritum missionum amplectatur.

Nostre igitur missiones plures sunt; nam præter
Hiberniam, in qua sunt plures Conuentus, Angliam,
Hollandiam, & Germaniam; in Oriente ad Terram
sanctam, regnum Syriæ, Arabiam, Persidem, regnum
Mogoritanum, & Indias dilatatae sunt, de quibus Ca-
pitulis sequentibus sigillatim agetur.

C A P V T III.

*De Prima missione ad Regiam Ciuitatem
Persidis Aspahanum.*

Clemens VIII. aduertens in nostris Patribus de-
siderium conuertendi infideles, & cooperandi
Christo in salutem animarum (quod opus omnium di-
uinorum

uinorum diuinissimum vocat Dionysius Gallorum Apostolus) eos collaudans amplectitur, & ad executionem exhortatur.

Anno igitur Domini 1603. ad hoc opus perficiendum eligitur R. P. N. Paulus à Iesu Maria Genuensis è nobili Riuarola progenie aliis præficiendus, qui propter merita, & experimentalem gubernandi prudentiam, ter ad officium Præpositi Generalis fuit promotus; maioribus dignus honoribus, inter alios itineris socios ei adiungitur R. P. Ioannes à S. Eliseo Calaguritanus, qui postea propter insignia merita, & rara in missionibus gesta Aspahanensis Archiepiscopus totius Persidis Primas creatur: sed dum ad Hispaniam proficiscitur, ut è Lusitania cum nauibus solueret, prope Ilerdam urbem Catalauniæ ex equo decidens paulò post iam senex moritur.

Præfati hi duo Patres, cum essent Româ ad suam missionem discessuri, sanctos Persidis Apostolos Simonem & Iudam Thadeum sibi peculiare assumpsere patronos; eorum nomina sibi appropriantes; unde qui prius Paulus & Ioannes, nunc Paulus Simon & Ioannes Thadeus vocari cœperunt.

Iter suum per Poloniam & Moscouiam versùs Persidem dirigunt; in Polonia à Rege beneuolè suscepti remanere coguntur, & Cracouiæ Conuentum fundare; in Moscouia autem capti, & carceribus mancipati plurimos sunt passi labores; sed tandem pericula mortis euadentes in Persidem peruenerunt: hæc cursim pertransimus; si enim cuncta, quæ in hac & aliis missionibus successerunt, referenda essent, integrum volumen exigent.

Româ discedentes commendatitias Summi Pontificis ad Regem Persidis litteras statim inferendas detulerunt, quibus Regi oblatis, ab ipso maxima veneratione & affectus significatione, tanquam Legati Pontificis

ficis suscepti, ac postea semper habiti sunt : eò regis erga eos creuit affectus & reuerentia , vt sæpè ad comedendum in sua mensa inuitauerit , sæpiùs familiaria cum eis habuerit colloquia , & dum capta Babylone triumphans Aspahanum ingrederetur , eos equitans sibi proximos habuerit : multa eis concessit in suo regno beneficia , domúmque, in qua habitarent vltro offerens liberaliter concessit.

Fundata hac missione rediit in Italiam. R.P. N. Paulus Simon ; totius rationem successus Summo Pontifici , nostrisque Patribus redditurus ; manet ibi R. P. Ioannes Thadeus , qui linguam Persicam apprimè discens , & Regi & magnatibus fuit charissimus : in hac missione decem religiosi ordinariè commorantur ; Ecclesia sub nomine Iesu & Mariæ dedicata est.

Vix credi potest , quot labores & incommoda ibi patiantur Patres nostri, sæpè enim victui necessaria defunt , & solo pane ac herbis vesci coguntur ; cum in illis partibus sancta paupertatis virtus non sit congrua, & mendicare in dedecus vertatur : bis captis & funibus ligati sunt , semel mandato Regis expresso, de quo postea dicetur ; alia vice ex eodem mandato malè concepto : contigit enim quòd Lusitani aliquos persas captiuos effecerant , quo Rex iratus iussit Patres Lusitanos ad se vinctos in ciuitatem Siras perducì : Gubernator Aspahani , cui hæc cura fuerat demandata , milites ad Conuentum mittit, vt ad se Patres perducerent : hi in vigilia Annunciationis, paulò ante prandium ex inopinato in conuentum irrumpunt , & suæ commissionis modum transgressi , velut ministri Dæmonum Patres percutiunt , funibus vinciunt , iniuriis afficiunt , habitum partim euellunt ; & sic malè compositos per vicos cum magno dedecore versùs ciuitatis castellum deducunt: quinque, aut sex religiosi in Conuentu tunc erant, qui semper ad similia parati, & facti causam ignorantes

tes se duci ad martyrium arbitrantur : non horrent de præsentis mortis periculo , sed potiùs alacres effecti , & se inuicem exhortantes , ac hymum (Te Deum laudamus) alta , & sonora voce canentes , quasi agni mansueti ad occisionem mirantibus cunctis læti procedunt , horum cantum fastidientes milites , minis & ictibus silere iubent ; sed his contemptis incepto persistunt. Postquam sic malè habiti ad castellum peruenerunt , & coram Gubernatore pluribus aliis assistentibus adducti sunt , ipse Gubernator commissionis suæ regias extrahens litteras coram omnibus apertè legit : vnus ex assistentibus audiens in eis solam fieri mentionem Patrum Lusitanorum , admonuit Gubernatorem nostros Patrès non vocari Lusitanos , sed Romanos (quia à Pontifice Romano missi hoc insignimur nomine ; sicut Patres sancti Augustini , quia sub nomine Régis Lusitaniæ ibi commorantur , Patres Lusitani vocantur) tunc sui erroris admiratione perculsus , à nostris Patribus veniam petit , milites arguit insolentiæ , ipsosque ad Patres S. Augustini mittens præcipit , vt cum decore & sine tumultu eos adducant. Dum illi ad explendam commissionem properant , multas de religione Gubernator excitat quæstiones , vt de potu vini de bigamia & similibus : sed præcipua fuit an Patres nostri crederent Mahometem esse verum Dei prophetam , cui cùm negatiuè respondiissent , subiunxit , nunquid de ipso Christus in Euangelio mentionem fecit , suis promittens Apostolis alium Paraclitum ; cui audacter Patres replicant illum Paraclitum post paucos dies promissum , esse Spiritum Sanctum , qui decimo die post Christi Ascensionem super Apostolos venit ; & non Mahometem , qui sexcentis circiter annis tardauit , & concludunt nullam de eo fieri in Euangelio mentionem ; nisi dum præmonet nos , vt caueamus à falsis prophetis ; & dum dicit , quòd exurgent Pseudochristi , & Pseudoprophetæ : dum feruentius

tius ista discutuntur, Patres sancti Augustini, qui iam venerant, introducuntur; & sic disputationi finis imponitur; interrogantur an sint Patres Lusitaniæ, qui cum se tales esse respondissent, vincti ad Regem mittuntur, nostris Patribus in Conuentum dimissis; quò cum peruenissent, accedunt vicini Persæ festiui & hilares, de fausto & incolumi reditu ipsos congratulaturi.

Sicut in Perside missionum operarij plures tolerant labores, sic vberes colligunt fructus; nam præter administrationem Sacramentorum, & verbi Dei prædicationem, quam Christianis Catholicis, qui ibi vel habitant, vel commercij causâ reperiuntur; exhibent; (sine quibus auxiliis, vt ab vno illorum didici, primo quo cum Mahometanis versabantur anno, fidem circa vnum articulum fidei amittebant, & sensim infideles reddebantur) præter assiduam sollicitudinem in reducendis schismaticis, maximè Armenis, qui ibi præcipui sunt, in quo plura effecerunt, etiam circa Mahometanos labor ipsorum fructificat: plura exempla tum in hac, tum in aliis missionibus adduci possent; sed hæc historię nostri ordinis reliquendo, duo in præsentī tantummodò compendiosè proponam.

Dum essem in Perside quemdam noui adolescentulum propè Conuentum manentem: hic matrem quidem Armenam, sed patrem Turcam habuit; mater, quæ in corde Christi fidem colebat, anxia de salute filij, qui patris educatione Mahometi legem amplectebatur, eum ad nostros patres inducere tentabat: vix in principio puer audebat accedere, sed consuetudine ipsorum mutatus à Conuentu postea nolebat recedere: ibi sensim amoris Christi concepit ignem, qui postea suo tempore flammam excitauit: erat indolis optimæ & acris ingenij adolescens Zemam Beq dictus; à Rege linguarum externarum electus interpres nostris patribus linguam Italicam & Latinam traditur edocendus. Tandem re-

ligiosis eorum exercitiis, ac virtutum captus exemplis Christianus efficitur: huic operi illustrissimus Dominus Episcopus Babylonienſis è noſtris aſſumptus vltimam impoſuit manum cum baptizando.

Alius, ſed ſuauiſſimus Chriſto, miſſionis huius fructus, eſt martyrium aliquorum Perſarum hîc ordinatè deſcribendum: contigit anno Chriſti 1621. vt quinque Perſæ ad Chriſti fidem conuerſi baptizarentur, videlicet Elias (qui noſter erat hortulanus, cuius vxor baptizata vocata fuit Thereſia) Chaſſadir eius cognatus, Alexander, Ioſeph & Hebrahim: tunc Rex Perſidis Abbas erat Luſitanis inſenſiſſimus, & ſe ad obſidionem Ormuſij Anglorum auxilio fretus præparabat: cùmque Patres noſtri ad ſecuritatem, & inſtructionem horum Chriſtianorum opportunum iudicaſſent, eos ad Ormuſium inſulam Luſitanæ ditionis mittere, priùs noſtros Carmelitas in eadem inſula commorantes, ac Ducem præſidij litteris præmonere decreuerunt. Hæ commendatiæ epistolæ; Eliæ horum regionum peritiori, & maioris fiduciæ viro deferendæ committuntur: hic deſpectis, quæ præuidebantur, periculis, fidei zelo & Chriſti amore ſuccenſus ad deſtinatum pergit locum: iter agens per patriam tranſit, ſuùmque cognatum Chaſſadir reliqui comitem itineris aſſumit.

Elias à quodam Anglo cognitus retinetur, & ad Proregem Syraſenſem, vulgò Kan, adducitur; carceri mancipatur, & diligenter inquiſitus commendatas ſibi litteras tradere cogitur: interrogatus de ſua conditione, ſe Chriſtianum Catholicum liberè & conſtanter profitetur, ſicut & ſocius eius Chaſſadir: Prorex illos tum blanditiis, tum promiſſis, tum minis à fide Chriſti, ad Mahometicam legem reducere conatur: ſed hi ſtrenui Chriſti milites diuina roborati gratia, ſibi propoſita deſpicientes & præmia & tormenta, inuiſto animo ſe iterum Chriſtianos conſitentur, immenſasque Deo gra-
tias

tias referunt, quòd se à tenebris infidelitatis, & sectæ Mahometicæ liberatos erroribus ad Euangelij lucem perduxerit, séque in ea & viuere & mori paratissimos dicunt.

Hac responsione Prorex iratus, eos fame, siti, aliisque miris modis affligens constantiores reddidit; cùmque se frustra laborare cerneret, asino pellem iubet extrahi, in eaque confutum Eliam stipiti infigi, sicque crudeliter tortus aliquot horis viuens Christum continuè laudabat, eiusque sanctissimam fidem constanter profitebatur, & aliis prædicabat, his cognati tormentis non territus, sed potius animatus Chassadir, & in fide Christi perseverans stipiti alligatur, eique venter cultro discinditur, cunctis eius constantiam sicut & socij admirantibus.

His duobus faustè, fœlicitérque consummatis, Prorex ad Regem Persidis interceptas Patris nostri Ioannis Thadei Epistolas mittens, eidem nomina trium Christianorum, qui supererant, tam Mahometica, quàm Christiana prodit: hoc recepto nuntio Rex illos Christianos ad se imperat adduci (à Ciuitate quippe Asphanensi nouem milliaribus aberat) & ciuitatis Gubernatorem, siue iudicem, vulgò *Daroga*, ad nostrum Conuentum Patres obseruaturum misit. Hic statim omnium cellas claudens sigillis munit, omnesque in vnam congregat aulam, & Patri Ioanni Thadeo improperans ait, tibi ne iustum videtur hæc in Regem perpetrare post tot honores & fauores ab illo tibi collatos? respondit Pater, se non venisse in Persidem, vt his honoribus & fauoribus frueretur; sed vt Regem ipsum totumque regnum ad fidem Christi conuerteret. Dum hæc agerentur vnus Pater adhuc post meridiem ieiunus ad Ecclesiam properat, sanctumque Sacramentum consumit, ne aliqua eidem iniuria irrogaretur. His peractis discedens Iudex plures domi custodes relinquit

X 2

qui

qui nostris diuinas laudes prohibent decantare : sic vexati & restricti Patres martyrio se præparabant, eius expectatione hilares ; sed maximè dolentes quòd tres illos Christianos tormentis expositos animare & adiuuare non poterant : vnde continua oratione & implorata sociorum martyrum Elię & Chassadir intercessionem Deo commendabant. Tribus in hac arcta custodia diebus permanentes nostri Patres , generali confessione emaculatas hostias se martyrio præparabant, primæque die vitam sancti Ignatij martyris , secunda vitam sancti Laurentij ; tertia tandem vitam sanctæ Catharinæ communiter legerunt ; quibus animati non pauebant, nec tormenta formidabant , sed potiùs sancta quadam impatientia martyrium appetebant.

Secunda reclusionis die, Rex interceptas epistolas cum adulterata interpretatione Patri Ioanni Thadeo remittens sciscitatur , an prædictæ epistolæ fuerint ab ipso conscriptæ, & an legitima sit earum interpretatio, conquestus quòd collatos eius honores tam ingrato animo reciperet : lectam interpretationem falsitate , & imposturis plenam reperit, ipseque suas epistolas interpretatur, ac nuncio à Rege misso respondet , se fauores regios agnoscere , has epistolas suas esse , seque hos Christianos baptizasse fatetur : causamque interrogatus liberè subiunxit , cur Rex vester tot Christianos fidem Christi abnegare & Mahometicam amplecti cogit : sicut autem ipse Mahometis partes tuetur ; sic & ego partes Christi tueor : propterea quicumque ad me venerint Christianæ fidei desiderio , à me baptizabuntur : hoc enim solo fine ego & socij mei in Persidem venimus. Hoc patris responsum Regi delatum approbatur, etiam coram ducentis Mahometicæ legis Doctoribus, quos *Moula* vocant ; qui eò accesserant , vt contra Patres, de conuersione illorum Persarum conquerebantur : Rex enim asperis & iniurijs eos verbis excipiens,

piens, recedite, inquit, nebulones : hic Pater iustam, & rationabilem affert causam ; à decem annis , quibus cum Patribus illis ago , ne vllum mendacium ab ipsis audiui, nec quid mali de ipsis relatum est ; sunt optimi viri : his confusi & territi recesserunt , ex quibus colligitur quantum Rex patres nostros diligeret & veneraretur. Quòd si Persas conuersos occidi iussit, hoc metu alicuius seditionis in ipsum , fecisse credendus est: imò cum fundamento creditur custodiam in domum nostram misisse, ne populi irruptione patres enecarentur.

His ita gestis Rex tres Persas conuersos imperat adduci, simulque cum eis sex catechumenos etiam captos: eos omnes interrogat, an Christiani sint, qui omnes se Christianos esse negant, excepto Alexandro qui animosè se Christianum profitetur ; Rex eius audacia iratus imperat, vt abnegata Christianorum fide ad Mahometicam redeat; respondet ipse se nunquam tantum facinus, cõmissurum, vt relictà vera Iesu Christi fide ad falsam Mahometis redeat, subiungens se diuina fretum misericordia in Christi fide victurum semper , & moriturum. Rex eius respondendi libertate excandescens, imperat eum statim lapidibus obrui , & postea corpus flammis consumi ; quod mortis genus generosè ferens, Christum continuò inuocans, ipsi gratias referebat, quòd se martyrij corona dignum effecerat.

Octo alij Regis mandato ad Patres, vt erant catenis vincti deducuntur ; vt ab ipsis resciret quinquam ex illis Christiani essent. Pater Ioannes Thadeus eos blandè suscipiens ad fidem Christi, quam susceperant, constanter profitendam hortatur , subdens nefas esse Christianis , Christum etiam solis verbis negare , postea ministris dixit se Iosephum & Hebraim baptizasse (sciens hoc Regem non latere :) hac patris confessione vnus irascitur, alter tacet.

Mirum est, quod Deus ipsosmet Mahometanos induxit ut hos seruos suos ad martyrium animarent; unde vnus ex ministris iustitiæ dixit, ne formidetis mortem omnibus hominibus hæreditate communem, Christiani estis, moriamini igitur in fide Christi. Alius dixit, tormentum hoc momentaneum erit, postea in cælum cum Christo regnaturus ascendes. Tertius tandem ait, Christus viuit, nec mortuus est sicut Mahomet, constans in fide Christi esto, & ad quartum cælum cum Christo ibis.

Sequenti die hi octo iterum ad Patres reducuntur, simul cum Sebastiano Diez Lusitano, qui captiuus Aspahani detinebatur peculiari Dei prouidentia, ut hos novos Christi milites animaret: cumque Patres ad eos refocillandos cibum obtulissent, soli duo Christiani cum Lusitano comederunt; eis exemplum trium sociorum, Eliæ, Chassadir, & Alexandri proponitur, ut ad martyrium animentur, Christi subsidium ad tolerandos labores, & vita æterna in præmium promittitur. His animatos & hilares amplectuntur mœsti Patres, quod tam scælici sorte priuentur, eosque prædicti Lusitani curæ committunt. Omnes simul diu per ciuitatem circumducuntur; Christiani fidem Christi alta voce profitentur: tandem ad Regis conspectum adductis Rex imperat, ut Lusitanus & Cathecumeni ad Carcerem reducantur; Ioseph autem & Hebraim lapidibus obruantur, & eorum corpora concrementur.

Præmisso præcone, qui omnes Mahometis amicos, ad vlciscendam eius iniuriam inuitabat, ad locum martyrij hi duo adducuntur, de nouo proposita venia, & oblatis præmiis ad patriam Mahometis legem sollicitantur; sed frustra, nam Ioseph qui primus ante Regem fidem Christi prius negarat, audacter respondit se nunquam tale scelus commissurum; & quod satis,
supér

superque erat, quòd semel fidem Christi negauerat, de quo maximè dolebat, subiungens se ad mortem pro Christo paratum.

Omnes astantes lapides arreptos in martyrem coniciunt, ipse pene fracto capite clarè nomen Dei benedicebat, fidem Christi exaltabat, & Mahometicam tanquam falsam & mortiferam condemnabat. Tandem cum se nullum dolorem pati testatus esset, & circumstantibus dixisset; Vobis parcat Deus, fratres mei, & veram lucem concedat; martyrio coronatur.

Hebraim adhuc remanens ad abiurandam Christi fidem de nouo sollicitatur; sed ministrorum irridens consilia, se Christi discipulum professus, & pro eo mori paratissimum exhibens stipiti alligatur; tunc adinstar Sancti Stephani prothomartyris pro lapidantibus oràs, gloriosè triumphans, obrutus lapidibus occubuit, eorumque reliquiæ semiustæ à Christianis maxima veneratione colliguntur: etiam Mahometanis Christi fidem collaudantibus.

Rex Aspahano discedens sex Cathecumenos à carcere, & Patres nostros à custodia liberans, suis præcepit ministris, ne quicquam mali nobis fieret, & ut pristinis ritibus nostris cum omni libertate relinqueretur.

Horum martyrum exemplo quadraginta tres pagi Armenorum, qui fidem Christi cogente Rege negauerant, eandem fidem palam & liberè profitentur, Rege factum dissimulante, & præcipiente ut sublatis legis Christianæ Codices eis restituerentur: quæ omnia horum quinque martyrum intercessioni sunt referenda.

Quia, ut supra dictum est, nostri Patres à summo Pontifice Clemente VIII. cum commendatitia epistola ad Regem Persarum directi sunt, eiusdem epistolæ copiam hîc apponere conueniens esse duxi.

Illustri, ac Potētissimo Sciahabas Regi Persarū.
Clemens Papa VIII.

Illustris, ac Potētissimè Sciahabas Persarum Rex,
 Adsit Tibi Deus, & perfectam in omnibus rebus verita-
 tem & vitam ostendat. Misimus iam ad Te Paulum-Si-
 monem, Ioannem Thadaum, & Vincentium fratres ordi-
 nis B. Maria de monte Carmelo, eisque mandauimus, ut
 nonnulla negotia nostro nomine Tibi exponerent. Cūque
 facilè futurum sit, ut ea de causa aliquandiu apud Te
 moram trahant, eis iniunximus, ut interea Christi fideles,
 qui sub tua potestate sunt, nostro nomine inuisant: ut me-
 mores sint salutis aterna, eos salutaribus praeceptis in-
 struant, & iuxta Christianorum ritum, & facultates eis
 concessas spiritalibus remedijs, & sacrosanctis Sacra-
 menti reficiant. Ut autem in aliqua de eorum instituto
 intelligas, pauca quaedam Tibi significanda duximus; ex
 quibus cetera facilè conicias. Habuerunt olim religionis
 huius professores, sicut à Romanis Pontificibus praecef-
 soribus nostris memoria prodictum est, sui instituti aucto-
 res sanctos Prophetas Eliam & Eliseum, omnibus natio-
 nibus, & gentibus notos, & à Beato Alberto Patriarcha
 Ierosolymitano magni nominis viro proprias regule con-
 stitutiones acceperunt, quibus illis in primis praecipitur, ut
 summam obedientiam, perpetuam paupertatem, & ca-
 stitatem seruent. Deinde ut in lege Domini meditantes,
 contemplationi & orationi vacent, tum praedicationi ver-
 bi Dei, atque animarum saluti incumbant; atque ideo ad
 regiones longinquas mittuntur. Et iam Hispaniarum re-
 gna & Indiam occidentalem, nonnullasque Italia Cui-
 tates peragrarunt. Bonorum temporalium (ut illorum quo-
 que viuendi rationem accipias) nec communi quidem no-
 mine proprietatem, aut usum retinent: & quotidianum
 victum, aliisque ad Ecclesiarum cultum, & usum vitae
 necessaria

necessaria, ex pia eleemosynarum oblatione capiunt. Nudis pedibus Apostolorum more soleis utentes incedunt, unde discalceati nuncupantur. Perpetuò à carnibus abstinent, corpus vigilijs, & ieiunio macerant, horrido cilicio domant, & crebris verberibus in seruitutem redigunt, ut legi mentis non repugnet, & in omnibus diuina subiaceat voluntati, dumque se à carnis petulantia & terrenarum rerum ambitu, atque à visibilium voluptate custodiunt, ab his etiam alios admonendo compeſcunt. At igitur petimus, ut illos & libenter audias, & Christianos functiones cum fidelibus subditis tuis exercere permittas: nec verò incultum & rudem illorum vestitum despicias; nam si vitam & mores inspexeris; experieris, ut in Domino confidimus, sub illo vili, asperoque indumento latere quasdam praeclaras animi dotes, atque virtutes, quibus se Deo, & hominibus gratos praeberere student. Et licet pedibus longinqua loca peragrantes puluere conspergi, & inquinari luto videantur; ex eorum tamen colloquijs, & vsu frequenti comperies, ut speramus, quàm omni labe immunes, quàm à rerum humanarum colluue liberi, quàm denique speciosi sint pedes Euangelizantium pacem, Euangelizantium bona. Datis Roma apud sanctum Marcum die Octobris, anno 1604. Pontificatus nostri 13.

CAPUT IV.

De alijs missionibus Persidis.

DVas alias fundauit Religio nostra in Perside missiones, vnam in Ciuitate Sirasensi; aliam in Ormuzio Persici maris Insula.

Sirasensis missionis fundandæ motiuum præbuit Gloriosus ille martyr Elias: cum enim Apostolico zelo conuersionem incolarum oppidi sui summopere desideraret, patres nostros repetitis precibus induxit, ut in hac nobili Ciuitate, non multum ab ipsius natali solo

distante, residentiam fundarent : vnde hanc R. P. Ioannes Thadæus à sancto Eliseo iam supra nominatus hoc opus aggreditur, & autoritate, qua apud Regem & Principem Sirasensem pollebat, tandem perfecit; inò & ab ipso Principe annuam obtinuit eleemosynam satis pinguem : hæc missio Sanctorum Persidis Apostolorum Simonis & Iudæ titulo & patrocinio gaudet.

Exercitium nostrorum Patrum hîc est, adiuuare tum aliquos, sed raros orientales Christianos incolas, tum Europeos illac transeuntes, vel ibi ex capto Ormusio detentos, ex quibus etiam aliquos euadere facientes ad additionem Lusitanorum remiserunt. Ibi quidam Lusitanus nomine Blasius Caruagle glorioso consummatus est martyrio; cùm enim captiuus esset, & Christi fidem abiurare iussus, hanc impietatem constanter reiecisset, abscisso capite martyr occubuit, eius constantia Patrum nostrorum consiliis, & prædicatione fuit roborata: cùm enim eius libertatem à Prorege aliàs nobis multùm affecto impetrare non possent, quia tunc Lusitanis erat infensissimus: ab ipso tamen obtinuerunt, ut sæpe cum conuenirent: quamuis subridendo iniungeret, ne eius ad Mahometicam legem transitum impedirent.

Quædam erant Armenorum oppida in medio Persidis ædificata (Rex enim Abbas capta Turcis Armenia maiori, habitatores eius in Persidem translatos ad illam habitandam hinc inde disperisit) his mandato Regis concessa mutuò fuerat notabilis summa pecuniæ, suppellectili comparandæ necessaria, sed suo tempore restituenda; hoc elapso exigitur pecunia, nulla paupertatis admittitur excusatio; ni reddant, vel carceres & cruciatus, vel mutatio legis de Christiana in Mahometanam intimatur: quid agant, quò se vertant, penitus ignorant; suas angustias, suæ statum miseriæ desilent: huius rei nuntio Patribus nostris relato, de pauperum

perum illorū solatio & remedio cogitant, initioque consilio R.P. Dimas à Cruce linguam callens Armenam, & zelo plenus illuc mittitur, qui per aliquod tempus illa circuiens, sic omnes exhortationibus animando confirmauit, vt potius mortem crudelissimam se electuros, quàm Christi fidem abnegaturos dicerent: his expletis ad nostros rediit, qui ex abundantia charitatis totam ferè pecuniæ summam, quam penes se habebant, pauperibus illis ad redimendam suam vexationem vltro obtulerunt: quod vbi Rex audiuit, factum admiratus, condonato debito dimisit eos liberos, & in lege Christi pacificos: his, vt referebant, sanctus Patriarcha noster Elias apparuit, maximè tunc temporis, quando Patres nostri primò Persidem sunt ingressi.

Eo fine primi huius missionis Patres Conuentum in Ormusiana Lusitanæ ditionis insula Persidi adiacente fundarunt; tum vt aliquæ piorum eleemosynæ ibi collectæ in Persidem mitterentur; tum, vt si quandò persecutionis rabie de finibus Persidis expellerentur, aut recedere cogerentur, securum ibi reperirent azilum. Hanc foundationem incepit, & generosè perfecit R.P. Leander ab Annunciatione Hispanus Burgenfis, vitæ & doctrina, & sanctitate, & in rebus gerendis prudentia conspicuus, qui postquam multis annis omnium nostrarum orientalium missionum extitit moderator, ad ciuitatem Visapor Curiam Regis Mahometani, vulgò *Dialcha* dicti, tum Christi, tum Lusitanæ Regis causa hospitium fundaturus proficiscitur, vbi plenus meritis & rerum gestarum gloria celebris decessit.

Vix credi potest, quot labores, & aliquorum oppositiones in hac foundatione passus est; quotidie ad expellendos patres mandata regia falsis informationibus extorta mittuntur; Gubernator ipse Dominus Ludouicus de Soza vocatum ad se P. Leandrum secretò retinet clausum, in Persidem remissurus; intrepidus ipse

ipse & generosus Pater de incurſa monet excommuni-
 catione, & iram Dei ſuper ipſum venturam propheti-
 zans minitatur, quam euentus rei poſtea declarauit; ex
 tunc enim infortunia plurima ei contigerunt, & vlti-
 mò veniens in Luſitaniam capta à Mauritaniz piratis
 eius naui, captiuus ipſe cum vxore, tota domo & fa-
 cultatibus Algeziras adductus miſeram duxit captiui-
 tatem: his non contenti noſtri æmuli, qua pollebant
 authoritate, ſic Proregem Indiarum contra nos adhuc
 ibi ignotos animarunt, vt Benedictum de Baëna Com-
 miſſarium electum cum triremi miſerit Ormuſium, vt
 per vim Patres noſtros expelleret; & ſi reſiſterent, tor-
 mentorum globis Conuentum euerteret: huius com-
 miſſionis nuntium ciuitatem percurrit, Patres inito
 conſilio ſanctiſſimum Sacramentum in ſuperiori do-
 mus parte mari expoſita, vnde tormenta bellica explo-
 denda forent, ſolemniter & apparenter collocant, Re-
 ligioſis ibi ſucceſſum bonum rogantibus: vniuerſus au-
 tem populus & maximè præſidij milites nobis pluri-
 mùm affecti, ad noſtram deſenſionem turmatim con-
 gregantur, Conuentum armati circumſtant, expellen-
 dos potius noſtros æmulos proclamant, & mortis mi-
 nas intentant etiam Gubernatori, ſi quid mali nobis
 contingat, ſubreptitium Proregis dicunt eſſe manda-
 tum: his viſis & auditis tremens commiſſarius è trire-
 mi deſcendit, & ad Eccleſiam noſtram oraturus acceſſit:
 ex tunc omnis ceſſat perſecutio benè informatus Prorex
 quieſcit, ibique Patres noſtri ſolitis miſſionum exer-
 citiis occupati tandiu perſeuerant, donec capto à
 Perſis Ormuſio omnes Luſitani & Chriſtiani expel-
 luntur,

CAPUT V.

De Missione Indica.

AD perfectum missionis Persicæ munimen idem R. P. Leander ad Indias proficiscitur, Indicam missionem iisdem motiuis & titulis, quibus Ormusianam fundauerat, fundaturus: sub missione Indica omnes domos & residentias comprehendimus, quas ibi in ditio-
ne Lusitanorum possidemus.

Primam igitur in ciuitate Goana fundandam aggreditur; incredibile est, quot labores, quantas difficultates, & contradictiones in sancto hoc opere tolerauit; sed sua prudentia, & incredibili patientia sic omnia disposuit, vt & Prorex consenserit, qui erat Dominus Ferdinandus D'Albuquerque, & Archiepiscopus Dominus Christophorus Vlissiponensis ex ordine sancti Hieronymi plurimum sanctæ Matri nostræ Theresiæ, nobisque affectus, fundandi veniam concesserit sequenti successu commotus. Accidit quòd tunc ob vrgentem aliquam causam solemnem indixit supplicationem, siue Ecclesiasticam processionem, ad cuius celebritatem plures reliquiæ, plures item Sanctorum effigies magnificentissimis vestibibus ornatae, deferuntur: impetratâ faciliè eius licentiâ inter hos cõputatur sancta Mater Theresia, statim effigies eius efformatur, perficitur & monilibus, aliisque pretiosis decoratur ornamentis. Destinâtâ supplicationis die ad Archiepiscopum; vt erat auro, gemmisque, ac lapillis refulgens, ac præ manibus supplicem habens petitionem, defertur. Eius pulchritudinem deuotus Antistes miratur, cartam lecturus ex eius manibus suscipit, in qua legit sanctam Matrem Goanam suis filiis Carmelitis foundationem suppliciter ab eo efflagitare: desset bonus ille Præsul deuotionis teneritudine, & ex tunc fundandi concedit
faculta

facultatem anno Domini 1620.

Tunc idoneus nouo Conuētui locus quæritur, inuentus capax, & amœnissimus emitur, paucisque interiectis diebus, copiosis piorū eleemosynis iustū exoluitur pretiū; Ecclesia sub titulo B. Virginis Mariæ de monte Carmelo fabricata dedicatur, ipse verò Conuentus à fundamentis erectus nunc inter præcipuos & maiores religionis nostræ computatur. Ex hoc Conuentu plures alij dimanarunt, videlicet alius propè ipsam ciuitatem sub ritulo sanctæ Matris Theresiæ, alius in ciuitate Diuensi sub titulo sancti Ioseph peculiaris nostræ religionis patroni, à Venerabili Sacerdote Domino Francisco Calassa fundatus: alius item Mozambici in parte orientali Africæ, & plures alij sine dubio dimanassent; nisi mandato Regis expresso nouæ religionum fundationes illis in locis prohibitæ fuissent: nam in Macao ciuitate Chinæ, in Insula Ceilam, Bassaini, & alibi Conuentus etiam cum redditibus offerebantur.

Præmarium Goani Conuentus exercitium est; idoneos pro aliis missionibus educare ministros; propterea ibi nouiciatus & collegium; separatim tamen, ad religiosos admittendos, & litteris instruendos reperiuntur. Inter alios celebres huius Conuentus alumnos celeberrimus est V.P. Dionysius à Natiuitate quem dum ibi Superioris officio fungeret, habitum sacre nostræ religionis indui & Philosophiam postmodum edocui, qui insignis martyr Christi paucis post annis extitit; de hoc iterum libro sequenti capite 2. & libro vltimo capite primò fusè dicetur, his paucis in præsentī prælibatis.

V.P. Dionysius à Natiuitate dictus in sæculo Petrus Berthelot, natus est in vrbe maritima prouinciæ Normandiæ nobilis & potentissimi regni Galliæ, dicta Honfleur, quæ adiacet Sequanæ, vbi se mari miscet. Contigit fœlix eius natiuitas anno Domini millesimo sexcentesimo in principio mensis Decembris, à tenera ætate

ætate sub disciplina piorum parentum in fidei puritate, ac bonis moribus instructus fuit; erat quippe optimæ indolis, suisque parentibus obsequentissimus, quorum imperio legere & scribere didicit, & adhuc iuuenis, Hispanias, Angliam, terras nouas, aliásque regiones mercimonij causâ adnauigauit. Anno Domini 1619. consentientibus eius parentibus ad Indias orientales perrexit, soluens è portu Honfleur cum quatuor nauibus illuc tendentibus; vix explicari potest, quot labores, quot tempestates, quot pericula in prolixa nauigatione passus est: incensa nauis, in qua transmiserat, in oriente bono suo remansit primò mercatoribus Gallis Maclouiensibus associatus in insula Celebes; deinde in obsequium Lusitanorum in Indiis mancipatus, vbi per aliquot annos Nauarchi, & Cosmographi regij munera summa cum laude exercuit; plures ibi & periculosas suscipit nauigationes; classẽ Lusitanorum ad pugandum contra Batauos & alios Catholicorum hostes dirigendo; tandem cum iam à multis annis ad sacrum religionis statum continuis Dei inspirationibus vocaretur, meo consilio & opera nostræ Carmelitanæ anno salutis 1635. in vigilia Dominicæ Natiuitatis habitum sumpsit, & sequenti anno ipsa die Natiuitatis solemnem emisit professionem. Omnibus aliis virtutum exemplar effectus, ac Grammaticæ & Philosophiæ studio incumbens in eodem Conuentu Goano perseuerauit vsque ad 25. diem mensis Septembris anni 1638. qua iam sacris initiatus occasione cuiusdam Legationis ad insulam Sumatram nauigauit, vbi glorioso martyrio cum aliis sexaginta coronatus est, quod infra fusiùs describetur: hæc ex libro vitæ ipsius, quem typis mandauit, summariè collexi.

In eodem Conuentu, vtpote in terris Lusitanorum existente, eadem quæ hûc in Europa, quantum ad conciones & confessiones audiendas, fiunt exercitia; & in-
super

super gentiliū ibi commorantium conuersio procuratur; multique quotannis conuertuntur; ipse quadam die integram familiam septem animarum baptizauit. Quando fames illa s̄uissima, de qua supra actum est, Indias deuastabat, Patres nostri consiliis ac precibus suis Goënsē magistratum induxerunt, vt ad colligendos pauperes misera fame pereuntēs Xenodochium erigeret: infiniti gentiles illuc admittebantur, qui omnes pene conuersi à nostris, quibus huius Xenodochij cura demandata erat, baptizabantur. Aliquandò ex Conuentu Goënsi ad terras gentiliū nostri pertranscunt; tum ad prædicandum eis Euangelium; tum ad reducendos Lusitanos, qui illuc sæpe confugiunt, & cum salutis periculo commorantur.

C A P V T VI.

De missione Mogoritana.

QVamuis regnum Sindi in Indiis computetur ipso Indo flumine irrigatum; quia tamen sub Mogoritana ditione infideli continetur, idè missio ibidem fundata speciali capite describetur.

Missionis huius fundator extitit R. P. Ludouicus Franciscus Hispanus, vir admodum sanctus, & opinione sanctitatis non solum inter Christianos, sed etiam inter Mahometanos & Gentiles illius regni ita celebris, vt cum quadam die vnus aduersus eum, nescio quid oblocutus fuisset, alter dictis offensus, causam Patris suscipiens; ipsūque, vt virum sanctissimum & Deo gratissimum laudans, vindictam propriis manibus sumpsisset; nisi maledicus ille aufugisset. Hic Pater, dum in Europa degeret, Deo ad maius virtutis exercitium, & ad maiorem eius gloriam sic disponente, ita scrupulis vexabatur, vt quotidie ad superiores & confessores causā consolationis accederet: sed in illis infidelium

delium terris constitutus, sic diuina replebatur gratia & consolatione, vt per sex, aut plures annos solus sine socio sacerdote perseuerans, nullam animi perturbationem, aut scrupulum senserit; quotidie in conuersione animarum occupatus, tanto zelo diuinissimum hoc opus perficiebat, vt cum morbo oppressus ad vltimam vitæ periodum peruenisset, se ad Ecclesiam deferri iusserit, vt antequam moreretur duos cathecumenos baptizaret, ibique Litaniis Beatissimæ Virginis Mariæ recitatis ad mortis agoniam peruenit, eadēque die plenus consolatione decessit; Lusitanis, qui aderant, eius absentiam deflentibus; huius sancti viri memoria adhuc post tot annos in terris illis in benedictionibus est.

Non defuerunt ibi nostris persecutiones; nam mortuo Selino Rege Christianis admodum affecto, eius successor Corron, infensissimus & acerrimus hostis eorum, suis imperauit ministris, vt & domum, & Ecclesiam nostram penitus euerterent: cuius imperium executioni mandantes, domūque nostram aggredientes diruebant; sed precibus & muneribus placari ab opere destiterunt, donec Regi denunciaretur; quòd si Patrum Ecclesia destrueretur, mercatores omnes Lusitani cum maximo commercij, & regni damno discederent: hoc temporalis lucri motiuo Rex à persecutione Patrum destitit, & diruta refarcire permisit.

Fructus huius missionis etiam est vberissimus; nam Patres nostri Lusitanis hīc commercij causā commorantibus, aut continuò venientibus administrant Sacramenta, & Gentilium conuersionis incumbentes plures quotannis ex illis conuersos in Indias transmittunt.

Ad proximos Reges Christianæ religionis bonus odor peruenit: nam Rex Cache misso ad nostros Legato, ad fundandam in sua ciuitate domum & Ecclesiam inuitabat: hac Legatione expensa P. Ioseph Ale-

xius , huius missionis præses, consultis qui aderant Lusitanis, iter aliquot dierum aggreditur , vt ad prædictum Regem responsurus se transferret : postquam illuc peruenit , ad eius conspectum sistitur ipsum maximis submissionibus vñtatis salutat , & oblata quam secum detulerat Beatissimæ Virginis Mariæ pulcherrima effigie , apud ipsos etiam infideles venerabilis , solitum persoluit tributum (in toto quippe oriente nullus ad Principes & Magnates vacis manibus audet accedere) Rex ipse vultu hilari , & maxima amoris significatione Patrem suscipit , cui suum de fundanda ibidem Ecclesia desiderium manifestat , liberam conuersionis in tota ditione sua facultatem pollicetur , & plura futuræ missioni emolumenta promittit. His vrbauitatis & amoris significationibus satisfacere volens Pater , se suis Superioribus , (sine cuius licentia nihil in hac materia fieri posse dicit ,) scripturum affirmat , eique *Vale* dicens apud nostros Superiores huius foundationis licentiam instantius sollicitaturus recedit.

Potest Mogoritana Missio in ciuitate Tatta regni Sindi gloriari , quòd inter alios quos genuit Christo filios , Venerabilem fratrem Redemptum à Cruce , cuius martyrium libro sequenti capite secundo describetur , habuerit alumnum ; hunc enim nouitium vidit , & solemniter profitentem audiuit. Hic V. Frater in sæculo vocabatur Thomas Rodrigues da Cagna ; natus est in oppido dicto Paredes in regno Lusitaniæ , in Archiepiscopatu braccarensi , perrexit iuuenis in Indias Orientales , ibique per aliquot annos militauit , fuit postea dux custodiæ Domini Roderici Diez de Sampaio , Generalis in ciuitate S. Thomæ , (olim dicta Calamina , nunc vulgò *Meliapor*) tandem apud nos indutus frater Donatus , & in hanc residentiam ciuitatis Tattæ , quam alluit Indus fluuius , in regno Sindi ditionis magni Mogoris , cum maxima religiosorum & sæcularium

rium ædificatione, tum nouicius, tum professus vixit; sicut & in aliis Conuentibus nostris Diuienti & Goënsi, vbi Ianitoris & Sacristæ diu munere functus est: plurima charitatis, humilitatis, & obseruantix regularis omnibus exempla præbendo. Erat admodum affabilis & vultu hilaris; vnde & multum amabilis omnibus, cum quibus agebat. Denique in præmium suarum virtutum, Deo sic disponente, ex obedientia missus in regnum Achem in insula Sumatra, socius Venerabilis Patris Dionysij à Natiuitate, Martyr gloriosus occubuit, vt dicetur libro sequenti capite secundo. Erat statura paruus, & admodum gracilis, colote fusco, & facie præ ieiunio valde extenuata; erat prudens, acuti ingenij, & facetus in dictis: sed hæc pauca ex multis decerpisse sufficiat.

CAPUT VII.

De Missione Arabica.

Habet religio nostra in Arabia felici in ciuitate Bassora, ad fluuium Euphratem propè Sinum Persicum sita, celebrem missionem; huius fundator extitit circa annum Christi 1623. Reuerendus Pater Basilus à sancto Francisco, Lusitanus, qui linguarum Orientalium, præsertim Arabicæ, Turcicæ, & Persicæ apprimè peritus in illis partibus celeberrimus per multos annos perseuerauit: hic vniuersalem illam Christianorum sancti Ioannis transmigrationem procurauit, summa, qua apud Proregem Turcam veneratione, & autoritate pollebat: hic enim præ nimio erga Patrem amore sæpè domum nostram inuisebat. Admirabilis hic missionarius, postquam plurium annorum curriculo missioni Bassoranæ fructuosè deseruiit, ad montem Carmelum à superioribus missus se recepit; vbi postea describendis missionis illius exercitiis non impari fructu occupatur.

Huius missionis Arabicæ præbuit fundamentum annuus Lusitanorum illuc commercij causâ nauigantium aduentus ; solent enim bis quotannis , mensibus videlicet Martij & Augusti , viginti & plurium nauium classem mercatoriam illuc dirigere , faciliusque portus illos frequentant , vbi Catholicæ religionis exercitia vigent : propterea etiam Principes Mahometani ; non legem suam , sed lucrum attendentes , facile in suis terris religiosos admittunt , eisque commorandi , & Christianos ritus exercendi amplam concedunt facultatem.

Cùm præfatis temporibus Lusitani aduentant , omnibus propè Conuentum habitantibus ; non infidelium , sed Christianorum hæc ciuitas apparet ; nam quotidianæ missæ ducentis & amplius auditoribus celebrantur ; festiuis autem diebus , & maximè in Natiuitate Beatissimæ Virginis , cui Ecclesia dedicata est , cum musicis instrumentis diuina decantantur officia , & frequentia confessionis & communionis solemniora redduntur : tantoque Lusitani Patres nostros amore complectuntur , in gratiam huius ministerij , vt vix vllus accedat , qui præter copiosas eleemosynas Indica sua munera non deferat.

Præter hoc impensum Lusitanis ministerium , maius impendunt Patres nostri , Christianorum Orientalium qui ibi commorantur , incumbentes salutis. Hi licet è diuersis procedant sectis , videlicet Armenorum , Nestorianorum , Iacobitarum , & Cophthorum : in sua tamen simplicitate fidem Romanæ Ecclesiæ admittunt ; ritu quippe Romano , ministrantibus nobis tanquam Parochis , omnia suscipiunt Sacramenta , singulisque diebus Dominicis Missæ solemni interfunt , & factas Arabicæ lingua exhortationes auidius auscultant , sicque Christiana religione fouetur , & quotidianis his exercitiis , ne ad Mahometismum transcant , impediuntur.

Tandem

Tandem Patres ibi commorantes infidelium conuersioni plurimum incumbunt. Quantum erga Christianos sancti Ioannis, de quibus supra libro sexto capite penultimo dictum est, profecerint, patebit ex dicendis libro sequenti capite quinto. Circa Mahometanos etiam etsi difficilior sit eorum conuersio, non parum proficiunt: nam aliquot in lege Mahometis educatos conuertebant, alios verò ad ipsam prolapsos Christianæ restituerunt, vtriusque bina referam exempla. Quidam Bassoranus nomine Omar Mahometanis natus parentibus, ex diuturna Patrum nostrorum consuetudine fidei Christi affectus, ad Indias mittitur, vbi tandem à nostris baptizatur, mutatoque nomine, Maurus, (Lusitanè Amaro) vocatur: propter vtriusque nominis consonantiam eius in Arabiam redeuntis conuersio Turcis secreta manet. Alius item Turca Babylonius Bassoram venit, vbi à nostris baptizatus, & Ioseph à Carmelo vocatus ad Indias destinatur; vt inde Romam, nauibus Lusitanis vectus, posset peruenire: hic vir viginti quinque circiter annos natus ad celeberrimum Mahometani nominis templum, quod Mecchæ colitur, deuotionis causa erga suum Pseudoprophetam perrexerat, templum ingreditur, supersticiosi ritibus insistens diutius in templo commoratur, vbi mysterioso somno correptus sanctum Petrum Apostolum videt, qui ipsum baptizans ab impio templo iubet exire, & ad Christianorum terras transmigrare: hoc mandato permotus prædictam suscipit peregrinationem: cumque Goam peruenisset, in nostro Conuentu recipitur, vbi ipsum prædicta narrantem audiui. Cum eum Domino Michaëli de Norogna Comiti de Lignares Indiarum Proregi, in Lusitaniam redeunti commendassemus, mari committitur; sed in diuturna hac septem mensium nauigatione, iam cælo maturus è viuis decessit. Non leuitatis, aut necessitatis causâ Mahometanam hic

fidem deseruerat; nam vir erat maturæ ætatis, & diues mercator. Quî Mahometanorum difficilem admodum nouit conuersionem, eamque tam conuerso, quam conuerteti periculofam, non miratur, dum paucos audire multorum annorum spatio conuersos; plures sine dubio conuerterentur, vt ab ipsismet Mahometanis audiui, nisi sua conuersione certissimam sibi eamque crudelissimam necem afferrent: ex his autem qui Mahometani per vim effecti, nostrorum Patrum opera ad Christi fidem reducti sunt, propeinodum infiniti possent numerari; sed duos tantum celebriores in medium afferam. Primus vocabatur Bartholomeus Correa Lusitanus Vlissipone oriundus, hic adhuc puerulus capto Ormusio in Persidem transfertur, vbi Proregis Sirasensis puer honorarius effectus, Mahometanis dogmatibus imbuitur, multis post decursis annis, pictoris artem edoctus vxorem duxit, & sæpe cum turmis sui Proregis ad regium Persidis exercitum eques destinatur: à suo Prorege, apud quem semper mansit plurimum ab ipso dilectus, & diuitiis ditatur, & aliquot oppidorum dominio honestatur; sed Christi Domino eum ad suam fidem reuocante Bassoram pergit, vbi superatis maximis difficultatibus libro primo capite vltimo expressis, ad Indias dimittitur. Dum Bassoræ apud nos commoratur Ecclesiam de nouo constructam variis exornat picturis. Alius vocabatur Anthonius è ciuitate Diu oriundus: hic captâ Lusitanis nauî ad BandelRegh; siue ad portum arenosum in Sinu Persico deducitur; puer erat, vnde facile Domini sui portus illius gubernatoris persuasus blanditiis, abinrata Christi fide Mahometicam amplectitur, tanto affectu diligitur, vt totius domus cura ipsi à Domino demandaretur: sed bono suo Bassoram mittitur, vbi à nostris Patribus agnitus dolo capitur, & in secreto recluditur loco: hæc vbi nuntia eius Domino relata sunt, missis ad Proregem

Bassoranum supplicibus epistolis suum ab ipso exposcit captiuum, quem contra iustitiam in ciuitate ipsius libera dolosè captum, & vi retentum affirmat: religionis & status rationes adducit, ipsum asserens sponte Mahometanum esse, & se amicum intimum (è cuius portu multa Bassoræ commoda proueniunt) commemorans; sed Prorex ipse Patrum amorem, eius amori, & commodum Lusitani commercij præferens, Patres quietos relinquit, & puer ipse paulò post reconciliatus Ecclesiæ ad Indias remittitur.

Præter ordinaria aliis missionibus exercitia, prædictus Pater Basilius fundator istius aliqua extraordinaria media ad alliciendos horum Arabum animos induxit: nam & quotidianas pluribus largiebatur eleemosynas, & Chirurgiam erga pauperes exercebat: nullus in illis partibus est Chirurgus, nullus Medicus, omnia pene fato relinquunt: Pater ipse tot miserorum vulneribus commotus, fecit vnguenta, quotidie determinata hora venientibus Conuentus porta aperitur, omnibus ineditur; & diuina potius virtute, quàm arte omnes è foetidissimis, ac putridis vlceribus curantur. Hæc pietatis & misericordiæ opera communem totius Ciuitatis amorem, & applausum ei conciliarunt.

Præ cæteris emicuit continuum charitatis exercitium, cuidam pauperi per multos annos ab ipso patre exhibitum; erat quidam mendicus ad eleemosynas exposcendas prope conuentum sedens; contigit malo, vel potius bono suo, quoddam inuidiæ causa ab aliis mendicis gladio vulneraretur, eoque illorum rabies & crudelitas pertingit, vt ipsi verenda amputarent; ad eius clamorem accurrunt multi curiositate, non charitate moti: Patres nostri hoc successu commoti, & commiseratione ducti illum in domum statim, vt credebatur, moriturum deferunt: sed miraculosis illis medicamentis curatur, multisque apud nos iam domesticus annis com-

344 *Itinerarium Orientale R. P. Philippi.*
moratur, & Christianus effectus, ac Eustachius nomi-
natus fœliciter me præfente è viuis excessit.

C A P V T V I I I.

De missione Syriaca.

DVæ sunt Patrum nostrorum in Syria missiones.
Prima in Ciuitate Aleppi fundata anno Domini
1627. secunda in monte Libano fundata anno 1644.

Missionis Aleppensis fundator fuit R. P. Prosper à
Spiritu Sancto Hispanus Cantaber, vir planè Apostoli-
cus, qui iam ante in Persidem missus Conuentus nostri
Aspahanensis Prior electus fuit; sed propter negotia
consilio Patrum in Europam rediens, iterum prædicto
anno Aleppum mittitur. Plurimas in hac fundatione,
tum Turcarum, tum Christianorum difficultates repe-
rit; primas Christianissimi Regis autoritate, secundas
longa & admirabili patientia superauit. Quando in
Persidem missus Aleppo transiui, ipse Domui præerat,
omnibus mercatoribus Gallis & Italis charus, & præ
sanctitate venerabilis: tanto animarum zelo flagrat,
vt linguam Persicam & Arabicam admodùm senex con-
tinuo studio, & assiduo labore ad earum conuersio-
nem comparauerit: sed de eo iterum capite sequenti
dicetur.

Superatis, quæ ibidem occurrerunt difficultatibus,
in magno campo, vbi Consul Gallorum cum præcipuis
mercatoribus etiam Italis & Turcis, sub custodia ad
maiorē securitatem commoratur, domum eligit, eam-
que, vt moris est, sola diues Dei prouidentia emit quin-
gentis circiter nummis, soluto insuper quotannis sexa-
ginta nummorum censu.

In hac missione Patres circa Christianos Catholi-
cos, tam Italos, quàm Gallos ibi commorantes, eadem,
quæ hîc in Europa, faciunt exercitia, eorum confes-
siones

siones audiendo, verbum Dei prædicando, Missas & officia diuina ipsis cooperantibus decantando; vnde inter ipsos mercatores maior in terris infidelium pietas apparet, quàm sit in terris fidelium. Circa Christianos orientales schismaticos plurimum laboris impendunt, vt eos reuocent ab erroribus; propterea linguam Arabicam, vt cum eis conuersentur, addiscunt; eorum paruulos linguam Latinam & Italicam edocent, vt ex diuturna conuersatione nostra ritibus Catholicis familiares effecti, Catholicam fidem amplexentur, ex quibus exercitiis vberius emanat fructus. Circa Mahometanos paruus apparet profectus; tanta enim diligentia ministri Mahometicæ legis inuigilant, vt mulieres & paruulos nauigare cum Christianis non permittant, ne hac occasione ad Christianorum terras peruenire possint, nec de lege disputare, vel aliquid loqui sinunt. Mirum est quantum Christianos despiciant, & quantum Iannisseri eos persequantur, quotidie pecunias, vestes, vinum, aliqua per vim extorquant; & tanta insolentia, vt præcipuos etiam mercatores fustibus, pugnis, & gladiis percutiant.

Quamuis hæc Aleppensis missio propter animarum salutem, & infidelium conuersionem fundata sit; ad eius tamen foundationem plurimum contulit huius ciuitatis situs: cum enim ibi fiant mercatorum commeatus, vt inde simul discedentes, & Arabiæ desertum turmatim pertranseunt in Persidem perueniant: iudicatum est fore peropportunum in hac Ciuitate domum erigere, vt illac nostri in Persidem properantes, refrigerium & solatium apud nostros reperirent, & extraordinarios sumptus excusarent: huius missionis Ecclesia Beatissimæ Virgini Mariæ de monte Carmelo dedicata est.

Missionis montis Libani fuerunt authores quidam Maronitæ, qui Patrum nostrorum exercitiis & conuersatione moti, eis eremitorium quoddam sancti Patris

Elisei quasi nobis debitum, cum domo, aliisque annexis prope locum Cedrorum sponte concesserunt. Ad hanc missionem fundandam primus Aleppo missus est R. P. Cœlestinus, qui iam in Aleppensi missione maximo cum fructu plures annos transegerat: linguam autem Arabicam tam perfecte didicit, ut in hac materia nullus ex Europeis eo superior, & vix ullus æqualis reperiatur, cuius linguæ notitiam, quam proprio Marte didicit, sine invidia pluribus aliis communicat.

Quia, ut dictum est, Maronitæ Libani montis Incolæ soli inter orientales Christianos sunt Catholici: ideo Patres nostri in hac missione commorantes eadem cum ipsis, quæ hîc cum Europeis nostris observant exercitia: Sacramenta Ecclesiæ administrant, verbum Dei concionantur, ibique ab infidelium vexationibus remoti quietius viuunt, propriæ salutis inuigilantes.

C A P V T · I X.

De missione Terra Sanctæ.

IAm à multis annis Carmelitana religio nostra patrij Natiuitatis soli desiderio flagrans suum anhelabat Carmelum. Iam R. P. Prosper à Spiritu Sancto possibilem nostris superioribus Carmeli restorationem scripserat; cum ad totius ordinis consolationem, eorundem Superiorum mandato, tam arduum sola patientia munitus, & Dei providentia securus reparandi Carmeli negotium aggreditur anno Domini 1631.

Cum obedientiæ præceptum antiquo suo desiderio coniunctum vidit, adit intrepidus Principem Carmeli, vulgò Mir Tarabei, ad oppidum Genim in radicibus montium Ephraim, in campo magno Esdrelon situm: rem proponit, oblatisque muneribus, tandem concludit, nostros Patres in Carmelo monte sub ditione & protectio

protectione ipsius fore mansuros, persoluto ducentorum nummorum annuo censu.

His ita conclusis ad montem properat, locum nouæ foundationis eligit, ibique cauernam supra libro tertio capite primo descriptam, cum sociis incolit: inde ad visitanda sacra huius montis loca quotidie procedit; nunc ad antiquum Carmelitarum oratorium, primum quod in orbe terrarum sanctissimæ Virgini Mariæ suæ matri dilectissimæ post eius transitum ab ipsis fuerat consecratum; nunc ad fontem Eliæ nostri Patriarchæ, & huic adiacentem penè dirutum Carmelitarum Conuentum; nunc ad locum sacrificij, vbi sanctus Elias Deo vero sacrificans, ignem cœlestem attraxit, qui victimam comburens infidelium Iudæorum corda ad pœnitentiam emolliit; nunc ad cauernam eiusdem sancti prophetæ; nunc ad interiora montis penetrans, ad remotissimas antiquorum Carmelitarum cellas in viuo sculptas lapide recedit.

Vix credi potest, quot difficultates, quot contradictiones, quot pericula in hac foundatione perpessus sit: nam primò quidam religiosi nimia suæ religionis gloria, nimio conseruandæ Terræ Sanctæ sibi solis zelo, nihil intentatum & inausum reliquerunt, quin nos ab eius possessione excluderent, & à monte Carmelo deturbarent; sed accedente Superiorum autoritate, & summi Pontificis mandato hæc prima procella quieuit, & iam summa concordia inter ipsos & nostros in possessione Terræ Sanctæ viget.

Secunda, sed diuturnior desæuiit tempestas: nam cum in cauerna sancti Patris Eliæ tanquam in celebri sanctuario commorentur Eremitæ legis Mahometicæ: hi ex Patrum nostrorum aduentu sibi aliquid sinistri præfagientes, & proprium inde timentes exilium, terram & inferos mouent, vt eos de sacro hoc monte repellant. Priuata primùm autoritate persecutionem contra eos

excitant , mortem minantur : Patres nostri obstinatum eorum voluntatem in malo ; quin potius furorem aduertentes per loca montis secretiora errabundi discurrunt , in antiquis ædificiorum ruinis latitant, nec quicquam aliud tunc præter siluestres comedunt herbas : hi dæmonum ministri per montem diuisi , & circumquaque cursitantes insequuntur , nullibi quiescere permittant : denique tanquam lupi rabidi mansuetos Christi agnos in quodam saltu repertos mactare decernunt: sed Deo eorum innocentiam protegente , ex improviso & præter spem illuc adueniat Patrum amicus , qui iam imminentem ab ipsis mortem auertit, admonitusque de his Princeps Carmeli Patres protegit, & commotam in eos sedat tempestatem.

Cùm hi Patrum persecutores , se quicquam contra ipsos propria authoritate moliri posse desperarent, ad Turcarum Imperatorem Constantinopolim , iustitiæ causa impetrandæ accedunt : tot contra ipsos Patres, & eorum protectorem Carmeli Principem exaggerant crimina , religionis & status rationes obiiicientes , vt his commotus Imperetor Proregem Damascenum illuc miserit , circa hæc inquisitum. Hoc expedito mandato Constantinopoli discedentes Damascum aduolant , Proregi patentes Imperatoris exhibent , & de agendis ipsum instruentes vsque ad Carmelum comitantur.

Audito hoc nuntio Princeps Carmeli Patres admonet , vt statim recedentes ad inuia loca confugiant, donec sedatâ tempestate rursus euocentur ; obediunt Patres , ad præcella montis iuga conscendentes in cauernis latitant , agrestibus tantummodò herbis victitantes , & exitum rei Domino commendantes. Tandem venit Prorex delegatus , occurrit Carmeli Princeps , & præmissis vrbauitatis affectibus suam Prorex commissionem proponit , multa de hac re maturè discutit

cutiuntur, de Patribus agitur, quos inde expellendos esse diiudicat. Princeps his auditis respondet primò Patres recessisse; deinde aduocatis pluribus è suis Mahometicæ legis sectatoribus, tanquam ocularis testibus, innocentissimam Patrum ab initio conuersationem exponit; his & muneribus placatus Prorex ad instantiam Principis decernit, vt Patres redire possint, & in illo monte quietiùs permanere.

Superatis his maioribus procellis aliæ non defuerunt: nam & insolentes milites, & Arabes aduentantes rapinis, iniuriis, & verberibus Patres afficiunt, quotidieque noua ad eos vexandos excogitant artificia; quæ omnia constanti patientia Patres superant.

Prima religionis intentio in nostri reparatione Carmeli fuit, vt filij Carmeli, qui suum ab hoc natali solo exilium per aliquot sæcula defleuerant, nunc de noua possessione gauderent, & Patres ibi commorantes suorum parentum Eliæ & Elisæi vestigia sequentes, intimæ contemplationi diuinorum in sanctis illis eremis, ab omni creaturarum strepitu separati vacent, quem tamen recessum, si proximorum spiritualis necessitas exigat, eorundem parentum suorum exemplo relinquere debent.

Hinc religionis intentioni Patres Carmelum incolentes perfectè satisfaciunt; nam vix paucos illuc aduentantes Arabes, & paucissimos vident Christianos: vnde continua gaudent solitudine, quam diuinorum assidua contemplatio, & piorum lectio librorum conditam suauissimam reddunt. Ibi licet aliquando duo tantummodò existant, diuino officio tamen debitis horis satisfaciunt, & media nocte (expertus loquor) galli cantu excitati ad matutinum surgunt: officii autem persolutis, quod reliquum temporis habent in mediis illis siluis iuxta morem antiquorum Carmeli Eremitarum, ignitas iaculantur ad cælum aspirationes; ita vt
de

de ipsis illud Michææ 7. meritò intelligatur ; *Pasce populum tuum in virga tua , gregem hereditatis tue , habitantes solos in falsu , in medio Carmeli pascentur Basan & Galaad iuxta dies antiquos.*

Si rigidum ipsorum viuendi modum attendamus, non inferiores filiis Prophetarum inueniemus : nam sicut illi prandium paraturi , non ad hortos , sed ad campos herbas agrestes collecturi properabant : sic & in Carmelo nostri faciunt , vt ipse per viginti duos dies ibi commoratus experienciâ didici , lac ipsis à Carmelitis pastoribus subministratur , vix aliud comedunt : quantum ad potum pura sufficit aqua. Hunc rigorem maximè in potu voluit Deus mirabili successu comprobare , erat inter ipsos Patres Carmeli incolas vnus vir spectatæ virtutis ; cui tamen vini abstinentia nimis apparuit rigorosa , vnde vinum moderatum tanquam sibi necessarium poposcit : R. P. Prosper hanc assuetam vini abstinentiam infringere nolens , multis rationibus , & exemplo præsertim sancti Eliæ Carmelitarum Patriarchæ eam seruandam suadere conatur ; nam cùm ei Deus abundè alia subministraret , etiam tempore famis , subiungit tamen , *ibi de torrente bibes* ; & dum Iesabel fugiens furorem , in deserto reficiendus erat , adest Angelus qui panem subcineritium ; & vas aquæ , non vini affert : hæc audiens Pater ille , rationum congruentiam admittit , sed tamen suam exponit necessitatem ; vnde huius difficultatis iudicium ad Superiores nostros remittitur : à quibus subueniendum esse huius Patris necessitati iudicatur ; vinum adducitur , parum ei infunditur : res mira ! dum vinum oblato cratere recipit , deliquio mentis in terram cadit , statim in cellam deferitur , cùmque ad se rediisset credens hoc casu euenisse , alia die dum vinum iterum capit , eadem deliquij pœna punitur ; sed tertia vice dum idem attentat , tanta vi deliquij opprimitur , vt paucis post diebus interiret :

rit: hac temporali pœna hanc leuem culpam puniit Deus, tot eius merita & virtutes in cœlo præmiaturus.

Quamuis Patres incolæ Carmeli recessum & contemplationem, tanquam potiore partem elegerint; non tamen sic proptiæ vacant salutis, vt alienam contemnant: nam aliquos Carmeli incolas, quos ab antiquis Christianis ibi commorantibus descendere traditio docet, continuis charitatis officiis & exhortationibus ad Christi fidem alliciunt; plures Christianos Turcarum captiuos ad Carmelum confugientes euadere faciunt: & tandem omnes Christianos, tam Orientales, quàm Europeos illuc accedentes religiosa conuersatione ædificant.

Hic amor proximi ipsos è dulci solitudine Carmeli ad publicum venire cogit: nam cùm Ptolemaidæ, vulgò apud sanctum Ioannem d'Acridi, aliqui mercatores tum Galli, tum Itali negotiorum causâ commorentur, & defectu Sacerdotum diuinis officiis interesse non possint, diuinique verbi penuria laborent: etsi locus à Carmelo tribus circiter leucis distet; illuc tamen Patres pedites accedunt, vt proximorum salutis cooperari possint, & sic Dominicis diebus, & maioribus anni festiuitatibus ibi Missas celebrant, verbum Dei prædicant, & Sacramenta Pœnitentiæ & Eucharistiæ illis ministrant. Ad quorum faciliorem executionem locatam habent Ptolemaidæ domum, ad quam illuc venientes se recipiunt: sed frequentior est illorum accessus, cùm naues Massilia, vel aliunde appellunt: tunc enim crescente segete, operarij Christi maiorem opera assiduitatem præstant.

Præter ordinarium huius operis fructum, conuersionem vnus hæretici ibi commorantis fœliciter obtinuerunt: hic erat Venetus nomine l'Hermite, qui diuturna Batauorum familiaritate à Catholica fide defece

352 *Itinerarium Orientale R. P. Philippi.*
defecerat, & Caluini libros continuò voluebat; sed im-
portuna, vt ita dicam Patrum exprobratione resipif-
cens, ad fidem Catholicam redit, & libros hæreticos
igni condemnandos ipsis tradit.

Hæc sunt, quæ circa missiones nostras orientales
ex multis dicenda occurrunt; reliqua historiæ religio-
nis; sicut & quæ à nostris missionariis in Anglia, Hi-
bernia, Hollandia, & alibi in Europa geruntur, expo-
nenda relinquo.

LIBER



LIBER NONVS ITINERARII

In quo

Plures euentus in Oriente memo-
rabiles enarrantur.

C A P V T I.

De Prodigioso successu in ciuitate Goa.



ANTEQVAM ex Oriente meum descri-
bam recessum; aliqua, quæ ibi successerunt
memoriæ digna, sunt sigillatim referenda:
vt autem à sacris initium sumatur, prodi-
giosum referam successum iisdem omnino verbis, sed à
Lusitano in Latinum translatis, quibus expositus
fuit Gubernatori siue administratori Archiepiscopatus
Goani, ad hoc vt eius authoritate fieret authentica
eius informatio & confirmatio: sic igitur à monialibus
sanctæ Monicæ Ordinis S. Augustini, in quatum Ec-
clesia Goënsi successit, exprimitur.

Dicunt Mater Priorissa, & aliæ Religiosæ monaste-
rij sanctæ Monicæ huius ciuitatis Goënsis simul cum
suo Confessore; quòd adorationis, venerationis, ac
propriæ consolationis causa habent in suo choro su-
periore: in quo diuinum solent persolvere in commu-

nitate officium ; ac alternis vigiliis coram sanctissimo Sacramento assistere , vnum Crucifixum vultus emortui , ac staturæ vnus hominis , affixum magnæ Crucis ex ligno fortissimo confectæ , quæ in vacuo parietis arcus eiusdem chori prominentis Ecclesiæ collocata est , & inferius fixa intra fornicem satis fortem , ac munitum ; & sic firma adhæret , vt dimoueri non possit.

Cum hæc ita sint , & aliunde sanctus Crucifixus chorum directè respiciat , & terga Ecclesiæ vertat : contigit prima die veneris Quadragesimæ præteritæ , quæ fuit octaua Februarij anni millesimi sexcentissimi trigesimi sexti , qua in eodem monasterio omnes religiosæ , aliæque mulieres illis deferuientes , Sacramenta Pœnitentiæ & Eucharistiæ susceperunt , Iubilæum lucrata sunt , & intra clausuram secundùm morem suæ religionis processionem celebrarunt exprimètes sacratissimam Christi Domini processionem à domo Pilati vsque ad montem Caluarium : cùm ad dictum Crucifixum , vbi talis processio terminabatur , peruenissent , ad cuius latus dextrum est imago sculpta Sanctissimæ ac dolorosæ Virginis Mariæ ; ad sinistrum verò imago mœstissima sancti Ioannis Euangelistæ ; & ad pedes Crucis imago sanctæ Mariæ Magdalenæ illam amplectentis ; adhibebitis circumquaque multis cereis , quibus accensis , totus chorus illustrabatur , & Crucifixus clarè videbatur ; cùm iam esset octaua post meridiem hora dictæ diei , & religiosæ venissent à choro inferiori , vbi consue tam sumpserant disciplinam , ac ibi circa Crucifixum assisterent unitæ adhuc ; vt ipsum contemplantes , ei in sua passione condolerent : tunc incipit sanctus Crucifixus aperire oculos , non secus ac viuus existens ; quod aduertentes aliquæ moniales , alias de hoc admonentes , curiosius omnes inspicere cœperunt : idem omnes vident , videntes maximo terrore ac stupore perfunduntur , magnusque inter illas strepitus ac clamor exoritur ;

tur ; quo aliæ monasterij religioſæ , aliæque mulieres à choro abſètes excitatæ , etiã inſirmæ ſtatim accurrerũt.

Tunc quidem ſanctus Crucifixus ad priſtinam demortui figuram rediit : cum tamen omnes attentæ ac oculis in ipſum fixis perſeuerarent ; ecce iterum quaſi eſſet viuus , aperit oculos : cùmque pauor , admiratio & ſtrepitus magis ac magis creſceret , mater Prioriſſa & aliæ religioſæ conſultrices , & præcipuæ monaſterij acceſſerunt ad contiguam procurationis domum , in qua earum Confefſor commoratur , & percutientes cratem ferream admonuerunt de hoc ſucceſſu R.P. Fr. Didacum à ſancta Anna ſuum Conf. ſſorem & ſuum à principio foundationis adminiſtratorem , omnia quæ contigerant ei exponentes. Is quidem caſum admiratur , tanquam quid inſolitum , ac miraculoſum ; non audet tamen monaſterij clauſuram ingredi , donec ei dictum fuit ; quod aliquæ moniales inſirmæ volebant confiteri , & ita hoc motiuo ingreſſus eſt , quatum confeſſione audita , cùm ad chorum ſuperiorem perrexiſſet , vt illius miraculi veritatem exploraret , ibi cum monialibus à nona circiter hora uſque ad mediam noctem aſſiſtens , vidit vnà cum reliquis clarè ac manifeſtè , quòd ſanctus Crucifixus multis vicibus aperuit oculos , & ad diuerſas chori partes conuertit , & maximè ad dexteram in qua ſitum eſt monaſterium : quæ conuerſiones , nunc maiori , nunc minori ſpatio perſeuerabant ; aliquæ per quadrantem ; omnes tamen clarè ac diſtinctè videbantur , & maximam omnibus attentionem ac deuotiſſimam cauſabant reuerentiam. His finitis ad priſtinum intermediis ſpatiis redibat ſtatum : vnde dictus pater aſſeuerat , quòd minori quatuor horarũ ſpatio , viginti ſex vicibus apertos ſancti Crucifixi oculos viderit ; duabus verò ſic apertos , vt integras circũ pupillas coloris cærulei obſcuri in medio albi diſtinxerit : quæ omnia moniales , ac ancillæ ibi aſſiſtètes viderunt.

Insuper hac die, aliisque sequentibus ab eodem Patre Confessore, monialibus pluribusque aliis personis diuersi status sancta Crux tremere visa est, quasi esset virga viridis visus est etiam fluere sanguis à capite sancti Crucifixi, ab eius corona spinea dimanans; & à manibus, pedibus, ac latere visus est etiam sanctus Crucifixus corpus suum extendere, vnde cum prius esset multum collectus, ac improporcionatus; nunc extensus ac valde proporcionatus perseuerat: item visus est sacrum os aperire, verba pronuntiare (quæ tamen audita non fuerunt) ex oculis lachrymas fundere; & ita corpus colligendo commouere, ac si animam tunc efflaret. Sacrum eius pectus intumuit, & membra prius Cruci coniuncta, nunc separata videntur; & sic ab Ecclesia, & à choro optimè conspicitur; cum antea non posset ab Ecclesia conspici: item visus est sæpè colorem, tam vultus, quàm corporis mutare: corpus verò modò macie confectum modo plenum ac intumescens apparere, ita vt effectus veri Crucifixi viui edere videatur.

Hæc omnia contigerunt in die octaua mensis Februarij huius anni millesimi sexcentissimi trigessimisexti, qua principaliter visa sunt, & multis aliis diebus; ac noctibus per totam Quadragesimam; & maximè diebus Veneris hora quasi meridiana: sexta verò feria sacratissimæ passionis mutauit sanctus Crucifixus colores, & intumescente pectore quasi in agonia visus est. Quæ vsque ad præsentem diem decimamoctauam mensis Maij, festiuitatem sanctissimæ Trinitatis eiusdem anni perseuerant: & sic fuerunt nota, & per ciuitatem promulgata; vt penè totius ciuitatis populus diuersis diebus, multisque vicibus ad Ecclesiam monasterij turmatim accesserit, ad hæc miracula videnda & adoranda. Multi qui opportuno venerunt tempore, illa viderunt; tantusque fuit populi concursus & occursum, vt Ecclesiæ fores occludi non possent; & quod mirabile

bile est , quandò populus ex Ecclesia has immutationes se videre clamabat , simul à monialibus in choro existentibus videbantur : séque tanta liberalitate benignus Dominus manifestabat , vt etiam gentiles hæc mirabilia viderint , ex quibus aliqui ad fidem Christi conuersi sunt.

Bis Illustrissima Vestra Dominatio , aliæque grauissimæ personæ simul accesserunt , & mirabilia Dei viderunt : & maximè secunda die Veneris eiusdem Quadragesimæ, ab hora octaua in nocte vsque ad decimam; & semel accesserunt Domini Inquisitores Apostolici: Item duodecima eiusdem mensis Februarij accessit Dominus Prorex ; tunc enim circa meridiem se sanctus Crucifixus manifestauit ; sed cum tardius aduenissent, nihil præter aliquos supernaturales effectus viderunt: quibus , circa mirabilium , quæ audierant , veritatem confirmati recesserunt.

Cùm hæc ita sint , & sanctus Crucifixus sit in debita proportione ; cùm antea multos artis defectus haberet ; cùmque prius eius oculi ducta solummodo linea nigra notarentur , nunc apertæ videantur palpebræ; intus verò album , & in eius medio pupillæ appareant, aliæque multa particularia , quæ humana depingi non possent industria : & cùm iam à viginti sex annis sculptus ac depictus fuerit , mandato R. P. Magistri Fratris Didaci à sancta Anna , absque vlla renouatione, & haberet multos in proportione ac pictura defectus (propter quos dictus Pater iussit alium efformari , & in eius loco nisi restitissent moniales, voluit collocari) nunc est imago perfectissima , pulcherrima , & aspectu gratissima : sanguis verò ita recens , ac tam iucundi , & viuidi coloris ; vt angelicis , non humanis manibus efformatus videatur. Inde apparet quòd tota hæc sacratissima imago sit quoddam miraculum continuum ac perpetuum , in quo laudetur Dominus Iesus Christus

per infinitam omnium sæculorum æternitatem. Amen.

His verbis dictum miraculum fuit expositum Domino Michaëli Rangel Lusitano Episcopo Cochinenfi, ac Apostolica authoritate Goënsis Archiepiscopatus Gubernatori ; vt illud adhibitâ præuiâ inquisitione ac discussione confirmaret : propterea omnes pene, qui iuris, tum Ciuilibus, tum Canonici censebantur periti, aut in sacra Theologia docti ; sicut & omnes Prælati Ecclesiastici, ac religionum superiores in Archiepiscopali palatio sunt ab ipso congregati.

Aula satis ampla , ad hunc congressum celebrandum fuit preparata , erectum fuit altare in fine aulæ , quæ dispositis circumquaque sedibus erat plena : in principio verò erant tria sedilia , in medio erat Patriarcha Æthiopiz , à dextris Episcopus Hierapolitanus , à sinistris verò Episcopus Gubernator : alij verò , tum sæculares laici & Clerici , tum regulares promiscuè sedebant.

Omnibus iam sedentibus & attentis , Episcopus Gubernator exponit causam talis congressus , omnes sigillatim interrogat , quid in præsentī materia sentiant ; illam iam omnes examinauerant , multis enim ante diebus transsumptum huius miraculi adhibitis testibus habuerant : tandem singulis ritè examinatis concluditur , prædicta esse miraculosa ; vnde vt talia declarantur , & in gratiarum actionem , *Te Deum* cantando , omnes qui aderant processionaliter in Ecclesiam procedunt , interim campanis iucundè sonantibus.

Ad hoc miraculum dignè celebrandum , festa tum spiritualia , tum temporalia parantur : omnes anxio præstolantur animo , quid illo prænuuntietur : singuli religionum Superiores singulis diebus concionantur, omnesque ferè in eo conueniunt , quòd Dominus super regnum Lusitaniæ , ac Indias oculos suæ protectionis aperiret;

aperiret; sed tamen euentus expectabatur : multa eduntur signa lætitiæ , ad celebrandum tam iucundum , vt credebatur, prænuntium.

Euentus infœlix , qui postea contigit, hanc omnium spem diminuit aliquantulum ; contigit enim , vt in vigilia Natiuitatis Domini immediatè sequenti , dum moniales eximium Christi præsepe parant , ignis supra materiam combustibilem cadens ; non solum præsepe, sed totum monasterium miserè consumat : quod vix triginta millibus aureis refici potuit ; multa ac pretiosa hoc incendio consumuntur , Crucifixus tamen miraculosus ab illo eripitur , & in Ecclesiam sancti Augustini proximam transfertur , vbi eum videre ac attentè contemplari potui: prædictum miraculum huius incendij prænuntium asseriebant multi ; sed potius crediderim illos ritè prædixisse , qui dixerunt illo exprimi futuram Lusitaniæ libertatem , ac Indiarum renouationem imminere , fundati autoritate prophetiæ factæ primo Regi Lusitaniæ : illi quippe Dominus sexdecim generationes filiorum, ac nepotum promittit, & in decimasexta defecturam prædicit eius progeniem ; supra quam tamen se respecturum pollicetur.

Hunc Domini respectum ac fauorem Lusitani iam diu præstolabantur ; sed quandò accideret , penitus ignorabant: iam accidit, iamque fructu illius perfruuntur ; vnde prædictum miraculum huius Lusitaniæ renouationis prænuntium ex euentu possumus appellare. Plura alia, etiam miraculosa referre poteram ; sed breuitatem ex industria affectans prætermitto.

CAPVT II.

*De Martyrio V. P. N. Dionysij à Natiuitate,
& V. F. Redempti à Cruce.*

CUm Indiarum Prorex Dominus Petrus de Silua ob bonum status Indici mittere decreuisset ad Regem Achem, Legationis causâ, Dominum Franciscum de Soza de Castro, ad eius petitionem Venerabilis Pater noster Dionysius à Natiuitate cum eo nauigare iubetur; tum vt peritissimi Nauarchi; tum vt eius ad Regem illum interpretis munere fungeretur; & insuper ei à sacris esset confessionibus; propterea tunc ad sacrum presbyteratus ordinem promotus die sacro Natiuitatis Beatissimæ Virginis anno Domini 1638. primam Missam in nostro Conuentu Goano solemniter decantauit.

His peractis iam imminenti se accingit nauigationi, dolentibus cunctis religiosis; maximè R. P. Matthæo à Cruce Conuentus Priorè, de futura eius absentia; & me plurimum resistente: ipsi in socium deputatus fuit V. F. Redemptus à Cruce Lusitanus; cuius etiam profectio difficultate non caruit: nam præter habitualementem virium deiectionem, & corporis malam affectionem (adde vt à nonnullis ad longum illud iter ineptus haberetur,) personæ quædam deuotionis gratiâ retinere cupientes, bono vt arbitror zelo, nihil non intentatum reliquerunt, quin etiam dum iam Conuentu egressus in portu nauigationis diem expectat, pertinaci ac temerario ausu, medica aromata cibus immiscuerunt, vt subitaneum aliquod symptoma fratrem arriperet, atque ab itinere reuocaret. Sed non est consilium supra Dominum, qui seruum suum elegerat ad coronam: soluit Goano portu Legatus 25. Septembris 1638. duabus nauibus ad pugnam armatis, & tertia deportandis
apta

apta prouisionibus ; sæuissimis agitari procellis 25. mensis proximè sequentis, admirabili directione nostri nauarchæ appulerunt ad Insulam exulum , vulgò *dos Degradados* , ab vrbe Achem distantem passuum 8000. Hic in duas naues Hollandicas accensum est bellum; & illæ quidem fœdè dilaceratæ fugerunt, & Legatus vulnus à pugna recepit, ac suas naues in conspectu portus Achem iactis anchoris collocauit.

Visis, quas diu expectabant, Lusitanorum nauibus confestim adfuit à Rege missus Eunuchus, vt sciret quis in illis esset, & vnde venirent: qui vbi responsis vtrò cirróque redditis accepisset, adesse Lusitanorum Oratorem, magna lætitiæ signa dedit, significans Regem suum impensè gaudere de honorifica Legatione personæ tam nobilis tam excellentis: sed melliflua hæc verba pectoris erant odio pleni. Sequenti Luce adest iterum Eunuchus, qui amicitiae & lætitiæ significationes continuans nomine Regis ipsum Oratorem ad ingressum portus inuitat, asserens ipsum Regem stipatum suis Principibus, & Magnatibus in littore aduentum eius expectare, vt ad præparatum deduceret palatium. Ad hunc finem cymbam Regiam honoris gratiæ, & beneuolentiæ signo; Regalibus armis, vexillis, flammulis ornatam; terræque fructibus & eduliis, quibus Orator & comites recrearentur, onustam: fidem præstitit fidei Regiæ, & Legatorum dignitatem apud omnes gentes inuiolabilem, sperauit etiam in hoc regno suo, in pretio fore seruandam. Portum per quindecim millia passuum emensum sub ipsa ciuitate Achem stetit; inde à propriis: nautis in tapete delatus fuit ad litus; neque Elephantibus suis cum castellis turribusque præparatos ascendere voluit, nec potuit ob vulneris dolorem, ac virium debilitatem. Cum ergo pedibus incedere cœpisset cinctus suorum comitatu; vix paucis passibus progressus, ab irruentibus infidelis Regis cir-

cum datur ministris, qui magna feritate ac sæuitia arrepto compedes iniecerunt; eamdem crudelitatem exercuerunt in comites, quos inter, primi fuerunt Ludouicus de Soza miles Goanus ipsiusque Oratoris consanguineus, V. Pater Dionysius à Natiuitate, V. F. N. Redemptus à Cruce, duoque alij Patres Recollecti sancti Francisci. Vix sermone explicari potest, quanta incommoda & mala in hoc primo occurso pertulere gloriosi Christi Confessores ab impij Regis illius ministris: unde non leues fuerunt primitiæ crudelitatis futuræ; cum enim barbarus ille Rex iam odio in Lusitanos, omnesque Catholicos flagraret, acerrimè ad Mahometicam, quam colit, superstitionem promissis, minis, tormentis Christianos adigere meritum ducit & gloriosum. Vincitis primùm post terga manibus, cubitos etiam in summum attractos sibi mutuò coniunxerunt, humerorum ossibus in transuersa deductis, cruciati non impari ei quem sentiunt in funium tormento suspensi: captiuos Magnatibus suis distribui Rex imperauit, aut promissis seducendos, aut molestiis affligendos, donec abnegarent Christum. P. F. Dionysio Xisti subdialis angulus in habitaculum cessit, ad introitum palatij Proceris vnus, immundiciis horridus, foetore pestiferus; quo in loco seruus Dei tanquam in suauissimo roseto flagrantem animam exhilarabat. Magnatem ac domesticos, qui velut in cloacani aquarum eluuiem, culinæ spurcicias, & vrinam proiciebant in venerabile caput, cibo ventris excrementa miscebant; & faciem conspuebant, patientia superauit incredibili. Vnde alterum aggressi crudelitatis officium, promissis variis animam maculare nitebantur: Mahometo si manus daret; confestim ex ergastulo foetido in aulas palatij educendum, speciosam diuitumque coniugem accepturum, omnes vitæ dies in delitiis atque honoribus exacturum pollicebantur. Ad quæ Christi miles sancta indigna

indignatione commotus : apagite miserrima cupiditatum & Mahometis mancipia , recreor ego tormentis quæ ob amorem Christi suffero , pergite certatim ea congerere : nec enim mihi fidem euellent , donec animam euellant à corpore : nec coniugem offerte , quia iam pridem ; tum ob Sacerdotium , quod indignus in Lusitanos exerceo , tum ob religiosam professionem in sacratius seruitium Dei memetipsum abdicavi. Non omisit zelantissimus animarum amator charitatis operibus suos adiungere Confratres , & impetrata licentia (dederat enim Deus seruo suo gratiam in conspectu Magnatis , à quo Regis iussu detinebatur) captiuos visitabat , infirmis remedia , vulneratis curam exhibebat , afflictos consolabatur , vacillantes firmabat , peccatis obnoxios expiabat , reconciliabat lapsos , omnes animabat ad tormenta , atque ipsam necem pro fide & amore Christi lubenti animo sufferenda. Ab ipsismet infidelibus lingua Malaica , quam exactè callebat , eleemosynam exposcebat , & Deo dura eorū corda mouente , sapientius impetrabat ; quibus famem , sitim , nuditatem , aliásque captiuorum angustias piè solabatur : modicum id oryzæ , quod in tenuem vitæ sustentationem accipiebat ab hero , proprium appetitum eximia charitate defraudans , Christianis distribuebat. Legatus post reditum sæpe testatus est , quòd à se secretò transmissa per aliquem ex Ephebis edulia , P.F.Dionysius non attingeret ; sed viscera propriæ commoditatis effundens in concaptiuos infirmos impendere festinabat ; sed præcipuum pietatis affectum exercuit circa Patrem S. Francisci , cui graui morbo laboranti non aliter , quàm si proprio gestasset utero , materna teneritudine solatium omne præbebat , & obsequium. Hæc omnia sollicitus obibat aggrauatus compedibus arctissimis ; quibus annuli inserti ; non rotundi , sed quadri ; non ad mensuram passuum , sed palmarum incedere cogeant , & ad quem

quemlibet motum acumina infigebant, plagam refrigerabant, atque eliciebant sanguinem, quo patientissimæ charitatis spectaculo comites Christiani se se ad quælibet supplicia perferenda potenter animatos fuisse commemorant. Charissimus F. N. Redemptus à Cruce, postquam mille similiter à lictoribus insolentias, crudella vinculorum tormenta, ferreos compedes animosè pro fide & amore Christi sustinuit; ab hero cui obrigit, capite, barba, superciliis etasis exponitur ludibrio Mahometanorum, bubalorum custodiæ mancipatur, ad secandam paleam destinatur; aliquandò per triduum sine ullo cibo detinetur, angustiis naturæ famelicæ supra modum excruciat; cum fame penitus deficeret, fugit in siluam; in qua tandem repertus, & coram Rege adductus de nouo sollicitatur; vt relicta fide Christiana ad Mahometicam sectam transeat; hoc enim pacto omnia incommoda laborum, & famis cessatura promittuntur: sed generosus Christi miles, promissa irridens, respondit incongruum esse, se ad legem Mahometis allici, qui eò venerat, vt ad fidem Christi eos conuerteret: hoc mihi retulit testis oculatus. Ex alia parte nitebantur intorquere satanicæ perfidiæ ministri Casii, siue legis spurcissimæ Sacerdotes, qui iugiter fermè laceſcebant, diuitias, matrimonium, honores promittentes: quæ Dei seruus respuebat omnia, nullam se gloriam, voluptatem, aut ex reliquis quæ videntur bonis aliquid optare, nisi Christum pro nobis incarnatum, ob cuius amorem mille vitas ponere, mille supplicia proferre, vnicum insidebat cordi desiderium; cuius se gratiæ commendatum, ascriptumque irritis conatibus tentare desisterent, numquam elicitori vel minimum suæ voluntatis assensum: longum hoc martyrium ad octo supra viginti dies Athletas illos reddidit illustriores: nam toto ferè temporis spatio dum mille modis affligitur corpus, animam infernalibus fraudibus præci

præcipitem agere Calisi iussu Regis assistentes, promissis: blanditiisque non destiterunt. Christianorum constantia tyranni mentem vertit in furorem, ut probro ducens sua irrideri promissa, sententiam pronunciauerit ultimam, ut quisquis eorum non adiuraret Mahometi legem, exquisitis suppliciis trucidaretur.

Mortis sententia Christianos inuoluit numero fere sexaginta; nam Legatus & alij pauci reseruati sunt: carceribus educti properarunt ad supplicij locum animo læti, sed facie ob inedia, æumnasque adeo squalida, ut à Legato qui transeuntes ad martyrium vidit, aliqui non dignoscerentur omnino. Ibant processionis in morem, unusquisque decem carnificibus stipatus, lateri inhærens Calisus venenata lingua sectam obtrudebat infamem: concurrerátque ad crudele spectaculum turba populorum immensa. Maris ripa theatrum fuit, in quo barbarorum impietas pietatis segetem temporali supplicio messuit, quam in æternitatis horrea cœlestis virtus euexit. Huc quamprimùm aduenerunt omnes excepto P. F. Dionysio, trium tormentorum ordo ritusque immolauit: nam decem illi carnifices, Christianum quem carceribus eduxerant, primùm eminus ex opportuna distantia sagittis impetebant velut iaculantes in scopum: mox cominus præacuti cuspidis hastis siue stimulis aculeatis pungebant, & toto forabant corpore: tertio venenantis, & in modum flammæ serpentisque per gyros incedentis retortis gladiis, quos Crizos appellant, lethalia tandem infligebant vulnera. Tot vulneribus in fide & amore Christi feruentem animam F. Redemptus in cœlos emisit: etenim Mahometicam detestatus impuritatem, mille actus fidei, mille reliquarum virtutum ingeminans, nomen Iesus ac Mariæ festiuè replicabat, usque dum atrocitate suppliciorum transmissus est æternis eorum deliciis, quorum gloriam resonabat in tormentis. Plura de F. Redempto, sociisque reliquis

reliquis haberi non potuerunt. P. F. Dionysius cohortis huius spiritualis Pater, certaminis dux & antesignanus, non eodem genere mortis interiit; sed ad suæ curæ commissorum æternam salutem, ad coronam augustiorem, ad ampliorem Christi gloriam post reliquos omnes est reseruatus: iustitiæ Capitaneo preces porrexerat, ultimo ut loco posset inire supplicium, & Deo cor efferum inclinante meruerat obtinere; non ob vacillantis naturæ metum, sed ob zelum quo flagrabat ouium Christi, ne lupo incautam aliquam abriperet: hac acceptâ licentiâ, Redemptoris è Cruce pendentis effigiem, quam sub scapulari ad sinistrum cordis latus nostrorum more gestare solebat, ante pectus supra scapulare petenter exposuit, particula funis alligatam collo, ceu vexillum gloriosæ militiæ qua depugnabat: ut aspicerent in authorem fidei nostræ Iesum, qui proposito sibi gaudio sustinuit Crucem. Quam in modum ultimi certaminis scenam feruidus prædicator obibat, assistebat in agone, Lusitano sermone solabatur; sacra confessione expiabat, debiles roborabat, vacillantes firmabat, reconciliabat lapsos; alacer intrepidusque gyrauit per theatrum, dulcissima nomina Iesu ac Mariæ sonora voce proclamando: occurrebat ubi maior urgebat necessitas; omnes denique exhortabatur, præibat in formandis fidei, spei, charitatis, ac contritionis, aliarumque virtutum actibus, & Christum ob oculos proponebat, qui cum infinito Beatorum choro brachiis expansis fidelem animam in cælos abituram expectabat, pro momento tribulationis æterna gloria coronaturus.

Sociis ad cæleste brauium hoc pacto præmissis (in quibus præ compassione tot martyria subiit, quot ex ipsis martyrio præmisit) lingua Malaica, communissimo nationum illarum idiomate, quam callebat optime, fidei Catholicæ veritatem ac maiestatem Mahometanis

metanis astantibus prædicare non destitit; donec tempus aduenit Christo vitam propriam per tortorum manus offerendi. In terram deuotus Athleta genu flexit vtrumque; ac Crucifixi, quam diximus, effigiem amplexus feruentes actus viuacis fidei, diuinique amoris, ac gratiarum actionis ob tam beatam sortem indigno peccatori concessam eliciebat, obfirmabat animam Christo, & corpus exponebat supplicio. Carnifices, sagittis omissis, quibus eminus iaculabantur, Lusitanorum Patrem (sic enim eum appellabant) aggressi sunt hastis aculeatis perforare, frameis ac crisis interficere: verum non vulnerare, sed neque contingere potuerunt: an Deo vires humano sceleri denegante, res tam prodigiosa contigerit; an sceleris horror, & reuerentia in Patrem, iam fama sanctitatis etiam inter ipsos infideles insignem, tot tortorum manus absterruerit, incertum. Non vna, sed pluribus vicibus postquam intentata supplicia non valuerunt inferre, ad Iustitiæ Capitaneum conuersi mille iniuriis caput obtuderunt, arma proiecerunt ad pedes: Capitaneus tyranno renunciauit compleuisse se in reliquis pronunciatam supplicij sententiam; carnifices in Lusitanorum Patrem eam exequi vel non audere, vel non valere: quid deinceps agendum sit, iniungat. Rex Elephantes expediri iussit: sperabat enim supplere per formidabiles bestias, quod exhorruerant homines. Martyrium quod elephantum ministerio fieri decernunt, quemadmodum Legati narrauit Ephebus, quem supplicio proximum eximerunt; peragitur in hunc modum: Christianus in terram superius extenditur, adigitur super extensum Elephas, qui pectori pedem imprimens tam vasta mole viribusque conculcat; ut oculi exiliant capite, viscera ventre, toto corpore sanguis exundet; horribili spectaculo circumstantium, patientis acutissimo cruciatu. Hærebat aspirans ad crudele martyrium Athleta nobilis,

nobilis , & paratum animum etiam ad maiora Christo offerebat ; sed interim dum expediuntur ; dum expectantur , dum tumultus fit , & varius increfcit rumor , apostata Christianæ fidei , qui Malaca timore pœnarum fugerat Sumatram , enseni eximens adhuc genuflexi Patris , & sanctos omnes ac Beatissimam Virginem , ac Dei filium incarnatum vocantis in auxilium venerabile caput à vertice ad aurem vtramque ictu valido diffudit : ad instar duorum fluminum fusus pro Christo cruor emanauit , qui seraphinum illum terrestrem miro splendore purpurauit. Scelus apostatæ carnificibus audaciam addidit , quorum vnus crismum ad vsque viscera per humerum dextrum adegit , alter à læua latus vtrumque transuerberauit. Hic tunc purpuratus Athleta toto corde in diuinum amorem succensus feruentissimos iaculabatur actus fidei viuacissimæ , detestationis sectæ Mahometicæ , diuinæ charitatis ; & tergemina inuocatione suauissima nomina deuotè proclamans , **I E S V S M A R I A , I E S V S M A R I A , I E S V S M A R I A** , pium os plagæ lateris Christi applicuit , & ad tertium crisi vulnus super effigie Crucifixi cadens in terram , fœlicem animam in æternæ beatitudinis sinum expirauit ; factus spectaculum Deo , Angelis & hominibus. Hæc inter alia memoriæ digna in glorioso hoc serui Dei martyrio , ex testibus oculatis ac fide dignis habemus , qui dictum Patrem omni laude superiorem asserunt : siue inuictum eius animum inspiciamus , siue actus virtutum charitate feruidos attendamus , qui ex ipsismet lapidibus lachrymas extorquere poterant. Insuper à Reuerendo Patre Emmanuële de Lima è Societate Iesu Lusitano , qui & ipse multum ab hæreticis passus est , certa firmatæque relatione accepi , ipsum à Barauis (apud quos captiuus tenebatur , quique V. P. Dionysij martyrio interfuerant) audiuisse , quòd cum ad locum martyrij omnes Lusitani cum P. V. Dionysio adducti fuissent

fuiſſent , præco vltimò denunciàſſet hanc eſſe Regis voluntatem & mandatum , vt qui ex Luſitanis ad legem Mahometis deflexerint , honoribus , & diuitiis cumularentur ; qui verò pertinaciter reſtiterint , crudeli nece interficerentur : quam denunciationem cùm V. P. Dionyſius ſociis expoſuiſſet, eique ob defectum linguæ Malaicæ voce reſpondere non potuiſſent , ſtatim genuflexi omnes ad imitationem Patris , qui eos verbis vitæ æternæ firmauerat : ſe mori paratiſſimos ſignis oſtenderunt .

Serui ſui mortem dignatus eſt Deus illuſtribus exornare prodigiis ; Primum eſt quòd quamvis àër regionis illius mirum in modum ad putrefactionem conducatur, ob humoris & caloris exundantiam ; etenim ferè quaternis diebus alternatim copioſus imber cælo decedit, & mox feruidus Sol terras exurit ; & reliquorum Chriſtianorum exuias poſt paucos dies in putredinem , lutum, puluerem abierint ; atq̃amen P. F. Dionyſij corpus ita manſit incorruptum , viuudum , integrumque vt ne capillus quidem deeſſet ex capite , & corona religioſa ; & veluti viuum ſpiransque appareret, poſt menſes omninò ſeptem quibus vltimò viſus eſt : de reliquo tempore nondum ad partes noſtras peruenit notitia.

Secundum ; poſt, mortem tribus noctibus continuis apparuit facularum ſplendoribus ornatus , eodem in loco , eodem ritu ac lingua Malaica , Mahometanos ad Chriſti fidem exhortans , vbi & quemadmodum fecerat viuus ante ſupplicium ; imò dicti ſplendores pluribus aliis noctibus ſequentibus ſupra defuncti cadauer ab incolis Achem viſi ſunt ; & Angli , hollandiue, qui mercimonij gratiâ illuc enauigant; interrogati quid rei portenderent ſplendores illi nocturni , reſponderunt quòd fidei Chriſtianæ cultores occidiſtis : nunc diuinis ſplendoribus amiçti regnant in cælo , atque ideo Deus eorum cadauera lampadibus & faculis cæleſtis lucis

exornat , adeoque pretiosæ Patris exuviæ infidelibus illis cœperunt esse venerabiles.

Tertium prodigiorum quæ videbantur , & audiebantur , ad Regias aures fama peruenit : is in persona propria , suis cum Nobilibus & Aulicis sese contulit ad cadaver Patris; iussit fossam fieri profundam à loco martyrij distantem , quantum laxatus à balistario globus deferri solet , in quam cum serui Dei corpus festiuo ritu, vexillis explicatis resonantibus tympanis tripudiantes & choreas ducentes intulissent , terra obtexissent, rosas alióque flores tumulo sparsissent , eo quo solent modo suas exequias celebrare , omnibus adamussim expletis : confestum insensibiliter sepulchro exiens , eodem in martyrij loco repertum est , vnde fuerat exportatum.

Quartum; quapropter aliud medium commentus est Rex: V. P. Dionysij corpus versùs insulam, de qua supra diximus , *dos degradados*, octo millibus ab Achem distantem , à nautis parata cymba iussit deportari ; atque inde cum ab ea procul in patentem Oceanum enauigassent , tenacissimo fune , graui saxo alligatum demergi in profundum : nautæ imperata complerunt , & reducta prora versùs Achem vela dabant ventis , læti ouantesque : verùm vbi littus, vnde corpus acceperant, relegentes ; idem ipsum repererunt , in stuporem capti confusique totam rem tyranno retulerunt , & sparserunt in populum gloriam fidei Christianæ.

Quintum ; Rex consilij impos & pertinacia perfidæ legis excæcatus , in densam horrendamque siluam proiici mandauit , sperans à lupis , vrsisque deuorandum ; sed irrita fuerunt machinamenta omnia ; nam quamprimùm reuersum est in locum certamine purpuratum.

Sextum ; per mensem integrum iacuerat in ripa cadaver ; cum nauta nauis illius qua Legatus Sumatram vectus fuerat sua pro deuotione paruum digitum manus

nus sinistrae cultro nifus est excindere; confestim sanguinem simul & aquam emanare conspexit ex vulnere; unde stupore prodigij, metuque vigilum, qui iugiter astabant, inauspicatum opus abruptit, fugit, & inter Christianos factum euulgans ansam dedit, ut prouiperent in feruentiores diuinæ gloriæ laudes.

Septimum, Legatus partem tunicæ Patris Dionysij promissis, donisque à Christiano quodam inter suæ deuotionis conseruat, quantum ipse, tum Ephebus odore suauissimo flagrare testantur, sed terrenis odoribus incomparabili.

Octauum; tribus diebus antequam per humana tormenta ad gloriam transiret æternam, Castræ siue nigri coloris seruæ; quæ ex fide Christi quondam defecerat, & nunc inter quinquaginta alias eiusdem coloris antesignanam agebat, more solito, modicæ orizæ coctæ in cibum afferenti, P. Dionysius inquit: heus soror dic dominæ meæ, quod ei gratias ago pro hospitio & cibo, quam mihi huc usque præbuit; nam tribus non amplius diebus protrahetur hæc cura: prædictionis veritatem euentus asseruit; nam cum nemo, quid Rex deliberaturus esset, agnosceret, quarta luce pro Christo tormenta subierunt, & posuerunt vitam. Hæc omnia non solum Lusitani & Indiani testantur; sed ipsi Mahometani & Gentiles; Angli quoque & Hollandi, celebri fama ac voce loquuntur: horum tamen prodigiorum finem longinqua terrarum spatia nobis huc usque negarunt.

C A P V T III.

De aliis, quæ in Indiis successerunt.

PLurima in Indiis memoriæ digna successerunt; quæ omnia sigillatim ordine seruato proponam.

Primò contigit, quod Rex insule Sumatræ, vulgò

a' Achem, sic denominatus à metropoli ciuitate regni, anno Domini 1629. Malaccam obsidione premebat; Indiæ Gubernator Nunnus Aluares Botelh classem viginti octo trirremium ad illam parat soluendam; ipsèque assumpto in Nauarchum regium Venerabili Patre Dionysio à Natiuitate, tunc sæculari dicto Petro Berthelot proficiscens, Malaccam appellit: vbi cùm audisset hostium classem recessisse, & in angusto maris fretto consistere, statim illuc aduolat, & dispositis ad exitum freti nauigiis, hostes obsidet; hi exire tentant, sed repelluntur; ad pugnam prouocant, sed meritò recusantur; vnde fuga sæpius perperam tentata, sublatâque omni spe euadendi, ac omni auxilio destituti ingentem suam classem plurimis ipsorum, tum fame, tum globis tormentorum enecatis tradiderunt.

Secundò, contigit anno Domini 1630. fames crudelissima, quæ infinitam propemodum hominum multitudinem enecauit: sed præcipuè in interioribus prouinciis; propter quod ad partem maritimam omnes suæ famis remedium inuenturi confluebant: licet autem in terris Lusitanorum sufficiens esset ciborum copia; quia tamen maiori pretio foris vendebantur; illuc omnes transferebant & sic incolæ fame misera perire cogebantur: vnde præ multitudine mortuorum, quibus sepeliendis viui non sufficebant, compita, vici, & plateæ ciuitatum putridis cadaueribus horrebant.

Tertiò; nuntium Goam delatum est anno Domini 1631. quod Rex Mombassæ à fide Chæristi, & à Lusitanis defecerat: hic ab ineunte ætate Christianis ritibus institutus fuerat, in quibus per multos annos perseuerans Christianam duxerat vxorem: contigit quod irritatus iniuriis sibi illatis à gubernatore Lusitano illius præsidij, omnes Christianos ibi commorantes occiderit, ac Mahometicam legem nimio zelo introducens castrum ipsum, gubernatore, aliisque interfectis

perfectis obtinuit: in hoc casu plures extitere martyres: sed præcipuæ quædam mulieres glòriosius enituerunt, hortante Venerabili Matrona Domina Natalia de Saa. Statim ac huius proditiõis nuntium Goam delatum est, Prorex classem instruit, vt deperditâ recuperet ciuitatem: hanc vt Nauarchus dirigit V. P. N. Dionysius adhuc sæcularis; in ea expeditione plurimum laboris, famis, & sitis pertulit, ac sæpè in manifesto fuit mortis periculo: dum etiam strenui militis munus obiret: hostes enim Christiani, & Lusitani nominis sagittis veneno infectis utebantur, quibus læsi statim necabantur: sed Dei prouidentia protectus incolumis classem Goam reduxit; aufugiente autem Regulo præ timore redituræ classis ciuitas Mombassæ iterum Lusitanorum ditioni subiicitur.

Quartò, quotidie deflebantur naues, quæ à piratis Batauis capiebantur: harum hoc tempore mirabilis iactura contigit Lusitanis, veniebant è China vndecim nauigià auto, aliisque mercibus pretiosissimis onusta; iubet Prorex, vt ad quendam locum simul conueniant promittens se classem maritimam illuc ad eorum incolumitatem missurum: sed accidit, vt tunc temporis in insulam Ceilam rebellio contra Lusitanos detegeretur, illuc cogitur Prorex classem destinare, vt commotam sedaret seditionem: aliunde etiam contigit, vt Batauorum piratarum naues in illo loco sisterent, vbi Lusitani se classem promissam reperturos sperabant: & ita Lusitani à Batauis incauti capiuntur; alio item anno aliquot nauigià mercibus onusta, ne in Batauorum potestatem deuenirent, flammis consumpserunt.

Quintò, Angli fœdus cum Lusitanis inituri anno Domini 1634. Goam cum quatuor magnis nauibus accesserunt, vbi à Prõrege Domino Michaële de Norogna Comite de Lignares magnificentissimè excepti fuere, cisque domus ad sua exercẽda cõmercia Goæ deputatur.

Sextò , Comiti de Lignares in Proregem successit Dominus Petrus de Silua vir senex , qui malorum Indiae successuum tædio affectus , elapsis duobus annis, in die Natiuitatis sancti Ioannis Baptistæ moritur: eius in Indias aduentus fuit anno Domini 1635. cum eo venit V. P. Marcellus Matrillus , qui subeundi causâ martyrij in Insulam Iaponiam , diuina reuelatione de sua certus corona , generoso & alacri animo properabat. Hic vir insignis, dum Neapoli ornandæ Ecclesiæ sedulus insisteret, cadentis desuper ictu mallei lethali-
tèr vulneratur : huic ad extremum vitæ periculum re-
ducto , veste peregrinantis indutus astat sanctus Xaue-
rius Indiarum Apostolus , qui laborantem curat infir-
mum, & votum missionum pro conuersione infidelium
suadens ; imò verbis expressis , quæ ipse votum emit-
tendo repeteret , proponens, ad tam arduum opus ani-
mauit , & certum de subeundo martyrio reddens, totius
successus ordinem prædixit. His inflammatus genero-
sus Christi miles ad Hispāniam quantocius proficisci-
tur, & è portu Vlissiponensi cum dicto Prorege soluens
superato sex mensibus Oceano ad Indias appulit , vbi
non multum immoratus in insulam Iaponiam sui mar-
tyrij theatrum Deo manducente præter spem omnium
peruenit , vbi statim captus glotioso martyrio corona-
tur: quem non multò ante precesserant martyrium sub-
euntes gloriosi Patres illi Dominicani, de quibus supra
libro quinto capite primo dictum est. Hoc eodem an-
no V. P. Dionysius à Natiuitate sacro nostræ religionis
habitu indutus celebri martyrio præparatur : de ipso
capite præcedenti , & libro octauo capite tertio fusè
dissertitur.

Septimò , erat Goæ quidam gentilis nomine Rama
Canis diuitiis præpotens ; hic cum Batauis , vt diceba-
tur conuenerat, vt ciuitatem Goam eis proditione tra-
deret ; iam nauem ingentem è regno Lusitaniæ aduen-
tanrem

tantem dolo combusserat: iam omnes galliones, igne vni qui in medio aliorum consistebat admoto consumere tentauerat; capitur hic infamis proditor, factaque omnium informatione data sententia condemnatus anno Domini 1638. 19. mensis Nouembris suspendio necatur.

Octauò, defuncto Prorege, vt dictum est, anno Domini 1639. in Ecclesia sancti Dominici, eadem Natiuitatis sancti Ioannis die vespere sepelitur; sed prius in eadem Ecclesia coram toto populo è scriniolo trium clauium patentes regię obsignatæ suo educuntur ordine; quibus lectis gubernator Indici status declaratur Dominus Anthonius Telez de Menezes, vir insignis, ac nobilissimus; ex progenie siquidem Regum Legionensium procedere dicitur, qui tunc in Indiis Dux erat generalis gallionum. Quandò Indiæ Gubernator omnium applausu proclamatus fuit, è ciuitate Daman redibat, cuius obsidionem Mogoritanos soluere cõegerat. Iam ab anno 1636. Bataui Goënsen portum obsidebant, tum vt aduentantes caperent naues, tum vt sublato commercio Lusitanos destruerent; conantur Lusitani suis gallionibus muniti illos expellere, multa commissentur prælia; in quorum vno præsens aderat V. P. N. Dionysius iam nouicius; hunc enim Prorex directioni totius classis prospecturum, à nobis iustis de causis propositum libentissimè suscepit; quam sollicitudinem periculis plenam ipse libentius acceptauit; ea maximè ratione, quòd contra hæreticos pugnandum erat; destinata ad pugnandum die nauim capitaneam ingreditur, inita pugna non solùm directioni classis attendebat, sed etiam præ manibus habens Crucifixum, (quem ei dederam, & nunc ampliori colo deuotione, quia tanto Martyri deseruiit) Catholicos milites ad pugnandum contra hæreticos miro feruore, ac constantia animabat; in hoc conflictu per duos dies repetito multi tor-

mentorū globis periēre, noster Dionysius mirabili Dei prouidentia seruatus incolumis, classem etiam incolumen ad portum reduxit, & ad pristinum cellæ pergit recessum. Hoc anno miserabili casu tres Lusitanorum galliones maximi & potentissimi, sub titulo nominis Iesu, sancti Sebastiani, & sancti Bonauenturæ Batauorum audacia, & incuria Lusitanorum in portu combusti sunt: sicut & aliqua nauigia prope Melundy: sed in hoc prælio periit vna nauis Batauorum, & Dux generalis eorum occisus fuit.

CAP V T IV.

De his, quæ in Arabia successerunt.

IN Ciuitate Bassora Arabiæ fœlicis tria notatu digna reperiō. Primum est, quodd paulò ante meum in hanc ciuitatem aduentum, æstiuo tempore prope Solis occasum, vndique nubes eleuari cœperunt: ac ita totum inuoluentes cœlum lucem Solis penitus obscurarunt, & palpabiles imminebant tenebræ; horrescunt omnes, timore proximi tabescunt exitij; vltimum aduenisse sibi diem formidant; excitatur lux in nostra Ecclesia; præces variæ, litanie & psalmi magna deuotione & assiduitate recitantur: ipsi etiam Mahometis sectatores qui ad Ecclesiam confugerant, ipsa cogente conscientia fatentur, se nullibi tam securos, quàm ibi fore; post aliquod spatium nubes resoluuntur, ac pristina diei reddit serenitas.

Secundum est, quodd in nostro Bassorano Conuentu canis erat, qui mirabili Dei instinctu Christianos à Mahometanis discernebat, vt omnes quotidiano comprobarent experimento: quod & ego spatio quindecim mensium expertus sum; nihil in his partibus à brutis perceptibile Christianos à Mahometanis discriminat: & tamen hic canis Christianis aduentantibus blâdiebatur,

Maho

Mahometanis autem, postquam momorderat, allatrabat: nullus, etiam domesticus seruus, quo ad aquam Euphratis potabilem afferendam bis quotidie utebatur, etiam cani blandiendo, & aliquid comestibile porrigendo ab eius indignatione liberabatur, unde nulli unquam Mahometano, nisi caueret sibi, pepercit; nulli autem Christiano unquam nocuit: si canis iudicio frueretur, merito in Mahometanos vlciscendi causa inueheretur, qui canes tanquam immundos & abominabiles fugiunt, & asserunt Angelos Dei nunquam ad eas domos accedere, in quibus canes reperiuntur; propterea eos in vicis nutriunt, ac manere cogunt. Ad maiorem prædictorum confirmationem accedit, quod quando Lusitanorum classis commercij causâ Bassoram venerat, accesserit quidam Lusitanus, qui paulò ante Christi fidem negauerat; hic ficto animo quasi ad Ecclesiæ gremium rediturus domum nostram ingreditur; sed qui homines sua simulatione decepit, canem à Deo directum decipere non potuit; nam ipsum aggreditur & mordet; miramur omnes, qui canis erga Christianos mansuetudinem noueramus: sed rei euentus ostendit canem monuisse hoc factò, ut ab illo hypocrita caueremus; hic siquidem infelix collectis Lusitanorum copiosis eleemosinis, quarum causâ tantummodò venerat, ad terras infidelium iterum aufugit.

Tertium est, quod contigit anno Domini 1632. videlicet: Turba Christianorum sancti Ioannis, de quibus supra libro sexto dictum est septingentorum circiter è portu Bassorano versùs Mascatum in Lusitanorum nauigiis vela dederunt; hi tanquam præcursores totius gentis, ac exploratores reliquos præibant. Aliis Mascati remanentibus septuaginta ipsorum velut capita, quorum Dux vocabatur Roboan, Christiano verò nomine Ludouicus de Sqza, ad Proregem Goæ commorantem, se mari committentes, proficiscuntur. Iam à

multo tempore hi solo nomine Christiani suasu nostrorum Patrum ad veram Christi fidem transire desiderabant: sed hoc in terris Mahometanorum fieri non posse iudicabant: quapropter rogarunt vnum è nostris Patribus nomine Basilium Lusitanum, cum quo ibidem mensibus quindecim mansi, vt à Rege Hispaniæ aliquam terræ portionem prope Mascatum obtineret, vt illuc omnes transmigrantes eum omni libertate fidem Christianam possent profiteri. Scribit hic Pater ad sacram Congregationem de propaganda fide hanc Christianorum intentionem, quæ tam pio cooperata desiderio à Rege Hispaniarum obtinuit, quod illi postulabant. His expeditis dictus Pater à Bassorense gubernatore sibi summè affecto dicti populi transmigrationem impetravit admonet ducem generalem Lusitanorum in Sinu Persico nomine Rodericum Frere d'Andrada, qui hoc summo opere exoptabat: hic mille aureos ad omnia transmigrationi necessaria misit, ac mercatoribus iniungit, vt inter se hos Christianos diuidentes in suis nauibus admitterent. Septingenti naues ingrediuntur, qui aliorum præcursores locum eis destinatum parare volebant, vt sensim alij postea confluerent: sed mortuo hoc duce generali res infelici exitu conclusa est. Postquam ex illis septuaginta Goam appulerunt, inuenientes iuxta littus vnum è nostris religiosus nomine Alexium Lusitanum, quem Bassoræ nouerant, rogarunt vt eos ad Proregem deduceret; illo præcedente ad palatium Proregis tanquam milites ordinati, catapultis muniti, sub vexillo in quo Crux depicta erat, peruenerunt: ad ipsum palatii ingressum depromptis catapultis Proregem salutarunt: Hanc miratur Prorex nouitatem, qui sint, vnde veniant, quo tendant, quidque postulent inquit: omnibus ei per dictum Religiosum ab exordio declaratis, mittit illos in nostrum Conuentum, vt ibi per aliquot dies donec de his deliberauerit,

commorentur. Interim Patribus id strenuè sollicitantibus Prorex consilium generale status conuocat, vt de his maturius iuxta propriam instructionem, determinare possit: Consiliarij in diuersa feruntur suffragia; quidam transmigrationem hanc in bonum statu; alij ad eius perniciem, allatis pro vtraque parte rationibus, futuram asserunt: vincunt tamen qui illis fauebant, & ita autoritate Regia conceditur eis castrum Doba in Sinu Persico cum terris adiacentibus: Dominus illius creatur Dux illorum Christianorum, cui Prorex honoris causâ habitum equestrem Deus continentem Crucem viridem, propriumque ensẽ concessit: insuper datur illis classis maritima sex nauigiorum, vt Sinum Persicum piratis mundarent, sub hac tamen condicione, vt in suo castro Doba duos aut quatuor è nostris Religiosis alerent, quos tanquam Parochos autoritate Ecclesiastica, & Regia eis destinauerant.

His ita conclusis exurgunt religiosi alterius ordinis, illos Christianos à se conuersos & missos asserunt, & ita pluribus titulis composito libello tanquam ad se pertinentes à Prorege exposcunt: offertur nobis libellus, vt singulis eius articulis respondeamus, præcipitur: data responsione, & præhabita illorum confessione, qui se à nobis & non ab aliis conuersos fatebantur; omnium sententia nobis adiudicantur; vnde eligitur in Patrem ac Pastorem ipsorum P.F. Eustachius Romanus noster Religiosus, linguæ Persicæ peritissimus, & ad alias orientales addiscendas valdè idoneus. Anno 1633. mense Aprili soluunt portu Goano, ad Sinum Persicum tendunt, sed aduersis flantibus auris redire coacti vsque ad vndecimam Nõuembris Goæ commorantur. Iterum discedunt, Mascatum perueniunt: sed Deo sic permittente negantur illis à gubernatore Mascati concessæ terræ, & aliis imò inimicis ratione status, vt dicebat, conceduntur: sic pium illud peruertitur negotium, &
illi

illi Christiani partim dissipantur, partim ad proprias redeunt terras; unde sublata penitus videtur spes conuertendi hanc gentem, quæ ad viginti millia animarum pertingere, aut potius dicitur superare. De nouo agitur, ut audiui, de eorum ad Indias reductione, Prorex nostros Patres ad pium illud opus applicat; utinam præteritæ delusionis obliti nostrorum consiliis obtemperent.

C A P V T V .

De his, quæ in Perside successerunt.

IN Perside etiam aliqua comperi, quæ hûc notanda iudicaui.

Primum contigit, quod Rex Persidis Abbas, ut à principio exordiar, assumpserit in familiarem quendam Anglum Catholicum nomine Robertum Sirlei, postea creatum ab Imperatore Comitem Palatinum: quia à Rege Persidis Legatus missus est ad multos Principes Christianos. Cum inuidia virtutem ordinariè comitetur, alij Angli mercatores ipsum persequi; imò apud Regem diffamare cœperunt, præsertim quod suam uxorem è Mahometana lege in Christianam conuertisset; aliæque his similia mentientes, adeò Regem in illum commouerunt, ut è sua Legatione redeuntem è curia recedere iusserit. Miratur bonus ille Comes, præ tristitia talis successus infirmatur, moritur, ac in nostram Ecclesiam sepeliendus Aspahanum deportatur: eius vxor nomine Theresia dicta Comitissa Sirlei (quæ nunc Romæ commoratur, ibique nuper eam vidi) comprehenditur, ad iudicium vocatur; sed seipsam iustificans clarissimè demonstrat se ex Hircania adductâ Christianis parentibus ortam, ac semper fuisse Christianam, asseuerans, quidquid res tulerit, se semper talem futuram: minantur ignes, se ad ignem paratam pro fide Chri

Christi respondet : se eam ex altissima turri præcipitem duros obiciunt, quod supplicium in Perside sæpè reis imponitur , inuincibili constantia replicat se nullum mortis genus propter Christi fidem illatum metuere : tandem quia Iudex nobis plurimum affectus erat , aliquibus muneribus flexus eam dimisit. Iterum eam die Ascensionis anno 1629. comprehendere voluerunt, eam in propria domo quærunt; sed admonita, erat quippe in nostra Ecclesia, effugit : latuit apud Armenos, ac paucis post diebus dimissa à nostris Patribus Constantinopolim, ac inde Romam petit vbi nunc commoratur.

Secundò, contigit duplex aduentus exercitus Turcarum in Persidem. Primus quidem anno Domini 1630. iam supra lib. 1. cap. penultimo descriptus. Secundus fuit anno 1637. ipso Turcarum Imperatore dirigente; postquam enim totam penè Mediam deuastauit, ipsamque ciuitatem Tauris celeberrimam penè destruxit , ad Babylonem , cuius obsidendi causâ venerat , transactis in regione Mediæ magis , moderata caloribus ; accedit, obsidet , & gubernatoris prodirione capit. Tunc etiam accidit crudelis mors tum huius generalis exercitus Persici ob prodicionem , tum Proregis Sirasensis , de quibus etiam supra dictum est.

Tertiò, contigit infirmari puerulum cuiusdam Christiani Cophti nondum baptizatum : hic nostros Patres rogauit , vt ad eius domum irent , Dominum supra puellum rogaturi ; iuimus duo, inuenimus ipsum in extremo mortis periculo constitutum, voluimus baptizare, resistunt parentes, cum enim soleant magna, cum pompa baptismum paruulis administrare , nolebant sic priuatim baptisari ; ac ita re infecta recessimus : sed de illius salute corporali desperantes, ac de spirituali, si absque baptismo decederet : iterum ad illius domum venimus, patri suademus nos iterum baptizatos puerum ; sic illo annuente aquæ aspersione baptisauimus,

ac paulò post emoritur. Si hîc immorari liceret, diuinæ prædestinationis mysterium se nobis considerandum offerret, nemo è manu Dei quemquam prædestinatorum eripiet, specialissimam illorum gerit prouidentiam; tres de hac materia Lumen Ecclesiæ Augustinus quæstiones proponit difficillimas. Prima est, cur ex duobus paruulis vnus assumatur, vt iste; alius relinquatur. Secunda, cur ex duobus adultis impiis vnus vocetur, alius verò non. Tertia, cur ex duobus iustis vni donum perseuerantiæ concedatur, alteri verò negetur: & his respondet iudicia Dei esse inscrutabilia, & quòd miseretur cui vult misereri; & quòd hæc discretio prouenit ex hoc, quòd Deus aliquos ex gratuita voluntate ante præuisionem meritorum ad gloriam elegerit; alios ab eadem gloria ob occulta sua iudicia tanquam à bono indebito exclusit.

C A P V T VI.

De his, quæ successerunt in Syria, & Palæstina.

PLura etiam in Syria & Palæstina contigerunt. Primum est mors crudelis Principis Sidoniensis, vulgò dicti *Mir Fecardin*; hic ex Christianorum Regum Hierusalem prosapia dimanans; etsi fide Mahometanus, affectu tamen Christianus erat. Hic in totius Phenicis littore principatum habens nominatissimas Beriti, Sidonis, Tyri, Ptolomæidis, & Sepheth ciuitates cum annexis oppidis possidebat. Hic in Italiam, & Galliam venit, ad suam recuperandam Palæstinam Christianis Principibus opem polliciturus. Hic cum diu Turcarum Imperatori plurimùm restitisset; tandem ineundæ pacis, & amicitiae confirmandæ causâ dolose Constantinopolim accersitus pœna capitis damnatur.

Secundum, quod contigit, est persecutio Aleppi contra religiosos excitata; præfectus enim Iustitiæ, quem

quem *Caddi* vocant, zelo Mahometicæ legis motus omnes Christianorum Catholicorum Ecclesias, videlicet nationis Venetæ, quam Minores sancti Francisci administrabant, Patrum Capucinorum, Iesuitarum, & nostram adiuit; eas sublati altari- bus & imaginibus prophanat, ac in Moscheas, siue templa suæ legis præcibus suis decantatis suo more consecrat; imò & aliquos religiosos per urbem circumductos iniuriis afficit; sed huius crudelitatis, ac impie- tatis pœnas diuina vlciscente iustitia luit; nam qui sa- cras Deo ædes polluerat, suas Constantinopoli eodem penè tempore ardere videt, pluresque alias in pœnam sui delicti pertulit miseras.

Tertium, quod contigit sed in Palæstina, fuit destru- ctio ciuitatis Nazarenæ: cùm enim illius incolæ pessi- mi traditione continuata censeantur, iuxta illud Na- thanaël, nunquid aliquid boni potest esse ex Nazareth? oppida circumquaque posita (nescio qua noua occa- sione, vel titulo) armatos in eam mittunt milites qui funditus evertant; irruunt ex improviso, multos truci- dant, domos diruunt, & conuentum Minorum in do- mo Beatissimæ Virginis ædificatum incendunt; creden- tes, quòd illo delero ciuitas ipse obliuioni traderetur: hanc in præscripto misero vidi statu, ex hac traditione de populo Nazareno, gloria Christi Domini, Beatissimæ Virginis, S. Ioseph, sancti Ioachimi, & aliorum accrescit; quòd scilicet Sanctus Sanctorum, Sancta Sanctorum, & alij tam celebres Sancti in medio malorum extiterint.

Quartum, quod Hierosolymis contigit, fuit aliqua contra religiosos sancti Francisci persecutio: ciuitatis enim gubernator, non alio titulo quàm tyrannidis duo millia nummorum ab ipsis per vim exigebat: hæc iniu- sta pecuniarum exactio fictis titulis apud Turcas fre- quenter occurrit; attoniti illi Patres de nouo sibi im- posito tributo, quid agendum sit deliberant; bonum iudica

iudicatur medium, si Superior clandestinam aggredia-
tur peregrinationem, sub specie visitandi religiosos, qui
sub eius obedientia commorantur in Syria; & interim
scribatur Constantinopolim ad Christianissimi Regis
Oratorem sub cuius protectione manent; ut inde Hie-
rosolymitanus Gubernator ab huiusmodi vexatione
coërceatur. His deliberatis exit secretò, Sidonem adit,
ubi cum in meo reditu commorantem inueni: sed
licet ipse euaserit; eius tamen substitutus præfatam pe-
cuniam dare recusans, fustibus dirè cæsus est: hic suc-
cessus meam peregrinationem Hierosolymitanam par-
tim impediuit.

Plures alij successus etiam miraculosi, maximè sacri
scapularis, & sanctæ Matris Theresiæ contigerunt: sed
ab his abstinco, ne lectori fastidium ingeram.

LIBER



LIBER DECIMVS ITINERARII

In quo

Causa , & successus mei in Europam
reditus afferuntur.

CAPVT PRIMVM.

De causa mei reditus in Europam.

PRIMA , & principalis causa mei reditus in Europam, fuit vt processum authenticum Venerabilis Patris Dionysij à Natiuitate , & Venerabilis Fratris Redempti à Cruce, authoritate Domini Francisci de Martyribus Archiepiscopi Goani ex ordine Minorum assumpti formatum ad sacras de propaganda fide , & de ritibus Congregationes Romam deferrem.

Summa semper erit mihi causa lætitiæ , consolationis , & gloriæ ; quòd hos Venerabiles Religiosos Martyres viderim , cum illis per plures annos conuersatus fuerim : & maximè quòd dictum Venerabilem Patrem Dionysium ad sacram religionem nostram allexerim, religioso nostro habitu & professione donauerim , & Philosophiam edocuerim : actu enim studebat, cum ad illam nauigationem , in qua martyrium subiit , ex

B b obediens

obedientia , & Proregis mandato fuit destinatus.

Eram in nostro Conuentu Goano , cum fœlicia huius martyrij nuntia recepinus , toto vrbi celeberrima , & communi omnium applausu celebrata : vbique resonabat nomen , virtus , & gesta ; præsertim Venerabilis Patris Dionysij. Nos quorum præcipuè intererat , solemnî campanarum sonitu , & cantato deuotè *Te Deum laudamus* , celebrauimus , atque exhibita prædicto Goënsi Archiepiscopo supplici petitione , huius martyrij iuridicam informationem instruere cœpimus ; dum maior à Sede Apostolica ad hæc perficienda auctoritas expectatur : sed periculum est , ne testes , qui rari ex insula Sumatra possunt euadere , desint ; dum hæc impetrabitur.

Huius applausus motiuum fuit Epistola Domini Francisci de Soza de Castro Oratoris Regij , cum quo noster Dionysius ad Achem processerat ; qua ipsum verum martyrem appellat , eiûsque Apostolicas prædicationes & facta heroïca sic breuiter refert. Pater Berthelot , (ipsum nomine sæculari adhuc omnibus notum appellans) perfectus martyr occubuit concionando vtraque lingua (Lusitanam , & Malaicam intelligit) quod ipso sinet terruit carnifices ; postquam per triginta dies compedes , famem , & crudeles ictus cum aliis passus est : sic enim Martyres vexati sunt , vt dies mortis fuerit illis dies quietis.

Seruus eiusdem Oratoris nomine Petrus Martius , qui ex Achem euaserat primus ; quod eius Dominus scripto dixerat , verbo palam confirmabat. Mirum est , quantam sanctitatis opinionem Venerabili Patri Dionysio conciliarunt tam admiranda ab ipso relata prodigia , quæ post eius martyrium contigerant ; de quibus supradictum est : nam corpus humanum post mortem incorruptum tandiu perseuerare in regione corruptioni obnoxia , imò colore viuïdo ; ex terræ visceribus per
penetra

penetrationem bis exiliisse; sanguis & aqua post mentem à felici obitu ab ipso defluentes; tot splendores & apparitiones; Angelici cantus per octo consecutiuos dies ab aliquibus auditi; continuus eius ad locum martyrij reditus; & alia plurima, quæ ab ipso dicebantur, omnibus admirationem; nobis autem animam, ad prædictam informationem faciendam excitant; quibus ordinatè finitis nauigationi, & itineri me committo.

Quia verò ipse Orator Dominus Franciscus de Soza de Castro maxima cura & diligentia in ciuitate Achem existens, omnia quæ sanctis Martyribus acciderant, collegit, & Romam misit; eius testimonium omni exceptione maius in quadam epistola ad R. P. N. Præpositum Generalem missa, quam vidi & de verbo ad verbum transtuli, audiamus.

R *Reuerendissime Pater.*

Congaudeat tecum Vestra Reuerendissima in Deo Domino nostro, & adiuuet me ad infinitas ei rependas gratias, pro ea misericordia mihi collata, qua per spatium ferè trium annorum concessum est pro suo amore & confessione sua sanctissima fidei tolerare rigores asperi & arcti carceris; etsi cum magna consolatione anima mea propter bonum exemplum, quod subeundo martyrium, reliquerunt sexaginta Lusitani comites mei, quos mecum duxi ad regnum Achem, cum ad illud missus Orator properarem: sed maximè in particulari P. Fr. Dionysius à Natiuitate, qui mihi erat, à sacris confessionibus, & Fr. Redemptus laicus ambo subditi obedientia Vestra Reuerendissima; quorum primus non contentus vitam dare pro confessione nostra sanctissima fidei, manifestauit quàm parum timeret tormenta etiam crudelissima, & in medio illorum usque ad ultimum visa spiritum perseuerant confessiones audiendo, socios animando, &

eos exhortando ad subeundos labores pro Deo & sanctissima fidei confessione. Scribo circa hoc martyrium ad Eminentissimos, & Reuerendissimos Cardinales de Ritibus, & ab ipsis peto, ut mandent fieri veridicam inquisitionem huius successus. Vestra Reuerendissima non pratermittat interponere suam auctoritatem huic petitioni, precipiens ipsam sollicitari; ita ut suum consequatur effectum ad honorem Dei, & horum eius seruorum; ad gloriam sacra Religionis Carmelitana; & ad summam consolationem meam: cum enim mihi precipua defuerit, quod eis sociari non potuerim; hanc saltem habebo, quod pro ipsis in terra sollicitabo, ad cuius effectum mittunt ad vestram Reuerendissimam eius Religiosi, qui in his religionibus manent, summarium quoddam testimoniorum. Deus Dominus noster seruet Vestram Reuerendissimam. Datum Goa die Tertia Martij anno Domini millesimo sexcentesimo quadragesimo Tertio.

Franciscus de Soza de Castro.

C A P V T II.

De meo exitu è portu Goano.

Dies tertia Nouembris anni millesimi sexcentessimi trigessimi noni è ciuitate Goa discessi; sed vsque ad decimam octauam eiusdem mensis prope portum manere coactus sum vnà cum tribus aliis sociis mei itineris; vno quidem ex nostro ordine, alio Dominicano, alio Franciscano: ibi expectauimus epistolas Proregis commendatitias: ipsis enim præcipiebat Duci generali Sinus Persici, vt nobis duo nauigia suæ classis præberet, quæ nos Bassoram vsque deferrent.

Quia verò è portu Goano nullæ soluebant naues propter continuam Batauorum obsidionem, tinentes ne in eorum inciderent manus propterea nauigium
exiguum

exiguum oblongum, sed angustissimum, octo vel nouem ex utroque latere remis munitum, vulgò *Almadiam* dictum assumimus: hoc genus nauigij est leuissimū circum littora nocturno tantum tempore nauigans: habet enim pro singulis diebus singulos portus designatos, è quibus sub crepusculo nocturno discedit, & ad principium diei se in alio colligit. Hic modus nauigandi nocturnus propter quosdam piratas dictos *Malabares* statim describendos introductus est: cum enim hi Piratæ in sua nauigatione sint velocissimi, aliæ naues crassiores ex eorum manibus euadere non possunt: nec *Almadiæ* interdum euaderent, quia ipsi aliquando leuiiores habent nauiculas; & quia remis & velis eas solum remigantes facile attingerent: & ita ad nauigationis securitatem noctu nauigatur, in qua rarè sibi occurrunt, & propter tenebras facile separantur: maius periculum est in egressu portus, ne ibi prope latentes sint piratæ; & maximum est in ingressu ne occurrant, cum nautæ nocturna sunt remigatione fatigati: & ita si ab illo portu excludantur, ad alium præ fatigatione peruenire non possunt: vnde facile capiuntur.

Inter Piratas qui in oceano Indico reperiuntur omnium pessimi sunt *Malabares*: hi habitant in parte maritima Regni *Samorim*, quotannis plurima ad prædandum instruunt nauigia; non quidem magna, sed optimè armis ac militibus munita, ac velocissima: iidem sunt nautæ & milites, multi in quolibet nauigio; sunt aspectu horribiles coloris nigri, auribus perforatis ac pendulis, crinibus, dum pugnant, solutis, totoque vt plurimum nudati corpore: hi ferè nunquam in altum mare procedunt; sed circa littora nauigant, ibi naues dum portum appellere volunt expectantes.

Statim ac naues mercatorum aduertunt, & remis & velis ad eam aduolant: ducenta & plura vasa testacea puluere tormentario plena intra eam proiciunt, quæ ex

casu confringuntur. & pulvis per nauim spargitur : de-
 mum aliqua vasa , in quibus funis ignitus alligatus est,
 immittuntur ; & ita pulvis concepto igne erumpit , ac
 obuios quoque exurit , & sic facile nauis capitur : sed
 huic piratarum artificio duplex præparatur remedium :
 Primò enim supra nauim rete magnum à puppi ad pro-
 ram in modum tecti ex vtraque parte penduli expan-
 dunt ; & ita vasa illa proiecta non intra nauem, sed in
 mare decidunt : secundò, ne piratæ ad nauim accedant,
 trabes satis longas , ac extra nauem circumquaque ex-
 currentes catenis ferreis in extremitate ligantes , tan-
 quam murum eis obiciunt.

Solent Piratæ celebrato Octobris nouilunio è suis
 exite portibus : quandò primò aliquid capiunt , inter
 captiuos sortes mittunt ; ille, cui sors ceciderit, sacrifi-
 catur in prora nauigij , quæ fuso eius sanguine conse-
 cratur : alios verò denudant , & inauditis excruciant
 tormentis ; non cogunt captiuos fidem negare, si noue-
 rint ipsos esse diuites , sed multiplicatis tormentis co-
 gunt multum pro sua redemptione promittere , & do-
 nec multum promiserint continuis angunt supliciis :
 vix paululum orizæ pessimæ ad victum conceditur , die
 labore conficiuntur , noctu compedibus adstringuntur,
 & duplici alligato pollice aliquandò suspenduntur : qui
 nihil pro sua redemptione promittunt , fidem Christi
 negare coguntur ; quem nisi negauerint , crudeliter
 enecantur : qui verò pretium redemptionis offerunt ;
 veneno interficiuntur , si post solutum pretium apud
 eos manducent : vnde ex illis littoribus multi quotidie
 in cælos emittuntur : propter vicinas tamen Lusitano-
 rum terras aliqui euadunt , vnius tantum historiam
 enarrabo.

Contigit , vt quidam Lusitanus solertissimus ; non
 tamen in hoc coram Deo laudabilis , sequenti astutia è
 manibus illorum Piratarum euaserit : confestim ac se
 captum

captum vidit, sciscitatur quis sit Dux nauigij, illi sibi indicato catenam quā habebat aureā tradit, ipsūque se-
cretò allocutus, dixit se nolle redimi, sed velle inter eos
conuersari, quod tamen secretā fore optabat, donec om-
nia sua bona in terris Lusitanorum vēdi iusserit, ac vni-
uersum pretium ad se deferri sub prætectu suæ redem-
ptionis curauerit; ac propterea expediendum esse suum
seruum illi persuadet. Hoc ita esse credit bonus ille
Pirata; sed seruus eo animo dimittitur, vt liberetur, &
intimat parentibus Domini sui, ne quidquam pro eius
liberatione mittant. Conformat se ille exterius Maho-
metanorum ritibus, ab aliis maximè à suo Domino
summè diligitur, & eò amor deuenit, vt ei vnicam fi-
liam ditissimam in matrimonium tradiderit. Per ali-
quot menses apud ipsum gener eius effectus ac Domi-
nus omnium conuersatur: sed oblata fugiendi oppor-
tunitate, multis sublati diuitiis, insalutato hospite ac
focero, in suam patriam recedit ex illa captiuitate di-
tior effectus. Non mirum si hic Pirata delusus fuerit;
aliqui enim Lusitani ad eos accedunt, & Mahometani
efficiuntur: vnus talis Goæ fuit combustus, quia bis
ad eos accesserat. Refertur de quodam alio quòd iniu-
ria à Prorege affectus ad eos accesserit: cū enim Goæ
manens vindicari non posset; si ad illos transiret sese
vindicturum sperabat: sciebat quippe Proregem sin-
gulis diebus Sabathi ad quandam Ecclesiam in fine in-
sulæ Goanæ constitutam, ac Beatissimæ Virgini dica-
tam accedere, vt ibi missam audiret: cū igitur se illis
coniunxisset Piratis, iubet illos bono esse animo, pro-
mittit Proregem esse capiendum; vnde cū locorum
esset peritissimus, eò venit quòd Proregem venturum eo
die sciebat: apparet Proregis nauicula, illi citiùs ad
prædam capiendam exiliunt, ac proinde tanquam Pi-
ratæ detecti citissima remigatione fugiuntur; Pro-
rex quippe remigantibus catenam auream dedit, ac

maiora promisit munera.

Sunt alij Piratæ prope Indum fluuium, sed exiguo numero, qui eodem pene modo naues mercatorum ag-grediuntur; in hoc tamen differunt, quòd cùm Mala-bares vasa testacea puluere tormentario repleant, isti calce replent; quæ dum vasa cadendo franguntur, in aërem euaporans & ad oculos ascendens illos excæ-car.

Die igitur decima octaua Nouembris circa mediam noctem portu Goano soluimus. Primâ nauigationis die, peruenimus portum Bandæ; secundâ, Melundi; tertiâ, Mombri; quartâ, Reiapor; quintâ, Mazagan; vnde diu Piratarum nauigia in mari nauigantia vidi-mus; sextâ, venimus Dabul; & decimâ, peruenimus Chaülum finem illius nauigationis; ibi enim nauim magnam in Sinum Persicum profecturam eramus con-scensuri: Chaülum igitur vigesima octaua Nouembris appulimus, ibique in Conuentu sancti Dominici, ad cuius Priorem commendatitias Vicarij eorum Genera-lis deferebam epistolas, vsque ad duodecimam Ianu-arij sequentis anni mansimus, opportunitatem nauigan-di expectantes. Nihil nobis notatu dignum in hoc tra-ctu contigit; sola vltima nocte, cum classis Lusitano-rum nobis occurrisset, eos quasi Piratas formidantes retrocedere cœpimus; sed rei veritate cognitâ iter pro-sequentes illud sælici exitu conclusimus.

C A P V T III.

De traiectu Oceani, ac Sinus Persici ingressu.

Quadragesimus iam cœperat annus supra millefi-num sexcentessimum, & duodecima dies mensis Ianuarij illuxerat; cùm nocte sequenti nobis fore dis-cedendum intimatur. Nauim igitur ingredimur, no-cturno tempore quando ex maris fluxu creuerant aque, portu

portu soluimus, & ad tria milliaria procedimus, ibique iacta sistimus anchorâ : cùm enim Piratæ Malabares circa littora deuantur, nolimus ultra procedere, ne deficiente vento soli in conspectu eorum maneremus, ac in eorum manus incideremus. Ibi expectabamus quinque nauigia bellica, quæ quia parua poterant quilibet hora è portu soluere; soluturæ igitur erant die sequenti, & nobiscum processura donec periculum deperdito littore euasissemus : hi siquidem Piratæ, quia tunc venti orientales intra mare impellunt, in ipsis solum nauigant littoribus.

Statim à prandio tria Piratarum nauigia comparent, nouem circiter milliariis distantia : statim cum tanto impetu, vigore, ac pertinacia remigio manus admouent, tantæque remigantibus identidem mutatis velocitate ad nos feruntur, vt intra duarum spatium horarum, velocissimo aquarum fluxu, & ventorum flatu in contrarium impellente, tres leucas confecerint : Dux nauis nostræ, vt generosi erat animi, eorum aduentum exterius saltem intrepidus præstolari volebat, indecoram iudicans, si ad tutum sub castro proximo locum fugiendo recederet : veritus maximè, ne hoc tanquam argumentum ignauitæ postmodum ei ab aliis obiiceretur, alij summe desiderabant propriæ fugæ consulere salutem ; nec Dux contrariæ erat sententiæ, si illæso posset honore recedere. Hæc videns, aliorum meæque salutis desiderio commotus nomine omnium Ducem aggreddior, multis quas breui illo tempore excogitaueram, rationibus suadeo recessum, & inter alia dico non esse cur de suo formidet honore ; cùm aliàs, dum miles esset, tot præclara gessisset generosi animi facinora ; nunc autem cùm mercator esset, ac Piratis viribus inferior, eius temeritati ascriberetur, si eos pugnaturus expectaret ; etiamsi victoriæ certus esset, & quòd Dux Mascari, qui hanc ei commiserat nauim, non eius præ-

lia & victorias, sed mercium incolumitatem ac lucrum tantum expeteret: his motus rationibus, cæterisque applaudentibus, iubet anchoram euelli, ac vela vento dari; ad castrum sensim accedimus. Interim nauigia illa bellica, ut nobis in periculo succurrerent, portu soluunt, quorum aduentum aduertentes Piratæ ulterius accedere non audent; sed suis fidentes remis proximi tota die iacta manent anchorâ.

Cum prima nocte paululum spirarent auræ vela facimus, quod aduertentes Piratæ, nec alia videntes nauigia utpote remotiora (media si quidem erat nostra nauis) nos insequuntur proximè, solito clamore perstrepenes accedunt; sed exploso à nobis tormento bellico recedunt, nec amplius audiuntur: cessant auræ, iterum iactamus anchoram, totaque ibi sistimus nocte; sed ad Solis ortum rediuiui perflant venti, vtra procedimus; insequuntur Piratæ, sed procul: tandem inualefcente vento, expansisque omnibus velis in altum tendentes, continentem montiumque cacumina deperdimus, nec imposterum tales Piratas, sed solos Batauos in alto mari formidamus.

Per aliquot dies tranquillo mari, ventisque prosperis sed debilibus nauigantes oceanum Indicum traicimus, & ad initium Sinus Persici peruenimus, quod ex ingruenti aduertimus tempestate: solent enim in illo aquarum concursu & occurſu frequenter sauire. Die igitur vigesima octaua Ianuarij contrario, eoque rapidissimo flante vento tempestas magna excitatur, omnes terror occupat, periculumque formidamus; nauis quippe vetus plurimum aquæ admittebat; sed tunc cum omnium stupore; sed ratione naturali nihil penè admittebat, citissimè quippe in suo cursu præterlabantur aquæ multum tamen timebatur, ne nauis contra venti impetum nauigans aperiretur: vela colliguntur, vnico ad nauim regendam relicto, nihil præ timore

re tota die comeditur, iamque in Indias retrocedere cogitabamus, timentes ne ventorum impetu ad mare rubrum delaberemur; sed Domino sic disponente paululum ventus remittitur, ac sub vesperam mare quiescit; iter prosequimur, sequenti die quædam auiculæ non multum intra mare procedentes apparent, & terra proxima nobis denuntiatur. Tota die nauigamus, terra Solis splendore occulta, ad cuius occasum manifesta, imò proxima compareret: ad hanc tota nocte nauigantes tendimus, ad Solis ortum pagulus nomine Teue in Arabia felici compareret, vbi riuulus aquæ dulcis inter montium angustias decurrit; Palmæ mala aurea aliique fructus colliguntur: illuc accedimus, quia ventus contrarius nos ultra progredi non permittebat, anchoram iacimus, sed paululum elapsa fundum non inuenit, ac ita vento delati ad tres leucas recedere usque ad destructam Calaiati Ciuitatem compellimur; ibi inuento alio Lusitanorum nauigio per triduum sistimus, donec contrario Septentrionali cessante vento, Australis desideratus perflaret: in Meridionali igitur tempore, prospero nauigamus vento, quo per totam noctem perseuerante Mascatum summo mane peruenimus; illa nocte accidit, vt quidam nauta Arabs, dum in cymba nauigij Comitissæ dormiret, repentino maris fluctu cymba repletur, ac ita miser ille decidit in mare, ac impetu fluentium raptus aquarum naufragium pertulit; vnde quantum ad corpus & animam naufragus periit. Dies, quo Mascatum appulimus fuit quarta Februarij, & ad Conuentum S. Augustini, qui vnicus est in hac vrbe, secedimus; Solent enim illi Patres omnes Religiosos cuiuscumque sint ordinis illuc aduentantes colligere, & insigni charitate tractare.

C A P V T IV.

De ulteriori Sinus Persici navigatione.

MAscata quindecim circiter diebus commoramur, tum ut nauigia à Prorege nobis promissa expectaremus, tum ut omnia pro ulteriori navigatione necessaria pararemus: sed quia classis nauigia præ vetustate nauigare non poterant, coacti sumus nauiculam Persarum tendentem versùs Bassoram conducere; nos enim illuc iter nostrum dirigebamus. Circa vigesimam Februarij Mascato discedimus, prosperè navigationem incepimus; sed vix Castrum Suar attigeramus, cum vento septentrionali flante nobis contrario, qui in illo præcipue mari domipatur; iactâ anachorâ propè littus duobus ferè diebus sistimus. Iterum redit serenitas; unde ulteriùs nauigantes appellimus Corfacam, vbi dimidio die mansimus: deinde sub vesperam exeuntes totam illam maritimam Arabiæ fælicis partem secundo vento pertranseuntes, ad promontorium Mossandam supra descriptum summo mane alterius diei appellimus, quo superato ad Cassapini portum propter ventos contrarios diuertimus. Ibi Pater alius mei comes itineris malignis febribus cœpit laborare: unde cùm nihil penè haberemus, quo in sua infirmitate sustentaretur, per inaccessos propemodùm montes ad Cassapum Castrum Lusitanorum properaui; vbi dux pullos aliquos aliâque pro infirmo Patre concessit. Mirabile est, quomodò Arabes per abruptos montes quasi Capræ discurrant, horrebam aliquandò illos ibi conspiciendo. Intra illos Arabiæ montes sunt varij sinus maris, in quibus tri-duum ventorum pertinacia detenti sumus; qui illac pertranseunt, nisi continuò velorum cordas præ manibus habeant, manifesto se committunt naufragio; tam validi ac repentini ventorum flatus ex illis montium

montium scissuris erumpunt ; vt facilè , nisi vela demittantur , ingentes etiã naues euertant. Vbi contrariorum impetus ventorum quicuit , accessimus ad quoddam caput vbi Mahometanorum est templum ; inde mare tota nocte nauigantes traicimus , ad insulam Angan peruenientes : sequenti die superatâ Quexomis insulâ , portum Congo appellimus die quarta Martij.

In hoc portu Perfidis est quidam Lusitanorum procurator , qui dimidiam vectigalium partem ex pacto colligit : ibi in domo Patrum S Augustini commoramur ; ibi noster infirmus è morte penè rediuius aliquântulum conualescit : quia verò Prorex , & Dux Generalis Lusitanorum nos suis epistolis Gubernatori Congo plurimùm commendauerant ; propterea ille Gubernator noluit vt in illa , quam conduxeramus , naucula vltteriùs procederemus : paucis enim ante diebus aliqui Arabes Lusitanos aliquot milites trucidauerant ; vnde ad se vocati iussit quendam senem Arabem nomine Seif siue Hali apud Arabes notissimum , & magnæ apud illos venerationis ; & imperat vt nos Bassoram vsque per illa Arabum littora saluos & incolumes perducatur. Antequam è Congo discedamus , dicendum nobis occurrit , quòd ex paruis principiis siue ex casulis piscatorum , ob continuum Lusitanorum , Gentilium , aliorumque commercium in magnam iam excreuerit urbem : aquæ tamen ad bibendum sunt pessimæ ac nociuæ : inter alia autem quæ causant nocumenta , generant in corpore vermes , qui postea è tibiis erumpunt : statim ac caput foras mittunt , illud in lino alligant , deinde vermes paulatim quotidie extrahunt , illos lino circumuoluentes , donec omninò exierint ; longissimi quippe sunt. Si quis illos vi statim voluerit extrahere , disrumpuntur & partes multis è foraminibus exeunt. Generantur etiam in illis partibus in hominum corporibus serpentes,

tes ; dicunt hoc contingere quandò aliquis serpens super indusia transierit ; in medio namque corpore nascitur serpens , apparet caput , & cauda paulatim crescit , nisi quotidie verberibus & incisionibus vexetur : si enim crescere permittatur , paulatim excrescendo corpus integrum cingit ; quandò autem caput caudam attingit , hominem suffocando perimit. En quot miseriis humana subditur conditio.

Postquam navis illius Arabis navigationi præparata fuit , è portu Congo solvimus die decima septima mensis Martij , sequenti die peruenimus ad insulam Piloro , Tertia die ad insulam Caïs , vtraque olim habitata fuit , nunc deserta est ob continuas Lusitanorum incursiones ; propter ventos enim remissos sensim procedebamus : vigesima tandem Martij ; quæ fuit quarta navigationis , flante Austro insulas Laram & Androuiam superantes ad littus Nichilou peruenimus. Illius littoris habitatores , qui urbem paucis ex lapide constructis domibus , plurimis tamen ex ramis palmarum extructis casulis fundauerunt , Lusitanis sunt infensissimi. In hoc portu per aliquot horas , ut aquam aliâque necessaria prouideremus , manere cogimur : ibi nos senex ille relinquit , asserens nobis nullum ultra superesse periculum , suum tamen nobis ducem præficit nepotem ; nos ad videndum urbem inuitat , sed his non omninò fidentes discedere properamus : vnde ad occasum penè Solis , deficiente iam vento Australi , ex illo portu discedentes nostram prosequimur navigationem.

Vix per quadrantem nauigabamus : cùm ecce ventus Septentrionalis validissimus exurgit , paulatim augeatur , & intra dimidiam horam , tanta rabie desæuit , ut ingentem excitauerit tempestatem : horresco , quoties de illa cogito , vix adhuc credo me tot euasisse naufragia : pericula dolorosæ ac inæstæ illius noctis figillatim enarrabo.

Cùm ventus semper cresceret , nec vltra progredi licebat (si enim paululùm vlteriùs progressi fuissẽmus, vicinus aderat portus) anchoram iacimus ; sed quia exigua erat naucula , crescentibus vndis ac penè intrantibus periclitabatur : vnde iterum anchora iubetur extrahi, quod diu laborantes vix perficere valuerunt : en primum periculum. Iam enim vndæ nauculam arena onustam ingrediebantur non egressuræ : eductâ anchorâ retrocedere coacti, non ad urbem , quia portum non habet ; sed retrò insulam Latam vel Androuiam properamus , vento , semper excrecente tantòque aliquando impetu nauculam impellente, vt eam vno impetu penè euerterit , & nisi scissæ fuissent cordæ , quibus velum ligabatur , actum erat de nobis : en secundum notabile periculum. Tertium statim adest ; scapha enim quæ naiculæ à puppi alligata erat , vndis repletur , subtus aquam descendit , naiculæ puppim suo pondere deprimit : rogamus illos Arabes , vt cymbæ cordam abscindant ; imò viginti aureos pro illa offerimus , plures sine dubio oblaturi : sed non aliud respondent , quàm nos esse perituros priusquam cymba pereat , nec ab illo animo precibus aut promissis dimoueri potuerunt : quos vbi obstinatos aduertimus, omnes labori manus admovent , vt cymbam ex vndis extrahant , & intra nauculam attrahant : diu in vanum laboramus, sed Deo sic volente aduenientis vndæ impetu in nauculam impellitur.

His maioribus liberati periculis , ad optatam procedimus insulam : sed nocte ingruente in noua pericula, imò in continuum denoluimur periculum : obscurissima erat nox , venti ita fremebant , vt cordæ naiculæ concussæ præ strepitu loqui viderentur ; vndæ continua successione insilientes quasi montes apparebant, mare spumis repletum albescebat : Quid plura ? mortis imaginem omnia præferebant : approximauimus insulæ,

fulæ, quod ex aliquali vndarum quiete dignoscebamur, sed cùm maris fundum immisso plumbo non attingeretur, vltra progredimur, magis insulæ nos accessuros credentes; sed malo nostro illam præterimus, & ad pristina deuoluimur pericula, quæ tam frequentia occurrunt, vt quot temporis momenta, tot mortis pericula computentur. Ingentes vndæ continuò irruentes passim nauiculam obruturæ videntur; & verè si aliqua fuisset introgressa, de nobis actum & conclamatum erat: aliquando tantillum veli ad regendam nauiculam expandebatur; aliquandò verò nauicula vndarum discretionì committebatur, quibus ingruentibus Arabes voce mœsta dicebant, vt foras præterirent. Quàm longa nox illa visa fuit: quàm tarda aurora, somnus ab oculis omnium recesserat, solo mœtore conficiebamur: nos multiplicata cōfessione morti sæpè præparauimus, omnium Paradisi Sanctorum, præcipuè Sanctissimæ Virginis, ac Sanctorum Ioachim & Benedicti, quorum festiuitas erat, suffragia qua poteramus deuotione, adhibitis etiam votis implorabamus. Ego me nostris martyribus, quorum causa mittebar, plurimùm commendabam: tandem Domino adiuuante, ac votis nostris obsecundante, surgit aurora, dies aduenit, tempestas aliquantulum sedatur: ad vicinum quendam portum recedimus.

Tanto præteritæ noctis periculo fuimus exterriti; vt omnes mutato nauigandi consilio ad portum Congo regredi decreuerimus; indeque itinere terrestri Persidem pertansire. In reditu nouum occurrit periculum: nam vndæ propter contrarios hinc inde flantes ventos occurrentes, mutuo collisæ supra nauiculam eleuabantur: sed vento ac remis citò euadentes Congo peruenimus.

CAPVT V.

De secundo meo ingressu in Persidem.

BReui discursu meum in Persidem iam supra descriptam reditum, progressum, & exitum enarrabo. Expeditis igitur, quæ in Congo nobis occurrerunt negotiis, præparatis etiam ad iter necessariis, sub finem mensis Martij Persidem penetramus. Coniungimus nos turbæ Gentilium mercatorum, qui suas Aspahanum deferabant merces: multi simul procedunt; cùm enim loca deserta ac pene inuia prætereundum sit, & aliunde inertes incedant, multitudini iter agentium confidunt: imò nos tanquam turbæ duces ac defensores venerabantur; quia sæcularis Christianus duas habens catapultas, nobiscum itineris nostri comes veniebat.

Totus ille comitatus, tum ad merces deferendas, tam ad homines vehendos utitur asinis, qui prægrandes tanquam muli plusquam equi in Perside æstimantur; ac venduntur. Duobus primis diebus adiacentem mari planitiem perambulamus, in qua sunt aliqua oppidula, multa palmaria, ac per aliqua milliaria salis immensa copia: Tertia die montes ingredimur, ac per illos etiam die sequenti magno labore ac æstu procedentes, quinta tandem ad oppidum satis amplum in planitie constitutum iuxta fluuiolum pene salsum deuenimus, ibique per duos dies commorati, socios mercatores de nouo aduentantes præstolamur.

Inde descendentes, ac singulis diebus oppida prætereuntes, ad ciuitatem Laram, septima die Aprilis, quæ erat Sabathum Sanctum, sub vesperam superatis montibus inaccessis peruenimus; Gentilibus relictis, qui aliquos è suis præstolari coacti sunt, qui deuotionis causâ ad quendam locum solitarium eorum idolis de-

dicatum processerant. Tribus Paschatis diebus in ciuitate Lara mansimus; quibus elapsis ulterius progredientes, decima tertia die, postquam è Lara discessimus, ciuitatem Siras peruenimus, ibique in nostra residentia aliquantulum quieuius: nihil peculiare in hoc tractu nobis contigit, nec aliquid peculiare dicendum occurrit: via ut plurimum plana quamuis serpentinis propter montes intermedios prolongata gyris. Inter Laram & Siras in medio penè tractu est vrbs Iacon in vasta planitie collocata, suis palmis optimis nominatissima.

E ciuitate Siras egressi Aspahanum contendimus, quò vigesima prima mensis Maij manè peruenimus, ibique vsque ad quintam diem Iunij in nostro Conuentu à præteritis laboribus itineris recreamur: his diebus in quærenda discedendi opportunitate vacamus. Cùm verò mercatorum turbam ab aliquibus iam diebus præcessisse didicerimus, statim aliquos Armenos mercatores, qui ex illa remanserant, breuique discessuri erant, conuenimus; enixè deprecamur, ut nos sui comites itineris admittant; insuper auctoritatem Episcopi Chulfensis nobis plurimum affecti imploramus: hic mercatores aduocat, eisque præcipit, ut nostri curam tanquam sui gerant, quod nobis plurimum profuit. Præparatis igitur ad viam necessariis, assumptis equis quarta die Iunij Aspahano discedimus, ac magnis itineribus, ut citò præeuntem turbam pertingamus, quinque simul properamus. Quinto itineris die ciuitatem Cassam in immensa planitie collocatam venimus; ibi repertis aliquot sociis vsque ad alium diem expectamus; inde discedentes, ac diffusam illam planitiem percurrentes, Comum urbem appellimus, deinde urbem Sauam. Inter has duas vrbes occurrit mons, quem spectris ac dæmonibus infestatum ferunt: nullus ad illum præsumit accedere; quia aliquos ibi traditur periisse.

se. Post Sauam venimus Arasenq oppidum, ad radices montis collocatum, à quo maxima planities ciuitatis Casbin incipiens, ad multas leucas longè latèque procurrat: inde dictam Ciuitarem olim Persidis curiam, quamuis à longè conspeximus. Hæc planities dispersis hinc inde oppidis plena ac amænissima compareret: vltèrius ad aliud oppidum duobus distans leucis progressa, turbam mercatorum, quam prosequēbāmur inuenimus.

Quia verò mercatores sic turmatim incedentes tardius viam conficiunt: captā quorundam, qui præcedebant, mercatorum opportunitate, nostrisque sarcinis cuidam amico commendatis præeuntes, quā possumus celeritate viam prosequimur. Tertia die ciuitatem Sultaniā appellimus, nosque aliis iter agentibus associamus. Die sequenti ante lucem surgimus iter aggressuri; sed omnibus iam paratis aufugit vnus ex nostris equis, qui in illa discurrens planitie, tenebrarum opportunitate securus capi vix potuit. Post iter quatuor circiter horarum, cum turbam cui nos iunxeramus præcederemus, occurrit cursor Regius, nosque ictibus baculi salutare incipit: hunc esse latronem existimantes effusis in fugam equis periculum declinare festinamus: sed ab aliis admoniti quòd sistendum esset, sistimus exitum expectantes.

Dignoscuntur hi Cursores, ex eo quòd Crucem Sancti Andreæ ante pectus, & retrò positum gestent: qui similes gestant cruces, tanquam dæmones fugiuntur: Cum enim in Perside non sint determinata loca, vbi equi ad currēdū necessarij sumantur, hi Cursores Regij; scilicet ad Regem, vel à Rege missi possunt ad libitum obuios quosque sibi sumere equos, & resistentes sibi occidere; & ita aliquandò iter agentes, sublati equis in media cogunt sistere via: sic nobis accidisset, nisi oblatis illi cursori quinque aureis, vexa-

Iubet igitur ille , vt ex equo descendamus ; metu mortis obedimus, semper illum latronem existimantes; si enim Cursorem esse nobis innotuisset , manifestato ei priuilegio nobis à Rege concessio , euadere hîc, sicut sæpe alibi, poteramus : Equos nostros assumit ; sed oblato prædicto pretio statim restituit ; sicque procedimus vltra , nostros itineris comites dispersos colligentes. Ex hac die quoscumque habebamus obuios, Cursores esse formidabamus, similisque Cruciferos impostorum declinare curauimus. Dum hæc tragœdia perageretur , à longè prospiciebat Illustrissimus Babylonien-
sis Episcopus ex nostro ordine assumptus, cum alio religioso nostro mihi plurimum affecto : sed præ distantia non agnoscentes, nec compati, nec iuuare potuerunt.

Postquam ad proximum oppidum accessimus , ad quandam domum recedentes , secreti per duos dies mansimus ; quia alium transire Cursorem audiueramus ; ibique Legatum quendam nos subsequenter expectamus. Hic Legatus à Principe Pachachou Christiano ad Regē Persidis destinatus fuerat, vt ei suam filiam in vxorem tradendam deduceret : finita iam Legatione ex ciuitate Casbin , vbi Regem viderat , in patriam redibat ; habebat aliquos secum à Rege deputatos, qui ei per viam omnia necessaria , expensis urbium vel oppidorum , per quæ transibant , prouiderent. Hoc inter alia gaudent priuilegio, vt nullus cuiuscumque sit conditionis , aliquem ex eius comitatu vexare , aut vlllo modo offendere præsumat : Illum prope Sultaniam inueneramus ; sed inscij futurorum , eius societatem non quæsiuimus : vbi eius aduentus nobis innotuit , ipsum adiunximus , ac de more patriæ salutantes enixè precamur, vt nos tanquam seruos in suo admittat comitatu : læto nos excipit vultu, vt amicos recipit, seque curam nostri habiturum pollicetur : quod & affectu & effectu demonstrauit.

Secunda,

Secunda, postquam illum comitamur, die; ad quendam locum venimus, ex quo cum habitatores recederent, ne illi expensas subministrare cogerentur, male ab illo tractati ac plexi sunt: unde populi commotionem veritus discedit: hoc expauescimus nuntio, repentino eius discessu affligimur, & qua possumus celeritate fugam arripimus: tunc enim nobis obiicitur miseranda Legati Poloni, ac vnus è nostris Religiosis cædes paulò ante in euentu simili perpetrata. Vix loco egressi populi commotionem audimus, nobisque sepulchra quorundam ibi interfectorum ostenduntur. Tota nocte procedimus, & ad locum latrociniis infestum, in quadam valle angusta plena latebris, prope fluuiolum constitutum deuenimus; maxima illum cautela præterimus, ad illam vallem magno fragore catapultas explodendo, ad terrendos latrones, si qui essent, descendimus; & ponte ibi transiisso, iterum montem arduum ac præcelsum ascendimus, quo superato sensim descendentes, ad urbem Mianam in lata constitutam planitie, duobus irrigatam fluuiolis simul confluentibus, in vigilia Natiuitatis sancti Ioannis Baptistæ deuenimus, indeque procedentes die vigesima sexta Iunii in celeberrimam ciuitatem Tauris, olim Ecbatanam, tandem peruenimus.

CAPUT VI.

De mea per Armeniam profensione.

TAURIS ciuitatem decima septima mensis Iulij deseretes, in Armeniam proficiscimur; Armenis mercatoribus adhaerentes, Camelis potius agitati, quam vestri procedimus. Prima itineris die tres tantum conficimus leucas. Secunda planitiem Tauris prætereuntes, relictâ vrbe Sophian ad vallem montibus coarctatam deuenimus, vbi vuas iam maturas inuenimus. Tertia

die exercitum Persicum in illis montibus consistentem sub papilionibus videmus : ultra progressi prope urbem Amarant vectigal soluturi triduo manemus; inde discedentes ; ac vastissimam percurrentes planitiem , vnde supra descriptum montem Noë vidimus , elapso triduo itineris Armeniam ingredimur. Occurrit primò multum diffusa planities, pluribus Armenorum oppidis referta , amœnôque duplici irrigata fluuiolo , in ipsa est ciuitas Coi ibi iterum vectigal , sed satis moderatum, sicut & alibi in tota Perside soluitur : in Turchia verò excessiua sunt vectigalia : ibi enim quadraginta aureos soluere coguntur de his mercibus, de quibus in Perside vix duos soluunt.

Mansimus in ciuitate Coi tribus diebus, tum vt vectigal solueretur , tum vt necessaria pro itinere pararentur ; deserta enim loca sex diebus prætereunda nobis erant ; tum propter iurgium ac conflictum mercatorum, verè me in mediis vidi angustiis; illi enim mercatores, quorum consortio utebamur, de expensis ibi factis dissidentes, postea rixantes, denique ad arma confugiunt ; sed vnus tantum ictu baculi in fronte vulneratur, qui ad Gubernatorem Ciuitatis accedens contra alium format querelam. Is statim aduocatur, pœna pecuniaria viginti aureorum ipsimet Gubernatori applicata multatur, sicque tota lis inter eos terminatur. Inde discedentes, illamque emensi planitiem ad quendam fluuiolum peruenimus : hic fluuiolus inter montium angustias defluens , vix aditum præbet iter agentibus: illius cursum , sed aduersum sequentes accedimus ad extremum Persidis terminum , vbi supra collem inaccessum est domuncula, in qua milites aliqui morantur, qui integrum prætereuntem exercitum lapidibus solis destruere possunt ; inferius enim est via perangusta, per quam duo simul incedere nequeunt ; propterea hæc domuncula arx nominatur , & est Persidis ex hac parte propu

propugnaculum : ibi est fons aquæ calidæ prope fluuiolum iam dictum emanans. Inde discedentes ac contrarium semper fluuioli cursum tenentes, inhabitata Turchemannorum loca, adhuc per quatuor dies inter medios montes pertransimus, & castellum Cochab alteri fluuiolo prominens attingimus : ibi primo vectigali Turris soluto ultra procedimus; & tertio itineris die, quæ fuit sexta Augusti, in ciuitatem Van peruenimus.

Vsq̃ue ad duodecimam eiusdem mensis, tum vt vectigal solueretur, tum vt cameli mutarentur; huc vsque enim cameli Persici veniunt, sed non plus ultra: horum ductores sunt viri ordinarij, peditesque iter agunt: non ita inter Turcas; hi enim equitant, seruosque habent: hoc credo, ad reuerentiam sui Mahometis, qui ministerium istud exercuisse traditur; propterea carissimo eos conducunt pretio. Iis diebus apud quendam Armenum mansimus, maximosque passi sumus calores; inde deuotionis causâ ad montem Varac profecti, ab illis Religiosis Armenis insigni charitate fuimus excepti. In nostro venerunt comitatu mercatores illi Armeni itineris nostri comites, duosque nobiles Turcæ: illuc ad noctis principium peruenimus, statim nobis obuiam venit loci illius Episcopus eiusdem monasterij Religiosus. Locus est amœnissimus, vastam sub se planitiem, ac mare coniunctum prospiciens; est arboribus confusus, fontibusque ac riuulis iucundus: monasterium est pene dirutum; olim fuisse magnificum apparet, adhuc extat Ecclesia integra ex lapide quadro constructa, ac recta fornice: huic aliquæ adhærent aulæ, quasi aliæ Ecclesiæ; in quarum vna Armenorum Patriarchæ, sepeliuntur; reliquum monasterij ex luto constructum est. Inuenimus ibi duodecim Religiosos ferè omnes ætate prouectos; tres enim tantum erant iuvenes: duo inter illos erant ad Episcopalem dignitatem promoti,

Ulteriùs procedentes vias difficiles , ac subiectis emi-
nētes præcipitiis præterimus; in quibus me diuina præ-
seruatum agnosco prouidentia; mulus quippe , quem
insidebam , in ipsa itineris ora quamuis me reluctante
incedebat ; sed nunquam cecidit , quamuis postea sæ-
pè ceciderit : si tunc cecidisset , de me actum erat. Hac
die ad quoddam venimus oppidulum in deciui mon-
tis positum , ad cuius radices pertransit fluuiolus.
Inde discedentes ad quendam venimus pontem , vbi
vectigalis exactores commorantur ; quos prætergressi
(iam enim Domino illius loci , in ciuitate Van persq-
lutum fuerat vectigal) ad oppidum venimus, vbi sunt
plures pntei aquæ salis , ex qua sal pro vicinis regioni-
bus conficitur , & ministerio boiū illuc deferitur : vno
sistimus ibi die , deinde progredientes ad vallem amœ-
nam prætereunte fluuiolo irrigatam accedimus : media
reperimus via novos vectigalis exactores , qui camelos
numerantes eos ad determinatum stationis locum per-
uenire , mercatoribus secum assumptis , & nobis ad
suum adductis oppidum , permiserunt ; à quibus post
solutionem dimissi ad dictum properamus locum: hanc
vallem plurimū diffusam iuxta fluuioli ripam ince-
dentes præterimus , fluuiolūque traicientes ad sum-
mitatem collis facili ac suauī consensu venimus ; ibi
fontes scaturiunt , ac infinita propemodū Perdicum
aliarūque auium multitudo conspicitur : ibi sicut &
in via plures boiū sal deferentium turmas reperimus.
Ex colle illo sensim descendentes per vastam progredi-
mur planitiem , quam præterfluens medio tractu alius
fluuiolus irrigat : ad eius ripam sistimus, ibique nouum
exigitur vectigal ; illic nobis consedentibus veniunt
mulieres Arabes lac aliāque comestibilia venalia defe-
rentes ; inde digressi , planitiēque percurrentes alium
offendimus fluuiolum , in cuius medium ex equo deci-
di ; cū enim quidam Persa in meum voluisset insilire
equum

equum iam aquam prætereuntem, meipsum in aquam ipsam deturbauit, sicque madidus vsque ad ciuitatem Diarbequir, Tigri Armeniam & Mesopotamiam ex illa parte diuidenti prominentem perueni.

C A P V T VII.

De meo in Aleppum aduentu.

ALiquot diebus in ciuitate Diarbequir māsimus: vt nouam vltius procedendi opportunitatem haberemus; ibi quippe sistebant illi mercatores, quorum in comitatu ex Perside veneramus. Congregata igitur noua mercatorum turba, in ipsa Natiuitatis Beatissimæ Virginis festiuitate iter aggredimur: in ipsis autem noctis tenebris dum progredimur, ab inuicem separamur: diuersisq; viis tota nocte procedimus; sed ad eundem terminum superatis agris, saxi tenacibus consitis peruenimus. Prima die in decliui cuiusdam montis, vbi fontis riuulus scaturiebat, sistimus: inde ciuitas Diarbequir, eiusque planities, ac decurrentis alueus Tigris maxima conspiciebantur amœnitate. Montem illum prætergressi ad aliam planitiem deuenientes, iuxta abundantem aquarum originem tentoria figimus. Tertia die ad exiguum quendam lacum deuenimus: inde discedentes, iterum quarta die scientes ac volentes diuidimur; quidam enim ad Orpham defleunt: nos recta tendentes ad cuiusdam fluuioli ripam accedimus, vbi febris laborare cœpi; sed paucis diebus terminatur. Quinta die ad oppidum in vastissima planitie situm, riuulis aquarum irrigatum, non longè à ciuitate Orpha distitum properamus: Inde digressis, sexta nobis die aliud occurrit oppidum in eadem planitie; vbi non fontes, sed soli sunt putei; ibi vectigalis exactores vnum à singulis Europeis aureum extorquent. Inde septima discedimus die, ac in loco deserto; iuxta copiosum

sum tamen ac amœnum fontem remanemus. Tandem octaua die ciuitatem Elbir iuxta fluuium Euphratem ad radices montis situm præteritis pluribus vineis appellimus.

Ibi soluto pro nobis eodem vectigali, traiecto naui fluuiio, relictaque Mesopotamia nobilissimum Syriæ Regnum ingredimur: postquam vno ibi die mansimus, nostrum versùs Aleppum iter prosequimur. Prima die occurrit oppidum in valle situm, vbi præterfluentis aquis fluuioli plures irrigantur horti, fructuumque copia colligitur: inde progressi viam primò rectam ac planam, lapidibus per multa milliaria stratam; deinde traiecto ponte fluuiolo, ciuitatem destructam ac castrum ei adhærens in colle situm reperimus: multa quæ memoriâ exciderunt, de hac ciuitate dicebantur: sed inter alia quodd vnus magni Prophetæ patria fuerit: est ibi locus latrocinii infestus; latrones quippe illis in ruinis latentes, illac prætereuntes inuadunt mercatores. Ibi vsque ad lucem subsistimus; quia duos abesse mulos aduerterunt, quos à latronibus subreptos formidabant. Ibi iterum diuidimur; aliqui enim Damascum properantes, Aleppum declinare volunt; ne vectigal pro mercibus soluere cogantur: nos verò ultra procedentes post duos dies in ipsa sancti Matthæi festiuitate ad desideratam Aleppi ciuitatem peruenimus.

Vltima nocte, dum progredimur, imber maximus ingruit, tantoque ruit impetu; vt muli conuerso capite steterint immobiles. Eramus tunc in via lapidibus strata: per horam circiter imber ille perdurat, cessante imbre non recedunt nubes, sed potius ita aërem obscurant, vt nec via compareret, nec se mutuò comites itineris intueri possent: accenditur ex filice excussus ignis, præeunt aliqui tædam accensam præferentes; sicque per aliquod spatium, magna tamen confusione procedimus: quisque enim propius ad lumen procu-

rat accedere ; ne casus aliquod periculum ex ipsis tenebris incurrat. Imber iterum maiori impetu , ac longiori spatio delabitur , ac ita in media cogimur sistere via, quam ita deturpat, vt sequenti sereno die maxima cum difficultate progredi vix liceret; cataractæ quippe cæli apertæ videbantur : sic madidi vigesimaprima Septembris Aleppum peruenimus.

Adsunt statim Iudæi vesticigalis exactores , nos vt-pote ex India venientes adamantibus onustos credunt: omnia perscrutantur, ipsos habitus , imò & corpus palpant . cùmque finitis omnibus diligentis nihil inuenissent ; nos omnia ipsis celare conqueruntur : cùmque me Lusitana aliqua verba proferentem audiissent (illa enim loqui per octo annos assuetus eram) me Hispanum & Lusitanum dicunt : imò me vocant Dominum Philippum , exprobrantes mercatoribus Gallis , quòd me pro meritis & dignitate non honorarent : vix illis potui persuadere me esse natione Gallum : quamuis & nauim in qua veneram , & testes qui me agnoscerent, indicarem. His Iudæi vtuntur artibus , vt deueniant in notitiam personarum & rerum quas deferunt ; quando enim nobilis aliquis Lusitanus in eorum manus incidit, tyrannicis eum diuexant modis.

Anceps de me sententia differtur , sarcinæ sigillantur, exitus interdicitur , fidei iussores nostri Patres constituuntur , & ita vsque ad duodecimam Octobris Aleppi remanere compellor : vbi à febris lenta & breui conualeco.

C A P V T VIII.

De traiectu Syria , ac nauigatione.

VExatione & malitia Iudæorum à die sancti Matthæi vsque ad vndecimam Octobris Aleppi remanere coactus sum : multiplici diligentia , nunc rogando,

gando , nunc autoritate nostri Gallorum Consulis discedendi veniam procuravi : obstinati manent ; pecuniam , sed quam eis dare non poteram , exposcunt : sic in dies meus discessus protrahitur. Cōtigit tamen quòd quidam ex Indiis orientalibus venerit , decem aureorum millia in adamantibus secum ferens : hic cū Aleppo discessisset , fortuitò captus ac grauitèr multatus , quos ferebat adamantes in carcere detexit : Omnia fisco fuissent addicta , nisi Consul noster sua illum protexisset autoritate. Iudæi mille nummos Consuli proferebant , si adhibita aliquali diligentia , eum totali protectione non defenderet : sed ut erat vir rectus ac timens Deum , validæ tentationi resistens , & conscientiam ac honorem vtilitati præferens , illum infælicem toto cordis affectu , totaque officij protexit autoritate. Mille nummi Iudæis conceduntur ; sed ea conditione , ut liberam mihi discedendi facultatem tribuerent.

Hæc licentia in scriptis mihi datur : sed quia Iudæi sunt in omnibus malitiosi , consilium amicorum secutus ; non versùs Alexandrettam , ut Iudæi credebant ; sed versùs Tripolim iter meum dirigo : cū enim Alexandrettæ Gubernator ipsi Iudæi vectigalis exactori subiaceat ; miseros iter agentes ad Iudæi nutum diuertat : expectat vltimum discedendi diem , quandò verò illi nauim conscendere parant , per fas pèrque nefas pecuniam exigit ; quam vel inuiti soluere tenentur ; nè ibi discedente nauì diutius manere compellantur.

Inuenta mercatorum turma Tripolim proficiscente , vndecima mensis Octobris sub vesperam Aleppo discedimus : vix illa die tres leucas conficimus , ut aliquos mercatores ibi expectaremus. Erat planities , quam præterfluens riuius irrigabat , ac molendino proximo deseruiebat ; inde digressi ac aliam planitiem percurrentes , ad exiguum diuertimus oppidulum : tertia diè ad aliud dirutum accedimus , in quo plures erant nucum arbores :

arbores : quarta die , quæ fuit decima quinta mensis Octobris , ac festiuitas Sanctæ Mariæ nostræ Theresiæ , nemus amplissimum , ac plura in eo destructa oppida prætergressi , ad vallem collibus circumseptam accedimus , vbi duo sunt putei , ad quos circumuicini Pastores aquam hausturi accedunt. Ibi dum pernoctamus , ingentes excitantur ignes ; mane verò dum discessuri surgimus , clamitantes audimus latrones aduentantes , ad arma properant mercatores ; vnde illi sub tenebrarum fauore recedunt : inde discedimus , & ad Orontem venimus fluuium : iuxta quem viginti circiter Arabes conscensis equis , lanceis munitos , & ad furandum paratos inuenimus.

Nos magnus in principio terror inuasit , postea re-sumptis animis omnes se ad dimicandum præparant. Onerantur catapultæ , denudantur enses , arcus tenduntur , parantur sagittæ : nostri aduersus Arabes currunt ; hæc omnia contemplantur hostes , in eodem loco persistunt immobiles ; cùmque se viribus inferiores aduerterent , simulata amicitia recedunt , nosque ultra progredimur , ac iuxta ripam Orontis illa die turma dimidiata sistimus : aliqui enim tanto latronum illorum metu perculsi fuerant ; vt duplicato itinere ad ciuitatem Aman illa die peruenerint. In hoc loco multæ erant rotæ , quæ decurrentis impetu fluminis voluentes , aquamque exhaurientes supra canales effundebant , vt vicini irrigarentur horti : illuc multi accesserunt rustici , quos omnes velut latrones suspicabamur : tota nocte vigilias alternatas fecimus , & in diluculo discedentes ad ciuitatem Aman properamus.

Quia Præcipui nostræ turmæ mercatores , negotia in hac ciuitate expedienda gerebant , in illa toto pene biduo commoramur : tandem discedimus , ac latam prætereuntes planitiem , ad decliue montis accedimus , ibique ignibus excitatis pernoctamus : montem sequenti die

die superantes ad vallem descendimus, in qua parua sancti Georgij Martyris Ecclesia constructa est, ad quam etiam Mahometani deuotionis causâ processerunt: illic Sacerdotes Græcos vidimus, qui nos ad Ecclesiam introducentes; imagines, paramenta, ac tandem omnia quæ ibi asseruantur, ostenderunt. Ultra procedentes ad pratum accedimus, ibique transacta nocte planitiem Tripolitanam iuxta littus maris longè procurrentem ingredimur, quam sequenti die prætereuntes, traiectis aliquot oppidis, fluuiolisque è Libano dimanantibus Tripolim peruenimus; & ad domum Proconsulis Gallo- rum diuertimus, ibique per paucos dies commoramus. In quodam pago, vltima die antequam Tripolim perueniremus, vidimus sepulchrum alicuius viri insignis nobis incogniti.

Aleppo Tripolim profectus sum eo animo, vt inde Cyprum nauigarem, vbi erat nauis Hollandica post paucos dies Venetias profectura; sed inuento ibi Cancellario nationis Gallicæ propositum mutauit; Is enim post paucos dies Sidonem nauigaturus erat, secum copiam serici deferens, pro quadam naui, quæ breui Massiliam profectura erat: eius igitur consilio nauigationem & societatem Catholicorum meæ patriæ societati hæreticorum externorum prætuli: vnde relicta Cyprinauigatione versùs Sidonem profectionem paro.

Dum ille Cancellarius merces, aliâque nauigationi necessaria præparat, quæ præparatio tres aut quatuor dies exigebat: motus exemplo cuiusdam Patris sancti Francisci, qui mecum ex Indiis venerat, ad montem Libanum conscendi. Primò planitiem illam duarum circiter leucarum pertransimus, fluuiolum traicimus, & ad radices montis accedimus: ibi paululum comedentes, & haustam è puteo aquam bibentes ad laborem ascensus vites refocillamus. Quatuor leucis per montem, sæpe ascendendo, aliquandò etiam descendendo,

dendo, rarò via plana progredimur: iamque vires deficiebant, & labor ascensus ardentissimam accenderat sitim: toto quippe illo spatio, nec guttula nobis aqua occurrerat: tandem ad exiguum deuenimus fontem, vbi extincta siti, viribúsq; tantillum refocillatis, reliquum ascensus vsque ad ciuitatem Edem superamus. Habent ibi hospitium Patres Franciscani, ad quod me socius deduxit; sed Pater, qui ibi aderat, nos ad domum Archiepiscopi supra descriptam reuerentiæ causâ conduxit: præmissis salutationibus, & hospitalitatis cœna paratur, in qua nobis caseus, herbæ, ac fructus appositi sunt: dum paratur cœna, ad exiguum introducor cubiculum, in quo erat quidam Nobilis Aquensis nomine Chestui, qui deuotionis causâ in montem Libanum recesserat, ibique vitam pauperem pro Christi amore ducebat, apud illum Archiepiscopum voluntaria fruens solitudine, librorúmque lectiõni vacans: Multa breui illo tempore colloquia rerum cœlestium conferimus, quæ ad cœnam vocari terminamus, nobisq; lectus sola storea componitur: sed pulicibus vexati insomnem totam noctem præterimus: media nocte surrexit Archiepiscopus & alio monacho adiutus matutinas persoluit laudes.

Postero die assumpto itineris duce, ad locum Cedrorum duabus inde leucis distitum, per aspera montis loca procedimus, sed omninò defessus, ac somno oppressus ipse ego perueni: eas numerandi curam meo comiti commisi, ac subter vnius cedri vinbram me proiciens obdormiui. Transacto quietis aliquo spatio, & assumptis aliquot cedri ramis in domum Archiepiscopi redimus, ipsóque salutato ac *Vale* dicto, ad domum Patris Franciscani recedimus, ibique reliquum diei trásigimus. Sequenti die summo mane discedentes, ac montem descendentes, viribus exhaustis, cruribúsq; vt dicitur, fractis Tripolim reuertimur; vbi adhuc per duos dies tempus
 nau

naugandi expectamus & à labore præcedentis itineris recreamur.

Vigesima octaua die mensis Octobris sub vesperam è portu Tripolis discedimus, illuscente die littora Syriæ contemplanur: aliqua nobis oppida & Ecclesiæ denominantur. Vrbs Gibelletum iurisdictionis olim Genuensium ostenditur, media circiter nocte splendoribus Lunæ clarissimæ, prope Beritum accedimus, ibique relictis aliquot hominibus sequenti die sub vesperam Sidonem appellimus.

Transacta in naui illa nocte, exeunt mei comites, ego solus in naucula remansi: cùm enim mihi dictum fuisset, quoslibet Religiosos, qui ibi nauim relinquunt, vel nauim ingrediuntur, duos nummos soluere; volui antequam naucula discederem, scire: an nauis aliqua ex his quæ in portu erant, citò versùs Massiliam esset discessura: cùmque mihi renunciatum fuisset vnã ex illis post decem dies profecturam; sicut & aliam quæ erat in portu Ptolemaidis: desiderio videndi sacrum montem Carmelum, Ptolemaidem in naucula eadem proficiscor.

Tertia post meridiem hora Sidone discedimus, sub vesperam Sarephtam Sidoniorum videmus; media nocte Luna plena Tyrum attingimus; ventisque contrariis flantibus in altum deiicimur; orto iam die Sacer noster Carmelus apparens, mentem meam ineffabili lætitia ac consolatione repleuit: tota illa die ventis è Carmelo procedentibus à littore proiicimur: sed illis in melius postea mutatis terram versùs nauigantes, ad nobilem illam quondam ciuitatem Ptolemaidam, nunc propriis sepultam ruinis sub vesperam peruenimus.

Erant tunc Ptolemaidæ nostri Religiosi, montis Carmeli incolæ: Contigit enim vt tunc temporis Princeps montis Carmeli nomine Tarabeus suo principatu exspoliaretur: eiùsque terris nouus Gubernator præfi-

ceretur : Is utpotè amicus noster , Patribus nostris suavis , ut è Carmelo recederent , seque in hospitium quod ad similes euentus Ptolomaïdæ habemus , se colligerent ; ne aliquod sibi ex hac rerum vicissitudine periculum immineret : promittens se eos suo tempore vocaturum.

Propter hunc euentum Patres nostri Carmeli incolæ erant Ptolemaïdæ , statimque audito meo aduentu ad nauiculam conuolant , & me assumentes in domum deducunt : erat tunc vigilia omnium Sanctorum ; die sequenti Gallorum , qui aderant , confessiones audio ; ibique usque ad diem vigesimam Nouembris nauis alicuius discessum expecto. Erant in illo portu duæ tantum naues , quarum vna gossipio onusta Massiliam profectura erat : alia verò Hollandica triticum deferens Hispanias petebat : hanc ultimam ad meam elegi nauigationem , tum quia multis ante aliam diebus profectura erat , tum deinde quia maior ac securior , tum denique quia ad Melitam insulam certò appulsura dicebatur ; vnde cum mihi Romam rectè tendendum esset ; hæc mihi videbatur alteri præferenda ,

Toto illo tempore , quo Ptolomaïdæ mansi , tum audiendis confessionibus sæcularium , tam in transferenda ex Italico in linguam Latinam historia renouationis Carmeli fui plurimùm occupatus : si quandò verò temporis aliquid residuum erat , ad contemplandas antiquæ Ptolemaïdis ruinas egrediebar. Non est qui illas contemplatus à lachrymis abstinere possit ; in illis quippe ingentibus ruinis magnam videns sepultam gloriam , omnia sublunaria citò transire , & vanitati subiecta tandem ad nihilum redigi manifesta discit experientia. Aliquando me ad nostri Carmeli contemplationem conuertebam : considerabam sanctum illum montem , olim sanctis plenum Religiosis , nunc Mahometicæ legis ritibus coïnquinatum : hinc ex tristitia præsentis status ;

status ; inde lætitia prioris , & spe futuri perfundebar.

Dum essem Ptolemaïdæ , venit vnus Pater sancti Francisci, qui dum Nazareth petij , ibi Guardiani munereungebatur. Hic mittebatur Alexandriam; sed pertranseundo,Memphim vulgò *Cairo* accedere tenebatur ; hic mihi suadere, qua potuit eloquentia, tentauit; vt vnà cum ipso in Ægyptum, vnde vnico die distabamus , proficiscerer , asserens plures esse Alexandriæ naues , quæ me Massiliam deferre possent : sed licèt me curiositas videndi Ægyptum aliquantulum moueret; tædium tamen tam longæ peregrinationis meæ , quo plurimum afficiebar , omnia itinera ; & multò magis nauigationes , in quibus tam frequentia occurrerant mihi pericula , dissuadebant : eadem die ille versùs Ægyptum,ego versùs Europam enauigamus.

CAPVT IX.

De mea peregrinatione in Terra Sancta.

DVm nauigandi in Europam tempus expecto , me ad peregrinationem partis Terræ Sanctæ determino : totam lustrare non potui , triplici difficultate præpeditus ; prima quidem quia ad videnda sacra Hierosolymorum loca multæ expendantur pecuniæ ; mihi autem parcissimum & vix redditui sufficiens erat viaticum : secunda , quia Superior Patrum sancti Francisci Hierosolymis fugerat propter iniquam Gubernatoris vexationem , qui magnam pecuniæ copiam tyrannicè exigebat ; vnde non multum secuta Hierosolymorum peregrinatio mihi videbatur , quod paulo post euentus magis declarauit ; nam Vicarius eorundem Patrum fustibus acerrimè plexus est : tertia tandem, quia tempus deesse videbatur ; nauis enim in dies discessura credebatur , licèt postea discessum distulerit.

In principio igitur Nouembris, ad sanctam Nazareth ciuitatem viginti tantum milliaribus Ptolemaïda distantem pergo; in media pene via est planities satis amœna, vbi magnus est puluis, in ea aliquæ visuntur ruinæ quæ Cana Galileæ esse dicuntur, vbi Christus Dominus aquam in vinum conuertisse dicitur. Paulò vterius sita inter colles conspicitur Sefori patria sanctæ Annæ, vt traditur, adhuc habitata: Tandem superato monte ciuitas Nazareth occurrit, nunc penè destructa. Inter ipsos Mahometanos hostiles vrgent discordiæ; quidam enim, vt Nazareni dicuntur vexilli candidi; alij verò vexilli rubri: hi perpetuas inter se fouent inimicitias. Nuper contigit, vt sectatores vexilli rubri simul conuenerint, & in destructionem ciuitatis Nazareth irruerint; noctu ciuitatem adoriuntur, eam diripiunt, funditusque euertunt; ipsum etiam Patrum sancti Francisci Conuentum in eodem loco, vbi domus Lauretana Beatissimæ Virginis erat ædificatum demoliantur.

Ciuitas Nazareth est in decliui montis non adeo excelsi, à summo eius cacumine ad radices vsque pertingit, orientem respicit Solem: huic monti à parte Septentrionali alius adhæret eiusdem altitudinis, qui alium similem ab ortu ciuitati oppositum attingit; media inter hos montes perexigua vallis extat; solum in longitudinem versùs Austrum ad vnum milliare, sensim strictior procurrit, mons enim Nazareth, aliúsque oppositus ex æquo ad Austrum procurrentes sensim mutuò sibi appropinquant, ac in fine vix angustam tendentibus Hierusalem præbent viam: quæ inter illas montium angustias descendens ad magnum campum Esdrelon pettingit. In illa extremitate montis Nazareni est locus; vnde Iudæi Christum precipitare voluerunt: non longè in eodem monte est ædícula, eo in loco ædificata, vbi traditur Beatissimam Virginem cordis deliquium passam, dum properaret post Iudæos sacratissimum

inum suum filium ducentes ad præcipitium.

In extrema Ciuitatis parte est Conuentus Patrum sancti Francisci in eodem loco ædificatus, vbi olim domus Lauretana Beatissimæ Virginis exstabat : appa-
rent ibi ruinæ insignis Ecclesiæ, quam sancta Helena Imperatrix ædificauerat ; in omnibus quippe locis, in quibus erat aliqua Christi Domini memoria, pulchras Ecclesias ad maiorem eorum deuotionem construxit. Conuentus nunc est destructus, decem prius continebat cellulas, & officinas Conuentui proportionatas; hortulum habet, & Ecclesiam sed combustam, eiusdem magnitudinis, ac est domus Lauretana, quæ in ipsomet loco, fuisse dicitur. Subtus Ecclesiam est locus subterraneus, Ecclesiæ in dimensione correspondens ; muri eius vt plurimum non sunt lapidei, sed in natiuo excuati solo : hîc creditur ab aliquibus celebratum sacrosanctum Incarnationis mysterium, quod & ab eis traditione, & ratione confirmatur ; ibi quippe in extremitate Septentrionali loci sunt duæ columnæ marmoreæ circiter quinque palmos crassæ, & duodecim altæ : vna in loco vbi sanctissima Virgo orabat, quando Angelus ad eam salutandam ingressus est : alia verò ad Occidentalem illius prioris partem, in loco vbi Archangelus sanctus Gabriel stabat, cùm Sanctissimam Virginem salutauit : hæ duæ columnæ vix tribus palmis distant. Hîc collocatæ & erectæ traduntur à sancta Helena ad perpetuam huius sacrosancti mysterij venerationem : sed quòd ibi, mirabile dictu, videtur ; est quòd illa columna quæ est in loco Beatissimæ Virginis à Turcis fracta est in inferiori parte, credentibus infra eam esse aliquem Thesaurum, ex eo quòd Christiani eam tanta veneratione colebant : sic verò fracta distat à solo quinque palmis, parieti non adhæret, superiorem tantum loci partem attingit : vnde miraculosè in aëre creditur subsistere. De illa etiam traditur, quòd peregrinus

nus volens deuotionis causâ tantillùm assumere , viderit Angelum , qui increpans dixit ei , vide ne sub pre-textu deuotionis , & Filium , & Matrem offendas .

Hic locus creditur esse maximum totius orbis sanctuarium ; & meritò , cùm maximum ibi mysterium , videlicet Dominicæ Incarnationis celebratum sit. In eo tria sunt altaria , duo in extremitate Australi prædictis columnis opposita ; primum est Annunciationis correspondens primæ columnæ ; secundū est sancti Ioseph correspondens secundæ ; in parte Occidentali loci est paruum altare sanctæ Annæ dicatum : in angulo occidentali est ianua , qua per aliquot gradus ascenditur ad hortum , ibique est fenestra qua locus aliquantulùm illustratur : in parte verò Orientali est porta qua per gradus obscuros ascenditur in Conuentum.

Nullus , nisi solutis calceis , locum illum ingreditur : si enim Moyse ad rubum ardentem , sed incombustum accedenti dictum est , *Solue calceamenta pedum tuorum ; locus enim in quo stas , terra sancta est* ; quantò potiori iure idem iubetur Christianis ad hunc locum accedentibus , qui est totius orbis sanctissimus. Ibi peculiari priuilegio celebratur quotidie missa de Annuntiatione ; in Euangelio autem dicitur sic , *Missus est Gabriël Angelus à Deo in hanc ciuitatem Galilee , cui nomen Nazareth* : in fine verò dicitur , *Et Verbum Caro hic factum est* : Bis in hoc loco sacrosanctum Missæ sacrificium celebraui , ibique votum pro parentibus solui ; cùm enim paruulus essem , & ad vltimum vitæ periculum peruenissem , votum emisserunt me in sacram Lauretanam ædem fore ab eis mittendum ; si ex illo euaderem periculo ; illis referentibus accepi , me miraculosè statim conualuisse , ac penè à mortuis surrexisse : meo in Religione ingressu suo soluti sunt voto ; quod tamen ibi reddidi. Vnde sacra domus Lauretana ab Angelis (eo tempore quo nostri Religiosi , qui huius domus curam habe

habebant à Barbaris trucidari sunt) in Europam tam insigni miraculo fuit translata : ibi quotidie celebratur processio , ac in singulis altaribus singulæ fiunt itationes ; vbi anthiphonæ, versiculi , & orationes iuxta loci exigentiam decantantur.

Non tamen ex dictis sacræ ædis Lauretanæ honor & reuerentia diminuitur : nam licet in hoc loco iam delineato ineffabile ac sacrosanctum Incarnationis mysterium celebratum esse dicatur (traditur enim Beatissimam Virginem in illo loco tanquam secretiori , vt in Oratorio solitam orasse :) tamen tota domus hoc mysterio sanctificata, ac dedicata fuit ; maximè cum Christus Dominus , eiúsque sanctissima Parens , sancti Ioseph, Ioachim , & Anna hanc domum Lauretanam incoluerint, millies eius muros tetigerint : Erat enim locus habitationis ipsorum ; vt ex ipso camipo , aliisque apparet : quæ circa hæc dicta sunt non mea auctoritate fulcio ; sed solum refero , quæ traditione , ac relatione aliorum percepi.

Prope ciuitatem Nazareth in summitate montis, est locus vbi videtur mensa lapidea fonti proxima , vbi Christus Dominus cum suis Apostolis sæpè comedisse dicitur ; credibile quippe est , quòd sæpè ad domum suæ Sanctissimæ Matris , post officium prædicationis itinere fessus accesserit : in infima verò ciuitatis parte est fons pulcherrimus , ex alto decidens in locum excavatum , murisque adinstar templi circumdatum ; in eum traditur Beatissimam Virginem ad hauriendam aquam quotidie accessisse , hæc sunt , quæ in Nazareth notatu digna videntur.

Iam obscura nocte Nazareth perueni , ad Conuentum Patrum sancti Francisci diueri : inter ipsos enim & nostros Patres in Carmelo commorantes maxima intercedit amicitia; cum priùs soli in terra sancta habitarent, nunc nostros Patres in Carmelo admissos, habet so-

cios tam sanctæ possessionis: statim collatio proponitur panis & oliuarum, quæ ex horro Gethsemani fuerant asportatæ. Die sequenti celebrata missa, & pluuia cessante, assumpto mecum vno Maronita, qui hæc omnia loca nouerat, ac Romæ studuerat, Benjamin nomine, ad sacrum montem Thabor, ad Orientem Nazareth duabus leucis distantem proficiscor: superatis collibus, vallibusque plurimis ad eius radices peruenio: ibi in parte occidentali est oppidulum nomine Debora, à nobili & generosa illa muliere denominatum, quæ ibi Madianitas referente scriptura superauit: ibi proxima est Ecclesia non magna ex lapide quadro constructa, in eo loco in quo Christus Dominus nouem reliquit Apostolos, dum in sanctum montem Thabor, assumpris secum Petro, Ioanne, & Iacobo conscendit, ut eis suæ Transfigurationis gloriam manifestaret.

Sanctum montem conscendimus, qui in celsitudine ad duo milliaria pertingit: tempus erat nubilosum, & ideo ascensus laborem suauius tolerauimus; quamuis difficillimus & rapidissimus sit: mons iste quamuis ab Occidente alios habeat proximos; tamen ab omnibus separatus existit; est in circuitu rotundus, inferius latior, superius strictior: in summitate planitiem habet, ubi olim ciuitas; vel, ut alij volunt, amplissimum erat monasterium: pars murorum & fossæ adhuc extant: est etiam pons, quo supra fossam collocato, ad ciuitatem, vel monasterium patebat aditus: ubi supra versùs Orientem pars adhuc videtur exiniij templi, à sancta Helena, ut dicitur, ædificati: huic proximè adhæret locus Transfigurationis ruinis penè sepultus: aliquantulum enim descenditur, & ad exiguum cubiculum subterraneum peruenitur. Interius est aliud vix quatuor passus longum & latum, ubi tres perexigui sunt arcus ad instar capellæ, ibi celebratum traditur sacre Transfigurationis mysterium: ibi accenso igne aliquandiu orauimus:

postea

postea exeuntes prope cisternam loco adhærentem sistimus, ibique panem & cepam comedimus, ac cisternæ aquam bibentes à labore ascensus recreamur.

Postea totum montem lustramus, omnino viridem, arboribus plenum, & amœnissimum: ibi inter illas quercus glandiferas multi pascuntur Apri. Ad partem occidentalem illius planitiei exiguam vidimus aliam Ecclesiam, in qua licet penè destructa Græci Nazareth incolæ in die Transfigurationis quotannis celebrant; subtilissimum ipsi supra aërem sentiebamus, & vnde-que respicientes mira perfundebarur iucunditate, maiorem terræ sanctæ partem inde prospicientes.

Ab ortu longè diffiti apparent Arabiæ montes, apparet & mare Galileæ, quod Christus Dominus toties cum suis Apostolis traiecisse dicitur, ipsi mari & ventis aliquandò, ne sæuissent, imperando: lacus propriè est; nam aquæ dulcissimæ sunt, illud pertransit Iordanis, à Septentrione in Austrum procurtens: à monte Thabor Iordanis duplici in loco percipitur; qui in mare mortuum definit. Mare istud, non quidem inde videtur, propter aliquos interpositos montes, quamuis appareat crassissimus ille aër huic incubans mari. Circa illud nascuntur fructus exterius pulcherrimi ac sani, interius verò cinere ac corruptione pleni, aliquos præ manibus habui, & hoc Dominus in horrorem ac vituperium Sodomitarum permisit. Ad radices Tabor versùs orientem incipit planitiès, non multùm tamen æqualis, quæ per duas circiter diffusa leucas ad mare Galileæ pertingit: ibi Tiberiadis ciuitatis, ex qua etiam hoc mare denominatur, ruinæ adhuc comparent. In media illa planitie factum traditur illud insigne miraculum, quos Christus Dominus tot millia hominum paucis panibus cum tanto illorum stupore refecit.

Ab occasu, soli comparent montes, præcipuè noster Carmelus iam supra descriptus, qui inde altissimus ac
longè

longè diffusus videtur ; apparent & viciniore montes ciuitatis Nazareth , aliique ad Septemtrionem longè latèque procurentes : nulla ex hac parte ciuitas, nullum etiam cernitur oppidum, excepto illo perexiguo nomine Debora , ad eius radices immediatè collocato.

A Septemtrione , remotissimi conspiciuntur montes Damasci , paulò viciniore Betulix montes , vbi generosa ac sancta illa Iudith , occiso Holopherne Assyriorum exercitum prostrauit : in aliis montibus sita videtur antiqua ciuitas Sephath , cuius memoria in libris Tobix habetur : & quæ maximæ apud Iudæos est venerationis ; quapropter multi illam inhabitant magna tamen inter illos & Tabor inæqualis excurrit planities ; in cuius medio est collis oliui confitus , vbi Christus Dominus Beatitudines suis traditur discipulis prædicasse.

Ab Austro denique multò plura conspiciuntur. Nam primò socius Taboris mons Hermon vix tribus distans milliaribus adstat ; de quibus dicit Propheta, *Tabor & Hermon in nomine tuo exultabunt tuum brachium cum potentia.* Mons Hermon non est altior ; sed multò latior monte Tabor : in summitate habet templum à Mahometanis extructum : ad eius radices septemtrionales sunt ruinae ciuitatis Endor , vbi Madianitæ debellati perièrè , de quibus ait scriptura , *Disperierunt in Endor , facti sunt vt stercus terra* ; ad radices autem Occidentales est ciuitas Naïm , in qua Christus Dominus Iuuenem illum viduæ filium à mortuis suscitauit ; adhuc habitatur & vocatur Nem : à longè conspiciuntur montes Ephraïm , ac montes Samariæ , vastissimæque patet planities Genim , sic dicta à ciuitate Genim , quæ in eius extremitate prope mōtes Ephraïm sita est (olim vocabatur campus magnus Esdrelon) longè latèque mira æqualitate discurrens : ibi multa olim facta sunt prælia ; illam præterfluens irrigat torrens Cisson , non multis , nisi dum pluit auctus aquis : hic tandem

tandem inter Tabor & Hermon percurrrens ad mare Galileæ præcipitatur : limites huius campi ab Oriente est Hermon ac alij montes successiui : ab Occidente noster Carmelus ac mare Mediterraneum : ab Austro montes Ephraim : à Septentrione mons Tabor , & montes Nazareth.

Postquam hæc omnia mira animi iucunditate diutius contemplati fuimus , è Tabor descendimus, eadem via Nazareth redimus , & sequenti die Missa celebrata de Beatissima Virgine , Ptolemaidam proficiscor. Iam ab aliquot diebus Principis Tarabei nuncium ad nos venerat , quo Patres nostros inuitabat, vt iterum Carmelum peteremus : assererat enim suos status sibi esse redditos , ac omnia in eis quæta & secura. Hoc accepto nuncio ad dictum Principem , in oppido Tir ad radices Carmeli , tunc commorantem proficiscimur , eique ducentorum scutorum tributum annuum soluimus: nos multis amicitie signis excepit , ad cœnam inuitauit , & vt citò ad Carmelum rediremus , inuitans dimisit. Tunc Carmelum conscendimus totum penè lustramus ibique omnia in eius descriptione relata , cum magna animi teneritudine, cõtemplamur. Deinde Ptolemaidâ recedimus meæ nauigationi necessaria paraturi.

C A P V T X.

De meo reditu in Galliam.

DIe sanctæ Cæcilie circa meridiem è portu Ptolemaidis soluimus , prosperisque flantibus auris à Syriæ littoribus recedentes , in altum ferimur. Libanum iam niuibz plenum , totumque candidum recedendo videmus : fœlici nauigatione ad Cretam vsque Insulam percurrimus : sed illa transacta ; prospero quidem , sed nimio flante vento ingens excitatur tempestas , intumescit mare , frequentes ac tumidæ decur-

rentes

rentes vndæ montes excelsi apparent, nauem impetunt, ex vna in aliam transiliunt partem ; tantâque fit maris inæqualitas , vt nauis in vtramque partem successiuis motibus inclinetur : tormenta bellica firmiter alligantur , ne nauis commotione huc illuc discurrant, nauem ipsam confringant , aut euertant : timetur , ne nimia concussione, aut vndarû percussione nauis dissoluatur, aut ne nimia maris inæqualitate ; hinc prægrandi vnda veniente ac instat montis ingruente ; illinc verò recedentibus aquis & adinstat vallis depressis , euertatur. Tunc erat secunda Decembris ac Dominica prima Aduentus , tota die ieiunantes Aduentum incipimus : sub vesperam tantillùm ventus decrescit , ac mare quiescit, secundo tamen perseverante vento quarta eiusdem mensis die ad insulam Melitam peruenimus.

Cùm mihi Romam esset eundum , decreueram in insula longam terminare nauigationem ; sed portum ingredi non licuit . cùm enim nautæ à prætereunte nauicula didicissent aliquam esse in insula tritici penuriam , timentes ne nauis tritico plena per vim ibi detineretur ; cùm tamen in Hispaniam maioris spe lucri dirigeretur , portum appellere noluerunt. Nocte sequenti circa Insulam nauigamus ; primò verò diluculo Anglica nauis occurrit ; quæ dum Piratarum esse creditur , magnum priùs incutit timorem, sed agnita postmodùm lætitiâ auget : Alexandria veniebat , Liburnum tendebat , aqua & alimentis carebat : hæc omnia illi subministrantur , alternatis se nautæ conuiujs excipiunt , & ita læti personantibus Anglorum tubis , ac sæpè vtrinque tormentis bellicis explosis Siciliam prætereuntès procedimus.

Quanta potui diligentia cum duce nauis Anglicæ egi , vt me in suam admitteret nauim , vt ita Liburni mare relinquens , Romam profisceretur ; promissit in principio , sed re meliùs inspecta negauit, dicens

se iam per mensem cum dimidio ab Alexandria portu soluisse ; ac ita quadragesimam sanitatis expleuisse ; nos verò solùm à quindecim diebus nauigare ; quòd si nos reciperet, ob nostrum consortium de nouo quadragesimam facere teneretur , quod sine maximis expensis facere non poterat ; percepto hoc plusquam iusto responso Hispanicam coactus profectionem amplector.

Apparentibus Sardinia montibus , Anglos relinquitur , ac fretum Sardiniam & Corsicam diuidens traiecit , prosperoque ac vehementi flante vento , breui Maioricam attingimus , periculosum prætergressi fretum , quòd Lugduni nominatur ; Hispanica circumlegentes littora , in vigilia sancti Thomæ Apostoli Alicantum nauigationis terminum peruenimus.

Iam mari, eiusque tempestatibus vale dicto, iter terrestre eligo , ac Valentiam profiscor ; vigesima tertia Decembris Chichonam venio , vigesima quarta oppidum dictum *El Baide* , vbi apud Patres Dominicanos triplici missa die Natiuitatis Domini celebrata , vltra progredior , planitiem vastam percurrans ad fluuiolum peruenio, in cuius ripa aliquantulum panis Damasci ac Ægypti, quem mecum detuleram , caseum Cypri, ac fructus Ptolemaidis comedens , ac eius aquam bibens requieui : sub vesperam urbem Xatiuam perueni : inde die sancti Ioannis discedens, vastissimamque illam planitiem oppidis plenam superans , die sequenti nobilissimam Ciuitatem Valentiam attingo.

Xatiuæ apud nostros Patres Carmelitas calceatos diuerto , in quorum Ecclesia miraculosus asseruatur Crucifixus , qui locutus fuisse traditur : historia verò sic refertur. Quidam Nobilis illius Ciuitatis , dum Perpinianum profiscens transit Barcinone , conuenit quendam lignarium artificem , vt ei Crucifixum efformaret : iustum pro eo soluit pretium , post eius discessum hic artifex efformatum iam Crucifixum alteri vendit :

dit : quod Dominus indignè ferens , conuersa facie increpans artificem, ait : *Me Iudas proditor semel tantum vendidisti, tu autem bis me vendis.* Hunc ergo Crucifixum magno decore conseruatum, ac conuerso capite adhuc perseuerantem adoraui : Valentiaè verò plures reliquias, maximè in Collegio, quod vocant Patriarcha,

Valentiaè apud nostros Discalceatos per quindecim dies immoror, quibus elapsis discedens, sub finem mensis Ianuarij Cæsaraugustam curiam olim Aragoniaè peruenio , ibi per octo dies mansi : Reliquias sanctaè Engretiaè , sicut & antiquissimam Beatissimæ Virginis del Pilar Ecclesiam à sancto Iacobo Apostolo , vt tradunt , ædificatam visitaui. Cæsaraugusta discedens Hoscam ciuitatem sanctorum Laurentij & Vincentij martyrum patriam ad radices Piræneorum montium sitam venio : deinde montes niue plenos ingrediens, ac spatio septemdecim leucarum percurrrens ; superato, quem Salieni vocant, portu desideratam Galliaè terram sexta mensis Februarij aspicio, ac magno propter niues labore tandem peruenio.

In hoc montium Piræneorum traiectu multi labores, & multa occurrerunt pericula : nam præ continua glacie pedes incedere , vt plurimùm coactus sum : cùm verò defessus itinere equitabam, in perpetuo casus periculo versabar ; imò & bis cum equo cecidi , semel in planum , semel in præcipitium. Cùm autem ad montium cacumen medium inter Galliam & Hispaniam peruenissem cum sociis flantem ventum timuimus , ne ipso nix eleuata caderet , & cadendo agglomerata nos obrueret, quod non rarò illis in locis contingit. Dum à summo deorsum esset nobis procedendum, per dimidiam circiter leucam, præruptam & angustam ingredimur semitam; vix capiendis aptam vestigiis : cùmque facilis esset lapsus , pedes fibulis munimus , vt euidens mortis periculum vitaremus ; quod ex narratione

socio

fociorum magis extimui , dum ab ipsis audiui , quemdam ex eorum comitatu paucis retro diebus in hæc præcipitia lapsum nunquam comparuisse; superato mōte, in profundis vallibus vsque ad pagulum dictū Cabas, penè niuib. immersis per aliquot milliaria iter egimus.

Dum ex ciuitate Osca discedens iter meum prosequor , curæ cuiusdam honesti viri committor , ne aliquod in desertis illis locis periculum incurrerem. Contigit vt in quodam oppido esset miles Hispanus, qui in Lusitania diu vixerat : hic cū me Hispanica 'quidem lingua , sed accentu Lusitano loquentem audisset ; me Lusitanum esse credidit , ipsique iudici , apud quem hospitabamur , me vt talem denuntiavit , subiungens me in Galliam pergere , vt reuolutionis Lusitanorum, quæ tunc de nouo acciderat , nuntium ferrem : quibus potui rationibus illum ab hac opinione dimouere conatus sum; nam & patentes religionis & fidem authenticam Alicanti acceptam exhibere promisi; sed ipse hæc omnia adulterata iactabat : vnde plurimū sudabam timens , si non periculum , saltem detentionem. Tandem vir ille honestus , cuius curæ à Patribus nostris Oscæ commissus fueram , meam causam defendens Patrum nostrorum testimonio & commissione me ex his liberauit angustiis.

Hic finio , lector , relictis pluribus aliis minoris momenti , quæ possent adduci , immensas Deo gratias referens , qui me ex tot tantisque maris ac terræ periculis , in tam longa peregrinatione liberauit : Ipsi, eiusque Sanctissimæ Marri Virgini Maria sit honor , & gloria per totam æternitatem.

F I N I S.







